

g 02190

J. W. Aug^r. 1861



Thomas Swanwick. M.D.

12129/B



Digitized by the Internet Archive
in 2017 with funding from
Wellcome Library

<https://archive.org/details/b29321463>

P R A X I S M E D I C A

S Y S T E M A T I C E E X P O S I T A

S E L E C T I S

D I A R I I N O S O C O M I I F R E D E R I C I A N I

I L L U S T R A T A .

A U C T O R E

F R E D E R I C O L U D O V I C O B A N G M . D .

S. R. M. A CONSILIIS STATUS, MEDICINAE PROFESSORE ORDINARIO IN UNI-
VERSITATE HAFNIENSI, EQVITE ORDINIS DANNEBROGICI &c. &c.

E D I T I O S E C U N D A A U C T A E T E M E N D A T A .

H A F N I A E .

T Y P I S S C H U L T Z I A N I S .

M D C C C X V I I I .



P R A E F A T I O
AD PRIMAM EDITIONEM.

In omnibus artibus & scientiis practicis duplex solummodò datur via cognitionem & habitum acqvirendi, instructio nempe & exercitium. In artibus inferioribus, ubi cognoscendæ veritates paucæ sunt, has inter agendum addiscere licet & sufficit. Verum in superioribus scientiis practicis, quæ ampliorem veritatum numerum complectuntur, aliud requiritur institutionis genus, non modò occasione exercitiî porrigendum, sed quod pleniore methodo veritates colligit, ritoque nexu exponit. Inter posteriores meritò ponenda est medicina practica, ad quam pertinens instructio præsentis operis contentum sistit.

Quatuor præsertim sunt qualitates, quibus hoc doctrinæ opus, ut scopo respondeat, adornare studui; scilicet: justus ordo, plena expositio, adæqvata brevitæ, & sufficiens probatio.

Morborum, qui describendi sunt, & veritatum, quas de singulis cognoscere oportet, insignis est copia, ad quam docendam æque ac discendam exactissimus requiritur ordo dissimilia rite discernens, & distinctis locis proponens, similia conjungens, generalia specialibus præmittens, & cuicunque materiæ prædicata, quæ illi competunt, annectens; classificationis ordo ab hodiernis medicis præsertim illustri Sauvage receptus meritò antiquiori methodo præferendus est; similem igitur docendi viam sed magis limitatam in præsentì tractatu inivi, atque tot tantummodo divisiones morborum, quot diversa medendi ratio desiderat, condere studui; specierum verò immensum numerum e causis deductum, singulari medicatione non indigentum, quique inutilem prolixitatem & taedio plenam repetitionem creat, vitavi. Verum non tantum in disponendis morbis, sed quoque in proponendis veritatibus ad singulos morbos pertinentibus tam exquisito ordine usus fui, adeo ut doctrinæ partes de quolibet morbo cognoscendæ simili modo distinctæ & sub simili titulo traditæ sint, oculisque igitur discentium & legentium mox & quasi sponte sese offerant.

Alterum ad docendum medicinam practicam requisitum habui plenam expositionem, nil

omittentem eorum, quæ scopo hujus instructionis scilicet ad cognoscendos, dijudicandos & curandos morbos scire oportet. Practicorum scripta rarò administrandam medelam adeo determinatam sistunt, ut discipulis pro certa agendi regula inservire possit; non sufficit, medendi genus scilicet indicationes & illis congrua auxilia, atque medicamina referre, verum etiam cujuslibet remedii in morbo utilis dosim, formam, combinationem cum aliis medicamentis, opportunum tempus & continuandum usum definire opus est; junioribus præsertim medicis, qui semet ipsos proprio Marte ducere nec audent, nec possunt necessaria est talis completa eruditio, & ut negotium rite perficiant, & ut sese recte agere persuasi sint. Hanc igitur instructionis partem, ut tyronum ingenio magis, quam antea factum est, accommodatam sisterem, annisus sum.

Adæquata brevitatis præsentis operis tertia fuit regula; scopo instructionis, quem semper coram oculis habui, convenientes veritates tradere contentus fui; hypotheses, ratiocinia, aliorum sententias, & consilia, quæ absque emolumento chartas implere judicavi, studiose omisi, sciendorum enim, quæ utilia sunt, sat ampla est copia & memorie difficile opus, longio-

res ambages confundunt & attentionem a veritatibus essentialibus avertunt. Maxime autem breviter instruendis adeò commodam procurare studui tam per justum ordinem, quo veritates convenientissimo ad docendum loco adeo ut repetitio haud requisita fuerit, disposita sunt, quam per distinctam tradendorum ideam, quæ paucis verbis ad sufficientem expressionem opus habet.

Tandem mihi curæ cordique fuit, ut asserta convincendi vim haberent; exhibita enim doctrina tanquam vera æstimata altius menti inprimitur & firmior evadit regula dubitationi per dissensum aliorum medicorum citatæ, & tyronibus saltem valde noxiæ minus subjecta; hanc ob causam principia instructionis per casus morborum individuales e diario nosocomii Fredericiani citatos demonstrare, & illustrare consultum duxi. Nec leve certitudinis argumentum fore spero, quod præsens praxeos systema superstructum sit experientiæ quindecim annorum, atque deductum e viginti mille saltem ægrotorum casibus, quorum cura præsertim in nosocomio, partimque inter alios cives mihi commissa fuit, adeo ut nil nisi sæpius expertum, nil mera aliorum autoritate innixum tradiderim.

Præfens institutionis opus imprimis dictum esse volo illis, qui praxin medicam in nosocomio nostro me ducente addiscere cupiunt, ut veritates, doctrinaeque partes, quæ sub clinicis exercitiis sparsim, incomplete, & absque nexu cognoscuntur, systematico modo collecta, illustrata, demonstrataque haberi, ponderari & pro lubitu repeti possint. Verum quoque ampliori usui, & ut aliis medicinae extra nosocomium nostrum studentibus inserviret, illud accommodavi, quid! quod! si exercitatiores idem evolvere haud dedignentur, operam non perendam esse sperare audeo.

Junioribus autem medicis monitum maximi momenti huc trahere conducit, quod nimirum sibi unicum sive præfens sive aliud instructionis medicæ systema pro norma incipientis praxeos eligant, & præceptis ibidem exhibitis certa cum fiducia obediant; plura enim practicorum scripta legendo, eorumque disensus & varias medendi rationes discendo haud aliud reportant laboris præmium, quam quod de iis, quæ apud ægrotos judicare & agere oportet, dubii, imò ad præscriptionem determinandam haud idonei reddantur. Peritiores dein facti imperfectiones & defectus traditæ cognitionis dijudicare valent, illamque tunc aliorum medicorum scripta

investigando corrigere & perficere, qvalia supplementa in chartis vacuis systemati adoptato annexis notare expedit; si hæc medicinae practicæ studendi regula mihi ipsi perspecta fuisset, ab inutili & molesto labore, quam in excerpendis permultis libris practicis, præmature suscepi nec debito modo instituere intellexi, liberatus fuisssem.

Quamvis triplice vice systematis hujus elaborationem renovaverim, meis tamen viribus haud adeo confido, ut illud in omnibus partibus completum, perfectumque æstimarem; verum obvios defectus, ut ignoscant, non minus spero, quam ut profectus, qvalescumque sint, benevolo animo excipiant æqui, ipsique periti judices, artis nostræ exercendæ magnam, rite autem describendæ maximam difficultatem cognoscentes.

P R A E F A T I O
AD SECUNDAM EDITIONEM.

*T*riginta elapsi sunt anni a tempore, quo doctrinam hanc medicam prima vice in lucem protuli, interea satis extensam praxin feci, cum vero dies diem doceat et experientia praesertim jam expertum, discere cupientem et in observando exercitatum instruere non desinat, mihi larga data fuit occasio videndi non pauca, quæ ad doctrinam antea stabilitam augendam et corrigendam inserviunt; talia tempore, quo occurrerunt, literis mandavi aptisque locis adnotavi, non tamen antequam repetito et, quantum potis est, non fallaci experimento mihi certa veraque reddita fuerint. Hæc servare merito consultum duxi non modo in proprium usum, sed etiam ut publici juris facta aliis medicis eorumque ægrotis utilia forent. Medicamenta nova ab aliis inventa et commendata nec fide prorsus indigna, cautis experimentis subjeci, sed modo in casibus, quos antiqua probata juvare non

valuerunt aut valent, horumque effectum observatum indicavi, illa tamen pauca fuere et minoris numeri a me ipso detecta. (Attamen hoc loco non possum non memorare unguentum, quod inter formulas sub nomine unguenti sinapini exposui; hoc seriori tempore loco emplastri e cantharidibus semper adhibui multoque magis commendabile habeo, et quia citiorem effectum intra tres quatuorve horas exserit et quia, minoris pretii, ubique ad manum esse potest). Ars præsertim medica lente procedit in novis inventendis instrumentis, horumque licet jam cognitorum perfectior redditus usus vix minus præstat novis.

Ordinem doctrinæ non mutavi, quia sufficientem mutandi rationem non vidi, nec theorias novas priscis substitui, et quia hac illis non certiores judicavi, et quia antiquas superstruendi praxi sat commodas inveni; ceteroquin aut vanitatis aut lucri librarii causa multas implere paginas infra dignitatem probi viri habui, sufficit mihi utilem esse, nec aliud ab illis, qui me sequuntur, timeo iudicium.

TABULA MORBORUM.

	Pag.
Glasfis Prima. Pyrexiaë	8
Ordo 1 ^{mus} . Febris	-
Genus 1 ^{um} . Febris intermittens	33
Genus 2 ^{dum} . Febris continua simplex	54
Genus 3 ^{tium} . Febris catharralis	56
Genus 4 ^{tum} . Febris putrida	60
Genus 5 ^{tum} . Febris exanthematica	97
Species 1 ^{ma} . Febris variolosa	-
Species 2 ^{da} . Febris morbillosa	119
Species 3 ^{tia} . Febris scarlatina	122
Exanthemata alia	129
Genus 6 ^{tum} . Febris Puerperalis	131
Species 1 ^{ma} . Febris lactea	-
Species 2 ^{da} . Febris puerperalis maligna	133
Ordo 2 ^{dus} . Phlegmasia s. Inflammatio	147
Genus 1 ^{um} . Inflammatio	164
Species 1 ^{ma} . Phrenitis	-
Species 2 ^{da} . Otitis	168
Genus 2 ^{dum} . Angina	169
Genus 3 ^{tium} . Inflammatio pectoris	175
Species 1 ^{ma} . Pneumonia	-
Species 2 ^{da} . Carditis	188
Species 3 ^{tia} . Paraphrenitis	-
Genus 4 ^{tum} . Inflammatio abdominis	189
Species 1 ^{ma} . Hepatitis	-
Species 2 ^{da} . Gastritis	194
Species 3 ^{tia} . Enteritis	197
Species 4 ^{ta} . Nephritis	203
Species 5 ^{ta} . Cystitis	207
Species 6 ^{ta} . Metritis	208
Genus 5 ^{tum} . Febris rheumatica	210

	Pag.
Clasis secunda. Dolores non febriles	217
Ordo 1 ^{mus} . Dolores universales s. arthritis	221
Genus 1 ^{um} . Arthritis regularis	-
Species 1 ^{ma} . Podagra	241
Species 2 ^{da} . Ischias	246
Genus 2 ^{dum} . Arthritis anomala	250
Ordo 2 ^{dus} . Dolores particulares	259
Genus 1 ^{um} . Dolores capitis	260
Species 1 ^{ma} . Cephalalgia	-
Species 2 ^{da} . Ophthalmia	263
Species 3 ^{ta} . Otalgia	266
Species 4 ^{ta} . Odontalgia	267
Genus 2 ^{dum} . Dolores colli & pectoris	269
Species 1 ^{ma} . Dysphagia	-
Species 2 ^{da} . Pleurodyne	273
Genus 3 ^{tium} . Dolores gastrici	274
Species 1 ^{ma} . Pyrosis	-
Species 2 ^{da} . Cardialgia	276
Species 3 ^{ta} . Gastrodynia	278
Species 4 ^{ta} . Dyspepsia	-
Genus 4 ^{tum} . Dolores colici	284
Species 1 ^{ma} . Colica indigestionis	-
Species 2 ^{da} . Colica ex refrigerio	285
Species 3 ^{ta} . Colica pancreatica	286
Species 4 ^{ta} . Colica stercorea	-
Species 5 ^{ta} . Colica hysterica	287
Species 6 ^{ta} . Colica pictorum	288
Species 7 ^{ma} . Colica verminosa	292
Species 8 ^{va} . Colica infantilis	293
Species 9 ^{na} . Colica symptomatica	299
Genus 5 ^{tum} . Hepatalgia	-
Species 1 ^{ma} . Hepatalgia infarctus	-
Species 2 ^{da} . Hepatalgia steatomatosa	306
Species 3 ^{ta} . Hepatalgia calculosa	307
Species 4 ^{ta} . Hepatalgia cancerosa	-
Genus 6 ^{tum} . Splenalgia	308

	Pag.
Species 1 ^{ma} . Splenalgia febrifequa . . .	308
Species 2 ^{da} . Splenalgia spasmodica . . .	-
Species 3 ^{tia} . Splenalgia spuria . . .	309
Genus 7 ^{mum} . Lithiasis	310
Species 1 ^{ma} . Lithiasis renalis	-
Species 2 ^{da} . Lithiasis cystica.	316
Genus 8 ^{vum} . Hyfteralgia	319
Species 1 ^{ma} . Hyfteralgia menstrualis . . .	-
Species 2 ^{da} . Hyfteralgia lochialis . . .	320
Species 3 ^{tia} . Hyfteralgia scirrhusa s. cancrofa -	
Species 4 ^{ta} . Hyfteralgia ex laxitate . . .	322
Species 5 ^{ta} . Hyfteralgia ex prolapsu . . .	323
Genus 9 ^{rum} . Proctalgia	324

Classis tertia. Neuroses 325

Ordo 1 ^{mus} . Adynamiæ	-
Genus 1 ^{mum} . Vertigo	326
Species 1 ^{ma} . Vertigo plethorica . . .	327
Species 2 ^{da} . Vertigo nervosa . . .	328
Species 3 ^{tia} . Vertigo stomachica . . .	330
Species 4 ^{ta} . Vertigo ex acrimoniis . . .	-
Species 5 ^{ta} . Vertigo symptomtica . . .	331
Genus 2 ^{dum} . Lipothymia	-
Species 2 ^{ma} . Syncope	332
Species 2 ^{da} . Asphyxia	334
Genus 3 ^{tium} . Apoplexia	336
Genus 4 ^{tum} . Paralysis	345
Genus 5 ^{tum} . Coma	351
Genus 6 ^{tum} . Asthma	353
Species 1 ^{ma} . Asthma pulmonale . . .	355
Species 2 ^{da} . Asthma pectorale . . .	356
Species 3 ^{tia} . Asthma abdominale . . .	-
Species 4 ^{ta} . Asthma humorale . . .	357
Species 5 ^{ta} . Asthma convulsivum . . .	358
Ordo 2 ^{dus} . Spasmi	365
Genus 1 ^{mum} . Tetanus	-
Genus 2 ^{dum} . Convulsio	369

	Pag.
Genus 3 ^{tium} . Epilepsia	373
Genus 4 ^{tum} . Hysteria	382
Genus 5 ^{tum} . Tussis	-
Species 1 ^{ma} . Tussis catharralis	391
Species 2 ^{da} . Tussis pituitosa	394
Species 3 ^{tia} . Tussis stomachalis	396
Species 4 ^{ta} . Tussis convulsiva	397
Species 5 ^{ta} . Tussis symptomatica	402
Ordo 3 ^{tus} . Paranoia s Infania	403
Genus 1 ^{um} . Melancholia	-
Genus 2 ^{dum} . Mania	409
Genus 3 ^{tium} . Amentia	414
Genus 4 ^{tum} . Amnesia	416
Genus 5 ^{tum} . Hydrophobia	417
Classis quarta. Morbi Excretionum	419
Ordo 1 ^{mus} . Morbi Sangvifluxus	-
Genus 1 ^{um} . Hæmorrhagia	420
Species 1 ^{ma} . Hæmorrhagia narium	426
Species 2 ^{da} . Hæmoptysis	-
Species 3 ^{tia} . Hæmatemesis	428
Species 4 ^{ta} . Hæmaturia	434
Species 5 ^{ta} . Menorrhagia	438
Species 6 ^{ta} . Morbus maculosa-hæmorrhagicus	443
Genus 2 ^{dum} . Menostasia	445
Genus 3 ^{tium} . Hæmorrhoides	451
Ordo 2 ^{dus} . Alvi fluxus vitiiati	458
Genus 1 ^{um} . Vomitus	-
Species 1 ^{ma} . Vomitus impuratum	459
Species 2 ^{da} . Vomitus nervosus	460
Species 3 ^{tia} . Vomitus Ileus	462
Species 4 ^{ta} . Vomitus hecticus	465
Genus 2 ^{dum} . Cholera	466
Genus 3 ^{tium} . Diarrhoea	468

	Pag.
Species 1 ^{ma} . Diarrhoea impuratum . . .	469
Species 2 ^{da} . Diarrhoea metastatica . . .	471
Species 3 ^{ta} . Diarrhoea habitualis . . .	473
Species 4 ^{ta} . Diarrhoea infantilis . . .	475
Genus 4 ^{tum} . Dysenteria	476
Genus 5 ^{tum} . Alvi obstipatio	490
Orda 3 ^{tius} . Seri fluxus vitati	
Genus 1 ^{mum} . Diabetes	494
Genus 2 ^{dum} . Enuresis	495
Genus 3 ^{tium} . Pyuria	497
Genus 4 ^{tum} . Stranguria	498
Species 1 ^{ma} . Stranguria accidentalis . . .	-
Species 2 ^{da} . Stranguria senilis	499
Species 3 ^{ta} . Stranguria venerea	-
Species 4 ^{ta} . Stranguria urethralis	500
Species 5 ^{ta} . Stranguria hæmorrhoidalis . .	-
Species 6 ^{ta} . Stranguria symptomatica . .	501
Genus 5 ^{tum} . Ischuria	502
Species 1 ^{ma} . Ischuria renalis	-
Species 2 ^{da} . Ischuria vesicalis	503
Species 3 ^{ta} . Ischuria urethralis	506
Genus 6 ^{tum} . Gonorrhoea virulenta	507
Genus 7 ^{mum} . Gonorrhoea benigna	510
Genus 8 ^{vum} . Leucorrhoea	512
Species 1 ^{ma} . Leucorrhoea simplex	513
Species 2 ^{da} . Leucorrhoea cancrofa	-
Species 3 ^{ta} . Leucorrhoea purulenta	514
Species 4 ^{ta} . Leucorrhoea fungosa	-
Species 5 ^{ta} . Leucorrhoea venerea	515

Clasfis quinta. Cachexia 516

Ordo 1^{mus}. Hydrops 517

Genus 1 ^{mum} . Hydrops intercus	527
Species 1 ^{ma} . Oedema	528
Species 2 ^{da} . Anasarca	529
Genus 2 ^{dum} . Hydrops abdominalis	530

		Pag.
Species 1 ^{ma} .	Ascites	531
Species 2 ^{da} .	Hydrops ovarii	533
Species 3 ^{tia} .	Hydrops faccatus	534
Species 4 ^{ta} .	Hydiometra	535
	Tympanitis	536
Genus 3 ^{tium} .	Hydrothorax	539
Genus 4 ^{tum} .	Hydrocephalus	543
Ordo 2 ^{dus} .	Tabes	545
Genus 1 ^{umum} .	Phthisis	-
Genus 2 ^{dum} .	Rhachitis	557
Genus 3 ^{tium} .	Atrophia	561
Ordo 3 ^{tius} .	Decolorationes	563
Genus 1 ^{umum} .	Icterus	-
Species 1 ^{ma} .	Icterus vulgaris	564
Species 2 ^{da} .	Icterus infantilis	567
Species 3 ^{tia} .	Icterus periodicus	-
Species 4 ^{ta} .	Icterus symptomaticus	570
Genus 2 ^{dum} .	Scorbutus	-
Genus 3 ^{tium} .	Lues venerea	579
Genus 4 ^{tum} .	Scabies	591



PROLEGOMENA.

Praxis medica est occupatio artificialis in curandis morbis internis.

Curare morbos est illam ægris præscribere diætam, illaque remedia, quæ ad præsentis morbos tollendos vel levandos conveniunt.

Functio hæc medici cognoscenda desiderat 1. quis & qualis sit præsens morbus, quem curare oportet, 2. quæ sint auxilia ad curandum morbum apta & efficacia.

Cognitio curandi morbi & opis medicatricis acquiritur partim per explorationem ægrotantis status, partim per doctrinam morborum sibi in antecessum perspectam redditam; prima via, quæ præter naturalia phænomena præsto sint, detegitur; mediante altera novimus, talia phæno-

mena certum designare genus vel speciem morborum ejusdemque medelam requirere.

Exploratio ægrotantium tres partes continere debet sc. examinationem ægroti primam; observationem progredientis morbi, & memoriam factorum s. historiæ morbi.

Examinatio prima partim per quæstiones ægroto propositas, partim per illius propriam narrationem nos in universum edoceat:

1. Ætatem ægroti, cujus cognitio quandoque ad indolem morbi, semper verò ad vim medicaminum rite determinandam infervit.

2. Durationem morbofi status, e qua eventum morbi & num curabilis sit, non rarò deducere oportet.

3. Symptomata ipsa, quæ tanquam signa morbi scitu maxime necessaria sunt, & quorum igitur singula quoad indolem, tempus, gradum, statum sive perseverantem sive incrementem sive decrementem rito examine detegi & certa reddi debent; præsertim in acutis morbis conditio lingvæ, pulsus, excretionum maxime alvi fluxus investigari debet; ordo hujus examinis talis fit, ut primum præterita dein præsentia inquiramus; si mox nobis occurrat symptoma essentialè cujusdam morbi signum, ad hujus reliqua symptomata invenienda disquisitionis statim dirigenda est; qua via propius & citius ad detegendum præsentem morbum adducimur. Certo sic manifestato morbo-

rum genere vel specie, num aliud præter symptomata per detectum morbum posibilia sanitatis vitium præsto fit, quærendum est, quod si non adfit, præsens morbus simplex & sufficienter inquisitus haberi potest; in contrario autem casu alienum obveniens symptoma examen priori simile desiderat, quo modo complicatus morbus s. plura morborum genera in ægroto compræsentia innotescunt.

4. Causas prægressas aut vitia diætetica, aut alios morbos antecedentes; harum enim indoles non raro ad morbi præsentis naturam intelligendam infervit.

5. Administratam medelam, ejusdemque effectum proficuum vel noxium vel indifferentem, unde quid vitare, quidve continuare oportet concludi sæpe potest.

Observatio progredientis morbi consistet in examine ægroti juxta indolem morbi acutam vel chronicam quotidie vel rarius repetendo, quo cognosci debet, num status & symptomata morbi continuent, increcant, decrecant vel mutantur, quisque sit effectus applicitæ medelæ.

Memoria factorum s. historiæ morbi non modo in præsentem ægroto requiritur, ut juxta morbi idea semper in mente habeatur, illique quadrans medicatio præscribatur, sed etiam propter emolumentum, quod e tali experientia ad alios

similes casus dijudicandos auriri potest; junioribus medicis vix melius consulendum est, quam has morborum historias literis conscribere, quo adminiculo decursus et mutationes morborum plenius & curatius observantur menti altius imprimuntur & diutius retinentur, indeque habitus salutem humanam digne & attente procurandi citius & certius acquiritur: verum etiam experti medici, quibus ob exercitatum vel felicem memoriam minus necessarium videretur hoc scribendi opus, in casibus gravioribus, dubiis, diuturnis observata litteris mandando rem perfectius agunt.

Doctrina abstracta morborum alterum est requisitum medico practico scitu necessarium; id est: cognoscat morbos posibles, caracteres singulorum distinguentes, eventum illorum possibilem ejusdemque signa prænuntia, atque tandem medendi methodum singulis congruam; obvia enim in ægrotis symptomata certum morbum ejusdemque eventum designare atque certam medicationem desiderare ignoramus, ni in antecessum de tali nexu instructi simus.

Modus acquirendi animoque inculcandi talem morborum scientiam duplex est ad perfectum studium æque necessarius & combinandus, sc.

1. Instructio clinica consistens in autopsiarum apud ægrotos contingentium & gestarum, ductuque alterius experti medici, qui in exemplis obviis & ipso actu & verbis tyrones edocet et ex-

plicat, quænam phænomena præternaturalia habenda sint, quæ diagnostica, quæque prognostica sint signa, & qualis medicatio sit conveniens; huic instructioni optimam occasionem præbent nosocomia propter omnigenos morborum casus ibi obvios.

2. Instructio systematica, quæ veritates ad cognoscendos & curandos morbos requisitas, non in individuis, sed ab illis abstractas exponit, aptoque ordine disponit. Hæc instructionis pars Therapia medica specialis nuncupata præsentis tractatus materiem constituit.

Morborum, qui ad hanc scientiam pertinent, immensus numerus ordinem quoque expositionis exactissimum desiderat, ut tam ampla doctrina viribus ingenii & memoriæ capi & retineri queat.

De ordine hoc præsertim superiores medici merito solliciti systematicam morborum divisionem, quam Classificationem appellant, formare annisi sunt & quidem sequenti ratione.

Totum morborum numerum diviserunt in cohortes maximas Classes dictas, quarum singulis propriæ notæ & nomina, quibus a se invicem distinguuntur, attributa sunt.

Clasfis quælibet iterum dispefcitur in cohortes medias, ordines appellatos, qui eodem modo ac classes a se invicem distinguuntur.

Ordines singuli dividuntur in cohortes minores genera vocatas.

Genera quandoque distinguuntur in cohortes minimas, quæ species appellantur.

Divisio hæc & subdivisio morborum nititur similitudine minus magisque completa notarum illis competentium; completissima f. plurimarum notarum ex individuis morbofis abstractarum similitudo efficit speciem morbi, identitas notarum in pluribus speciebus constituit genus, similitudo notarum in pluribus generibus efficit ordinem, & identitas prædicatorum in pluribus ordinibus constituit classem certam morborum.

Similitudines f. notæ similes, juxta quas allata morborum divisio instituenda est, vel internæ vel externæ corporis ægroti affectiones f. symptomata essent, internæ verò ægroti læsiones utpote sensibus occultæ pro notis indicantibus & distingventibus inservire nequeunt, symptomata igitur huic scopo tantummodo quadrant.

Aberrationes optime disponantur juxta leges violatas, morbi igitur, qui aberrationes sunt, in universum referri debent ad tot classes, quot sunt præcipua attributa f. regulæ sanitatis, quæ per morbos tolluntur & mutantur. Hoc fundamento generalissima morborum divisio quinque classes complectitur sc.

1. *Pyrexias* sc. morbos acutos, quorum caracterem præcipuum acceleratio pulsus & caloris præternaturalis mutatio sistunt.

2. *Dolores non febriles* f. absque pyrexia.

3. *Neuroses* f. læsiones functionum cerebro & nervis proprie competentium.

4. *Fluxus vitiatos* f. vitia excretionum.

5. *Cachexias*, in quibus principale morbi symptoma in superficie corporis hæret & apparet.

Therapeutica expositio completa cujuslibet morbi continet:

1. Definitionem ejusdem per notas manifestas constantes.

2. Symptomata in illo posibilia, ut sciri possit, num omnia in ægro obvia phænomena ad unum morbum referri possint, aut plura alium morbum simul præsentem indicantia adsint:

3. Causas externas manifestas, quæ ad cognoscendum morbum sæpe inserviunt, quæque, ut hic curetur vel præcaveatur, removeri debent..

4. Causam proximam, cui medela accommodanda est.

5. Diagnostica morbi signa.

6. Prognosin f. eventum morbi possibilem, ejusque signa.

7. Curationem morbi ipsam, cui quandoque annectitur prophylaxis.

CLASSIS I^{ma.}

P Y R E X I A

Est caloris mutatio præternaturalis cum pulsu frequenti & imminutione virium voluntati subditarum.

Pyrexiae vel junctus est dolor fixus certæ corporis partis vel minus, e qvanam differentia duplex formatur ordo sc.

Pyrexia absque dolore fixo topico quæ Febris nominatur.

Pyrexia cum dolore fixo topico Phlegmasia nuncupata.

ORDO I^{mus.}

F E B R I S

Est pyrexia absque conjuncto dolore fixo topico.

Symptomata per febrem qvatalem posibilia sunt extensa tam ad qvalitates corporis sensibiles, quam ad omnes actiones vitales, animales et naturales sc.

1. Frigus; horror, rigor, sæpissime externus universalis, rarius internus partialis, diversi gradus cum pallore, livore, asperitate quandoque insensibilitate peripheriæ, nec non tremore artuum

& maxillæ, temporarium est hoc symptoma raro ad plures horas durans communissime febris initium efficiens, interdum in progressu ejusdem recurrens.

2. Æstus vel ficcus vel humidus vel urens, horrorem insequens, durabilis, fere semper universalis cum rubedine & turgescencia partium.

3. Oculi mutati in splendentes, rubentes, hebetes, lachrymantes.

4. Lingva alterata, humida, vel ficca impura, albescens, flavescens, nigrescens, interdum ulcerosa.

5. Pulsus vix non semper naturali frequentior alias parvus v. magnus, durus v. mollis, regularis v. irregularis.

6. Sensus & sensationes perturbatæ, appetitus prostratus tam cibi quam veneris & aliarum cupidinarum ut tabaci & caffè, operationes mentis, attentio, recordatio, judicatio impedita quandoque erronea; molesta fitis; sensatio capitis, lumborum & præcordiorum dolorifica.

7. Motricium virium dejectio constans, hinc averfatio motus, situs horizontalis, stantium vacillatio; respiratio minus perfecta, frequens.

8. Excretiones depravatæ, saliva pauca viscida, alvus raro naturalis potius ficca quam laxa, urina in frigore pallida alias parca rubescens vel flavescens; perspiratio v. naturali minor vel largior ad sudorem usque, ulcera exsiccata.

9. Sangvis e vena missus solito densior, in putridis vero mollior imo plane dissolutus.

10. Superflites post febrem effectus: fluidorum inopia, solidorum laxitas, debilitas.

Gradus febris consistit in vehementia symptomatum imprimis essentialium, frequentiae pulsus, æstus & debilitatis; in omni fere febre pro vario ejusdem tempore gradus in certa stadia distinguitur sc,

1. Incrementum, partem temporis in febre, qva symptomata qvoad vehementiam augentur.

2. Statum, partem temporis, qva gradus febris maximus est nec increscens nec decrescens.

3. Decrementum f. partem temporis, qva gradus febris minuitur.

Duratio febris diversa indefinita raro intra diem finita sed ad plures dies atqve septimanas extensa.

Exitus f. eventus febris possibilis est triplex sc.

1. In sanitatem aut sensibili & citiore modo per manifesto adauctas excretiones, transpirationem, diuresin, alvi fluxum, salivationem, expectorationem, qvalis benigna febris transmutatio crisis appellari solet; aut lentiori progressu & sine notabili excretionum augmento, qvalis terminatio lysis nuncupatur.

2. In alios morbos sc. infarctus, inflammationes, suppurationes in certis corporis partibus, vel extravasationem liquidi morborum in cavitati-

bus; hæc terminatio febris metastasis audit. Etiam una febris species in alteram mutari & transire potest.

3. In mortem vel subito per læsionem visceris nobilioris vel lentius per consumptionem virium vitæ.

Causæ externæ febris s. res, quæ testante experientia febrem producere, conservare & augere valent, sunt

1. Ingesta vel iamiam per se acria & irritantia vel illius naturæ, ut in corpore corruptelam nocivam facile sibi contrahant, uti cibus nimius imprimis carneus, viscidus, crudus, pingvis, salitus, aromaticis conditus, semiputridus, vel potus fortiores spirituosus imprimis nimia quantitate hausti, vel medicamenta acria calefacientia & venena.

2. Aër & atmosphæra corpora nostra circumdans & inhalatus vim suam nocivam iisdem communicans varioque modo febris causam sistens.

a) Ob frigus nimium, cui diu corpus exponitur imprimis incalescens, vel ejusdem circumscripta pars, afflanti per rimas angustas aere tacta.

b) Ob æstus nimium, vix in nostris regionibus naturaliter tantum, ut immediate febrem producat, sed potius sensim humoribus præsertim bili corruptelam & acrimoniam inferendo tale malum efficere valet; artificialis calor minus tempe-

ratus præsertim ad febres jam præsentēs augendas efficax esse observatur.

c) Ob contentas noxias qualitates sc. miasmata contagiosa, variolosum, morbillosum, scarlatinosum, pestiferum, putridum, dysentericum & similia, quibus morbi epidemici plurimi haud injusto adscribuntur.

3. Excretionēs inhibitæ alvi, urinæ, sudoris, menstrui fluxus; tali enim vitio materia, quæ evacuari debet, superflua & acris irritationem insolitam & mediante illa febrem producere valet.

4. Corporis validiores diuque continuati motus, quibus sanguinis circulus & calor augentur, per se statum febrilem licet transitorium constituent, verum mediante quo certæ acrimoniæ aliàs involutæ & inertes evolvi atque ad efficiendam febrem capaces fieri possunt.

5. Animi vehementes affectiones ira, terror, doloresque fortiores.

6. Fames diuturna, fitis, defectus somni, alimento enim blando non renovatus sanguis sponte sua arescit, pervigilium autem nimium instar fortioris motus corporei sanguinis massam immutat.

7. Noxii & acres humores certis morbis generati & iam in corpore præsentēs, dum in sanguinis massam absorbentur, irritationem febrificam inferre valent, uti purulenta materia ex abcessibus, variolis, suppuratione quacunque interna,

ulceribus consolidatis, scabie exsiccata, nec non corruptum serum apud hydropicos vel scorbuticos in sanguinis massam reductum.

Causæ febris internæ præter irritabilitatem naturalem, s. dispositiones quibus, præsentibus allatæ externæ causæ facilius & graviores febrem efficiunt, sunt sanguinis abundantia, præsertim ejusdem iam præsens mala indoles diætæ vitiis contracta, nec non systematis nervosi singularis sensibilitas.

Theoria completa febris non modo continet cognitionem causarum antecedentium mox allatarum, verum etiam opus est perspectam habere læsionem corporis principalem s. causam proximam, in qua febris consistit indeque declarare symptomata & decursum, quæ per febrem possibilia esse supra diximus.

Causa proxima in febribus ut in aliis morbis internis est aberratio sensibus occulta internarum partium & virium; sola ideo illam cognoscendi via est conclusio ab ejusdem causis prægressis & effectibus manifestis; judicando sc. illam esse febris causam proximam, quæ ex antecedentibus causis deduci potest, & e qua symptomata febris tanquam effectus e causa declarari & intelligi queunt.

Hoc ratiocinio ductus causam febris proximam declaro notabilem irritationem systematis vasorum, ejusdemque exinde certo ordine adauctum motum sese primo exferentem in brevi du-

rante constrictione peripherica finium vasorum, quam insequitur constantius motus incrementum in principio vasorum five cordis.

Nexus hujus causæ proximæ cum anteceden-
tibus externis haud difficulter perspicitur.

1. Constrictio peripherica sub initio febrium eorumque frigore & horrore locum habens merito tanquam effectus ex irritatione & aggressu causarum febris externarum deducitur, utpote experientia notum est, tales horrores fere semper esse primos naturæ motus in homine solito validius irritato.

2. Cordis adauctus motus principalem & constantiorem partem febris efficiens atque in frequentiore & fortiore contractione consistens facile intelligitur ut effectus e causis manifestis febris allatis, quippequæ ponunt & producunt debitò magis irritantem sanguinis qualitatem, cui conformiter actio cordis increfcit & tamdiu perdurat, donec illa irritans causa e corpore eliminetur vel effectum lethalem inferat.

Symptomata & mutationes per febrem possibilia etiam ex allata causa proxima commode derivantur.

Constrictio peripherica duplicem inducit effectum, mediante quo reliqua sub febris initio obvia phænomena intelliguntur sc.

1. In superficie ipsa corporis, cujus vasa constringuntur, unde sanguinis ibidem & humorum

defectus, adeoque verum frigus, pallor, & urina limpida.

2. In partibus internis, versus quas sanguis ob contractionem & resistantiam in partibus externis majore copia ruit, ibidemque molestant creat abundantiam, quæ in capite stuporem somnolentiam dolores, in pectore difficilem respirationem & anxietatem efficit.

E motu cordis & arteriarum accelerato, itaque adaucta sanguinis circulatione alia & plurima febris symptomata eruuntur.

1. Æstus febrilis pro præcipua & constanti causa habet evolutionem materiæ calorificæ accelerato sanguinis motui necessario conformem & proportionatam; accidentaliter tamen quoad gradum dependere potest e sanguinis copia, quo major enim hæc, eò plures moventur particulæ & eò major evolutio e tensione & duritie vasorum, motum humorum melius propagante & conservante, ideo stricti habitus corpora fortiore febre quam laxiora subjecta laborant; e qualitate sanguinis varia minus magisque ad concipiendum calorem apta, ita pingvis & ad putrescentiam inclinans sanguis æstus febrilis capacior esse observatur, quam aquosus & minus corruptus.

2. Sitis febrilis effectus æstus vel forsan rectius pro particulari faucium æstu habenda, quæ junctam sibi habet sitis sensationem; accidentaliter dependere potest e simul præsentem humorum

acrimonia, partimqve e defectu secreti liquidi ad lubricandas hasce partis inservientis.

3. Se & excretiones præsertim ferosæ minutæ; hunc febris effectum etiam declarat celeris sangvinis motus, quatenus per illum serosi humores intimius cum grumosa sangvinis parte mixti tenentur, nec ab illa separari queunt, utpote separatio hæc promovenda est lentiori sangvinis motu & vi attractiva vasorum fecernentium, quæ non sufficit, dum vehementior sangvinis motus ad aliam & oppositam directionem adest.

4. Langvor febrilis s. virium voluntati subditarum decrementum sub febre vix melius declaratur, quam ex adaucta earundem applicatione ad motus vitales, svadente solita, quæ vires hominis determinat, regula, juxta quam una facultas tantum nisus agendi perdit, quantum aliis additur, sicuti enim unus animi affectus & appetitus alterum compescit & profligat, ita etiam status febrilis se habere videtur, per hunc enim irritato & commoto systemati vasorum solito major pars virium applicatur, & aliis partibus & facultatibus detrahitur; cum verò ad omnes appetitus & sensationes etiam certa vis vitæ atqve nervosa requiratur, etiam horum diminutio ex antecedente causa apte explicatur. Attamen anorexia febrilis etiam e causa magis physica sc. bile per calorem febrilem corrupta intelligi potest.

5. *Anxietas*, febris non rarum symptomata, sine dubio ipsius cordis molesta sensatio probabiliter producitur ex ejusdem nimia per sanguinem expansione; præponderans talis sanguinis actio triplicem rationem habere potest 1. frigus febrile, vi cujus contracta vasa sanguini e corde propulso resistent & ut hoc debita facilitate exoneretur, impediunt, 2. æstum febrilem, sub quo sanguis rarefactus citoque permotus haud satis celeriter per pulmones moveri potest, ideoque cor debita majore copia distendit. 3. Debilitatem ipsius cordis, vel ob malignitatem febris, vel ob ejusdem diuturnitatem, qua fit, ut affluens sanguis haud debita vi expelli possit, ideoque remora nimia distentionem anxiam creet.

6. *Cephalalgia febrilis*, quæ talis, merito haberi potest pro effectu valide commoti & rarefacti sanguinis, unde partes nervosæ debito magis distenduntur, quænam distentio præsertim in sensibiliore loco, ut v. c. caput censendum est, dolorem excitat. Accidentaliter etiam e sordibus primarum viarum per consensum oriri cephalalgiam experientia comprobatum est.

7. *Delirium febrile* adscribendum est immutato & irregulari motui fluidi nervosi, qui ad animæ functiones peragendas conspirat; cum enim cerebrum per vasorum distentionem ictusque enormes insolito modo comprimitur & movetur, ne-

cessario etiam circulatio fluidi cerebrialis mutatur, mox & alibi impeditur, mox & in aliis locis validius movetur, unde non potest non oriri varia aberratio functionum animæ, utpoteqvæ corpori, qvocum nexa est, conformiter agere, ejusdemqve mutationibus certa ratione determinari vix non cogitur.

8. Stupor & somnolentia, febri non raro adjuncta, surgunt a notabili congestione & rarefactione sangvinis circa cerebrum, qvo igitur compresso somnolentus, ut experientia notum est, oritur status. Stupor putridarum febrium gradus majoris est probabiliter inductus ex immediata læsione fluidi nervosi per penetrabilem & mephiticam vim materiæ morbificæ.

9. Pervigilium febrile præsertim derivari debet e violento sangvinis motu & impetu versus cerebrum, qvo fluidi nervei debito fortior motus citatur; partim etiam simul præsentibus & irritantibus doloribus in culpa esse possunt.

10. Sudor febrilis oriri potest 1. e relaxatione vasorum transpirantium, qvæ effectus esse potest v. prægressæ spasmodicæ constrictionis, vel enormis debilitatis. 2. ex humorum natura ad vasa exhalantia permeanda apta, qvæ aut resolutioni noxiæ aut salutari attenuationi per ita dictam coctionem imputari potest. 3. e circulatione sangvinis a vehementi febrili in moderatiorem conversa; validior enim motus serofos humores cum grumo-

sa sanguinis parte commixtos & conjunctos tenet, itaque ad separationem ineptos reddit; quisque hoc proprio exemplo facile comperit; quamdiu fortius exercetur corpus, vix provenit sudor, qui verò dein sub motu sensim immixto largus erumpit.

11. Hæmorrhagia febrilis præsertim derivanda est ex impetu sanguinis vehementi, quo vasa vel quoad orificia nimis dilatantur, vel revera dirumpuntur, itaque sanguinem permeare sinunt. Accidentaliter ad eandem producendam conspirare potest sanguinis dissolutio, cujusdamque visceris laxitas & debilitas.

12. Emaciatio corporis sub febre & post eandem effectus est necessarius impeditæ nutritionis & adactæ consumptionis, quæ utraque gradui circulationis præternaturaliter incrementis respondet.

Gradus febrium absolutus dependet ex causis quoad intentionem vel confluxum diversis; quo validior causa febris, eo major hæc & vice versa, e modico refrigerio modica febris, e fortiori gravior exoritur, eadem epidemica febris in uno subjecto damnosior quam in alio fit, dum simul plures febris causæ, ut impuritates notabiles primarum viarum vel sanguinis, conspirant.

Gradus febris relativus s. stadia febrilia differenti irritationi per materiam morbificam merito

adscribuntur; sic incrementum febris illi materiae magis magisque evolutae & irritanti redditae; status perseveranti & non mutato febrili irritamento, & decrementum potentiae nocivae involutae vel evacuatae imputari debet.

Duratio febris diversa pro causa habere potest 1. locum varium materiae morbificae, qui ejusdem separationem & evacuationem minus magisque difficilem reddit, sic in primis tantum viis haerens materia facilius & breviori tempore auferitur, quam sanguini commixta. 2. Copiam materiae morbificae, cui sat probabiliter respondere debet tempus ad talem hostem vincendum & profligandum requisitum. 3. Indolem potentiae morbosae minus magisque spissam & viscidam, quae ideo minus magisque diuturna naturae molimina evolventia & solventia desiderat. 4. Vires naturae diversas, dum a fortioribus citius, a debilioribus tardius perficitur opus in subigendo morbo.

Eventus s. exitus febrium pro differente indole etiam diversam habet causam.

Eventus febrium salutaris s. in sanitatem adscribendus est actioni solidorum imprimis systematis vasorum justo & sufficienti gradu adauctae, utpote enim haec naturali gradu constituta intervit ad separandam & eliminandam noxiam materiam tempore sanitatis in corpore generatam, ita etiam haud aptior cogitari potest causa quam incrementum hujus naturae actus ad debellandam

& profligandam magis inimicam & morbosam materiem. Hi naturæ motus ad sanationem febris tendentes ad duas operationes, coctionem sc. & crisin nuncupatas, referri possunt.

Coctionem dico talem materiæ morbificæ immutationem, ut vim irritandi perdat vel ad evacuationem e corpore apta reddatur; motus & calor per febrem adaucti hunc scopum triplice modo attingunt.

1. Per resolutionem, qva materia morbifica solvitur & attenuatur, itaqve ad vias excretorias permeandas adaptatur.

2. Per distributionem & dilutionem, dum materia morbifica forsan concentrata cum tota sanguinis massa commiscetur, itaqve vim agendi & irritandi perdit.

3. Per transpositionem, qva combinatio materiæ morbificæ cum principiis sanguinis immutatur, ita ut ab aliis divellatur, cum aliis verò commisceatur, & jungatur.

Crisin appello naturæ actum, qvo materia morbifica e corpore evacuat; causam hujus sistit partim prægressa coctio, qva materia morbi ita est resoluta, separata & mitigata, ut per vias excretorias expelli queat; partim motus febrilis per coctionem, itaqve subactam irritantem vim materiæ, minutus; supra enim monstratum est, fortiolem febrem nimis unita tenere sanguinis principia, itaqve se & excretiones impedire;

fracto vero per coctionem irritamento morboſo, indeqve motu febrili decreſcente excretiones melius procedere poſſe intelligitur. Circa criſin obſervanda ſunt ejusdem diverſus progreſſus, locus, atqve tempus.

Ratione progreſſus duplex datur differentia:

1. Criſis ſtrictè talis ſc. manifeſta, notabilis, cito perfectà qvandoqve tamen ad plures dies protracta & repetita evacuatio, poſt qvam febris mox ceſſat. Hujus cauſam probabiliter fiſtunt ſufficientes naturæ vires, nec non materiæ ſolubilis indoles ſeparationi & excretioni minus obſtans.

2. Lyſis ſ. critica & ſalutaris evacuatio minus ſenſibili & manifeſto modo, ſed ſuccèſſive ſeſe exferens, qvæ dependere poteſt e debilioribus naturæ viribus & materia morboſa difficilius extricanda & ſubigenda.

Locus criſeos diverſus: ſæpiſſime ſudor & urina, interdum alviſluxus, ſalivatio, expectoratio excretionem criticam conſtituunt; ſudor criticus debet eſſe univerſalis modice calidus; urina critica ſedimentum continere, qvo citius deſidens eo melioris notæ, ſub progreſſu morbi apparens; rarius contingit, qvò notabiliter aucta urinæ copia ſedimenti vices ſuppleat; qvandoqve per unicam excretoriam viam, rarius per plures ſimul criſeos opus perficitur. Diverſus hic excretionis modus derivari poteſt partim ex indole materiæ morbiſicæ, qvæ majorem affinitatem cum uno qvam

cum altero excreto habet, partim e laxitate vel debilitate cujusdam organi excretorii, ob quam irruenti humori facilius cedit.

Tempus criseos f. dies morbi, quibus critica evacuatio accedere solet, in genere certa ratione definiti sunt, ideoque dies critici nuncupantur sc. dies 4tus, 7mus, 9nus, 11mus, 14tus, 17mus, 21mus, 24tus; quorum uno natura criticum opus communiter exferit, sed condita est talis ordinis causa; neque nostris temporibus huic adeo conveniens deprehenditur criticum hoc tempus, ab antiquis medicis præsertim observatum & constitutum, forsan vel partim ob efficaciorē, quam nos administramus medelam et mutatum vitæ genus.

Exitus f. transitus febrium in alios morbos produci potest.

1. E coctione imperfecta & insufficienti, dum sc. materia morbifica haud ita mutatur, ut per vias excretorias educi possit, sed tantum a massa sanguinis separatur & in partibus non excernentibus deponitur, ibidemque tumores, abcessus, inflammationes producit; qualis morbi febrilis exitus metastasis audit.

2. E critica excretionē imperfecta, dum sc. pars materiæ morbosæ aufertur, altera autem pars in corpore remanet; hac forsan ratione una febris species, ut continua, transit in intermittentem.

Exitus febrium in mortem triplici ratione fit:

1. Per debilitatem f. virium, consumptionem sub febre non vincenda magis magisque incrementem demum ad tantum gradum, ut functioni suæ haud sufficiat cor.

2. Per destructionem & læsionem notabilem visceris cujusdam nobilioris imprimis cerebri vel pulmonum, quorum vasa & substantia aut vi impetus febrilis disrumpi aut materia morbifica corrumpi possunt.

3. Per effusionem sanguinis vel materiæ morbificæ in cavitatibus internis, abdominalis, pectoris, capitis, unde compressio vel irritatio funesta viscerum inducitur.

Diagnostica signa febris, e quibus hæc præsto esse concluditur, sunt:

1. Pulsus naturali frequentior; hoc signum certissimum est, quippe inseparabile, id est: semper febre nexum; & exclusivum, id est: non in aliis quam febrilibus morbis præsens, interdum tamen imprimis junioribus medicis minus manifestum f. obscurum.

2. Langvor febrilis; frequentissimum quidem haud vero inseparabile signum, haud exclusivum & interdum sat obscurum.

3. Urina magis naturali tincta; etiam frequens signum, verum nec prorsus inseparabile aut exclusivum.

4. Calor naturalis mutatus, initio per frigus febrile minutus, alias naturalem superans; hoc signum fat constans, tamen haud inseparabile est.

5. Cephalalgia, anorexia & sitis signa diagnostica febrium auxiliaria haberi possunt.

Regulae diagnosticae s. ex allatis signis praesentiam febris concludendi:

1. Pulsus naturali manifesto celerior semper febrem adesse indicat, etiamsi alia signa sese distincte non exferant.

2. Pulsus distincta celeritate non praesente vel appercepta, reliqua signa respicere oportet atque ex illis praesentem febrem cognoscere.

Prognostica signa febrium, e quibus earundem eventus concludendus & praesagiendus est, in universum sunt causae horum eventuum.

Salutaris eventus signa sunt:

1. Vires naturae quodammodo valentes & ad crisin peragendam sufficientes; hinc pulsus fortis, respiratio quodammodo libera, modica debilitas, oculi & facies haud nimis a naturali modo abscedentes, quatenus robur naturae, etiam benignum exinde sperandum eventum designant.

2. Incipientes excretiones salutares & revertentis sanitatis effectus; urina sedimentosa, sudor, alvi fluxus &c., imprimis diebus criticis, celeritas pulsus decrescens, linguae immutatio a sic-

ca in humidam, ab impura in puram, somnus & appetitus redeunt.

Transitum febris in alium morbum, imprimis metastasin, prænunciant:

1. Difficilis coctionis signa sc. diuturna febris perseverantia in eodem gradu, utpote quæ naturæ vires ad materiem morbi rite subigendam vix sufficientes monstrat; nec non urina clara permanens, quæ indicat materiem morbi haud talis capacem esse mutationis, ut per vias excretorias solitas educi queat.

2. Decrementum febris, imprimis celeritatis pulsus absque facta vel concomitante critica evacuatione, quod demonstrat materiem morbificam e massa sanguinis esse separatam, sed dum non excernitur, alibi in corpore deponendam.

3. Incipientis metastaseos indicium sc. dolor & affectio molesta in certa corporis parte externa vel interna sub allato statu febris superveniens, unde concludendum est, huc versus materiem morbi solutam tendere atque dirigere.

Funeſti febris eventus signa sunt:

1. Debilitas notabilis, increſcens, ejusdemque effectus, uti stupor enormis situs immobilis imprimis in dorſo continuus, magis magisque deorſum tendens, tremor artuum, ſubſultus tendinum, lipothymia in ſitu erecto, pulſus quotidie debilior, celerior, irregularis, oculi ſemiclauſi immobiles, inæqvales, lachrymantes ſplendore

naturali carentes, excretiones involuntariæ, extremitates frigidæ & viscidæ sudantes.

2. Viscerum nobiliorum imprimis cerebri & pulmonum afflictio notabilis, unde horum funesta destructio timenda est, uti deliratio gravis, insomnia continua, oculi magni rubri, torvi, convulsiones intercurrentes, respiratio frequens difficilis, anxia, stertorosa. Quo plura horum utriusque generis signorum præsto sunt, eo majus febris periculum; absolutum vero instantis mortis signum tantum exhibent pulsus vix sensibilis, artus viscidæ & frigide sudantes, atque stertor f. ut quoque dicitur, ronchus pectoris.

Curatio febrium in universum triplicem continet partem, 1. curationem radicalem f. principalem, 2. curationem symptomaticam, 3. curationem restaurantem f. convalescentium.

Curatio febris radicalis duplicem scopum habet, cui adminicula accommodanda sunt sc. 1. motus febrilis justum & utile moderamen 2. materiæ f. irritamenti febrilis debellationem.

Curatio motus febrilis consistit in tali ejusdem determinatione, ut ad materiam morbificam subigendam, cui scopo optime ipsam inservire febrem supra monstravimus, sufficiat, nec nimio impetu læsionem irreparabilem inducat; hæc determinatio obtinetur, minuendo febrilem motum, dum nimius est, augendo eundem nimis debi-

lem, & sustentando illum, dum modicus & justus est.

Nimius motus febrilis, e symptomatum febrilium vehementia imprimis pulsu forti, respiratione anxia difficili, cephalalgia valida, æstu & ficitate partium, urina rubra cognoscendus, in universum minui debet & potest, debilitando causas motum sanguinis excitantes, sc.:

1. Calorem sanguinis, utpotè cordis præcipuum irritamentum minuendo per auxilia sic dicta refrigerantia, tam medica quam diætetica, uti nitrosa, acida & vegetabilia, succum citri, acetum, cremorem tartari, sal essentiale tartari, & mineralia validioris efficaciae, imprimis spiritum vitrioli rite dilutum; potus & cibos vegetabilis indolis, juscula e frumentis variis parata, poma & prunos cocta, cerasa & fragas; aerem purum quodammodo frigidum & integumenta corporis modica haud calefacientia, quietem corporis & animi.

2. Massam sanguinis minuendo, ita ut pondere ejusdem cor minus irritetur, quod sit per venæsectionem, cujus opportunus usus & repetitio tamen haud generaliter sed secundum specialem febrium indolem definiri debet.

Debilis nimium febrilis motus, & langvore enormi, pulsu depresso, nullo vel parvo calore, & conspirante diuturnitate morbi concludendus, erigi & juvari debet:

1. Augendo & sustentando actionem cordis & vasorum per remedia sic dicta roborantia & stimulantia, ut corticem peruvianum, camphoram, moscum, vinum imprimis rhenanum, epispastica, vesicatoria.

2. Avertendo & prohibendo usum debilitantium, qvalia sunt nitrosa & evacuantia, imprimis sangvinis missiones.

Iustus & sufficiens febrilis motus, ubi nec signa supra allata periculosæ vehementiæ nec enormis debilitatis indicantia adfunt, non minui aut augeri debet, ideoque a medico haud aliud desiderat quam ad irritamentum febrile, cujus mentio mox facienda est, curationem dirigere.

Curatio materiæ s. irritamenti febrilis promovetur mutando, tollendo, avertendo pravam atqve acrem humorem indolem, qva cor ad enormes motus irritatur, sc.

1. Diluendo sangvinem per potus solito largiorem copiam, ita enim acrimonia in majori massa distributa redditur minus activa, sangvis quoque illo modo attenuatus excretionibus criticis aptior fit; multum bibere ideo maximi in febribus momenti regula est; quantitas ingerendi circiter ad duas tresve mensuras nycthemero definiri potest; alias fiti & gradui febris accommodanda; indoles potus fit blanda, fiti & æstui conveniens & quodammodo nutriens, uti decoctum avenæ vel hordei tenue aut infusum panis secalini, quibus

acida ut succus citri aut acetum, & si placeat, parum sachari admiscuntur; etiam mera aqua simplex frigida v. subfrigida, quæ sæpius repetita sed parca doci, ne ventriculus aggravetur, ingeri debet; subcalida potus conditio ad citiorem absorptionem etiam convenire videtur.

2. Promovendo & sustentando excretiones imprimis primarum viarum; generalis ideo in febribus potest esse regula, initium curationis facere per harum viarum emetico aut laxante productam purgationem, & dein si ipsa natura deficiat, alvum per enemata vel eccoprotica quotidie vel alternis diebus porrecta apertam tenere; cum enim contenta intestinalia, bilis, ingesta, excrementa sponte ad putredinem & acrimoniam vergunt, atque ob calorem febrilem adhuc magis corruptioni obnoxia sunt, per se intelligitur, quanti sit emolumenti, hasce materias tempestive eliminare. Exacta tamen determinatio talis evacuationis indoli febrium conformanda est, ideoque ad specialem earundem tractatum pertinet.

3. Prohibendo usum omnium, quæ irritante & calefaciente vi prædita sunt, qualia sunt carnea, pisces, butyrum, oleosa, spirituosissima, aromata & medicamenta sic dicta calefacientia.

Curatio symptomatice pro scopo habet levamen symptomatum molestiarum; pro maxima parte hanc continet curatio radicalis, utpote quæ causam s. morbum, adeoque illius effectus s. symp-

tomata tollere docet, fequentia tamen attentionem mereri possunt.

1. Frigus febrile, quamvis fere intolerabile, tamen nulli auxilio ante tempus a natura præscriptum cedit, potibus calidis tamen blandis parum levatur; integumenta multa nil juvant, & calefacientia varia præsertim a vulgo adhibita frigus non tollunt, sed æstum insequentem periculoſe augent.

2. Siti urgenti ſatisfaciunt acida potui admixta & frequens hauſtus.

3. Vomitus & vomituriſio indicatis evacuantiſus non cedens julapio ſalino extra efferveſcentiam vel ſub eadem alternis horis ſumta aut pulvere noſtro antemetico ad cohleare minus bi v. trihorio levatur, imo tollitur.

4. Capitis moleſtæ affectiones ſub febre, æſtus, dolor, infomnia, deliria auxiliis ſanguinem in capite diminuentibus, & ad alias partes derivantibus, q̄valia ſunt hirudines temporibus, epifpaſtica artibus, epithemata frigida capiti applicata, levare debent; opiata damnoſa ſunt.

Curatio reſtaurans ſ. convaleſcentium, indicata, cum febrilia ſymptomata ceſſaverint, ſomnus & appetitus redierint & urina naturalis obſervetur, pro ſcopo habet partium & virium ſub febre deperditarum reparationem efficiendam.

1. Nutrimenti apta electione; quoad qualitatem hoc fit digestu facile, ut iuscula carnea tamen haud fortiora, carnes teneriores, agnina, vitulina, gallinacea, pisces non pingves, coctæ velle affatæ; quoad quantitatem illa valet regula: pluribus, quam sanitatis tempore, vicibus alimentum sumere, sed eò parciori copia haud ad plenam saturationem, ne digerentes naturæ vires adhuc debiles superet ingestum, & pravam igitur indolem sibi contrahat.

2. Nutrimenti bonam promovendo concoctionem, quod fit auxiliis roborantibus ut decoctione corticis peruviani, essentia amara, vino rubro velle rhenano, cerevisia fortiori, spiritu vini aqua mixto, motu corporis modico sensim adaucto juxta vires convalescentium; hoc tempore evitandi sunt potus multi aquosi tepidi, quatenus relaxantes & debilitantes.

Divisio febrium, me iudice commodissima, sex genera continet 1. febrem intermittentem, 2. continuam simplicem, 3. continuam catarrhalem, 4. continuam putridam, 5. continuam exanthematicam, 6. continuam puerperalem.

G E N U S I m m.

FEBRIS INTERMITTENS

Est febris certo dierum intervallo præfens, & alio abfens. Tempus, quo adest, paroxysmus, & quo non adest, apyrexia appellatur.

Divisio intermittientium febrium potissimum duplex locum habet sc. ratione apyrexiae diversæ & ratione paroxysmi diverfi.

Ratione apyrexiae f. temporis paroxysmos intercedentis minus vel magis diuturni sive ratione typi febres sunt:

1. Quotidiana, cujus paroxysmi quovis die ad certum circiter tempus redeunt.

2. Tertiana, ubi paroxysmi alternis diebus adfunt, & apyrexia ad integrum circiter diem extenditur.

3. Quartana, cujus paroxysmi quarto quovis die, intermisfis adeoque duobus apyrexiae diebus revertuntur; rara habentur exempla febrium ad plures dies, quinque, sex &c. intermittientium.

4. Duplicata, ubi paroxysmi cujusdam ex allatis speciebus ad duplicem vicem redeunt, tempore, quo in simplice febre modo semel adfunt vid. Diar. 1785 Junii No. 2.

5. Erratica, cujus typus f. apyrexia haud certo ordine gaudet ex. gr. ubi febris mox quoti-

dianæ, mox tertianæ, mox quartanæ typum habet, vel prorsus irregularem recursum.

Ratione paroxysmi diversi f. differentiae symptomatum paroxysmum constituentium febris intermittens esse potest.

1. Benigna, quæ tantum symptomata ordinaria, satis cognita, non periculosa continet.

2. Maligna, cui præter symptomata ordinaria febrilia simul aliud insolitum & periculosum junctum est.

3. Protheiformis, larvata, quam loco paroxysmi febrilis ordinarii constituit alia morbosa affectio periodica f. typum febris intermittens habens.

Symptomata in febre intermittente possibilia juxta allatam illius differentem indolem optime disponuntur.

Benignæ f. ordinariæ febris symptomata sunt vel essentialia vel accidentalialia.

Essentialia symptomata paroxysmum ipsum febrilem efficiunt & ad tria stadia referri solent.

1. Frigus initium f. primum stadium paroxysmi constituens, gravius & diuturnius quam in aliis febribus, utraqve tamen ratione diversum, sibi juncta habens pallidum & lividum cutis colorem, tremorem artuum imprimis maxillæ inferioris, oscitationem, pandiculationem, crebram sæpe anxiam respirationem, langvorem, somnolen-

tiam, urinam pallidam, pulsum contractum, lum-
baginem, interdum vomitum.

2. *Æstus* ficcus, alterum febris stadium ef-
ficiens, frigus mox subsequens, & secum ducens
rubedinem faciei & aliarum partium, elevatum
celeremque pulsum, profundiorē & liberiorē
respirationem, molestam cephalalgiam, sæpe cum
incommoda pulsatione arteriarum temporalium,
sitim insignem & urinam rubescentem.

3. *Sudor* tertium & ultimum paroxysmi
stadium sistens, æstui succedens, universalis, lar-
gus, symptomata æstus incommoda sensim dimi-
nuens, tandemque profugans, pulsus tunc mollis
atque minus celer invenitur, posteaque missa uri-
na sedimentum rufum, ut dicunt, lateritium ha-
bet. Duratio cujusvis stadii diversa est, totus pa-
roxysmus ad plures horas extenditur. rara datur
exceptio, ubi paroxysmus sine sudore notabili
finitur.

Accidentalia intermittentium symptomata
etiam apyrexiae tempore præsentia sunt commu-
niter anorexia, sapor amarus, lingua mucosa,
langvor, quandoque color faciei pallido-flavescentis,
tumor œdematosus imprimis crurum vid. diar.
1784 Mart. No. 2 & Jul. No. 2. Obstructio he-
patis ejusque effectus vid. diar, 1782. Maj. No. 3.
1783. Maj. No. 2. 1786. Maj. No. 2. & 1785. April
No. 2.

Maligna intermittens communiter typum tertianæ nec non ordinaria symptomata & stadia febris habens, sed præterea aliud infolitum periculosum, quod diversi generis esse potest, symptoma, uti hæmorrhagias, epilepsiam, apoplexiam tertio paroxysmo lethalem & alia vid. diar. 1783. Octbr. No. 2. & Novbr. No. 3. 1784. Septbr. No. 1. 1787. April No. 2.

Protheiformis febris symptomata locum paroxysmi ordinarii subeuntia, illumque tantum quoad regularem reversionem referentia, testante experientia, fere omnis generis affectiones morbosæ esse possunt vid. diar. 1783. Maj. August. Septbr. Octbr. No. 2.

Causæ externæ intermittentium febrium partim vulgares & communes, partim personales & sporadicæ sunt:

Vulgaris causa in plures simul homines agens non injusto habetur certa atmosphæræ humiditas, nam in regionibus ficcioribus, uti Norvegia, fere nunquam observatur intermittens febris; talis aeris constitutio ortum trahit.

1. E locis paludosis & aquis stagnantibus, ubi febris intermittens testante experientia endemicus morbus est.

2. Ex anni tempore pluviosam tempestatem potissimum secum ferente, sic præsertim ver nec non autumnus huius morbo maxime favet,

3. Ex ipsius aeris singulari & epidemica constitutione, vi cujus hæc febres uno præ alio anno populares redduntur.

Sporadicæ causæ intermittentium febrium, quæ tamen non nisi in connubio cum causa vulgari febrem inducunt, esse possunt.

1. Alimenta pravæ indolis, uti carnes pingves, imprimis lardum, pisces pingves, ut scomber, salmo, haleces recentes, præsertim, dum mox post talia ingesta cerevisia vel potus aquosus bibitur.

2. Impuritates primarum viarum lentius vel per diætæ vitia vel ob debilem concoctionem generatæ.

3. Acrimonie retrogressæ, ita frigore suppressa transpiratio non raro febri ansam dat, nec non scabies retropulsa vid. diar. 1785. Mart. No. 4. Huc pertinet suppuratio interna vid. diar. 1786. Jul. No. 12 et 1787. Maj. No. 8.

4. Animi pathemata fortiora, imprimis ira & terror, quorum efficaciam ipse observavi.

5. Dispositio singularis in corpore ad febrem intermittentem concipiendam, quam ex hoc morbo antea habito contrahi indubitata probat experientia.

Causa proxima febris intermittens, me iudice, e duplici conspirante causa constat, harum altera efficiens in nervis & partibus solidis residet, altera excitans est.

Causa efficiens, consistit in certa irritabilitate & pronitate systematis nervosi ad illos motus, qui intermittentem febrem constituunt; hanc dispositionem febrilem peculiari modo nervis inhærere concluditur e multiplici analogia febrium intermittentium cum morbis nervosis sc. 1. pathematum simili influxu in hos morbos producendos & tollendos, 2. simili valida agitatione in febribus his ac in convulsionibus nervosis, 3. simili medicatione per remedia roborantia, 4. simili consuetudinis vi, ob quam febres intermittentes non minus ac stricte dicti morbi nervosi adeo recidivantes sunt. Hujus dispositionis observari merentur

1. Ortus, partim sine dubio ex humiditate aeris, qua nervi relaxati ad irregulares motus disponuntur, quæque vix alio modo quam nervorum tonum immutando febrium adeo fecunda causa esse potest, partim e consuetudine & singulari habitu ad motus, quos nervi antea citarunt, reproduccendos, & demum ex congenita, vel hæreditaria teneritudine & mobilitate nervorum, vi cujus certa individua hac febre corripuntur, dum alia iisdem reliquis causis febrium exposita tamen libera manent.

2. Gradus diversus, ob quem majorem aut minorem gravior vel levior causæ excitantis vis ad producendam febrem requiritur.

Causæ excitans s. irritamentum febrile ea est materia vel res, cujus influxu & actione nervi ad

febrem dispositi irritantur & ad illius motus exferendos citantur.

Quoad indolem irritamentum hoc duplex esse potest sc. accidentale & essentiale.

Accidentale febris irritamentum potest esse quaecunque res irritans & stimulus nervos ad febrem dispositos commovens, uti aër frigidus, potus frigidus largus, alimenta fortiora carnea, remedium purgans, animi pathema, e quibus febrem revocari posse fat certa experientia constat; verum tali irritamento utpote transitorio tantum primus febris paroxysmus adscribi potest, ad insequentes alia requiritur causa.

Essentiale febris irritamentum debet esse constans, id est: ad quemlibet paroxysmum, primo forsan excepto, producendum concurrens; pro hoc irritamento maxima probabilitate statuitur bilis vel corrupta vel naturalis, tamen sub notabili dispositione febrili sufficiens, quæ sensim collecta & in intestinis effusa demum efficax redditur ad motum nervorum febrilem excitandum; hanc sententiam probant:

1. Bilis læsa conditio fere omni intermittenti feбри annexa, unde merito concluditur, illius acrimoniam in culpa esse.

2. Nexus febris cum obstructione hepatis fat frequens & mutua horum morborum successio, ita sc. ut, febre imprimis per adstringentia intempestive adhibita profligata, oriatur obstruc-

tio, & hac sanata redeat febris; quod demonstrat, biliosum irritamentum ad febrem creandam pertinere & ad intestina effluere debere vid. diar. 1784. Mart. No. 5. 1785 April No. 2. 1786 Maj. No. 2 & Juli No. 2..

Declaratio symptomatum intermittentis febris ex allata causa sequenti modo fieri potest.

1. Frigoris stadium est effectus irritationis nervorum per bilem, quæ, etiamsi in primas vias modò agens, non minus tamen valida censenda est ad motum nervorum universalem citandum, quam alii similes stimuli ex. gr. calculi biliarii, e quo ductum choledochum permeante & irritante & frigus & alios vehementes motus produci sat certum est.

2. Æstus relaxatis sub evanescente frigore vasis periphericis, ideoque fortiter per vim cordis prævalentem irruenti & in vasis adhuc sat tensis vehementer moto sanguini adscribendum est, dein sub hoc incipiente æstu bilis e primis viis in sanguinis massam absorbetur, & novum irritamentum febrili motui præbet; frigore enim contracta vasa nihil, sub æstu autem maxime absorbent.

3. Sudor, ultimum febris stadium, produci-
tur, partim per plenariam relaxationem peripheriæ vasorum, partim per ipsos febriles motus conspirante vi saponacea & solvente bilis, quibus humores solvuntur, attenuantur & ad vias excretorias permeandas aptantur, sedimentum urinæ

lateritium, haud injusto biliosæ materiæ per diuturnam ejectæ imputatur.

4. Apyrexia febrium evacuationi irritamenti biliosi per sudorem & urinam tribuenda est.

5. Reversio paroxysmi febrilis e renovata in primis viis collectione bilis ad tantam copiam & gradum, ut ad nervos commovendos sufficiat, derivanda est.

6. Typus febris intermittens diversus declarari potest.

a) Ex irritamenti diversâ indole, spissitudine vel acrimonia, ob quam brevius vel diuturnius requiritur tempus ad collectionem ejusdem sufficienter irritantem, indeque brevior vel longior apyrexia intelligitur.

b) E dispositione nervorum varia minus magisque sensibili, quæ ideo minorem majoremve, minus vel magis diuturnam collectionem irritamenti desiderat, ut per illud commoveri possit.

Diagnostica signa intermittens febrium, & aliorum similium periodice recurrentium morborum sunt in universum:

1. Paroxysmus ipse aut aliud illius locum subiens symptoma, quod per invasionem subitam & cessationem periodicæ naturæ præsertim tempore, quo talis grassatur morbus, signum exhibet, imo pro indicio completo censendum est, dum gravitas paroxysmi periculum moræ & expectationis facit; quale exemplum apoplecticæ febris.

altera reversione lethalis ob ignoratam periodicam indolem, ideoque procrastinatum corticis usum refertur; mihi ipsi tamen haud contigit, adeo cito funestum periodicum morbum observare.

2. Regressus ejusdem paroxysmi, vel symptomatis ad easdem circiter diei horas, altera talis reversio fere certum, & tertia indubitatum signum periodici morbi porrigit.

3. Urinae sedimentum lateritium ut plurimum periodicis morbis junctum, signum eorundem corroborans aestimari debet, imprimis utile, si recursus periodicus haud satis per se manifestus videatur, verum haud inseparabile est indicium, adeo ut ab illius absentia ad absentiam febris concludi nequeat.

Specialia signa diagnostica typi sc. & indolis intermittentium febrium e definitione & descriptione supra allatis abunde patent, attamen mentione digna sunt indicia gravis a Werlhoffio imprimis descriptae febris carosae s. apoplecticae sc. ejusdem

1. Prænuntia signa, ex quibus periculosus talis accessus timeri potest: a) somnus notabilis primo vel alteri paroxysmo annexus, tantusque, ut aeger evigilari vix queat, nec vigilans teneri durante paroxysmo; b) stupor notabilis etiam extra paroxysmum continuans; c) talis morbi jam praefens epidemia; d) cardialgia enormis quasi ex inflammatio-

ne paroxysmo periculofum proxime antecedenti adjuncta.

2. Præfentis talis damnofi paroxysmi figna fub tertia reverfione communiffime fefe monftrant, rarò citius vel ferius, & qvidem fub forma apoplexiæ feu cari, privatione motus & fenfus, fomnoqve non interrumpendo, sæpe per mortem finito, interdum talis paroxysmus innocuus, verum in feqvens lethalis fit; rariffime hic morbus propriis naturæ viribus absqve noxa ægroti vincitur.

Circa prognofin notari debent.

1. Benignus & in fanitatem tranfitus intermittentium ut plurimum fperandus, interdum per proprias naturæ vires, verum per artem fere femper efficiendus eft; quotidianæ & tertianæ facilius tolluntur, quartanæ autem præfertim in hyemale tempus incidentes magis pertinaces funt, imo non nifi tempore vernali fanationem admittunt, quandoqve per fcabiem folvuntur, vid. diar. 1784. Jul. No. 2. 1786. Juli No. 2.

2. In alios morbos imprimis hydropem & obftructionem hepatis (vid. diar. 1784. Mart. No. 3. & 1785. April No. 2.) hæ febres fub prava diætâ protractæ vel remediis calefacientibus & adstringentibus imo cortice intempeftive ingefto tractatæ terminari poffunt; rarior faltem apud nos lienis obftructio (*Feberkage* nominata) obfervatur, in Holfatia frequens.

3. In mortem finire possunt hæc febres malignæ sic dictæ carosæ & apoplecticæ sc. sibi ipsis relictæ & remedio specifico haud satis tempestive debellatæ; etiam exemplum habetur lethalis eventus per metastasin hydropicam ad pectus; vid. diar. 1785. April. No. 2.

4. Recidivans præ omnibus aliis fere morbis observatur intermittens febris, ita ut illa licet fugata, imo per plures hebdomades absens, modico tamen diætæ vitio, præsertim alimentis carneis maxime bovino & suillo & lacteis, aere frigidiorē, animi pathemate revocari possit. Hæc ad febrem dispositio imprimis ad tres quatuorve septimanas post eandem devictam corpori inhæret &, si vernalis vel æstiva fuerit febris, cessat versus tempus autumnale.

5. Salutaris quandoque ad alios præsertim chronicos morbos observata est intermittens febris; Hipocrates jam docuit, & ipse expertus sum, epilepsiam superveniente quartana curari; palpitationem cordis molestanti quartana sanatam vidi; vertiginem inveteratam febre intermittente adjutam vid. diar. 1785. Jun. No. 2. & dyspnoeam insignem v. diar. 1787. No. 3.

Curatio febris intermittētis radicalis consistit in remotione causæ ejusdem proximæ tam sc. excitantis s. irritamenti febrilis quam dispositionis febrilis nervis inhærentis. Cui scopo,

confuadentibus ratione & experientia, aptata auxilia funt:

1. Refolventia f. digestiva & evacuantia medicamina, quibus materia morbi corrigitur, & aufertur.

2. Roborantia remedia, quibus dispositio nervorum febrilis tollitur.

3. Diæta conveniens, qua causæ febrem producentes, & sustentantes avertuntur.

Circa digestiva notari debent.

1. Opportunitas eorundem, quam constituunt a) initium febris, utpote vix hæc absque materia primo debellanda oritur; hoc tempus ad quintum paroxysmum peractum tutissime putatur, b) manifesta signa impuritatum primarum viarum plura vel pauciora sc. anorexia, amarities oris, lingua alba, fitis extra paroxysmos, quæ, quamdiu existant, digestivis tantum tractari debent, ni altera causa citiorem opem desiderans & infra declaranda accedat; c) renovata cruditatum signa post usum roborantium jam jam inceptum imprimis permanente febre, tunc hisce substituenda sunt digestiva.

2. Indoles medicaminum horum salina fit; mea experientia probatus est pulvis digestivus simplex bihorio ad cochleare minus præbitus, cui gustus ergo quarta circiter pars eleôsachari citri apponi potest; si alvus segnis observetur, illius loco, quamdiu opus est, pulvis digestivus cum rheo

confert; in quartanis pulvis digestivus ad quartanam bihorio vel trihorio sumtus melius convenit; infantibus tinctura aperiens ad quadraginta guttas trihorio quadrat; in febribus diu jam protractis etiam simul cum allatis reliquis decoctum resolvens ad mensuram dimidiam quotidie haustum radicali convenit curationi, & præsertim indicatur, dum signa obstructi cujusdam visceris præsto sunt.

Evacuantia remedia feбри intermittenti apta tantummodo sunt emetica, indicata, postquam allata digestiva per aliquot dies adhibita sunt, & si signa cruditatum nilominus persistant, nec non dum cortex chinæ per plures dies absque effectu optato exhibitus fuit; vid. diar. 1783. Aug. & Octobr. No. 2. & 1784. Mart. No. 3. Aut pulvis emeticus solitus pro adultis fortioribus, aut solutio tartari emetici per cochlearia juxta ætatem ægroti dimidia quavis hora ad effectum & quidem die non febrili porrecta conveniunt; vomitum promovet infusum florum chamomillæ. Alia quam hæc allata evacuantia sc. emetica & parca dosis rhabarbari alteri medicinæ ad aperiendam alvum juncta, testante experientia, in febre intermittente nocent & non juvant, imo febrem jam sat diu absentem revocant.

Roborantia, quibus altera causæ proximæ intermittentium febrium pars sc. dispositio nervorum febrilis tollenda est, potissimum reducenda sunt ad unicum corticem chinæ, inter cujus species

cortex chinæ regius optimus præferendus est. Ad utilem hujus applicationem sciri & attendi debent.

1. Opportunitas hujus remedii s. tempus & conditiones morbi, sub quibus adhiberi debet sc.

a) Perseverantia febris post allata digestiva & evacuantia adhibita, quantumque paroxysmum absolutum, & signa cruditatum in primis viis sublata, ita ut lingua, sapor. alvus, appetitus naturali modo aliquatenus se habeant. Quandoque tamen signa candidatum post dictum tempus & factas evacuationes permanentia per usum corticis simul cum febre tolluntur.

b) Absentia obstructionis viscerum, hepatis vel lienis; quamdiu enim hujus signa permanent, securius est, solis resolventibus insistere, & demum post perfectam resolutionem, si febris tamen superfit, corticis usum aggredi. Minutis per longum resolventium usum obstructionis signis, continuantem febrem cortice suppressere licet & dein si opus sit, resolventia repetere. v. diar. 1783. Maj. No. 3. 1787. Mart. No. 2.

c) Periculofum aliquod symptoma febri annexum siue apoplexia, siue hæmorrhagia, siue aliud exceptionem facit a præparatione antea laudata, & ut febris, quo citius, eo melius, per corticem supprimatur, desiderat.

d) Periodicæ affectiones, quæcunque sc. regulari tempore revertuntur, forma tamen ordinariæ febris haud indutæ, ni signa cruditatum præ-

sto sint, etiam absque præparatione per corticem debellari possunt, atque debent.

e) Apyrexia f. tempus, quo paroxysmi febriles silent, putandum a stadio fudoris aliquatenus finito ad unam alteramve horam ante paroxysmum proxime infecuturum; primo, quo cortex contra febres in usum trahebatur, tempore a nonnullis sub ipsa invasione febris præbitus fuit, sed lethalem inde surrexisse effectum refertur, quapropter hæc rejecta est methodus.

f) Recidivans febris corticis usum mox desiderat, nec nisi notabiliora cruditatum signa adsint, opus est præmittere digestiva & evacuantia.

g) Præfens menstruatio non prohibet corticis usum.

2. Forma corticis ingerendi varia esse potest.

a) Pulvis illius ipse, f. ut dicitur, in substantia merito efficacissimus censendus, vel quattalis aqua mixtus, vel mediante syrupo quodam in electuarium, aut per mucilaginem gummi arabici in pilulas formatus.

b) Decoctum chinæ simplex apud debiles v. infantes pulvere ipso quandoque præstantius, vel gustus ergo huic præferendum.

c) Sub clysmate etiam applicari potest, vel decoctum, vel pulvis aqua mixtus; tunc primo per clyfma evacuans intestina purgari debent, & dein corticis clyfma, cui, ut melius retineatur,

scrupulus laudani liqvidi apponitur, injiciendum est sc. qvinque unciae decocti pro adultis, & duæ pro infantibus tripla vice per diem; verum hæc methodus & minus efficax & incommoda cense-ri debet. Aliæ præparationes corticis, sc. ejusdem extractum & essentia vim debellandi febrem, quod me docuit experientia, non habent.

3. Conjunctio corticis cum aliis remediis juxta sequentes regulas instituenda est.

a) Simplex cortex quadrat & sufficit lingua prorsus pura & alvo parum ad laxitatem prona.

b) Cum radicis rhei octava parte combinatus cortex convenit in nonnullis, præsertim lingua non prorsus pura & alvo strictiori.

c) Cum sale ammoniaco atque rheo simul maritatus cortex sub titulo pulveris corticis ad quartanam præstat imprimis contra febres quartanas, nec non si signa obstructi visceris prægressa fuerint, ut vis corticis adstringens magis in-sons sit.

d) Cum corticis cascarillæ octava parte junctus cortex chinæ, si febrem diarrhoea comite-
tur, eligi potest; pertinaciori hac, opium conve-
nit sc, laudani liqvidi Syd. guttæ qvinque ter qua-
terve per diem; si decoctum corticis adhibetur,
mucilago gummi arabici illi apponenda est.

4. Quantitatem corticis ingerendi quod attinet, drachma dimidia bihorio in tertianis & quartanis, omni hora in quotidianis quovis intervallo apyreto consumenda est, donec nullum vestigium febris recurrat; tunc seponitur ejus usus, septimo vero die repetitur, itaque triplici vice, ut quovis septimo die post febrem fugatam dimidia corticis drachma bihorio ingeratur. Si sub largo corticis usu paroxysmi febris tamen eadem circiter vi aliquoties recurrant, adhibita emetica corticem efficacem reddere queunt vid. diar. 1783. Aug. & Octobr. No. 2. & 1784 Mart. No. 3 Ut plurimum febris sumto dicta dosi cortice mox fugatur, rarius sensim decrescendo, quandoque paroxysmus proximus ab incepto corticis usu gravior, saltem non minutus, observatur, deinceps tamen continuato cortici cedens.

Quæ cætera remedia vi corticis febrifuga quodammodo gaudere dicuntur; uti cortex hippocastani, falicis, quercus, radix gei urbani, herbæ quædam amaræ, coffea cæteraque, minus secunda, cortici longe inferiora, sæpius spem fallunt. Arsenicum, certa experientia teste, valde damnosum est.

Diæta in febre intermittente, & quamdiu durat, & ad duas vel tres circiter hebdomades post eandem elapsas observanda respectum habet:

1. Ad aerem, qui temperatus sit; humida & frigida tempestas vitanda est; libero aere, si æstivus non humidus sit, frui non nocet.

2. Ad alimenta; vegetabilia quævis, olera mollia, pisces recentes, non pingves, haleces saluti conveniunt & innocua sunt; verum pisces pingves, caro, indeque confecta juncula fortiora, ova, lac, butyrum nocent, febrem sustentant, ejusque reversioni ansam dant; elapsis quatuordecim circiter post febrem diebus concedenda est caro, initio tenerior vitulina, gallinacea, agnina, semper tamen modice ingerenda, bene masticata, & sale non paucò condita.

3. Ad motus corporis & animi; ex utroque genere nimis violento febrem revocari posse expertum est, ideoque ab his convalescentibus cavèri debet.

Curatio symptomatica affectiones morbosas febri intermittenti, haud quæ tali, sed accidentaliter annexas respicit sc.

1. Apoplecticum s. cæcûm statum in malignis præsentem, contra quem eadem sub paroxysmo adhiberi debet medela, ac in apoplexia non febrili, venæsectio, hirudines temporales, epispatica, clyisma.

2. Dolores fixos, pectus vel hypochondria occupantes, tempore apyreto, graduque notabili timorem inflammationis exhibente, continuantes,

qvales in certa epidemia vernali mihi obvios, venæsectio etiam crebrius instituta, & vesicatorium dein affectæ parti applicitum absque augmento febris juvarunt.

3. Scorbutum febri junctum; tunc utrique morbo convenientia remedia, cortex chinæ cum pomis citrinis aut succo herbarum recentium antiscorbuticarum simul in usum trahi debent.

4. Diarrhoeam adjunctam: tunc pro digestivo infervit anima rhabarbari ad guttas sexaginta bihorio; pro evacuanter radix ipecachuannæ; & pro febrifugo cortex allato modo cum cascarilla vel cum opio combinatus; interdum sub usu corticis oritur diarrhoea, quæ modica, ut salutaris, toleranda est, gravior per compositionem e cortice chinæ & cascarillæ domanda; & demum febre jam fugata, si oriatur diarrhoea, per animam rhei cum quarta parte liquoris anodini mineralis ad guttas sexaginta ter quaterve indies hæc tollitur.

5. Alvi obstipationem; quæ sub corticis usu licet triduum durans nullo auxilio indiget, diuturnior aut clysmate aut pulveris rhei granis quinque singulis corticis dosibus appositis.

6. Vomitum; qui corticem rejiciens avertitur laudani liquidi Sydh. guttis quinque ad quadrantem circiter horæ ante corticis ingestionem sumtis.

7. Obstructionem viscerum imprimis hepatis annexam; tunc hæc ante ipsius febris per cor-

ticem sanationem debellanda & tollenda est, per tincturam aperientem, decoctum radicum graminis & taraxaci atque pilulas resolventes, quæ simul in usum trahuntur. Hepatalgia ab quæ signis obstructionis & metastatica habenda per verficatorium cito abigitur. Febri forsan adjunctus icterus sine hepatis dolore corticis usum non prohibet, sed illi simul cum febre cedit.

8. Tumorem oedematofum crurum, qui non raro febri decrefcenti & præterlapfæ fucce-
dit; quandoque debilitatis effectus, interdum vere metastaticus hic tumor sub continuato corticis usu frequenter cessat, quod si non eveniat & vires ægroti satis reflauratæ fint, pilulas squilliticas numero quinque omni vespere, interdiu tamen triplice vice porrecto cortice, exhibere juvat, verum præmaturus hujus diureticæ medicinæ usus febrem revocare valet. Non raro infusum e baccis juniperi & fumitatibus absinthii talem tumorem fugat, tutiusque pilulis habendum est. Hydrops verus febri male tractatæ vel nimis protractæ superveniens remediis antihydropicis tractandus est nec raro redeunte febre tollitur (vid. diarr. 1784 Mart. No. 3. & 1785. Junii No. 2.) Hydro-
pem junctum febri, cujus paroxyfmi sudore carebant, pulvere temperante camphorato sub æflu porrecto indeque provocato sudore sublato vidi.

9. Alias reliquias post fugatam febrem; sic superstites artuum dolores apud alterum per suc-

cum herbarum antiscorbuticarum (vid. diaria 1784. Mart. No. 3.) & in altero per succum citri (diar. 1784. April No. 2.) tollebantur; frigus dorfi continuum febris succedens vesicatorio diu suppurante juvabatur (vid. diar. 1782. Januar. No. 2.) & tussis molestissima eodem topico inter scapulas applicito sanata fuit (diar. 1785. Junii No. 2.) in altero post vesicatorium frustra adhibitum flores zinci opem ferebant. — Dyspepsia, post febrem & corticis usum non cessans, ope tincturae aperientis amaræ ad guttas sexaginta ter per diem tollitur.

G E N U S II^{dim.}

FEBRIS CONTINUA SIMPLEX

Est febris sine intervallo apyreto, ab initio ad finem continuans, tantumque simplicem s. communem febris ideam habens.

Symptomata & signa sunt:

1. Communia febrilia, frigus initio, dein continuo durans æstus, sitis, pulsus celer elevatus, respiratio frequens.

2. Absentia signorum aliam febrium infra definiendarum speciem indicantium; raro saltem apud nos occurrit febris continua simplex revera talis, quandoque autem initium alterius continuæ

febris faciem simplicis habet & insequenti tempore in magis determinatam indolem evolvitur.

Causæ externæ hujus febris sunt quæcunque sanguinem valide agitantes, spirituosæ largiter ingesta, animi corporisque vehementes motus, grave refrigerium, æstus solis, suppressio subita sanguifluxus soliti.

Causa proxima proinde putandus est sanguinis enormis per allatas causas incitatus motus & calor.

Quoad prognosin sciendum est:

1. Durationem hujus febris variam esse, quandoque intra unicum diem finire, qualis febris ephemera dicitur, quandoque ad septem vel quatuordecim dies extendi.

2. Eventum ut plurimum benignum esse, atque excretionibus manifestis hæmorrhagia, sudore, diarrhoea citò perfici.

3. Transítum illius sæpe fieri in aliam continuam, aut putridam, aut inflammatoriam, aut exanthematicam aut rheumaticam.

Curatio peragenda est febriles motus juxta regulas huic scopo in universum convenientes & supra allatas moderando sc.

a. Diæta antifebrili sc. potu & alimentis vegetabilibus atque aëre temperato.

b. Remediis temperantibus imprimis talis indolis, quæ ad quascunque alias continuas febres sub larva continuæ simplicis forsan celatas apta

est, cuinam scopo optime quadrant cremor tartari ad drachmam dimidiam porrectus biborio vel trihorio aut mixtura acida vegetabilis vel julepium salinum ad cochleare majus bihorio.

c. Obtemperando excretionibus, cum occurrant, criticis, illasque nullo modo impediendo vel supprimendo.

d. Attendendo ad transitum hujus febris in alias continuas, ut hisce tempeſtiva & idonea medela opponi queat; tutiſſima eſt praxis in omni febre continua absque ſignis inflammationis deprehenſa, præbere emeticum, quod nunquam nocet & sæpe hoſtem celatum tempeſtive debellando certius vincit.

GENUS III^{tium}.

FEBRIS CATARRHALIS

Eſt febris continua cum moleſto affluxu ſeroſo ad tunicam Schneiderianam, quæ ſc. nares, fauces, & vaſa aërea pulmonis obtegit.

Symptomata & ſigna ſunt:

1. Communia febrilia; frigus initio, quandoque in progreſſu recurrens, alias æſtus, fitis, cephalalgia tenſiva præſertim frontalis, interdum lumbago, & horum exacerbatio vespertina.

2. Singularia sese in variis tunicæ Schneiderianæ partibus exferentia sc. in naribus per coryzam humidam vel ficcam, in ore per largam salivationem, in faucibus per raucedinem, & nonnullum dolorem, in pectore per tussum, initio fere ficcam, dein humidiores cum sputo sensim spissiore, flavescente, levatorio; quandoque plura horum simul junguntur, vel successe accedunt, initium in capite & finem in pectore habentia.

Causa externa in genere refrigerium est per mutationem aëris vel vestimenti calidioris in frigidum, aut per frigus imprimis humidum pedum contractum, quænam causa maxime tempore vernali efficax observatur; etiam ex epidemica constitutione aëris sæpe generatur (vid. diar. 1782. April & Maj. No. 2.)

Causa proxima meritò habenda est materia quædam peregrina acris ad tunicam Schneiderianam deposita illamque irritando insolitum feri & muci affluxum, tensionem partium dolorificam, atque febriles motus creans; perinde est, siue morbifica materies immediate ex atmosphæra corpori communicetur, quali modo epidemia agere videtur, siue e perspirabili cutaneo per frigus retento & ad partes internas converso ortum trahat.

Prognosis

1. Communiter læta esse potest, sæpius intra paucos, ut septem dies finitur, largo sudore,

raro diutius durat & tunc potissimum solvitur expectoratione larga spissa flava, quæ, licet ad plures hebdomades protracta, præsertim absente pectoris dolore & rita adhibita medela, nullum periculum portendit. Interdum diarrhoea critica in diuturna hac febre observatur & quæ talis tractari debet.

2. Minus benignus hujus morbi exitus etiam possibilis est, vel ob pravam diætam sc. curatrici mox memorandæ oppositam, vel in ægrotis ad phtisin jam dispositis, vel ob neglectam attentionem ad celatam inflammationem pectoris, quæ huic morbo juncta esse, sed ob exiguum dolorem vix animadverti, potest; sub hisce conditionibus catarrhalis febris phtisi initium & ansam præbere valet.

Curationis scopus est moderatio febris & promotio excretionum salutarium; huic congrua auxilia sunt:

1. Remedia temperantia cum diaphoreticis juncta, uti pulvis temperans camphoratus ad cochleare minus ter die sumtus, vel solus, vel si alvus segnior sit, cum granis decem lactis sulphuris junctus; emulsio camphorata v. mixtura camphorata nitrosa cum mucilagine gummi arabici bihorio ad cochlearia duo; vel mixtura diapnoica ad cochleare majus aliquoties per diem, præcipue illis propinanda, qui camphoram ægre ferunt;

Infusum e floribus sambuci cum semine foeniculi eidem scopo infervit.

2. Diæta antifebrilis sc. victus potissimum vegetabilis, aër temperatus; calor lecti ad transpirationem salutarem promovendam aptus commendari debet.

3. Venæsectio, quæ quidem, si pectus ab omni sensatione molesta immune sit, haud requiritur; verum si tensivus ejusdem vel punctorius dolor, etiamsi vagus, adsit, & præsertim in ægrois ad phthisin dispositis, venam, etiam pluries, recare opus est.

4. Expectorantia; in plurimis allata medica sufficit vel appositum mixturæ camphoratæ oxymell squilliticum; apud nonnullos diuturnior permanet tussis, tunc juvat decoctum radicis fenegæ bihorio vel trihorio ad cochlearia duo, nec non jusculum fecalinum mane bibendum &, si deinceps, decrefcente tussi, debilitas notabilis fiat, decoctum chinæ cum fenega alterius loco præstat.

Epidemia catarrhalis, quæ anno 1782 Hafniam ut alias Europæ regiones percurrerat, omnes totque simul invasit homines, ut nec medici, nec medicamenta ægrotis sufficerent; auxilia, quæ præsentibus & absentibus suadebam, mere diætetica erant, sc. calor cubiculi, & si affectio gravior esset, lecti, abstinentia a carneis & calefacientibus, potus largus tepidus decocti avenæ;

omnes ita fauste evadebant, plurimi per sudorem largum quarto die judicati.

G E N U S I V ^{turn.}

FEBRIS PUTRIDA

Est febris continua cum vertigine, sapore pravo, langvore f. deprefione virium notabili (*).

Symptomata in febre putrida poffibilia ad quatuor genera referri poffunt fc. fymptomata febrilia communia, fymptomata biliofa, fymptomata putrefcentiæ, & fymptomata debilitatis f. nervofa.

Communia febrilia fymptomata, tamen ob peculiarem febris indolem fingulari quodam modo comparata funt:

1. Frigus initium faciens, in genere levius, quam in aliis morbis febrilibus, quandoque vix fenfibile, interdum primis morbi diebus recurrens, & cum æftu alternans.

2. Æftus varii gradus, fub certo morbi ftadio fingularis urens, quandoque naturali vix major, imo minor; fitis fefe eodem fere modo habet.

(*) Hanc febrem, typhum quoque dictam, non igitur putridam voco, quia femp̃er putrefcentiam fecum ducit, fed quia ad eandem præ aliis febribus inclinât.

3. Pulsus ut plurimum naturali celerior ad varium tamen minorem majoremve gradum, quandoque vix celerior, alias depressus mollis, imo irregularis, quandoque tensionem nonnullam habens.

4. Urina varia, initio communiter aurantia clara, interdum viridescens, imo nigrescens, sub progrediente & decresciente morbo sedimentum album mucosum deponens, quandoque citrina clara.

5. Cephalalgia varii gradus, semper vertiginosa, alias vel mitis, vel gravior, imprimis tempore æstivo cum deliratione, æstu & rubedine faciei & oculorum (vid. diar. 1782 Jun. & Jul. & 1784 Jun, & Septbr.) quandoque cephalalgia primis diebus intensior, progrediente morbo, in vertiginem conversa.

Symptomata biliosa sc. sapor vitiat, vel spontaneus, vel ingestis annexus, amarus, putridus, raro dulcis, quandoque halitus foetidus ex ore spirans, eructationes malefapidae, lingua mucosæpius flavescenti obducta imo quodammodo aphthosa. non raro oppressio nonnulla cardiæ, nausea, vomituriatio, vomitus spontaneus biliosus, anorexia, & fastidium ciborum, appetitus acidi.

Symptomata veræ putrescentiæ

1. In primis viis; lingua, labia, dentes crusta obsita nigra, illi putrescentem carnem obducenti non absimili; flatus & dejectiones alvinæ

foetidissima, vel sanguinis putrescentis: expansio notabilis abdominis, metheorismus vulgo dicta, putrescentiæ contentorum indeque rarefacto aëri meritò adscribenda, (vid. diar. 1783 Octbr. No. 1.)

2. In reliquo corpore; maculae lividae petechiae appellatae, vibices livescentes majores, maculae sphacelatae, & verus sphacelus, imprimis in lumbis sese exferens, hæmorrhagiæ e variis locis copiosæ, sanguis missus mollis, urina sæpe foetidissima, quæ omnia dissolutionem sanguinis, & quidem e causa putrida contestantur, huc quoque æstus urens referri debet.

Symptomata debilitatis s. nervosa.

1. Externorum sensuum diminuta vis & applicatio; oculi hebetes, auditus sæpe gravis, incuria omnium, appetentiæ prostratae, & vix ipsius morbi, quamvis gravissimi, sensatio.

2. Interni sensus similis affectio s. stupiditas; nulla ad interrogata attentio, factorum oblitio, deliratio in genere mitis, quandoque furibunda, somno similis status absque vero somno.

3. Motrices voluntati subditæ vires notabiliter fractæ; quidam mox initio tantum, quem nunquam antea perceperunt, sensum queruntur debilitatis, quandoque dolorificæ, omnium artuum; situs erectus corporis intolerabilis lipothymiam infert vel minatur, lingua ex ore missa, artusque sub motu tremunt, & tendines involuntariò mo-

veri deprehenduntur f. subfiliunt, singultus quandoque & convulſivi motus accedunt.

4. Motus vitalis ipſe in aliis febribus naturalem normam ſuperans, in putrida non raro debito debilior per pulſum languidum depreſſum, irregularem & frigus artuum ſeſe exſerens.

5. Functiones naturales eadem laborant debilitate, per excretiones alvi & urinæ involuntarias ſæpe obvias, vi ſphincterum infirmatæ merito adſcribendas, denotata.

Gradus febris putridæ, revera & juxta experientiam diverſus, ad triplicem differentiam referri poteſt, ſc.

1. Ad febrem bilioſam, quam conſtituunt ſymptomata febrilia communia, nec non allata bilioſa, & modica debilitas.

2. Ad febrem putridam ſtrictè dictam, ubi ſimul cum aliis febrilibus & bilioſis ſymptomatibus adſunt allata veræ putreſcentiæ ſymptomata & adaucta debilitas.

3. Ad febrem putrido-nervofam, in qua ſymptomata putreſcentiæ & allata nervoſa conjunguntur; quandoque ſymptomata putreſcentiæ nullius fere momenti ſunt, in quo caſu febrem mere nervofam nonnulli medici nuncupant.

Progreſſus ratio in febre putrida etiam differt.

1. Communiter initium illius constituit febris cum symptomatibus biliosis, quæ non sublata transeunt in majorem morbi gradum s. febrem stricte putridam & nervosam.

2. Interdum validiore vi aggreditur febris mox ab initio & biliosis & putrescentiæ symptomatibus stipata; nervosa autem symptomata rarissime nisi in progressu sese ostendunt.

Causæ externæ febris putridæ, teste experientia, esse possunt.

1. Atmosphoeræ s. aëris corrupta indoles variam originem habens sc.

a) E vaporibus putrescentium impuritatum post inundationes relictarum, vel in paludibus fere exsiccatis contentarum; ipse fui testis talis febris in oppido rurali subito exortæ e vaporibus magnæ paludis æstivo calore fere exsiccatae, quæque tantum incolas in ea regione habitantes, versus quam ventus spirabat, invasit.

b) Ex animalibus putrefactis, sic post prælia ex interfectis & non sepultis; huc referri possunt venenatae exhalationes e sepulchris apertis provenire observatae; per foetorem e tumultu tali putridissimum exurgentem ducentos, qui præsto erant, homines putrida febre correptos fuisse refertur.

c) Ex inclusis & exhalationibus hominum siue ægrotantium siue non ægrotantium repletis habitaculis, hinc febris carcerum originem & nomen habet. Ante plures annos ad nosocomium Fridericianum portabantur quatuor futores junioris ætatis, qui fine mensis Octobris calceos parabant in cubiculo, ubi hypocaustum sine apertis fenestris prima vice calefactum fuit, horum tres confestim, quartus post elapsum triduum in febrem putridam incidebant, & illorum unus sub malignissimis symptomatibus septimo die exspirabat; plurimi putrida laborantes febre & in nosocomio suscepti miseris & angustis habitaculis, quæ etiam cum aliis familiis ob paupertatem communia habuerunt, inclusi erant.

d) Ex ægrotis putrida febre decumbentibus; hinc emanans contagium aëriqve vicino communicatum sat certa crebraqve experientia probatum est; sæpe sæpius non modo plures personas ejusdem familiæ sed & alias in eadem domo morantes, aut quæ ægrotos inviserunt, hoc morbo correptas observavi; infectione tali & ipse & plures alii medici hunc morbum nobis contraximus, nec improbabile est, imo experientia ductus credo, lecti strata diu non renovata imprimis ad putride ægrotantes continendos adhibita tandem exhalationibus malignis adeo repleri, ut alii ibidem decumbentes hoc morbo infici queant.

e) Ex occulta qvalitate aëris forsan locis, e quibus advenit, adscribenda, & epidemice agente, vi cujus sub ceteris conditionibus paribus morbus hic uno anno præ alio frequens observatur. (conf. diar. Nosc. Frid.)

2. Victus pravæ indolis ad putrescentiam nimis pronus, & eidem haud debite resistens.

3. Inopia boni alimenti, potus & somni, quibus blandities humorum promoveri & conservari debet, eorumque pronitas ad putredinem præcaveri. Huic causæ febris nostra in oppidis obsessis, navibus & apud pauperes sæpius orta & propagata jure adscribitur; contigit mihi observare, vomitu hæctico laborantes demum putrida interire febre ob defectum nutrimenti, spontaneam humorum putrescentiam correcturi.

4. Excretiones inhibitæ, imprimis cutanea perspiratio suppressa, nec non alvina evacuatio, retenta hinc materia nociva putredinosæ indolis febris ejusdem indolis, contestantibus ratione & experientia, ansam dare potest. (vid. diar. 1786. Julii 1.)

5. Materiæ acris morbosæ e parte quadam corporis, ubi deposita fuit, resorptio, ut hydropicæ, scabiosæ, metastaticæ (vid. diar. 1786. August 1. & Septbr. 1. & 87. Februar. 1. & Mart. 1. & August. 1. & 84 Octbr. 1.)

6. Animi mæror diuturnus & anxia constitutio debilitando nervos & concoctiones atque ex-

cretiones impediendo, consentiente etiā experientia, putridæ febris occasionem, imo originem, præbere valet.

7. Conjunctio plurium allatarum causarum eò certius & efficacius ad producendum hunc morbum agit; sic, qui multis memoratis diætæ vitiis debilitatus est, præ aliis ad febrem putridam e contagio suscipiendam disponitur.

Pronitas ad hunc morbum major in hominibus eundem non passis, quam in aliis præsertim notabiliore illius gradu antea affectis; raro eundem hominem febris putrida plus simplici vice aggreditur & tunc minus periculosa.

Causa proxima febris putridæ quoad indolem meritò habenda est putredinosa humorum constitutio, quænam sententia probatur 1.) e causis externis hujus morbi quæ putrescentem naturam habent, adeoque similem effectum s. putredinosum morbum inducere debent, 2.) ex effectibus s. symptomatibus hujus morbi, quæ notam putrescentiæ manifestam præ se ferunt, qualia sunt putridus sapor, putridus foetor excretionum, facilisque sphaeulosa partium corruptio, & demum 3.) e remediis antiputredinosis huic morbo maxime congruis, cum vero morbus oppositus sit auxiliis, quibus juvatur, nil probabilius est, quam morbum, qui antiputredinosis remediis tollitur, oppositam s. putredinosam habere indolem.

Causæ hujus proximæ fedes triplex vel separata vel conjuncta esse potest:

1. In primis viis sc. ventriculo & intestinis, quorum contenta vix non in omni putrida febre ad putrescentiam vergunt, quandoque solum, reliquis sc. corporis partibus incorruptis, in quo casu febris merè biliosa est.

2. In massa ipsius sanguinis, dum phænomena ex hujus labe modo declaranda, uti æstus urrens, hæmorrhagiæ, petechiæ, maculæ sphacellatæ, adfunt.

3. In systemate nervoso & encephalo, in quas partes penetravisse jure creditur subtile morbi miasma, spiritusque vitales functioni quodammodo ineptos & acres reddidisse, quando motus nervorum irregulares & debilitates varii generis cum morbo nostro junguntur.

Diagnostica signa, quibus febris putrida indicatur, ad duo genera referri debent sc. essentialia & accidentalia.

Essentialia signa vix non semper præsentia & exclusiva s. alteri morbo quam putridæ febri non competentia sunt sequentia simul sumpta sc.

1. Vertigo in situ erecto imprimis percepta vix unquam in aliis febribus obvia, exceptis quandoque exanthematicis.

2. Sapor oris vitiatum amarus vel putridus cum lingua ut plurimum fordida.

3. Langvor & depressio virium initium morbi mox concomitans, ejusdemque major in hac, quam in alia febre querela.

4. Oppressio nonnulla regionem cardiæ molestant in permultis quidem adest, verum haud prorsus constans, aut pathognomonicum signum cenferi debet.

Accidentalia signa putridæ febris talia sunt illius symptomata, quæ non semper præsto sunt, verum, dum occurrunt, hunc morbum indicant sc.

1. Obauditio s. gravis auditus, cujus cum febre continua combinatio indubitatum sistit signum putridæ indolis, utpote hoc symptoma nulli alii feбри supervenit.

2. Stuporis & debilitatis notabilis gradus, sub quo ægroti sese erectos sustentare nequeunt, nec morbi rationem reddere; modicus stupor expertis quidem medicis pro signo inservit, verum minus expertis tantum major illius gradus characterem morbi ostendit.

3. Causæ morbi prægressæ, imprimis illius ortus post commercium cum aliis putrida febre laborantibus habitum, unde saltem certitudo de putrida morbi indole augetur.

Diagnosticæ signa gradus febris putridæ sunt symptomata supra allata cuicunque gradui hujus morbi competentia.

Regulæ diagnosticæ hinc fluentes sunt.

1. Febris continua cum sapore malo, vertigine, debilitate, putredinosæ indolis censenda est & quoad gradum biliosa, five allata sola, five simul alia symptomata, biliosa nuncupata, adsint.

2. Febris continua cum memoratis signis, simulque observatis symptomatibus putrescentiæ pluribus vel paucioribus, stricte putrida judicanda &, si nervosa symptomata jungantur, putrida nervosa nuncupanda est.

3. Febris continua cum adjuncta obauditione, aut stuporis & debilitatis notabili supra descripto gradu, etiam febris putrida & quidem sensu stricte censenda est, quamvis ægroti, ut sæpe obvenit, reliqui status præsentis & præteriti rationem reddere nequeant.

4. Febris continua dictis characteribus essentialibus designata putrida simplex habenda est, quando nulla alterius febris vel inflammationis indicia sub instituto examine deteguntur.

Diagnosticæ signa putridæ febris complicatæ: cum alio febrili morbo junctæ, sunt in universum combinata signa utriusque talis morbi, sic existunt:

1. Febris putrida variolosa, ubi præter variolas adsunt symptomata putrida; virium insignis prostratio, cardialgia molesta, hæmorrhagiæ, maculæ lividæ in pustulis variolosis ipsis vel inter easdem dispersæ; hujus mentio ulterior ad tractatum de variolis pertinet.

2. Febris putrida anginosa, ubi simul cum symptomatibus putridis adfunt anginæ indicia (vid. diar. 1784. Septbr. & 1785. Junii No. 1.)

3. Febris putrida rheumatica, ubi dolores vagi artuum cum putrida febre juncti inveniuntur (vid. diar. 1783. Aug. No. 1. & 1785. Novbr. No. 2.)

4. Febris putrida cum pleuritide spuria aut vera.

a) Febris putrida cum pleuritide spuria f. pleuritis putrida, vel biliosa vocata, ubi nulla vera pectoris inflammatio adest, sed modo symptomata illam mentientia, a causa putrida vel rheumatica dependentia, illaque sublata evanescentia; talem complicationem indicant, 1.) juncta symptomata & putrida & pleuritica, 2.) prævalentior prioris & minor gradus posterioris symptomatum generis, sc. vertigo, stupor debilitas, impuritas oris notabilis & manifesta; e contra dolor & dyspnoea modica; quandoque dolor vagus vel inconstans est, & tunc minus fallax; 3.) frigus, quo febris aggressa fuit, quod in vera inflammatione gravius esse solet, in putridis communiter modicum; 4.) pulsus in pleuritide biliosa sæpius parum celer, imo mollis, in vera inflammatione celerior & tensus; 5.) jam præsens epidemica talis complicatio. (Exempl. vid. diar. 1785. Decbr. No. 1. 1787 Nov. No. 1.

b. Febris putrida cum pleuritide vera; illa censenda est complicatio, ubi symptomata putrida f. biliosa minoris gradus adfunt, pleuritica autem graviora & manifesta, pulsus celer tensus, dolor conflans & gravis, frigus prægressum validius, fitis notabilis, sputum sangvine mixtum, sanguis e vena missus vere phlogisticus. (vid. diar. 1784. Jul. No. 1.)

5. Febris putrida cum hepatitide f. inflammatione hepatis, indicatur per symptomata putrida juncta cum dolore gravi regionis hepatis, præsertim post emeticum adaucto, colore icterico urinæ & cutis, & quandoque illis annexo singultu. (vid. diar. 1783. Jun. No. 1.)

Prognosis febris putridæ duplici judicio constat sc. de duratione & eventu ejusdem.

Duratio febris putridæ indefinita & diversa est, & e gradu symptomatum præsertim deducenda; biliosus tantum gradus citius finitur, imprimis si apta evacuantia mox notabile levamen afferant, tunc intra quatuordecim dies talis febris sæpius cessat; vere putridum autem vel nerovosum gradum habens febris vix intra 17mum diem terminatur, quandoque ad tres, quatuor, sex, imo plures hebdomades protrahitur; terminus tamen, si funestus sit, breviori tempore compleri solet.

Eventus f. exitus febris putridæ triplex esse potest, 1. in sanitatem, 2. in alios morbos, 3. immediate in mortem.

Eventum benignum portendunt.

1. Gradus morbi modicus ejusdemque simplicitas; mere biliosa febris periculo caret, imprimis absque complicatione cum inflammatione internæ cujusdem partis.

2. Constitutio ægroti prægressa bona, non nimis succulenta, nec plethorica, obesa, cacochymica, ubi putrescentia faciliior, & gravior timeri potest.

3. Levamen notabile post adhibita apta evacuantia.

4. Symptomatum in naturalem normam sensim factus & observatus transitus sc. pulsus celeris & debilis in tardiozem & magis elevatum; lingvæ fordidæ ficcæ in mollem & puriorem; stupidi habitus in alacrem; somnolentiæ spuriae in verum somnum, qui tarDESCENTE pulsu optimi ominis est; inquietudinis & motus nervorum irregularis in tranquillitatem.

5. Evacuationes levatoriæ & salutareS, sub quibus morbi decrementum observari solet; uti modica alvi laxitas (vid. diaria 1783. Febr. No. 1. & 1785. No. 1.) urina antea clara dein sedimentosa, salivatio multa (diar. 1785. Sept. No. 1. & Novbr. No. 1.), huc etiam aphtæ referri possunt (v. diar. 1785. Jul. No. 1.) & sat crebro obvia expectoratio.

Exitus febris putridæ in alios morbos duplex, quandoque sc. in febres intermittentes (vid.

diar. 1782. April No. 2. & 1783. Mart. Aug. Sptbr. No. 2. 1784. Sptbr. No. 1.) multo autem crebrius in metastases.

Metastasis f. depositio & collectio materiæ morbificæ in certa corporis parte, indeqve citata localis affectio, febris ipsi putridæ decrefcenti velle evanescenti succedens, notanda habet:

1. Signa talem metastasin præfagientia sc. diuturnitas & gravitas morbi, urina interea clara permanens, subitum febris decrementum absque notabili excretionem, & quandoqve observata epidemica morbi pronitas ad hanc terminationem (vid. diar. 1783. Junii No. 1. & 1784. Octbr. No. 1.)

2. Locum diversum, ubi testante experientia metastasis fieri potest. sc.

a) Ad encephalum ipsum (vid. diar. 1785. Januar. No. 1.)

b) Ad parotides vel alterutram vel utramque (vid. diar. 1783. Sptbr. No. 1. April & Jun. No. 1. & 1784. Octbr. No. 1. 1785. Sptbr. & Octbr. No. 1.)

c) Ad glandulas submaxillares (v. diar. 1784. Octbr. No. 1.)

d) Ad pectus & pulmones (vid. diar. 1783. Mart., April, Junii, Octbr. No. 1. & 1785. Aug. No. 1. &c.); admodum frequens est hæc metastasis.

e) Ad hepar (vid. diar. 1783. Sptbr. No. 1. & 1784. April No. 1.)

f) Ad intestina, (vid. diar. 1784. Jul. No. 1. Nöbr. No. 1. & 1785. Januar. No. 1.)

g) Ad extremitates imprimis inferiores, (vid. diar. 1783. Febr. Novbr. Decbr. No. 1. & 1784. Octbr. No. 1.)

h) Ad ossa ipsa crurum (vid. diar. 1785. Octbr. No. 1.)

3. Modum affectionis diversum partibus tali metastasi inductum sc.

a) Veram inflammationem (vid. diar. 1783. Octbr. No. 1. 1784. Octbr. No. 1. 1785. Januar. No. 1. & Aug. No. 1.)

b) Suppurationem immediatam seu abscessum sine prægressa inflammatione. (vid. diar. 1782. Mart. No. 5. & 1784. Novbr. No. 9.)

c) Sphacelum (vid. diar. 1784. Octbr. No. 1. & 1783. Maj., Sptbr. & Decbr. No. 1.)

d) Serosam collectionem (vid. diar. 1783. Februar. Novbr. Decbr. No. 1. & 1785. Januar No. 1.)

4. Eventum varium; ad encephalum facta metastasis maxime periculosa; non multo melius de parotide duplici judicandum, (exceptiones vid. diar. 1782. Novbr. 1, 85. Septembr. 1 & Octbr. 1, & 86. Junii 1 & Decembr. 1, & 87. Mart. 1 & Decembr. 1); metastasis ad pulmones utplurimum per expectorationem fauste absolvitur, ad

viscera abdominalia dubius est depositionis eventus; ad extremitates facta metastasis ut plurimum salutaris, ni sphacelosa sit (vid. supra allata exempla diarii ad locum metastaseos varium). Etiam efflorescentia scarlatinosa v. partialis v. sensim universalis, in vigore morbi orta & metastatica censenda, dubii plerumque est eventus.

Terminatio febris putridæ immediate in mortem fieri potest.

1. Per læsionem encephali apoplecticam vel similem, quæ timeri potest e congestione gravi & continua sanguinis ad caput, aptis remediis non minuenda, facie & oculis rubris, stupore, delirio, tremore & convulsivis motibus artuum (vid. diar. 1782. Januar 1783. Februar & Jul., Mart. & August. 1785. Januar. Februar. Jul. August. Septbr. No. 1.)

2. Per excretionem enormes imprimis hæmorrhagias e pulmonibus, ano, utero (vid. diar. 1782. April. 1783. April. 1785. Septbr. No. 1,) nec non diarrhoeam profusam (vid. diar. 1782. Novbr. No. 1.)

3. Per meram debilitatem sub protracto & nulla arte tollendo morbo ad lethalem gradum perductam (vid. diar. 1783. Jul. Aug. & 1785. Aug. No. 1,) signa talis exitus sunt sudores frigidi, excretiones involuntariæ, pulsus exilis & demum deficiens, metheorismus partim putredini contentorum partimque resolutioni nervorum inte-

finalium adscribendus; in universum autem signa prænuntia mortis in febre putrida haud prorsus absoluta certaue sunt, sed æger quandoque sub periculosissimo debilitatis statu evadere potest.

Curationis scopi s. indicationes, quibus auxilia in febre putrida accommodari debent, sunt:

1. Auferre materiem morificam in primis viis stabulantem per apta evacuantia, emetica aut purgantia.

1. Debellare putrescentiam contentorum & humorum per remedia sic dicta antiseptica s. antiputredinosa.

3. Sustentare & erigere labentes naturæ vires per remedia roborantia & excitantia.

4. Oppugnare symptomata molesta & periculosa in morbo insurgentia.

5. Eligere & præscribere diætam allatis scopis convenientem.

Emeticorum usus in putridis maximi momenti est censendus, & ob manifestum communiter inde productum juvamen, & quia utilem præparationem ad effectum optatum alterius medicinæ efficit; rita eorundem applicatio respicienda præbet:

1. Opportunum tempus, quo adhiberi debent.

- a) Initium morbi, ut materia noxia in ventriculo & duodeno hærens mox & brevissima via auferri, atque, ne per remoram & distributionem

in toto intestinorum tractu reforbeatur, impediri possit; si morbi gradus modicus sit, impuritatum resolutionem & præparationem per cremorem tartari ad cochleare minus bihorio uno alterove die promoveo, & deinceps emeticum præbeo, si vero gravior sit morbi vis, vel alvi pronitas ad laxitatem, primo, quo possibile est, mane emesis producenda est.

b) Progressus & duratio morbi, etiam si ad duas tresve hebdomades, emeticum iamiam neglectum vel sine desiderato effectu porrectum permittit, imo desiderat, dummodo vires haud nimium debilitatæ observantur; verum si æger jaceat admodum stupidus & immobilis cum pulsu debili & lingua ficca, porrectum emeticum vix vomitum citat, sed non raro laxitatem alvi debilitantem & noxiam producit.

c) Impuritatum primarum viarum signa sc. mucositas lingvæ, pravus sapor, & quandoque vomituritio post primum emeticum quodammodo persistencia, vel sub progrediente morbo iterum exfurgentia, ni supra descriptus debilitatis status obstet, repetitionem emetici, exposcunt, imo ad plures vices; nequidem singultus aut aphthæ tunc temporis contraindiantia emeseos æstimanda sunt utpote interdum talium impuritatum effectus.

2. Indolem eetici putrida febre eligendi; aptissimum merito illud censeatur, quod certam, sufficientem & maxime sursum versus eva-

uationem efficit & dirigit; in fortioribus & ubi contagium nuper susceptum est, validior emesis movenda est per ipecacuanhæ scrupulum cum uno alterove grano tartari emetici; in debilioribus & sensibilibus tutior est solutio tartari emetui partitis dosibus porrecta; ipecacuanha sola haud satis largam excretionem producit, nec, nisi diarrhoea morbo adjuncta, convenit.

Laxantia & eccoprotica variæ indolis secundum gradum & tempus morbi determinanda sunt.

1. Cremor tartari, optima in hac febre medicina, illius tamen gradui primo potissimum conveniens, post peractam emesin biborio exhibendus, non raro sub modica alvi subductione ad sanationem complendam sufficiens; quandoque in gradu debilitatis & stricte putrido, dum lingua admodum fordida & alvus segnior est, nec non sub æstu urenti & pulsu elevato apprime convenit, alternatim cum decocto roborante corticis exhibitus; si vero debilitas minor judicetur absque notabili stupore & pulsu haud adco depresso, mixtura camphorata acida alternatim cum cremore tartari omni hora sumta, vel cremor tartari cum camphora mixtus permultos absque alia medicina ad integram restitutionem perducit.

2. Cremor tartari cum dimidia parte radicis rhei minutis dosibus ad cochleare minus bihorio vel trihorio sumtus etiam bilioso morbi stadio optime quadrat, sub alvo segniori, donec hæc li-

quidior fiat, cremori tartari soli substituendus, cui scopo etiam convenit solutio salis anglicani ad unciam bihorio; peracta emesi absque catharsi, etiam hæc medicina quo citius, eo melius quadrat ad plenam intestinorum expurgationem, quandoque enim fordes excrementitiæ per diu collectæ adfunt, quarum neglectæ vel insufficienti sub morbi initio evacuationi merito adscribenda est diarrhoea sub progressu morbi accedens sæpe periculosa, imo funesta.

3. Pulvis radicis rhei cum dupla parte corticis chinæ s. noster eccoproto-tonicus ad alvum, si non sponte fluat, sub majori debilitatis gradu aperiendam eligi potest, & ad cochleare minus bihorio vel trihorio ad effectum porrigi; decrefcente tamen morbo potissimum convenit.

4. Clysmata convenire possunt, & initio morbi, si alvus per plures dies obstipata fuerit; tunc, antequam emeticum præbetur, alvum clysmate exonerare utile est; & dein in majore debilitatis gradu tutius est, mediante hoc auxilio alvum subducere, quam per supra allata eccoproctica, e quibus nimiam alvi laxitatem & funestam debilitatem oriri posse certò observavi.

Antiseptica merè talia s. acida, uti in universum putrescentiæ opposita, sic etiam putridæ feбри, svidentibus ratione & experientia, apta sunt auxilia sc.

1. Acida vegetabilia, non modo cremor tartari supra allato modo exhibendus, sed & alia, ut succus citri, aurantiorum, acetum vini, fructus-que acidi, quæ fere semper copiose ingerere juvat.

1. Acida mineralia; sc. spiritus vitrioli post debitas evacuationes optime convenit vel solus aqua sufficiente aux decocto avenæ dilutus, vel sub forma mixturæ acidæ mineralis ad cochleare majus bihorio; incremente debilitate præferendum est elixir aromaticum acidum cum dimidia parte liquoris anodini miner. Hoffmanni ad guttas triginta bihorio, quo remedio sæpe tota febris bilio-
sæ cura perficitur. In majore debilitatis & putrescentiæ gradu vel acidum sulphuricum concentratum ad guttas LX vel acidi salis oxygenati drachmæ duæ sub forma clysmatis in decocto avenæ laudantur. Adjungitur quoque cortici acidum nostrum sub forma mox memoranda.

Antisepticam simulque roborantem vim possidens cortex peruvianus v. chinæ; duplici ideo principali in febre putrida indicationi satisfaciens merito egregium censendum est auxilium, etiam experientia sufficienter probatum; circa illius usum respicienda sunt:

1. Opportunum tempus, quo adhiberi debet; hoc constituunt: 1) præmissæ evacuationes & methodus antibiliosa supra laudatæ, 2) incrementum tamen posthac debilitas e pulsu depresso,

stupore notabili, impotentia corpus erectum tenendi, imprimis mensuranda; si accideret medico nimis serò vocato tam enormem ægroti debilitatem observare, absque prægressa evacuatione oportet roborantem inire methodum.

2. Forma hujus remedii sit liquida sc. illius decoctum; prorsus enim improbabile est, intestina nil aliud sub hoc morbo digerentia utile pulveris extractum efficere posse; duplex tale corticis peruviani decoctum mihi in usu est, sc. simplex absque & acidum cum spiritu vitrioli compositum; ultimum, ut validius, præfero &, exceptis tantum nonnullis casibus in symptomatum cura memorandis, exhibere soleo.

3. Quantitas & continuatio decocti corticis gradui & perseverantiæ morbi accomodandæ sunt; uncia, vel simplex vel raro sub insigni debilitate duplex, bihorio porrigenda est; decrescente febre minuatur dosis demum ad triplam modo die vicem; mihi tamen rara obvenierunt ægrotorum exempla, ubi e corticis usu morbus pejor est redditus cum adauctis sc. febre, inquietudine & siccitate lingvæ, prudentis est medici tales animadvertere effectus & medicinam suspectam seponere.

Antiseptica & simul nervina virtute varia pollent remedia, nostro igitur morbo congrua sc.

1. Camphora sub forma mixturæ camphoratae acidæ exhibita, cujus uncia bihorio porrigenda est; illius opportunitas duplex est.

a) Sub gradu febris, ut ita dicam, intermedio sc. bilioso post debitas peractas evacuationes, ob debilitatem modice incrementem ad gradum stricte putridum vel nervosum vergente, tunc convenit mixtura camphorata vel alternatim, ut supra dixi, cum cremore tartari, vel si alvus laxior sit, solâ exhibenda.

b) Sub gradu stricte putrido & nervoso semper quadrat hæc medicina omni hora alternatim cum laudato corticis decocto porrecta.

E liqore nervino ad guttas viginti bihorio porrecto & alternatim cum elixirio aromatico acido, si non æqualem, tamen haud contemnendam utilitatem percepi; imprimis in affectibus spasmodicis faucium sub hoc morbo accedentibus quasi specificum sese præstitit liqvor nervinus (vid. diar. 82. Junii 1. & 83. Februarii 1. & 86. Decem-ber 1.).

2. Moscus in putrida febre egregium & manifesta experientia probatum remedium (vid. diar. 1785. Decbr. No. 1.) sub debilitate & stupore notabilis gradus, & imprimis accedentibus symptomatibus nervosis, tremore artuum, subsultu tendinum, singultu convenit atque requiritur; grana quatuor hujus remedii uncis octo mixturæ cam-

phoratæ acidæ apponere soleo atqve e tam parca dosi vix minorem utilitatem quam e duplo vel quadruplo majori porrecta observavi.

3. Vinum præsertim rhenanum sub summo debilitatis gradu, pulsu depresso, facie & extremitatibus pallidis frigescentibus mirabiles quandoque edidit effectus, five cum alia supra laudata medicina, five solum propinatum, five cum guttis viginta liqvoris nervini in cochleari vini omni hora vel bihorio, dum forsan alia medicamenta recusant ægroti, (vid. diar. 1784. Jul. No. 1.) ad dimidiam mensuram nycthemero tolerari potest; si vero congestio notabilis ad caput sc. illius æstus rubedo, deliratio adsint vel exsurgant, vinum haud quadrat.

4. Fermentum cerevisiæ ad cochlearia duo minora cerevisia diluta post debitas evacuationes alternatim cum mixtura camphorata acida vel sub majore debilitate cum decocto chinæ porrectum sæpius imo in desperatis casibus efficacissimum est remedium.

Remedia aromatica, uti radicem serpentariæ, valerianæ, calami aromatici, cet., quæ alii collaudant, minus efficacia inveni.

Stimulantia f. excitantia externa, uti unguentum sinapinum vel vesicatoria extremitatibus, brachiis, aut cruribus applicita progrediente morbo conveniunt, & ob incrementem debilitatem præcipue illam, quæ magis e malignitate, quam

diuturnitate morbi derivari potest, & ob congestionem ad partes corporis nobiles imprimis caput, & ad avertendas metastases.

Curatio symptomatologica notabilem medicationis partem in febre putrida efficit, variisque, quæ in hoc morbo surgere queunt, symptomatibus accommodanda est; huc pertinent:

1. Capitis molesta affectio & illud versus facta insignis sanguinis congestio, æstu & rubedine faciei & oculorum atque deliratione cognoscenda, hæc triplici auxilio debellanda est, sc. hircudinibus ad tempora applicitis, si pulsus debilis sit; diligenti usu epithematis frigidi, sc. linteo per acetum & aquam frigidam humectato & capiti imprimis derafo frequenter imposito; atque demum vesicatoriis ad brachia vel simul ad crura admotis (vid. diar. 1784. Junii & Septbr. No. 1. &c.)

2. Parotidum s. unius s. utriusque exurgens tumor nullis topicis tractandus est, sed sibi ipsi relinqvendus, donec vel sponte dissipatus vel conversus sit in suppurationem & abscessum, qui tunc incidi & ut alius abscessus deligari debet; ab aliis receptam methodum tales tumores cataplasmate emolliente tractandi ipse fecutus sed minus tutam compertus fui; loco enim attractionis sæpe contrarium emollitione cataplasmatibus efficitur, sc. ut materia deposita resolvatur, itaque in sanguinis massam cum funesto effectû resorbeatur; certissime hoc valet de parotide duplici, in quo casu

modò agendum est per valida derivantia & evaeuantia, uti vesicatoria tam in brachiis quam in suris cum suppuratione diutius promota; nec non per pulverem eccoprotico-tonicum, ita totiesque exhibitum, ut alvus quotidiè ter quatuorve aperiat (vid. diar. 1782. Novbr. No. 1. & 1785. Sptbr. & Octbr. No. 1.) Parotidis suppuratæ iterumque consolidatæ refurgens tumor in uno ægroto sub applicito cataplasmate saturnino & exsudatione largi feri ponè aurem sensim evanuit (vid. diar. 1784. Januar No. 1.) in altero per cataplasma emolliens dissipatus fuit (vid. diar. 1785. Junii No. 1.) Inflammatio parotidis enormis congestionem sanguinis versus caput periculosam cum delirio efficiens sangvisugio hirudinum fausse compescitur.

3. Angina feбри putridæ adjuncta; fauces sunt explorandæ earumque status, si mere inflammatorius notabiliter deglutationi obstans, per hirudines circa laryngem debellandus est. Angina ulcerosa decocto chinæ acido bihorio alternatim cum mixtura camphorata acida sanatur.

4. Pleuritis putrida s. biliosa supra descripta & designata mox instar febris putridæ simplicis est tractanda, (vid. diar. 1785. Decbr. No. 1.) & sub suspecta doloris indole rheumatica vesicatorium affecto loco mox applicandum.

5. Pleuritis vera cum putridæ signis combinata ab initio ut vera inflammatio tractanda est, (vid. diar. 1784. Jul. No. 1.); attendendum simul

est ad morbi insequentem mutationem, deposita enim inflammatoria indole, non raro evolvitur putrida, cui observatae apta tunc apponenda est medela.

6. Pleuritis metastatica sub decrefcente febre oborta instar veræ pleuritidis sc. venæsectione etiam repetita, camphoratis & vesicatorio demum in parte dolenti applicito sananda est, (vid. diar. 1783. Octobr. No. 1. & 1785. August No. 1.) Cæteris frustra adhibitis, cataplasma emolliens sæpe cum usu adhibetur.

7. Expectoratio sub progressu morbi accedens vix non semper salutaris, five critica, five metastatica nuncupanda, communiter puriformis, conservari & promoveri debet; medicationem huic scopo convenientem quandoque decoctum chinæ cum fenega ad cochlearia duo biborio porrectum per se efficit; sub difficultate expectorationis interdum alternatim cum allato decocto profuit, & opus fuit, kermes mineralis granum sachari, vel si alvus laxior fuerit, gummi arabici scrupulo commixtum, nec non vesicatorium magnum medio pectori applicitum, & si tussis diuturna reddatur, jusculum fecalinum omni mane fumendum, (vid. Mart. April. Junii 1783. & plura loca diar. de febre putrida). Maximi quoque interest in hoc casu ad expectoratum ex ore educendum, quod quandoque erectione corporis melius procedit, assistere ægrotis, qui alias stupore

obrupti sputum deglutiendo febrem reproducent cum lethali eventu, (vid. diar. 1784. Decbr. No. 1. & 1785. April No. 1.); in summis angustis etiam emeticum tentari potest (vid. diar. 1785. April. No. 1.) Interdum in hoc casu flores zinci cum optimo effectu præscribuntur.

8. Febris putrida cum hepatitide rara quidem, sed cognitu difficilis, complicatio; hæc enim sub oppresione cardiæ febris putridæ essentialiter pertinente celari potest; attamen si supra allatis signis haud appareat, post præbitum emeticum saltem manifestatur sc. per dolorem notabiliter adauctum, vomitum frequentem spontaneum, & quandoque junctum colorem ictericum, quibus observatis venæsectio & camphorata in usum trahi debent, (vid. diar. 1783. Junii No. 1.)

9. Febris putrida cum rheumatica f. dolore artuum, five minus five magis notabili juncta, ut putrida simplex absque respectu ad alios dolores tractari debet, (vid. diar. 1783. Aug. No. 1. & 1785. Novbr. No. 1.)

10. Vomitus spontaneus nostro morbo adjunctus post rita adhibita evacuantia perdurans, initio morbi julapio salino in effervescentia vel extra eandem porrecto bihorio vel omni hora tractari debet. Infusum radice salicis eodem modo porrectum quandoque præstantius observatur, imprimis si aphthæ simul adsint; sub debilitatis incremento, ubi decoctum cor-

ticis desideratur, hujus unciis octo appositæ liquoris nervini drachmæ duæ contra vomitum profunt; nec non sacculus aromaticus vino & aceto calefactis humectatus & cardiæ frequenter impositus; sub decrefcente febre etiam adeo sensibilis fieri potest ventriculus forsan muco spoliatus, ut ingestis fere omnibus ad vomitum excitetur, in hoc casu tantum blandissima, ut merum avenæ decoctum & quidem parva dosi ingeri debent, (vid. diar. 1785. Jul. No. 1.).

11. Singultus, ut plurimum nervosum symptoma mosco indigens, verum etiam e cruditatibus produci potest emeticis juvandum, (vid. diar. 1785. Decbr. No. 1.) quandoque effectus aphthosæ intestinorum constitutionis, mucilaginosæ requirens, uti decoctum chinæ simplex cum quarta parte mucilaginis gummi arabici vel infusum salab.

12. Diarrhoea post ritas evacuationes institutas continuans & debilitatem notabiliorem secum ducens allato decocto corticis peruviani cum admixto liquore nervino vel melius decocto & mixturæ addita mucilagine gummi arabici loco alterius medicinæ compefcitur (vid. diar. 1783. Febr. No. 1. & 1785. Novbr. No. 1; quod quoque, si aphtæ adjunctæ sint, eligi debet.

13. Dysentericus fluxus adjunctus præsertim juvatur electuario antidyfenterico pro alia medicina præbito omni hora vel bihorio (vid. diar. 1783. Jul. & Octbr. No. 1.).

14. Metheorismus superveniens, si alvus rite fluat, nil præter methodum in univèrsùm valentem desiderat, si verò alvus segnior sit, pulvere eccoprotico-tonico omni hora alternatim cum mixtura camphorato-moscata debellari debet (vid. diar. 1783. Octbr. No. 1.) Egregium autem effectum exserunt clysmata repetita vel ex aqua simplici frigida vel infuso chamomillæ cum aceti vini uncia vel præfertim acidi sulphurici drachma.

15. Enteritis metastatica etiam si cum fluxu alvi juncta venæsectione repetita & emulsione camphorata tractari debet (vid. diar. 1784. Jul. & Octbr. No. 1.)

16. Hæmorrhagiæ, si ve narium, si ve aliarum partium, largum usum spiritus vitrioli & potui ad tolerabilem aciditatem admixti, & sub forma mixturæ acidæ omni hora ingerendæ; si debilitas, quod sæpius observatur, hæmorrhagias concomitetur, decoctum corticis peruviani cum acido vitrioli maritatum quam maxime indicatur simul cum fero lactis aluminoso ad unciam bihorio porrecto (vid. diar. 1784. Octbr. No. 1. & 1785. Septbr. No. 1.)

17. Metastases ad partes corporis externas juxta differentem indolem curandæ sunt; oedema unius vel utriusque cruris si non sponte sub incremento virium & motu corporis evanescat, pilulis squilliticis omni vespera sumtis tolli potest; tumor talis maculis scorbuticis notatus antifcor-

butica desiderat; tumor durus circumscriptus emolliente cataplasmate sensim resolvitur & dissipatur; in abscessum tendens eodem topico maturandus & dein aperiendus est, indeque ortum ulcus haud nimis cito consolidari debet; tophis similes tumores in partibus ossibus exsurgentes unguento neapolitano dissipantur; sphacelosa partium læsio præsertim in lumbis occurrens decoctum corticis peruviani & extus simul cum unguento terebinthinato diligenter applicitum & intus copiose sumtum desiderat. (vid. diar. 1783. Februar. Novbr. Decbr. 1784. Octbr. & 1785. Octbr. N. 1.) In universum indoles grassantis febris est respicienda, quandoque singulariter metastatica, quæ observata per vesicatoria tempestive artibus admota materiam deponendam huc versus trahere & a partibus internis & nobilibus avertere conandum est.

18. Aphthæ in regione oris quandoque pauciores vel nulla ope indigentes vel linctu boracino illito aut collutorii instar admixta aquâ adhibito, facile detergantur, quandoque admodum copiosæ imo fauces obdurantes, suffocationem & apoplexiam inducere valentes curæ medici exacta opus habent sc. frequenti deterfione per allatum linctum, nec non injectione crebra collutorii per syringam, sæpius tamen linctus boracinus ad cochlearia duo minora bihorio alternatim cum decocto chinæ sine alia oris collutione sufficit. Intus decoctum chi-

næ simplex cum mucilagine gummi arabici pro vitanda irritatione requiritur, vel si hoc ferri nequeat infusum radicis saleb.

19. Salivatio interdum fat larga occurrens & critica habenda singularem medicinæ determinationem non desiderat.

20. Transitu febris biliosæ vel putridæ in periodicas f. prorsus intermittentes f. notabiliter remittentes cum manifestis paroxysmis observato, eadem medicatio ac in febre intermittenti adhibenda est.

21. Stupores notabiles, ut obnubilatio visus, vertigo, vesania post febrem devictam remanentia per vesicatorium in nucha applicitum specifico quasi modo juvantur; liquor nervinus ad guttas viginti ter die etiam quadrat (vid. diar. 1784. Mart. & 1785. Junii. Julii. August. Septbr. No. 1.) quinimo observavi excretiones, ob hanc stupiditatem involuntario procedentes post effectum talis vesicatorii mox naturales redditas. Hoc quoque remedio sanatur aphonia ex simili causa orta. In duobus exemplis amaurosis sequela erat hujus morbi; altera ex his ægrotis junior sangvisugio hirudinum e temporibus & vesicatorio nuchæ melior verum non prorsus restituta fiebat, altera coeca parmanebat. Mihi etiam occurrit inflammatio pertinax unius oculi imo cum incipiente suppuratione in margine inferiore tunicæ corneæ, quater opus erat applicare hirudines circa ocu-

oculum, nec non vesicatorium in nucha, dein pone aurem, tandem in brachio, atque cataplasma saturninum oculo continuo impositum, quibus oculus demum prorsus sanatus fuit.

22. Convulsivi motus ut plurimum sub studio nervose putrido accidentes moscho & clysmate ex asa foetida compescendi sunt, eosdem tamen & singularem fere convulsivam inquietudinem extremitatum inferiorum sub studio bilioso emesi fedatos vidi. Observavi quoque faeminam in summo morbi gradu talibus convulsionibus & tetanica rigiditate artuum & dorsi afflictam, quæ post supradicta antispasmodica frustra adhibita vesicatorio in nucha renovato & sumtis laudani liquidi guttis quinque cum quadruplo liquoris cornu cervi succinati omni hora alternatim cum moschi granis duabus ex orci faucibus erepta fuit.

Diæta in febre putrida talis eligenda & præscribenda est, quæ putrescentiæ resistit; huic scopo accommodanda sunt.

1. Aer s. atmosphæra in habitaculis ægrotorum, qui sit purus & subfrigidus; spatiosa hinc præferenda sunt cubicula, aperiantur vel, saltem æstivo tempore, apertæ teneantur fenestræ vel janua; tempore hyemali hypocaustum vel modice vel prorsus non calefiat, acetum frigidum diligenter in vicinia ægrotorum effundatur. Optime depuratur aer vaporibus acidorum mineralium. Afunditur nempe acidum sulphuricum concentra-

tum duplæ parti nitri vel falis comunis vasis vitreis aut lapideis excepti; vel fenſim & repetitis vicibus vel unica vice perficitur hæc affuſio ſed caute præſertim in ultimo caſu ad avertendam noxam mox aſcendentis & concentrati vaporis; quantitas totius maffæ ſaliniæ ratione ſpatii depurandi ſit circiter unciarum decem pro cubiculo viginti lectos ægrorum continente, juxta quam menſuram determinari poteſt proportio deſiderata ad alia ſpatia minora vel majora. Efficacior redditur hæc evaporatio, ſed pulmonibus minus amica, ſi ſali comuni apponatur quinta pars magnæſii pulverati, qualis igitur compoſitio præſertim quadrat ad depuranda habitacula ab hominibus vacua. Svadent alii magno hujus morbi gradu ægrotantes aeri libero exponere, quod experimentum, verum absque ullo obſervato emolumento, inſtitui.

2. Potus, qui ſint aciduli per admixtum acetum, ſuccum citri & ſimilia tales redditi, decocta avenæ, hordei, ceraſorum, infuſum panis toſti materiã potus præbere poſſunt; ſubfrigidi imo ſub increſcente æſtu prorſus frigidi, largi potiffimum in primo & ſecundo morbi gradu, dum dilatio & refrigeratio præſertim indicata ſunt, ſub nervoſa autem morbi ſtatu haud tanta copia potus convenit, utpote viũ roborantem & nervinam medicaminum debitans.

3. Alimenta, quæ durante febre tantum e regno vegetabili depromenda sunt, ut allata decocta, fructus horæi, poma, vel pruni cocta; devicta tandem febre & appetitu viribusque redeuntibus, carnea initio teneriora & modica quantitate permittantur; fami ægrotorum post hunc morbum sæpius enormi caute obtemperandum est, ut recidiva avértatur.

4. Lectus ægroti ita parandus, ne hic nimis incalescat; tegumenta ideo e plumis confecta minus quam alia conveniunt, lectus præterea ad omnia latera sit apertus, nullis involucris accessum aeris liberi impediens circumdatus; famuli situm ægroti in lecto sæpius mutant &, ut mox in dorso, mox in alterutro latere sit, attendant ne exulceratio partium, in quibus decumbunt ægroti, alias in hoc morbo adeo facilis producat; quæ nilominus orta coronamentum (*Krands*) e pilis elasticis pelle involutis paratum ægrotis substernendum est, & ulcus balsamo universali deligandum; exulceratio talis diligenti lotione ægroti per aquam frigidam quandoque præcaveri potest.

Vitanda in febre putrida omnia allatis auxiliis five medicis five diætetis opposita sc. putredinem promoventia & debilitantia, inter quæ utpote præsertim damnosa nominari debent nitrum & venæsectio, quorum prius nunquam, & posterior tantummodo sub certis & supra definitis mor-

bi conditionibus & mutationibus locum habere debet.

Curatio prophylactica contra febrem putridam inprimis epidemice grassantem, cujusque contagiosa vis satis probata est, sequentia desiderat praecepta: 1) oportet sanos vitare conversationem non necessariam cum ægrotis & usum vestium lectorumque in tali morbo adhibitorum, antequam lotionem alioque modo sufficienter depurata sunt. 2) Atmosphæra circa ægrotos perflatione aeris liberi & vapore acidæ minerali diligenter depuranda est. 3) Medici & famuli ægrotis assistentes contra susceptionem contagii se munire debent salivatione crebra, stimulantibus in ore retentis promota, elutione oris per aquam aceto, vel acido minerali vel spiritu vini mixtam, inprimis ante ingerendos cibos; victu bene nutriente potuque confortanti spirituofo, animo hilari & cautione a refrigerio. 4) Quam primum contagio expositi & hunc morbum antea non passi affectionem aliquam queruntur insolitam febrilis quodammodo indolis, uti frigus, cephalalgiam debilitatem, anorexiam cum vel sine reliquis symptomatibus biliosis, rheumaticosve aut catarrhales affectus, subrepentem angvem suspicari oportet, emetico & quidem validiori, imo si minus larga exinde evacuatio videatur, repetito fugandum.

Febris epidemica, quam cholericam vocavi, ad genus bilioso-putridum pertinet, & descripta

invenitur in diario anni 1787. imprimis mensis Decembris.

GENUS V^{trum}

FEBRIS EXANTHEMATICA

Est febris continua, quæcum essentialiter juncta est efflorescentia cutanea, quæ exanthematis vel exanthematum nomine insigniri solet.

Divisio febrium huc pertinentium juxta differentiam annexi exanthematis in tres species fieri potest sc. febrem variolosam, morbillosam, scarlatinofam.

Species I^{mæ}

FEBRIS VARIOLOSA

Est febris continua cum adjunctis pustulis cutaneis suppurantibus, f. quæ certo morbi tempore ut tubercula inflammata in cute apparent, & dein abscessuum minorum adinstar pus concipiunt.

Symptomata febris variolosæ ad essentialia f. constantia, & ad accidentalia f. varietatis referri possunt.

Essentialia symptomata hujus morbi commode in quatuor stadia s. tempora, sibi succedentia dividuntur, quorum singula certam morbi & symptomatum conditionem & mutationem continent & monstrant.

1. Stadium invasionis complectitur tempus a primo morbi aggressu ad ipsam exanthematum s. variolarum eruptionem ad tres aut quatuor dies durans. Symptomata huc pertinentia sunt, frigus & horripilatio, dolor omnium artuum imprimis dorsi, lumborum, quandoque faucium, nec non capitis, pulsus celer tensus, sitis, æstus, vomitus vel vomiturius, cardialgia, pronitas ad sudorem in adultis, somnolentia apud juniores, & insultus convulsivi apud infantes non raro obvi.

2. Stadium eruptionis a die morbi tertio vel quarto ad octavum, circa quod notanda sunt: a) facies pustularum tunc erumpentium, quæ initio apparent parvæ, rubræ, parum elevatae, puncto albo in medio notatae, sensim latiores redditae, magisque albescentes vel flavescentes, b)ordo eruptionis talis, ut primò in facie, dein in collo, pectore & brachiis tandemque in artubus inferioribus proveniant, c) remissio febris sensim major juxta absolutam eruptionem.

3. Stadium suppurationis a die septimo vel octavo ad undecimum diem se extendens; morbi symptomata tunc temporis constituunt a) variolarum ipsarum mutatio sc. incrementum, flavescentes

color, & asperitas, b) tumor rubens dolens sensim increscens, primo faciem dein artus superiores occupans, gradu vario communiter copiae variolarum adæqvato, roseum colorem habens; oculi etiam hujus inflammationis participes redduntur, c) reversio febris post factam eruptionem diminutæ vel fere sublatae, æstus, sitis, inquietudinem & infomniam secum ducentis.

4. Stadium exsiccationis ab undecima circiter die incipiens ad plures non definiendos dies se extendens, tunc siccantur pustulæ, crustaeque obducuntur dura tandem decidua, tumor allatus sensim & febrilis status evanescunt: quandoque imprimis, ubi copiosae sunt variolæ, sub hoc stadio nova exsurgit febris, secundaria dicta, resorptioni materiae variolosae merito adscribenda, non raro vehemens & periculosa.

Accidentalia symptomata variolosae febris s. varietates quoad pustulas ipsas, concomitantem febrem & alia incommoda locum habere possunt.

Variolæ ipsae quoad faciem differunt & distinguuntur.

1. In variolas discretas, quarum singulae proprium locum habent, sc. mediante interstitio libero a se invicem distant; talis variolarum discretarum character faciei tantum competit, & indifferens est earundem conditio in reliquo corpo-

re; hisce attributum essentialiale est tempus eruptionis quarto morbi die incidens.

2. In variolas confluentes, quarum plures vel omnes in facie junguntur ad unicam efflorescentiam constituendam; prædicata hisce competentia sunt, a) tempus eruptionis vel citius se tertio die vel ferius quarto die inveniens, b) modus eruptionis, quæ non, ut in discretis, sensim procedit, sed quasi una vice & magno numero apparet; c) figura eruptionis, quæ mox efflorescentiam erysipelatosam refert, dein ad unam pelliculam, quæ faciem obducit, rubri coloris confluit, post octavum diem aspera fusca redditur, nec ante diem 15tum, vel 20mum exsiccat.

3. In variolas decoloratas, quæ solito colore non gaudent; huc pertinent: variolæ nigrae, variolæ sangvineæ, quæ sangvinem continere videntur, variolæ chrySTALLINÆ, quæ sero replentur, variolæ verrucosæ substantiam duriores uti verrucæ habentes.

Febris variolas comitans variæ indolis esse potest sc.

1. Benigna & solita, quæ in primo stadio modica post factam eruptionem cessat, sub tertio stadio revertens, & tamen tolerabilis est.

2. Inflammatoria gravem æstum secum ducens, inquietudinem, cephalalgiam, dolorem molestum faucium, dorsi, pulsus fortem & tensum,

respirationem difficilem, imo inflammationem pulmonum.

3. Putrida langvore notabili, pulsu debili, vertigine, tremore artuum, maculis petechialibus, hæmorrhagia, imprimis mictu cruento, nullo vel non sufficienti tumore faciei & artuum designata.

Alia symptomata sc. 1) Salivatio apud adultos sub numerosis imprimis confluentibus variolis obveniens, circa eruptionis tempus incipiens, copiosa tenuis, versus undecimum diem spissior, excreatu difficilis, &, ni tumor faciei atque manuum bene procedat, periculosa, ægrotum non raro suffocans. 2) Diarrhoea apud infantes salivationis vices subiens. 3) Reliquiæ post devictum morbum, ut inflammatio oculorum, abscessus, tussis, hæctica febris, oedema crurum; quæ omnia materiæ variolosæ resorptæ & ad varias corporis partes depositæ adscribi debent.

Causa febris variolosæ duplici constat parte. cujus conspiratio necessaria est, sc.

1. Dispositione certa corporis ad hunc morbum suscipiendum; hæc omni ætati communis est, omnibusque fere hominibus, qui illum morbum haud antea passi sunt, semel autem devictum altera aggredi vice nulla fida experientia docuit, rarissima sunt exempla eorum, qui licet infectioni subjecti ab illo intacti manent.

2. Contagio ipso varioloso, quod proprium est hominibus, ceteris animalibus vix nocens; specificum f. semper ejusdem effectus, haud alium morbum producens, quam variolas & quidem simpliciter tales absque complicatione, ita ut variolæ malignæ haud pejus ac benignæ spargant contagium; multiplicativum, ita ut minima pars materiæ variolosæ corpori communicata sui simile vitium integræ humorum massæ inducere valeat; vaporosum, quod vaporis insensibilis adinstar atmosphæra suscipi, contineri, & mediante illa ad loca disita transferri potest; quodammodo perdurabile, quod sc. peregrinis corporibus imprimis vestimentis laneis diu salva inficiendi vi adhærere valet.

Causa varietatum febris variolosæ, hanc sc. in aliis leviolem reddens, non ipsi competit contagio, quod teste experientia nil præter variolas quatales efficit, sed aliis accidentaliter nexis circumstantiis, constitutioni corporum minus sanæ vel conspirationi aliorum morborum; etiam variolas nationem prima vice aggredientes malignioris esse indolis, mitiores autem fieri erga posteros observatum est.

Diagnostica variolosæ febris signa deprimuntur.

1. E symptomatibus essentialibus, sc. ipso exanthemate supra definito & alias satis per se cognito; occurrit quidem alia efflorescentia febrili-

lis, varicellæ nuncupata, variolis quidem fimilis, haud difficulter tamen discernenda partim, quia vera suppuratione caret partim quia stadia variolarum solita haud percurrit, sed cito in conspectum venit, citoque exsiccat & demum, quia febre nullius momenti stipatur.

2. E causis, jam sc. grassante epidemia variolosa ideoque contagio præsentem, atque conspiciente ægroti dispositione, unde febrem in primo stadio eruptione nondum designatam ad variolas tendere suspicandum est.

Prognostica s. eventus signa:

1. Bona, a) tempus, quo aggreditur; initium & decrementum epidemiæ mitioris indolis habetur, æstas & hyems benigniorem facit morbum, quam ver vel autumnus, b) ægroti constitutio sc. ætas a quarto anno ad 25tum, temperamentum laxum (*Blonder*) potius quam strictum (*Brunetter*) variolas suffert, prægressa diæta, unde laudabilis humorum indoles expectari potest, c) variolarum indoles, dum discretæ benigniores sunt & quo pauciores, eo levior & minus periculosus morbus.

2. Mala, quæ minus faustum eventum portendunt.

a) Febris adjuncta valida sive inflammatoria sive putrida imprimis cum congestione notabili ad partes nobiles caput vel pectus, in secundo stadio non remittens.

b) Variolosi exanthematis indoles; confluentes in genere periculosæ, imprimis si non pure repleantur, sed depressæ maneant, vel nigrescant, periculosæ itidem sunt chrysellinæ & verrucosæ; maculæ petechiales variolis intermixtæ, vel hæ sangvineæ, aut nigrescentes, periculosisimæ sunt.

c) Urina pallida sub valida sangvinis congestionem ad caput & micturitio frequens fere inanis, periculosam affectionem encephali annunciant.

d) Hæmorrhagiæ periculosæ, quam maxime mictus cruentus, vix unquam non lethalis ad petechialem statum pertinens.

e) Diarrhoea cum admixta excretionem purulenta & expanso abdomine lethalis, alia diarrhoea modica infantum sæpe salutaris.

f) Salivatio & tumor faciei evanescentes absque subsequente tumore manuum pessimi omnis sunt.

Curatio variolosæ febris, me iudice, commode ad duplicem partem referri potest sc. generalem ad omnia illius morbi tempora & conditiones convenientem, & specialem stadiis singularibus & varietatibus accomodandum.

Generalem in variolis medendi methodum constituit regimen frigidum sc.

1. Aer frigidior, purus, per spatiosa cubicula & apertas, si anni tempus illud permittat, fenestras conciliandus, æger etiam extra lectum,

justo tamen observato moderamine, teneri potest: & in lecto leviter modo tectus sit; tempore hyemali nullus aut vix ullus hypocaufti calor opus est.

2. Victus & potus vegetabilis indolis, acidulus, largus, uti serum lactis, juscula e granis cerealibus parata, fructus horei maturi.

3. Abstinencia a calefacientinm omni genere & qvoad diætam & medicamina.

Specialis cura stadiis singulis adaptanda est.

Primi stadii medicatio continet:

a) Evacuationem primarum viarum, aut mediante emetico, si sapor malus, fordities lingvæ, vomituritio impurum stomachum monstrent, aut si hæc signa absint, per laxans antiphlogisticum, ut aquam laxativam viennensem cum vel absqve sale medio, insequenti tempore etiam alvus, ni sponte fluat, per artem imprimis clyσμα quotidie vel alternis diebus præbendum aperienda est.

b) Febris justam moderationem, modicæ tolerabili sufficit laudatum regimen frigidum, gravius inflammatoriæ indolis cum pulsu duro & affectione molesta topica venæsectionem & mixturam camphorato acidam desiderat; feбри ad putridam vergenti, in hoc stadio adhuc modicæ postperactam emesin cremor tartari opponendus est, petechialis verò quandoqve mox se exferens cum hæmorrhagiis largum usum decocti chinæ cum spiritu vitrioli, ut in morbo

maculoso hæmorrhagico per omnia stadia continuandum desiderat.

c) Derivationem humorum & vis morbi a partibus corporis superioribus ad inferiores, quod fit harum balneis tepidis aut fomentatione tali frequenti atque applicitis ibidem sinapismis, dum illæ e contra sc. caput, oculi, facies aqua frigida diligenter lavantur.

d) Convulsionum infantilium tractationem; & ad has prævertendas, & si præsto sint, tollendas commendo usum syrupi, e manna v. althæa, cujus unciae grana duo mosci orientalis adjuncta sunt, infantibus versus eruptionis tempus ad cochleare minus bihorio vel omni hora præbendi, quo non sufficiente balneum tepidum universale, capite interea per epithema frigidum tecto, nec non hirudines temporibus applicitæ desiderantur & juvant.

Secundi stadii medicatio præsertim ad febrem concomitantem respectum habet; si hæc modica sit, nil præter curam generalem opus est; si nimis languida ad promovendam eruptionem vix sufficiens e pulsu exili indicetur, mixtura camphorata & infantibus syrupus moscatus convenit, si inflammatorius status notabilis sit, venæsectio haud timenda est; si febris putridæ incrementum observetur, huic apta remedia cortex, camphora, moscus in usum trahantur.

Tertii stadii cura debellabit:

1. Febrem, vel resurgentem inflammatoriæ indolis ex adaucta inflammatione variolarum ortam, earumque numero proportionatam, cui potus multus acidulus & mixtura camphorata acida conveniunt; vel continuantem putridæ indolis, in hoc stadio incrementem, quæ debellari debet aut per laudatum decoctum corticis cum spiritu vitrioli, aut per mixturam camphoratam cum mosco simul adhibendam, si symptomata nervosa accedant.

2. Symptomata molesta in hoc stadio præfertim sese exferentia, qualia sunt:

a) Salivatio antea facilis, in fine hujus stadii difficilis, spissa, suffocationem minitans; hujus ergo potus largus fit, os diligenter colluatur sub sputo spisso per aquam oxymelle scillitico mixtam, derivantia remedia etiam commendantur, uti sinapismi circa juncturas manuum, vel pedum, lenia laxantia, spiritus salis dulcis, quatenus diureticum, ad guttas 50 ter indies; imo si periculum suffocationis instet, solutio tartari emetici ad vomitum citandum svadetur.

b) Diarrhoea apud infantes locum salivationis subiens, modica salutaris censenda, nec minuenda est; si nimia videretur, præberipotest syrupi diacodii, mucilaginis gummi arabici ana uncia, mosci grana tria ad cochleare minus bihorio; contra immoderatam talem adultorum cum detu-

mescentia periculosa faciei & artuum, juyamen, si possibile sit, e mucilaginosi cum opiatii junctis ex. gr. infuso saleb omni hora alternatim cum liqore anodino minerali & dimidia parte laudani liqvdi producendum est.

c) Retrogressio variolarum f. depletio earundem subita periculosa ex animi pathemate, aut forti refrigerio ortum trahens, remedia sti- mulantia & cardiaca requirit: ut emeticum, post- eaqve moscum, camphoram, vinum rhenanum, & si diarrhoea adfit, alia contra illam laudata re- media.

d) Urinae suppressio juvatur, dum æger to- rum relinquit & obambulat, imprimis in aere fri- gidiori.

e) Insomnia diuturna molesta juxta qvorum- dam consilium pauxillo opii lenienda est, me ju- dice potius, ut non periculosa, toleranda, impri- mis sub congestione sangvinis & humorum ad caput.

f) Oculi dolentes, rubentes, lachrymantes nil nisi lotionem diligenti per lac tepidum aqua mix- tum opus habent.

Qvarti f. exsiccationis stadii cura consistit in debellanda secundaria febre, qvæ e pure variola- rum in massam sangvinis resorpto producitur, hoc scopo :

a) Impedienda erat talis resorptio per punc- tionem f. incisionem variolarum & puris abster-

sionem, quod etiam ad foedas cicatrices avertendas aptum judicatur.

b) Evacuari debet resorpta materies, quod modo laxantibus perfici potest; undecimo die incipienda est talis methodus purgans per aquam laxativam viennensem, tertio quovis deinceps die repetenda ad quinque aut sex vices; diebus interpositis ingestio feri lactis convenit; cavendum tamen est a fortiori purgatione, quæ materiam variolosam ad interiora convertere potest.

c) Effectus morboſi resorptæ materiæ tollendi sunt, si motus febriles modici sint, allata methodus sufficit; si gravior sit febris absque indicibus localis inflammationis, decoctum corticis cum spiritu vitrioli convenit; si verò dolor exsurgat topicus inflammatorius, mixtura camphorata acida & venæsectio desiderantur.

d) Crustæ variolarum duræ molestæ leniri possunt inungendo oleum amygdalarum dulcium aut cremorem lactis.

Reliquiæ morboſæ post devictas variolas consistunt in læsione unius vel alterius partis a materia ibidem deposita, sc.

a) Abscessus externi, iam maturati, cito aperiendi, vel non maturati & duri emollientibus solitis topicis tractandi, atque ad suppurationem perducendi, ulcera inde orta haud nimis cito consolidanda sunt, & si diutius durant, usa corticis peruviani opus habent.

b) Dolores interiores in vicinia osium timorem materiæ ibidem deponendæ habentes, curatam requirunt explorationem, numne ullibi talis collectionis adsit vestigium, quod tunc emollientibus tempestive tractari debet, vel si tale non adsit, venæsectio, & laxantia repetita adhibenda sunt.

c) Ophtalmiæ supervenientes venæsectione, sangvisugio hirudinum, laxantibus, vesicatorio in nucha diutius suppurante, & cataplasmate ex aqua vegeto minerali cum mica panis parato juvandæ sunt.

d) Tusis purulenta decoctum corticis cum senega & jusculum fecalinum requirit.

I n o c u l a t i o

Est operatio medica, per quam materia variolosa visibilis corpori humano applicatur, & mediante qua variolæ producuntur. Auxilium hoc ad periculum variolosi morbi avertendum sufficienti experientia probatum est, ideoque ab hodiernis medicis fere omnibus & in plurimis regionibus receptum. Fausta hujus remedii applicatio sequentia respicienda habet:

1) Conditiones, quibus convenit, vel non convenit, quales sunt:

a) Ætas; prima infantum, antequam dentes prorumpunt, admodum apta judicanda est; reliquæ ætates excepta forsan senili etiam conve-

niunt; inflans autem vel præfens dentitio, non raro per se periculosa, non modo variolosum morbum tunc simul adjunctum pejorem reddere valet; sed etiam damnum ex illa natum variolis immerito tribui poterat, & ut inoculationis, quamvis infantis, effectus aestimari.

b) Anni tempus opportunum, si electio prorsus libera sit, vernale imprimis mensis Majus censendum est; alia quoque tempora convenire possunt, si certis de causis exempli gratia ad prævertendum naturalas variolas jam grassantes desideratur. Sub epidemia aliarum febrium, scarlatinae, aut morbiliosae subiecta illis disposita & exposita inoculare nefas est, dum conspiratio peregrini morbi timeri potest, indeque majus periculum febris variolosae.

c) Constitutio sanitatis quodammodo bona quoque requiritur; personae aliis morbis jamjam laborantes uti scorbuto, phtisi, vermibus, obstructione viscerum, convulsionibus aut ante inoculationem curandae sunt, aut si hoc fieri nequeat, haud inoculandae.

2) Præparationem subiectorum ipsi inoculationi per octo vel decem dies præmittendam, tendentem ad talem corporis & humorum statum producendum, qualis nec ad inflammationem nec ad putrescentiam inclinat, utpote ex his causis periculum variolosi morbi praesertim dependet, huic scopo conveniunt.

a) Venæsectio imprimis apud adultos & plethoricos.

b) Purgatio primarum viarum per laxans lenitivum, uti aquam laxativam viennensem cum sale neutro, initio præparationis, & altera vice die proximo instituendæ inoculationi porrigendam.

c) Victus vegetabilis, potus largus imprimis feri lactis, abstinencia a calefacientibus vino, caffè, carne.

d) Derivantia, quibus sanguis a superioribus ad inferiores partes dirigitur, sc. pediluvia tepida, capitis autem & faciei lavacra frigida crebra.

Præparatio similis etiam convenit & servanda est illis, qui grassantibus variolis expòsiti inoculationem non admittunt.

3. Materiem inoculandam, quæ e variolis maturis sive naturalibus sive artificialibus depro-mi potest, verum simul apud sana subjecta, quæ nullo alio contagioso morbo laborare nobis cognitum est; modus hanc materiem colligendi præfertim duplex in usu est sc.

a) Recens materia e variolis incisis educi, in vitrea lagenula collegi ibidemque mediante obturaculo fat diu ad usum conservari potest.

b) Filæ per variolas traductæ & materie sufficienter madefactæ diu quoque vim variolosam retinent, præfertim in vitro bene clauso conservata.

4. Partes inoculandas, pro quibus communiter eliguntur brachia & quidem loca eorum pro fonticulis solita; in hisce ambobus operatio instituitur securitatis ergo, ut si in uno forsan deficeret, effectus tamen in altero procederet; interstitio inter pollicem & indicem infitioni etiam convenire possunt, quæ tamen ob insequentem suppurationem minus apta judico.

5. Modum inoculandi s. materiem variolosam dictis partibus applicandi, qui duplex est.

a) Materia recens si applicanda sit, lanceola vel acu ordinaria epidermis solvitur vel abradiatur a cute adeo leviter, ut vix sanguis appareat, huic aperturæ materiæ pauxillum vel guttula mediante eadem vel magis obtusa acu imponitur; brachia dein nuda permaneant, donec imposita materia exsiccata sit, & nulla alia deligatio opus est.

b) Filum si adhibeatur, obliqua & profundior fiat incisio per lanceolam inter epidermidem & cutim, in quo facto foramine filum intromittitur; pro hoc figendo imponitur linteum carptum & dein emplastrum ut diachylon compositum; post duos dies hæc deligatio aufertur, & non renovatur.

6. Progressum variolosi morbi per inoculationem orientis.

a) Tertio vel quarto die post inoculationem, etiam si prægressis diebus exsiccatum ulcusculum parum quoad margines rubet cum linea alba in medio apparente, unde facta infectio mox cognoscitur, die quinto & sexto inflammatio manifestior fit, & dolor nonnullus in brachiis & axillis sæpe sentitur.

b. Septimo vel octavo die, quandoque ferius motus febriles exsurgunt, frigus cum aestu alternans, cephalalgia, lumbago, anorexia, amarities oris, somnus inquietus, vomituriatio vel vomitus, quænam minoris vel majoris gradus postea continuant.

c) Decimo vel undecimo die, raro ferius variolæ erumpunt, febriles motus cessant & ulcus pus maturam habet.

d) Diebus sequentibus decimo quarto vel quinto & deinceps variolæ in suppurationem vertuntur, ulcus brachiorum siccatur, sensimque ipsæ variolæ.

Interdum nulla fit eruptio, sed ulcus brachiorum bene suppurat cum adjunctis quibusdam motibus febrilibus, quoniam casus vices morbi vere variolosi supplet, verum si nec ulcus suppuraverit, nec variolæ provenerint, inoculationem nullius fuisse effectus judicandum est.

7. Curam morbi variolosi inoculati, quæ in univ ersum eadem est ac cura variolarum naturali-

um, attamen in priori casu multo leviori medela etiam ad sequentia puncta limitari potest.

a) Aëre quam maxime libero fruatur æger, quænam regula præsertim valet de tempore eruptionem præcedente, quinimo observatur, febrili æstu & inquietudine molestatum ægrum optime, dum aëri libero exponitur, lavari. Decubitus in lecto, quem æger languidus maxime appetit, non tamen nisi noctu concedendus est, & tunc sub stragulis levioribus.

b) Alimenta & potus sint acidula & vegetabilis indolis.

c) Apertura alvi, ni sponte procedit, manna vel aqua laxativa viennensi modice promovenda est, & dum exsiccantur variolæ, purgatio eodem modo, ac in variolis naturalibus sæpius repetenda est.

d) Symptomata quædam molesta, si inciderent, simili medela, ac de naturalibus dictum est, tractari debent, ulcus brachiorum ex incisione natum sæpius sponte sensimque exsiccatur, si forsan largius suppurat, balsamo universali deligandum est, & si abscessus jungantur, emplastris & cataplasmate emollientibus ad suppurationem promoveri debent.

Vaccinatio

Dicitur operatio, qua vel materia in certis pustulis mammas vaccarum quandoque obfidentibus generata corpori humano inferitur illique pustulas primitivis similes in loco insitionis infert, vel ex his ultimis depromta materia applicatur simili vi comunicativa gaudens. Pustulæ tali modo productæ variolæ vaccinæ dicuntur optimumque sistunt remedium ad variolas humanas non solum præcavendas sed prorsus e terris fugandas. A quo tempore primum observata et divulgata est efficacia hujus remedii, jam per viginti annos numerosissima experimenta, ubique regionum facta et per materiam e vaccinis humanis sumtum instituta, egregiam, nunquam fallentem hujus remedii contra variolas vim prophylacticam Inculenter probarunt nam innumeri et omnes hoc adminiculo usi contagio varioloso, cui variis modis exponebantur, non infecti fuere.

Ut succedat operatio, hæc respicienda sunt

1. Materies idonea depromenda e veris vaccinis imprimis humanis certo dum florent tempore ad octavam nonum vel decimum diem a facta insitione computato, quo materia vel statim, qualis certissimæ est efficacix, applicitur, vel ad usum feriorem et transportationem conservari debet immediate collecta et deposita vel in cylindro vitreo vel inter lamellas vitreas, quarum alteri cavitas lenticularis ad suscipiendam materiam in-

pressa est, quarumque margines cera allinuntur, dicto modo materies inprimis dum a nimio frigore, calore et solis lumine caveatur, per plures menses effica firvari potest; applicanda debet vapore aquæ calidæ solvi, itaque duabus tribusve personis inferi, ut infectio forsan in uno deficiens in altero succedat.

2. Methodus operationis in eo consistens, ut dicta materies mediante lanceola vel acu commoda sub levi solutione epidermidis inter hanc et cutim inferatur præsertim in brachiis, in quibus singulis duo vel tres tales punctus dimidium pollicem a se in vicem distantes instituuntur; brevi dein nuda teneantur brachia ne insita materia abstergatur, nec sanguis forsan proveniens auferatur.

Succedentem operationem indicant variolæ vaccinae veræ inde productæ, sc. tuberculum intense rubrum quarto nempe die in loco insitionis apparens, quod die sexto formam sibi propriam accipit, sc. ambitum lenticulæ, depressionem fuscam in medio, marginem album argenteum humore limpidio plenum, extra cinctum circulo rubro, qui insequentibus diebus ad nonum usque sub augmento ipsius pustulæ magis extenditur cum aliquali intumescencia adjunctisque interdum pruritu, dolore subaxillari, levi sensatione febrili et æstu, quæ tamen, illæso somno et appetitu, intra unum alterumve diem cessant; die duodecimo vaccinae exficari incipiunt cum crusta obscure

fufca verſus diem vigefimum ſecundum vel ſerius decidente; rariffime obſervantur eruptiones vaccinis minus magisque ſimiles in aliis quam inſitionis loco; æque raro puſtulæ non ante nonum diem vel ſerius poſt factam inſitionem erumpunt, in quo caſu vaccinae tamen genuinae habendæ ſunt, ſi ſupradicta ratione procedant.

Prætera utiliffimam illam variolas humans præcavendi virtutem, plura ſunt, quibus vaccinatiõ excellit, ſic nullum ſecum ducit periculum nullaque morbi ſymptomata medicinam poſtulantia; a contagio ſpontaneo immunis eſt facilisque ipſa operatio a quolibet licet artis non perito inſtituenda; in omni tale, ſanitatisque modo et anni tempore æque inſons et utilis, tenelli infantes ſi excipiantur, in quibus operatio quandoque fruſtranea eſt.

Raro deſcriptarum vaccinarum loco proferrumpunt variolæ vaccinae ſpuria, prophylactica illa verarum vi vix gaudentes, ortæ ut credunt, e materia vel debito ſerius a veris vaccinis depromta vel juſto diutius ſervata vel denique ab aliis ſpuriis hauſta: diſtingvuntur a veris 1. præcoci eruptione die primo, ſecundo, tertio poſt inſitionem, 2. forma puſtulæ in medio non depreſſa, ſed elevata 3. indole contenti humoris non limpidi ſed ſpiſſioris puriformis 4. exſiccatione celeri ad ſeptimum circiter diem.

Species II^{da}.

FEBRIS MORBILLOSA

Est febris continua cum maculis parvis, discretis, rubris, parum elevatis, primò in facie, deinceps in reliquo corpore sese monstrantibus.

Symptomata hujus morbi sunt.

1. Generalia febrilia sc. frigus, vel tantum initio, vel diuturnius cum æstu alternans, fitis, cephalalgia imprimis frontalis, somnolentia, lingua alba, quandoque vomitus, diarrhoea, hæmorrhagia narium, pulsus celer.

2. Specialia catarrhalis indolis, uti oculorum dolor, rubor, & quandoque lachrymatio, sternutatio frequens, coryza, oppressio pectoris, tussis sicca vel humida, quandoque faucium dolor.

3. Eruptio ipsa hujus exanthematis haud ad certum tempus determinata, sæpissime tamen quarto die eveniens, alias serius, vel ocys intra quintum diem; primò in facie apparent maculæ morfus pulicum adinstar, obscuræ rubræ, pauxillum elevatae, rarò confluentes, nullam materiem visibilem continentes: ipse cum aliis medicis febrem vere morbillosam absque ullo exanthemate observavi.

4. Continuatio symptomatum, licet gradus minoris, post factam eruptionem ad septimum præterlapsum diem; maculæ tunc sensim palle-

fcunt & evanescunt absqve desquamatione, quandoqve epidermis sub forma farinæ abscedit; miosis pectoris imprimis oppressio facta eruptione notabiliter minuuntur, tussis quandoqve remanet inflammationem & phthisin secum ducere valens.

Causa febris morbillosæ duplici parte constat.

1. Miasmata contagiosa epidemica, quod incertis annis & anni temporibus populum invadit.

2. Dispositione certa ægrotantium omnibus hunc morbum haud antea passis communi, ad juniorem ætatem imprimis pertinente.

Diagnosticæ signa sunt partim allata symptomata, imprimis specialia catarrhalia, affectio oculorum semper dolorifica quandoqve admodum mitis sub affulgente clariore luce tantummodo se exferens atqve exanthema, partim causæ sc. sæviens iam illa febris, & dispositio ad illam suscipiendam.

Prognosis.

1. Prosper ut plurimum sperari potest eventus sub rita morbi tractatione; hæmorrhagia narium levatoria est, diarrhoea aut sudor sub finem morbi accedentes salutare sunt.

2. Periculosus censeatur morbus, si exanthematis eruptio haud bene procedat, oppressio pectoris gravis sit & post eruptionem talis permaneat; maxime autem si exanthema subito evanescat cum insequenti deliratione & pectoris oppressione.

Curatio febris morbillosæ triplicem scopum continet, sc. inflammationi obistere, exanthema, quod criticum haberi debet, conservare & promoveri, symptomata incidentia debellare, quibus indicationibus conveniunt.

1. Venæsectio, si nimirum pectoris oppressio notabilioris gradus videatur; modica verò talis affectio illo auxilio non indiget, utpote post eruptionem sæpius evanescit, si verò continuet, venæsectio uti contra inflammationes ad levamen usque repetenda est.

2. Diapnoica temperantibus juncta, uti pulvis temperans camphoratus, vel mixtura camphorata aut emulsio bihorio exhibita; calor lecti, qui in variolis minus convenit, contrariò modo in morbillis salutaris habendus est pro exanthemate conservando.

3. Alvi apertura ingrediente morbo et sub eodem promovetur mixtura camphorata laxativa partitis dosibus ad effectum desideratum porrecta. Sæpius, abacta febre, unica purgatio sufficit sed in epidemia morbillosa Hafniæ 1791 grassante, admodum gravi, ad reliquias evacuandas et metastases præcavendas frequens purgatio post morbum opus erat, ut in scarlatina.

4. Symptomata incidentia: hæmorrhagia narium salutaris sibi committenda est; vomitus julapio salino bihorio loco alterius medicinæ compefcitur; diarrhoea emulsionem camphorataam &

potum mucilaginosum exigit; tussis sub morbo molesta usum fyrupi pectoralis lenitur, continuans & juncta cum signis inflammationis pulmonalis huic convenientem medelam desiderat, vel si jam purulenta materies expectoretur, antiphthifica solita, jusculum fecalinum, aqua selterana cum lacte &c. adhibenda sunt (vid. diar. 1784. Novbr. & Decbr. no. 2.) Congestio periculosa ad caput, cephalalgia vel delirio indicata, nec epistaxi spontanea mitigata hirudines, ad tempora et vesicatoria ad furas postulat. Exanthema non rite proveniens aut retrocedens praesertim cum adjunctis molestiis pectoris vel capitis camphoram, moschum, vesicatoria vel unguentum sinapium requirunt; affectio oculorum vix ullo alio remedio indiget quam abstinentia a clariore luce, ut plurimum simul cum febre cessans, raro superstes aqua saturnina tolli solet.

Species III^{ta}.

FEBRIS SCARLATINA

Est febris continua cum adjuncto exanthemate rubro, lato, vix elevato quasi ab inuncto fyrupo ribesiae rubrae.

Symptomata duplicis generis sunt sc. constituentia, seu ipsa febris, & consecutiva, quae devictam febrem insequuntur, vel insequi possunt.

Constituentia symptomata scarlatinæ febris sunt:

1. Communia febrilia, frigus initio, dein æstus solito magis urens, sitis, cephalalgia vertiginosa, gravativa, pulsus celerior, quam in aliis febribus, urina aurantia mox sedimentosa.

2. Specialia.

a) Faucium dolorifica affectio, rarissime deficiens cum impedita deglutitione, tumore, & rubore tonsillarum, in quibus quandoque simul maculæ apparent v. albæ benignæ, v. atrolividæ ulcerosæ latius proferpentes, malignæ & gangrenosæ indolis signum.

b) Exanthema ipsum inter primum & quartum diem sese monstrans, communissime die tertio, lata, rubra, fere glabra, aut totum corpus, aut certas tantum illius partes tingens, quandoque pustulæ parvæ instar purpuræ albæ simul sub progressu morbi adsunt; etiam absque exanthemate febris scarlatinosa existit.

c) Cessatio febris ad diem septimum vel octavum.

d) Desquamatio epidermidis manifesta, vel mox post febrem, vel tardius insequens.

3. Accidentalialia & incerta, vomitus sæpe sub aggrediente morbo, diarrhoea, hæmorrhagiarum, deliratio, inflammatio pectoris, etiam in certis epidemiis adjuncta putrida febris observata est.

Consecutiva symptomata febris scarlatinæ etiam incerta, multos non invadentia, communiter post quatuordecim a febre exactos dies sese exferentia variæ indolis sc.

1. Hydropicus corporis status & tumor faciem primo & crura occupans, dein magis universalis cum dyspnoea & urina parca, quandoque obscure rubra et nigrescens, tamen non malignis.

2. Parotidum tumor, quandoque simul cum hydrope, quandoque post illum apparens, inflammatoriæ indolis, imo sibi ipsi relictus ad suppurationem facile pronus.

3. Infaniam & convulsiones etiam, licet rarius, ut effectus hujus morbi observavi.

Causa scarlatinæ febris ut in supra allatis exanthematicis febribus duplici parte componitur sc.

1. Irritamento sc. miasmate contagioso epidemico, plures simul invadente, & ab ægrotis ad sanos migrante; rarius habetur exemplum scarlatinæ sporadicæ.

2. Dispositione ad hunc morbum suscipiendum fere communi omnibus, qui hanc febrem haud antea passi sunt; junior ætas ad trigésimum annum nec non sexus seqvior huic morbo maxime subjecta sunt.

Diagnostica signa sat manifesta sc. epidemica grassatio, febris cum pulsu valde celeri, exanthematis supra descripta indoles, atque faucium mo-

lesta affectio, quibus indicibus illius distinctio a febre morbillosa, scarlatinæ sat simili, non difficulter habetur. Maximi momenti est inspectio faucium ad detegendam indolem anginæ, num sit modica an gravior siue inflammatoria siue ulcerosa, utpote huic differentiæ accomodanda est medicatio.

Prognosis

1. Prosper ut plurimum eventus expectari potest: e centum ægrotis vix quinque mortuos observavi sub ipsa febre, & rarissime aliquis rite tractatus effectibus consecutivis necatur.

2. Minus faustum & periculosum indicium præbet viscerum nobilium gravis affectio, vehemens deliratio, peripneumonia, arti tamen convenienti sæpius cedentes; verum pulsus valde debilis, exanthema vagum, mox apparens & mox disparens periculum insigne portendunt. Puerperis superveniens sæpe lethalis fit.

3. Differt quoque eventus pro varia epidemia; una valde mitem, altera admodum perniciosum morbum producit.

Curatio febris scarlatinæ triplicem partem continet sc. curationem ipsius febris; prophylaxin contra sequelas, & denuo curationem harum sequelarum, si præsto sint.

Curatio ipsius febris scarlatinæ sæpissime antiphlogistica fit, ad quam pertinent.

1. Venæsectio indicata a) sub notabili faucium inflammatione, deglutitionem fere prorsus impediēte, tunc pluries phlebotomia institui potest & hirudines circa laryngem applicari, donec inflammationis decrementum observetur, b) sub adjuncta peripneumonia, contra quam venæsectio solito modo absque respectu ad scarlatinam habito administrari & repeti debet, c) sub insigni sanguinis congestione ad caput cum delirio, cephalalgia & rubedine, ubi præter venæsectionem etiam hirudines temporibus applicitæ conveniunt; apud plurimos autem, ubi allata symptomata haud observantur, venæsectione non opus est, quinimo noxa exinde timeri potest.

2. Diapnoica, & temperantia remedia, uti mixtura camphorata acida, vel emulsio camphorata vel mixtura diapnoica, vel horum loco, dum vomitus adest & durat, julapium salinum; victus, & potus, ut in aliis febribus vegetabilis indolis sint, & alvi itidem apertura pro necessitate vel mixtura camphorata laxativa ad effectum præbita, vel enematribus promovenda est.

3. Derivantia, uti sinapismi ad extremitates inferiores admoti, vesicatorium nuchæ, vel circa collum applicitum sub graviore sc. faucium malo vere inflammatorio; initio & leviori gradui convenit linimentum volatile camphoratum collo antico inunctum.

4. Collutorium in ore crebrò tenendū, ex infuso salviæ aceto simplici vel simul melle rosato mixtum & tepefactum, melius mixtura camphorata acida aliquantisper in ore et ad fauces tenenda omni circiter hora.

5. Si putrida febris signis suis denotata forsan cum scarlatina combinatur, venæsectio haud convenit; faucium vero inflammatione, si gravior sit, per hirudines & vesicatorium diminuta, emesis promovenda est, & dein alia antiputrida methodus adhibenda (vid. diar. 87. August 3. & Octobr. 2.)

6. Si angina ulcerosæ indolis deprehenditur, mox in usum trahenda sunt decoctum chinæ acidum et mixtura camphorata acida, alternatim omni hora ad unciam adhibenda et gargarismi loco et postea deglutienda; quæcunque alia medicina in hoc casu minus secura est, imo nocere potest.

Curatio prophylactica ad avertendas sequelas morbi perficienda est.

1. Per laxantia octavo morbi die in usum trahenda, & dein tertio quovis, vel quarto die repetenda ad quinque vel sex vices, aut mixtura camphorato-laxativa, aut pulvis jalappinus huic scopo quadrat.

2. Per remedia perspirationem & diuresin promoventia diebus reliquis præbenda, quoniam scopo mihi in usu fuit mixtura diuretica ad guttas

sexaginta ter indies maneque et vespere cremoris tartari drachma dimidia cum uno alterove grano camphoræ, si alvus segnior observatur.

3. Per abstinentiam ab aere libero imprimis frigidiori ad tres circiter hebdomades post finitum morbum, neglectæ huic regulæ præsertim malæ hujus morbi sequelæ adscribendæ sunt.

Curatio effectuum scarlatinæ consequentium:

1. Hydropicus tumor sat certò tollitur remediis diureticis, uti infuso juniperino, mixtura ex anima rhabarbari & spiritu salis dulci ana ad guttas sexaginta ter indies, vel cremore tartari ad drachmam ter indies porrecto, vel methodo ad prophylaxin laudata; optime etiam quadrat calor lecti, ideoque si allata diuretica per se sat citum effectum haud producere videantur, etiam imperandus.

2. Tumor parotidum ut plurimum inunctione per linimentum volatile camphoratum dissipatur, & vix nisi neglecta hac medicina in suppurationem vertitur, in quo casu abscessuum solita tractatio requiritur.

3. Inflammatio pectoris etiam hoc tempore possibilis methodum antiphlogisticam requirit, (vide diar. 87. Septbr. 2.)

4. Puerum post scarlatinam leucophlegmaticæ tumentem & subito gravibus convulsionibus correptum juvabam bina venæsectione, clysmate, liqore nervino, epithemate calido & vino & aceto

parato super abdomen die aggressi mali adhibitis, & insequenti die porrecto remedio purgante. In tali casu etiam convenit cremor tartari cum moscho.

Dantur quidem *plures differentiae exanthematum febrilium*, quæ tamen, me iudice, singularem febrium specimen non efficiunt, sed ut symptoma alterius febris, aut inflammatoriæ, aut potissimum putridæ indolis æstimari debent, ideoque vix aliam, quam concomitanti feбри competentem medelam desiderant sc.

1. Petechiæ s. maculæ solitariae, parvæ, obscuro rubefcentes vel nigrescentes, non elevatae, faciem nunquam sed reliquas corporis partes obfidentes. Has nunquam, nisi in febre putrida & quidem graviore gradu ejusdem, observare mihi contigit.

2. Purpura rubra s. maculæ parvæ, rubræ, asperæ, potissimum in pectore apparentes, vix non, quantumque mea docuit experientia, effectus regiminis nimis calidi, atque per illud provocati sudoris.

3. Purpura alba s. miliaria sc. papulæ cutaneæ, seminibus milii similes, elevatae, duriusculæ, albæ, vel pellucidæ, quasi serum limpidum continentes. Nec illas proprium quendam morbum significare credo; in rheumatica, scarlatina, putrida, phthifica febre et in puerperis illas observavi; singularem constitutionem ægrotantium cum

morbis conspirantem potius, quam singularem morbum pro hujus symptomatis origine habeo; vix ullum certum eventum, attamen periculum morbi, quocum neſtuntur, designant; quaſi ſpecifico modo proficuum contra illa exanthemata in acutis apparentia obſervavi liqvoreſ nervinum ad guttas 25 hihorio ſumtum; (exemplum funeſtæ talis cum miliaribus conjunctæ febris vid. diar. 83 Decbr. 15.)

4. Urticata effloreſcentia, maculas ab inſectis urticis ortas referens, febriculam nullius momenti ſecum ducens, & paucis diebus adhibito præſertim regimine diaphnoico, evaneſcens, qua neglecta cautela diſpoſitio ad frequentem hujus incommodi recidivam exoritur.

5. Zona, quæ conſiſtit in puſtulis ſat magnis ſero plenis, urentibus, alterutrum latus abdominis vel pectoris occupantibus, febrem inflammatoriæ indolis ſecum ducentibus, & medelam diaphnoicam antiphlogiſticam ſc. nitroſo camphorata deſiderantibus, quo modo paucis ut plurimum diebus tollitur, quandoqve autem pertinacior eſt morbus et plures hebdomades durans (vid. diar. 1784. Sptembr. 7.)

6. Pemphix, quam conſtituunt bullæ ſ. anpullæ magnæ nucis magnitudinem habentes ſero flavoſcenti turgidæ. Hoc ſymptoma rariffime apud nos occurrens magni gradus putreſcentiæ

signum est, atque validissima acida & antiseptica desiderat.

GENUS VI^{tm.}

FEBRIS PUERPERALIS

Est febris continua feminis recens enixis superveniens, & propria, s. cui non aliæ quam puerperæ, subjici possunt.

Duæ species ad hoc genus pertinent sc. febris puerperalis benigna v. lactea, & febris puerperalis maligna.

Species I^{ma.}

FEBRIS PUERPERALIS BENIGNA

S. LACTEA

Est febris levioris momenti omnibus fere puerperis, tertio potissimum, rarius secundo, quarto vel quinto die post partum superveniens.

Symptomata sunt leves horripilationes, adactus calor, imprimis vespertinus, quandoque aliqualis cephalalgia, pulsus solito parum celerior, mammarum aliqualis dolor tensivus, atque tumor; exacerbatio nocturna, remissio matutina sub sudore.

Causa hujus febriculæ non immerito statuitur congestio humoris lactei ad mammas, mediante qua vasis nonnulla distentio dolorifica inducitur, indeque febris; forsan etiam permutatus sanguinis circuitus, dum sc. sanguis ad foetum fluere solitus post partum in ipsis vasis retinendus est, illisque igitur & cordi ob copiam insolitam quodammodo irritantem.

Diagnos. hujus febris e tempore, quo invadit, et symptomatibus allatis, eorumque levi indole sat facile eruitur.

Prognosis:

1. Duratio febris lacteæ sæpius intra nycthemeron finitur, etiam ad duas tresve dies extendi potest cum exacerbatione circa vesperam renovata.

2. Eventus ipse: a) crebrius benignus, & cessatio febris ad dictum terminum, sub sudore, urina sedimentosa, quandoque largiori fluxu lochiali atque lactis e mammis spontaneo, aut per suctionem infantis promotum profluvio, b) rarius minus faustus per metastasin s. depositionem lacteæ materiæ, aut ad partes externas, earumque inde ortos tumores, ædematosos, inflammationes, suppurationes, doloresque pertinaces (vid. diar. 86 April 4, & August 11, & 87 Februar. 11, & Octobr. 5.) aut ad partes internas, uti cerebrum cum adjuncto delirio vario, acuto vel chronico,

quandoque lethali sæpius etiam post longum tempus sponte cessante; nec non ad alia viscera.

Curatio duplicem partem continet sc.

1. Curationem ipsius febris, quæ, docente experientia & svadente theoria supra exhibita, consistere debet in medela antiphlogistica & emolliente, qua motus nimius temperari, vasa tensa relaxari, & circulatio sanguinis per totum corpus facilis & æqualis promoveri possunt; auxilia huc tendentia tempore, quo febris lactea, vel ejus vestigia & reliquæ adfunt & timeri possunt, ad septem circiter vel novem dies post partum computando in usum præscribenda sunt.

a) Victus antifebrilis tenuis maxime e jusculis farinaceis, decocto avenæ, panis vel pulli; vitanda sunt carnea, spirituosæ, aromatica, potus caffè, & butyrum, saltem illius largior usus.

b) Calor temperatus & atmosphæræ & lecti ad transpirationem modicam, & circuitum sanguinis in partibus exterioribus promovendum conveniens.

c) Qvies animi & corporis, occasiones proin validiora mentis pathemata citare valentes sollicitè sunt avertendæ.

d) Subductio alvi per se minus bene procedens enemate oleoso quotidie aut alternis diebus applicito, vel remedio leniter purgante, ut electuario aperiente, pulvere infantum cum rheo,

mixtura camphorata laxativa, oleo ricini efficienda est.

e) Medicamenta temperantia modice diapnoica, mihi usu recepta est emulsio camphorata vel mixtura camphorata non acida ad unciam bihorio vel trihorio sumta, qvale remedium & motibus febrilibus in univcrsum compescendis & prævertendæ inflammationi admodum congruum æstimo.

2. Curationem depositi lactis:

a) Ad mammas; quam optime perficit suctio infantis; si hæc locum habere nequeat, affectio dolens mammarum avertitur, imo jam præsens tollitur diligenti frictione & inunctione per oleum camphoratum, atque ligatura modice comprimente; nec ineptum est emplastrum e spermate ceti, vel saponatum; e quibus optimum successum præsertim sperare licet, si mammæ distentæ in antecessum depleantur, quod suctu quidem institui solet, facilius vero, imo perfectius et minus dolorifice mammas super vaporem aquæ fervidæ tenendo efficitur; interdum cataplasma e speciebus resolventibus & emollientibus cito resolvit.

b) Ad alias corporis partes; qvalem depositionem f. metastasin suspicari licet e dolore fixo f. affectione locali cujusdam partis in puerperis, imprimis sub depletionc mammarum, minus magisve perfecta accedente; methodus antiphlogistica per venæsectionem, etiam repetitam, & cam-

phorata initio faltem, uti contra alias inflammationes, adhiberi debent; eccoprotica itidem quadrant; abfceffus infurgentes ad maturationem folito modo perducendi funt; tumores oedematofi lente tolluntur partim per eccoprotica partim per diuretica; interdum ut feqvela puerperii obfervatur tumor in alterutro regione iliaca cum vel fine dolore, in primo cafu convenit venæfectio bis vel femel facta, in utroque unguentum refolvens mane et vefpere ad drachmam circiter dimidiam tumori illitum, cujus effectus plerumque votis refpondit; raro cataplasma emolliens requiritur.

S p e c i e s II^{da}.

FEBRIS PUERPERALIS MALIGNA

S. PUERPERALIS STRICTE SIC DICTA

Est febris gravis, vix non epidemica, puerperas utplurimum primo, vel fecundo aut tertio die poft partum, rariffime ferius invadens, & expansionem dolorificam abdominis fecum ducens.

Symptomata & phænomena hujus morbi:

1. Constantiora.

a) Horror vet modo initium faciens, vel dein recurrens, quem in meis ægrotis fere femper obfervavi.

b) Pulsus femper juxta meam experientiam celer, tenfus, vel depreffus, debilisqve.

c) Stomachi affectio, molesta, anxia, cum vomituritione vel vomitu spontaneo quandoque biliosæ materiæ.

d) Expansio admodum dolens abdominis, universalis, quandoque initio morbi mox adjuncta, quandoque post aliquot horas vel die elapso accedens, semperque in hoc morbo præsens.

e) Defectus lactis in mammis, earumque depletio minoris vel majoris gradus, verum apud ægras mihi obvias plenam lactis absentiam semper deprehendi.

f) Lochiorum fluxus debito modo in plurimis persistens.

2. Alia possibilia minus constantia symptomata:

a) Dolor capitis, non modo frontis, sed etiam occipitis, quandoque lumborum.

b) Dejectio alvi sæpius liquida, foetida, quandoque cum tenesmo; stricta alvus rarius observatur.

c) Lingva humida, muco albo flavescenti obducta, interdum sub progressu morbi aphthosa.

d) Tumores dolentes in partibus corporis externis exsurgentes, vel sc. in artubus, vel in alterutra genarum cum intensa rubedine.

e) Inflammatoriæ affectiones pectoris vel capitis imprimis sub proVectiore morbo accedentes, non raro lethales.

f) Grangrænæ signa, ut pulsus celerrimus, sudor pingvis, extremitatum frigens, facies pallidoflavescens, oculi hebetes concavi, aspectus ferrox, convulsiones.

3. Reperta in demortuis vitia duplicis imprimis indolis: a) extravasata materies, aut spissior puriformis, caseosa, plures vel pauciores abdominis partes. intestina, uterum, ejusque partes obtegens, aut liquidior fero lactis non absimilis, quandoque fætorem putridum edens; b) inflammatorius, suppuratus, gangrænosus status mox in una, mox in altera abdominis parte, sæpius in utero, & ovariis atque tubis fallopianis. Mihi etiam occurrit extispicium, ubi præter naturam nil aliud in abdomine, quam enormis expansio intestinorum præsto fuit.

Causa remota s. principium febris puerperalis vix alia statui debet, quam nociva atmospheræ constitutio, certis annis sæviens, cujus sententiæ argumentum est indoles hujus morbi fere semper epidemica; vis aeris tali modo nocendi febriifica censenda est, quæ in puerperas cadens febrem, ut ita dicam, naturalem s. lacteam præmaturè vel ad gradum nimium excitat; naturæ enim vel febrilibus motibus tali modo redditis validioribus, quam qui ad secretionem & depositionem lactis in mammis desiderantur & conveniunt, possibile fit, ut liquidum illud cum massa sanguinis circumductum ad alias convertatur partes, potissimum qui-

dem abdominales ob prægressum partus opus præ aliis relaxatas & debilitatas; haud opus est, ut definita s. ad certam febris speciem producendam tendens aeris noxia vis statuatur; in genere talem sufficere, me iudice, docet ortus hujus morbi non modò per epidemiam puerperalem stricte dictam, sed etiam per alias supervenientes febres ex. gr. scarlatinam, quam puerperas invadentem symptomata veræ puerperalis febris inducere, & illius adinstar lethalem fieri nimis sæpe observavi. Ut causas hujus febris adjuvantes admittere licet alias febrificas cum epidemia conspirantes sc. impuritates primarum viarum, quarum irritatione affluxus humorum adhuc magis versus intestina dirigitur, terrorem, partum laboriosum aut foetus mortui jam putrescentis.

Causa proxima s. læsio corporis prima & principalis in febre puerperali haud inique statuitur irritatio enormis viscerum abdominalium per materiem lacteam morbofo modo huc conversam producta. Argumenta hanc materiæ lacteæ culpam probantia sunt.

1. Defectus lactis in mammis sub hoc morbo observatus; verum cum hoc fluidum tamen in corpore præsto fit, & quoad omnes partes, exceptis mammis, tanquam peregrinum & morbificum aestimari debeat, probabile est, tali efficaci & præfenti irritamento affectiones morbosas exsurgentes adscribere. Sunt, qui huic argumento opponant

experientiam de febre puerperali sub mammis lacte non carentibus exorta, contrarium tamen mihi ipsi nunquam non obvenit, & concessa licet parte talis objectionis, quod sc. mammæ non semper prorsus sub hoc morbo depleantur, non aliud tamen contra nos inde sequitur, quam quod pars lactis ad mammas deponatur; verum aliam illius partem ab abdomen converti non igitur contradictionem involvit, quid! quod! possibile demonstratur per ipsam experientiam & observationem non adeo raram, mihiqne aliquoties obviam, metastaseos lacteæ apud foeminas lac præbentes.

2. Tempus invasionis hujus febris sc. tri-duum a partu primum idem cum tempore febris lacteæ communis; cum autem hæc unanimi fere medicorum consensu ex irritatione fecernendi lactis derivetur, eundem tunc temporis præsentem hostem in febre puerperali accusare non iniquum videtur.

3. Extravasati apud demortuas reperti indoles non rarò lactiformis & copia notabilis; ex mera inflammatione abdominali nec tale, nec tantum, ni ad diuturnius quam in febre puerperali tempus inflammatio protrahatur, extravasatum generari observamus, unde merito concluditur, aliam concurrere materiem & quidem extravasato similem lacteam; interdum quidem parca & ad aspectum mere purulenta invenitur talis extravasatio, verum, me judice, non opus est.

semper eandem materiæ quantitatem tanquam necessariam ad morbum producendum statuere; nonne enim minor copia in femina sensibiliore, vel aliis irritamentis conspirantibus sufficeret?

4. *Metastases* f. *transpositiones* materiæ morbificæ in hoc morbo obvenientes, quibus demonstratur, plus quam meram inflammationem, rarissime in alio casu & modo post longum tempus metastasin efficere valentem, aut putrescentiam in] contentis intestinalibus adesse, sc. materiem transpositionis talis, etiam cito peragendæ, capacem, qualis non modo ob supra allata argumenta lactea habenda est, sed etiam, quia reipso lactiformis reperta est talis deposita materies, quandoque ad mammas reversa, interdum sub alvi depositione, quinimo in abscessibus.

Causæ proximæ in febre puerperali triplex status ex illius effectibus concludi potest, & ad hos declarandos convenit sc.

1. Status meræ irritationis & nondum inflammatorius, quem sub invasione & primo, vix definiendo, morbi tempore supponere licet & sub quo materia lactea partes abdominales aggreditur, illasque irritando dolorificas varias affectiones & motus febriles excitat; an expansio abdominalis e paralyfi & compressione nervorum per adjacentia vasa lacte peregrino turgida derivanda sit?

2. Status inflammationis ex permanente allata irritatione oriens, vix vel rarissime incipienti

morbo annexus, citò tamen, sed ad terminum diversum, causarum irritantium conspirationi & gradui vario respondentem productus, differentes abdominis partes occupans, atque in illis exudationem materiæ morbificæ, suppurationem & gangrænam efficere valens.

3. Status merastaticus, vel universalis, ut ita dicam, melius forsan febris puerperalis secundaria, rarius occurrens, quando materia morbifica, in integram sanguinis massam suscepta febrem continuam sine topica affectione excitat; vel locatis seu traductio materiæ morbificæ s. plenè s. pro parte ex abdomine ad alias corporis partes externas vel internas contingens & per accedentes dolores & tumores harum partium sese exferens.

Diagnostica signa puerperalis febris.

1. Generalia:

a. Epidemica hujus morbi jam observata grassatio, ob quam supervenientis apud puerperas gravioris febris similem naturam suspicari fas est.

b) Tempus invasionis talis febris intra primum a partu triduum, utpote serius illam oriri raro observatum est; febrem igitur eo stadio accedentem tanquam puerperalem timere oportet, minus verò aliam dicto termino succedentem.

c) Symptomata ipsa constantiora sc. grave frigus, molesta stomachi affectio, vomitus & vomitunitio, vacua mammarum conditio, expansio dolens universalis abdominis, quæ præsens indu-

bitatum morbi signum exhibet; verum etiam hoc ultimofigno nondum aggresso morbum suspicari et quatalem mox oppugnare oportet, quo citior enim medela, eo certior illius successus et semper in-
fons, etiam si morbus non esset febris puerperalis.

2. Specialia s. allatum diversum morbi statum denotantia.

a) Status meræ irritationis, sub morbi initium præfens, quamdiu absit circumscriptus abdominis dolor; intra paucas horas interdum finitur.

b) Status inflammationis metus habendus est, si morbus jam per aliquod tempus unum forsitan alterumve diem non mutatus, nec medicina apta tractatus, perstiterit, utpote irritationis in hoc morbo gravissimæ transitus in inflammationem non potest non esse citus atque certus; major, si sub administrata medela irritationis statui congrua dolor & symptomata potius incrementum, quam decreverint, maximus demum, quando dolor, circumscriptus, fixus, prævalens certam regionem abdominis occupet.

c) Status metastaticus facile dignoscitur, partim e seriore morbi tempore, quo oboritur, partimque ex mutata sede affectionis morbosæ ab imo sc. ventre ad alias corporis partes observata.

Prognosis.

1. Duratio hujus morbi sive fauste s. infauste finiti ut plurimum circa quintum vel sextum diem

absolvitur, ulterius protractus morbus haud stricte puerperalis febris censendus est, sed illi succedens metastaticus status, qui pro vario, quod afficit, viscere terminum diversum habet; interdum intra triginta sex horas miseras necat.

2. Eventus ipse, a) communissimus & per ipsius morbi vim vix non semper lethalis, saepissime mediante inflammatione, suppuratione, & gangæna visceris cujusdam abdominalis, imprimis partium uterinarum, quandoque mediante metastasi ad pulmones vel encephalum, b) rarius salutaris s. in sanitatem e convenienti artis auxilio tantum expectandus.

3. Signa eventus.

a) Benigni s. e quibus spem sanationis habere licet, sunt: prima invasio morbi per ritam medicationem mox oppugnata; decrementum s. levamen symptomatum e tali medela statim observatum; alvi fluxus levatorius; metastases in aliis corporis partibus praesertim externis exurgentes cum notabili abdominis euphoria.

b) Infausti: inflammationis jam praesens status, attamen nonnullos etiam sub eo sanatos casus observavi; accedentia symptomata gangraenae solita absolute lethalia, metastases graves ad pectus vel caput, nec non incompletæ metastases ad artus absque euphoria abdominis. Febris metastatica periculossima habenda est, diu durans et demum per hecticam consumptionem funesta, nisi

natura ipsa, quod tamen raro sperandum est, materiam morbificam in abscessum externum convertere valeat, vel quod in paucis observatum est ad intestina deponere et per fluxum crebriorem mucosum excernere, cui scopo frequens clysmatis emollientis usus convenire videtur.

Curatio febris puerperalis diverso ejusdem statui, quod per se intelligitur, accomodanda est.

Curatio status irritationis tempore, quo ille praesens est, ceu morbi primo & sub invasione ejusdem mox instituenda & inchoanda est, utpote minima mora periculum oriundae inflammationis habet. Scopus hujus medicationis alius esse nequit, quam irritationem & irritamentum tollere, aliorum dirigere & iners reddere; auxilia igitur congrua essent evacuantia, derivantia, involventia, qualia sequens per experientiam potissimum probata methodus continet sc.

1. Emetica circa quae observamus.

a) Opportunum illa praebendi tempus, quod est prima morbi invasio, quo citius, eo melius; quo plures horae ante usum eorundem praetereunt, eo minor juvandi spes; insequenti die repetenda est emesis, etiam si primo illius usu symptomata minuta videantur, quinimo si morbus haud sufficienter decreascit, ejusdem evacuationis ad tertiam, quartamve vicem repetitio fieri potest; in plurimis mihi obviis exemplis unica emesis adeo efficax

fuit, ut reliquiae morbi methodo infra memoranda cessaverint.

b) Medicamen ipsum: solutio tartari emetici partitis dosibus ad effectum vel, si diarrhoea adest, pulvis radiceis ipecacuannae. ad scrupulum porrectus.

e) Modum, quo emesis contra hunc morbum agit & juvat; quem non modo in evacuatione cruditatum irritantium consistere credo, sed etiam in producenda & augenda contractione tubi intestinalis, ita ut affluentiae materiae morbificae lacteae magis resistat. Sunt etiam, qui credant, vasa lymphatica ad functionem resorbendi melius peragendam sub emesi excitari, quo modo derivatio lactis ex abdomine cogitari potest.

2. Post peractam emesin indeque productum levamen reliqua cura absolvitur modica alvi subductione ope olei ricini americani ad unciam dimidiam trihorio vel rarius et quidem quotidie efficienda, donec dolor et tumor abdominis cessaverint; raro clysmatis usus simul requiritur. Interea convenit liquorem nervinum unacum oleo ter quaterve per diem porrigere. Adhibetur quoque cum fructu post absolutas evacuationes mixtura acida mineralis cum moschio omni hora vel bihorio.

3. Mucilaginosae pro potu sub integro morbi decursu largiter ingerenda; uti decoctum avenae, hordei vel infusum seminis lini; si forsan diar-

rhoea profusior adfit, quandoque cum aphthis, mucilago gummi arabici, vel infusum radicis saleb conveniunt.

Experientia tamen docuit, epidemias hujus morbi differre talesque dari, in quibus emesis speratum effectum non semper producit.

Curatio status inflammationis supra definiti, quo hic locum habet, tempore instituenda est; 1) per venæsectionem sæpius usque ad productum notabile doloris decrementum iterandam. 2) Per emulsionem camphorata ad cochlearia duo majora bihorio porrectam. 3) Per inunctionem abdominis cum linimento volatili camphorato vel melius unguento resolvente crebrius, imo bihorio institutam, quæ inunctio a morbi initio adhibita, superimposito simul abdomini sacculo aromatico camphorato, aliquoties juvasse videtur.

Curatio status metastatici duplex est: si metastasis ad partes internas, pulmones, vel cerebrum facta observetur, eadem medela ac sub statu mox memorato, inflammationis dicto, adhibenda est; si verò metastasis ad partes externas fiat, emollientia cataplasmata ad promovendam suppurationem desiderantur, & abscessus, quam primum maturatus est, aperiri debet.

Prophylaxis gravidis tempore grassantis epidemiae puerperalis svadenda me iudice spectare debet ad dispositionem febrilem tam inflammatoriam quam bilioso-putridam avertendam, cui sco-

po ultimo graviditatis tempore conveniunt. 1) Diæta tenuis potissimum vegetabilis. 2) Alvi modica per eccoprotica subductio. 3) Venæsectio in plethoricis, & si dolores abdominis sese ante partum exferant, repetita. 4) In quacunque febre, non manifesto inflammatoria, puerperas aggre-
diente mox emeticum præbendum est, quo simul metastases lacteæ avertuntur. Nonne etiam sub hac epidemia præsertim in nosocomio puer-
perarum grassanti prophylaxeos ergo conveniret, emeticum mox absoluto partu, morbi signis li-
cet nondum præsentibus, exhibere? (vid. diar. 82. Januar. 5. Mart. 7 & 8. Jul. 2. & 86. Septbr. 3. Octbr. 10. Novbr. 8. Decbr. 6.)

O R D O II^{us}.

PHLEGMASIA s. INFLAMMATIO

VEL FEBRIS INFLAMMATORIA

Est febris continua cum adjuncto dolore fixo circumscripto f. in certa parte corporis hærente.

Symptomata inflammationis sunt.

1. Communia febrilia: sc. frigus initio, alias æstus, fitis, urina rubra, lingua ficca, pulsus ce-
ler tensus, nec non sanguis e vena missus sub-

stantia durus, ut plurimum crusta alba, lardo simili, quæ crusta phlogistica dicitur, obductus, quod uttimum phænomenon tamen febris quatenus inflammatoriæ competit.

2. Particularia in parte ipsa affecta dolente:

a) Dolor ipse, constans, s. non intermittens, & fixus s. in eodem loco permanens, alias quoad sensum ægri diversus punctorius, pulsatorius, tensivus, pressorius.

b) Calor, & rubedo adaucta, tumor & durities præternaturalia, in externa inflammatione sensibus obvia, atque sub simili affectione interna per analogiam statuenda & per extispicia demonstrata.

c) Functio, quam pars affecta absolvere debet, læsa, difficilis, minus magisque impedita.

Gradus inflammationis diversus est cum secundum extensionem affectæ partes tum secundum sensibilitatem & nobilitatem ejusdem, cui gradui consentit adjuncta febris, in leviori inflammatione vix percipienda.

Causæ remotæ inflammationis sunt omnes potentiæ dolorificæ certo gradu in partem quandam corporis agentes sc.

1. Frictiones validæ, diuturnæ.

2. Distentiones partium similes, uti per fracturas, luxationes, compressiones ut sub partu laborioso, & contusiones, quæ omnes distendendo agunt.

3. Vulnerationes s. solutiones continui per rupturas, punctiones, incisiones.

4. Frigus notabile præfertim incalescenti parti admotum; e largo potu frigido non raro inflammationes internæ excitatæ sunt.

5. Æstus validus solis, vel ignis artificialis, vel partis vicinæ jam inflammatae, (vid. diar. 1783. Febr. n. 4. & 1784. Mart. n. 11.)

6. Acrimoniae variæ; vel extus applicitæ, ut rubefacientes imprimis cantharides; vel ingestæ, ut venena, medicamenta drastricta, inflammationem intestinalem producere valentia; vel per morbos generatæ, uti rheumatica, arthritica, purulenta, metastatica, variolosa, morbillosa, scarlatinosa, dysenterica, quales omnes parti, in quam agunt, inflammatorium statum inducere possunt.

7. Dispositiones ad morbos inflammatorios suscipiendos, partim universales sunt, nimirum corporis habitus plethoricus & temperamentum strictum capillis nigris notatum, & particularis debilitas, præfertim ab inflammatione antea affligente superstes; satis enim experientia constat, partes antea inflammatas inflammationi potissimum esse expositas.

Causam proximam s. statum partis inflammatorium constituit sanguinis præternaturalis accumulatio, atque retardatus motus in vasis minoribus, unde hæc nimis replentur, & ad tantum gradum distenduntur, ut dolor notabilis inde exurgat.

1. Accumulationem nimiam demonstrant inflammatae partis tumor & rubor, qui ab alia causa quam humorum & quidem sanguinis plenitudine particulari produci & intelligi nequeunt.

2. Retardatus sanguinis motus in parte inflammata adeo necessarius est ac ipsa accumulatio, si enim sanguinis refluxus eadem facilitate ac affluxus perficeretur, nulla accumulationis causa, nec ideo ulla accumulatio existeret; juxta quorundam sententiam prorsus impeditus esset sanguinis transfluxus in parte inflammata, verum huic obstat cita e plena tali stagnatione producenda corruptio & putredo, quæ tamen modò in maximo inflammationis gradu s. rectius inflammatione in alium morbosum statum nempe gangrænosum conversa locum habet.

3. In vasis minoribus, vel sangviferis & ferosis, accumulationem fieri probat coloris in parte inflammata mutatio ex albido in rubrum, quod tantum e sanguine rubro in vasa non sangvifera penetrante declarari potest.

4. Distentionis vasorum certus gradus & perseverantia, ita sc. ut notabilis exinde & constans dolor producat; quælibet enim in parte quadam præternaturalis congestio non ideo inflammationis ideam habet, ni gradu allato & sufficienti gaudeat.

Theoria inflammationis nexum illius cum causis & effectibus complectitur s. modum, quo e

causis remotis proxima, & ex hac symptomata inflammationis intelligi & declarari possunt.

1. Modus, quo causæ remotæ dolorificæ, seu dolor inflammatorium statum producunt, consistit in certa actione venarum & arteriarum vi doloris excitata, & mediante qua sanguinis accumulatio & retardatus motus effici possunt sc.

a) Venarum fines vi irritationis & doloris constringuntur, ita ut humores & sanguis ab arteriis excipiendi difficilius admittantur & per venas refluant; venarum talem ex irritatione contractionem lachrymatio irritati oculi probat.

b) Arteriæ itidem dolore irritatæ in motum fortiolem & celeriolem citantur, testante pulsatione in arteria ad partem inflammata pertinetem validiori, quam in aliis corporis arteriis; in dolenti & inflammata manu talis arteriæ affectio observari potest. E constrictis ita per dolorem venis sanguinis impeditus a parte inflammata refluxus, & ex arteriis validius commotis sanguinis ad inflammata partem fortior impulsus & copiosior affluxus intelliguntur; ex utraque autem, ut accumulatio producat, necesse est.

2. Modus, quo symptomata inflammatoria ex allata inflammationis causa proxima declarari queunt.

a) Dolor inflammatorius est effectus proximus distentionis vasorum & adjacentium nervorum, quæ per accumulationem sanguinis effici-

tur. Dolor proinde haud secus effectus, quam causa inflammationis est.

b) Tumor & durities inflammatae partis ex adaucta in vasis materia f. sangvinis copia, & rubedo, quia accumulata materies est ipse sanguis ruber, facile comprehenduntur.

c) Caloris incrementum partim adscribi debet majori copiae collecti sanguinis, unde attritus major f. plurium sanguinis globulorum produci-
tur, partim vasorum tensioni adauctae, vi cujus attritus fortior fit, ac si sanguis absque impedimento per vasa minus vel naturaliter tensa transfluat.

d) Febris inflammatoria est effectus doloris inflammatorii f. per inflammationem producti; citatus hic f. febrilis motus potissimum quidem in arteriis irritati & inflammati loci sese exferit, per consensum tamen ad totum systema arteriosum ejusque principium f. cor propagari potest, huic enim, & vasis ab illo ortum trahentibus idem iudice tribui potest consensus, qui fibris omnibus cor componentibus competit; unica enim cordis fibra per acum ex. gr. irritata omnes reliquae fibrae f. integrum cor movetur, similem consentientem actionem totius arteriosi systematis credere fere plus quam probabile est.

e) Pulsus tensus inflammationibus communis merito consensui omnium arteriarum adscribendus est, vi cujus idem status f. eadem tensio re-

liquis arteriis communicatur, quæ in arteriis inflammatae partis locum habet,

f) Crusta sic dicta phlogistica sangvinem e vena missum in morbis inflammatoriis obducens forsan oritur e nexu lymphaticæ et grumosæ sangvinis partis per morbum ita debilitato, ut prior ad separationem inclinet, et levior sursum petat; lymphaticam verò partem efficere crustam eo demonstratur argumento, quod sanguis eductus in uno vase sæpe densus & tunc absque crusta invenitur, in altero quoad substantiam laxior & tunc crusta obductus, unde constat materiem coagulantem s. lymphaticam efficere crustam; dum supernat.

Terminatio inflammationis diversa ratione fieri potest;

1. per resolutionem in sanitatem,

2. per exudationem,

3. per suppurationem,

4. per necrosin s. mortificationem,

5. per indurationem s. schirrum.

Resolutio inflammationis est diminuta sensim quantitas sanguinis in parte inflammata accumulati ad naturalem modum. Resolutionem producit & promovet triplex causa: decrementum vis & copiae sanguinis ad partem inflammatam affluentis, ita ut sanguis haud amplius immoderato gradu in vasa minora propellatur; adaucta vis arteriarum contentum sanguinem debito motu pro-

pellendi; relaxatio venarum ita ut refluxus sanguinis accumulati melius procedat; sub tali inflammationis mutatione sanitas integra absque morboſa ſeqvela reſtituitur.

Exſudatio terminat inflammationem, dum vaſa inflammata adeo diſtenduntur, ut pori parietum aperti partem contenti liquidi transmittant, quod ideo ſub forma lymphaticæ vel puriformis materiæ in ſuperficie inflammatæ partis provenit, illamque obducit, dolorifica tenſio hinc ceſſat & vaſa depleta debitum tonum & diametrum recipiunt. Talis exſudatio ſeſe oſtendit in ſuperficiali inflammatione cutis & pulmonum ſub expectoratione puriformi, in gonorrhoeis ſub ſimili excretionem per urethram, nec non perluftratis poſt mortem viſceribus inflammatis tali materia haud raro obductis; haud improbabile eſt, materiem hanc exſudantem ejusdem indolis eſſe, ac cruſtam phlogiſticam, forſan ſuperficie internæ vaſorum ſub inflammatione adhærentem; ſi inflammata pars ita diſpoſita ſit, ut materia inde exſudans evacuari & auferri poſſit, etiam per hanc inflammationis terminationem & poſt perfectam exſudantis materiæ excretionem plena ſanitas producitur; ſi verò intus exſudat materia, evacuationem non admittens, inflammationi alii ſuccedunt morbi, uti partium coucretiones & imprimis hydropicæ collectiones.

Suppuratio, quæ inflammatio non rarò finitur, consistit in generatione & collectione liquidi spissi albi pinguedinosi, puris dicti, in parte inflammata, ab hujus centro incipiente, sensim magis extensa & inflammationem gradatim demum plenario tollente; probabile est, talis suppurationis initium fieri ab exsudatione liquidi lymphatici in ipsa visceris substantia, quod mediante calore in pus formatur; textum cellulosum suppuratione tali consumi nemo negat, verum etiam partes visceris organicæ, vasa & nervos, in liquidum tale resolvi posse suppuratio integræ viscerum substantiæ sectionibus detecta probat. (vid. diar. 1783 Januar. 3 1784. Maj. n. 10 & 1785 Jun. 9. 1783 Maj. 5. & Jul. 8. & 1784 Nov. 9.) Suppurationis eventus varius est secundum differentiam affecti organi, in universum illa valet regula; puris, si fieri possit, educationem tempestivam sanitatem restituit, contrarium, verò casum mortem inferre, vel lentius per hecticam febrem, vel citius ob visceris ad vitam necessariæ destructionem, aut compressionem collecto pure productam.

Mortificatio s. necrosis, inflammationis etiam possibilis exitus, consistit in putrefactione & abolitione vitalium qualitatuum inflammatae partis; duplex hujus est gradus sc. gangræna s. putrefactio incipiens, dolor tunc & sensibilitas partis cessant, cutis relaxatur, pars affecta mollescit color mutatur ab intenso rubro ad cinereum, fuscum,

lividum, pustulæ ichorem flavum continentes quandoque elevantur; sphacelus f. putrefactio completa destructionem partium completam profundam cum foetore pessimo & nigredine secum ducens, & ni externus sit, aptisque remediis compescatur, mortem cito infert. Causa proxima gangrænæ & sphaceli est stagnatio plenaria sanguinis. ejusdemque putrefactio vi caloris inflammatorii citius promota. Corruptelæ hujus causæ esse possunt: 1) inflammationis summus gradus, quo tantum sanguinis in parte inflammata accumulatur, ut moveri nequeat, sed forsan etiam e disruptis vasis effusis putrefactionem concipiat. 2) Debilitas vasorum propellendo sanguini haud sufficientium, uti ab hydrope & senectute & ossificatione arteriis. 3) Humorū mala constitutio, vi cuius in inflammata parte stagnantes facile putrescunt, uti in scorbutis & febribus putridis, in quibus facta metastasis f. collecta & deposita materia morbifica jam putredinosa partem, quam petit. citæ gangrænæ subicit. 4) Frigus vchemens, perdurans, circulationem in parte quadam plenario, supprimens.

Schirrus, rarissimus inflammationis finis, est indolens durus infarctus & tumor in inflammata parte ortus, dum liquidior pars accumulati humoris absorbetur, reliqua autem in vasis permanet & stagnat; morbosus hic status tantummodo in

locis glandulosis, uti mammis, testiculis, hepate, locum habere potest.

Diagnostica signa:

1. Inflammationis.

a) In parte externa sunt symptomata localia ipsa, oculis manifestata sc. dolor, rubor, tumor, durities, e quibus, etiamsi vix febris animadvertatur, præsens inflammatio indubitato concluditur.

b) In parte interna, ubi localia inflammationis symptomata sensus fugiunt, dolor constans fixus, concomitans febris, pulsus durities, sanguinis educti crusta phlogistica inflammationem designant, duo ultima signa quandoque deficiunt, præsertim crusta phlogistica non raro sub initio morbi abesse, dein apparens.

2. Suppurationis incipientis & præsentis.

a) In parte externa, tumoris incrementum, ejusdemque in certo loco prominentia mollis, sensim amplior, cum colore albo transparentis puris, & fluctuatione explorantibus digitis percepta.

b) In parte interna, 1) doloris gradus idem perdurans circiter ultra septimum diem, 2) mutatio doloris posthac facta ex acuto punctorio in modicum obtusum, 3) febris quidem diminutio, attamen continuatio, 4) horrores crebri irregulares, quæ tamen haud semper præsto sunt, 5) perdurans læsio functionis visceris antea inflammati, 6) emaciatio corporis cum largis sudoribus.

3. Gangrænæ & sphaceli.

a) In parte externa, indolentia, nigrescens color, mollities, foetor putridus, pustulae saniosae quandoque, & frigus.

b) In parte interna, doloris vehementis subita & plenaria cessatio, pulsus admodum celer & irregularis, facies collapsa, pallidoflavescens, frigus extremitatum cum sudore pingvi viscido, horripilationes, anxietas, lipothymia, mors.

4. Schirri, quem in parte externa tumor indolens durus post inflammationem superstes factis designat; internae partis similem affectionem tantummodo perdurans laesa functio visceris antea inflammati absque signis suppurationis aut febre indicare potest.

Prognosis

1. Resolutio inflammationis, ejusdemque proin in plenam sanitatem conversio intra paucos haud tamen exacte definiendos dies sperari, & ut plurimum effici potest sub rita & tempestiva medela, modico inflammationis gradu, & reliqua aegrotantis quodammodo bona constitutione; decrescens dolor, pulsus tardior mollis morbum in melius procedentem designant.

2. Suppuratio in parte externa, unde collectum pus educi potest, nullum sanitatis periculum habet; in parte autem interna, & tali, unde pus evacuari nequit, tantummodo mors expectari debet, aut ob destructionem suppurati visceris ad vitam necessarii, aut ob puris resorptionem in

massam sanguinis, unde oritur febris diuturna, lenta dicta s. hectica, vires ad mortem usque consumens.

3. Grangræna & sphacelus semper mortem minantur, in parte externa tamen evitabilem quandoque per ritam administratam medelam, in parte autem interna semper non vitandam.

4. Schirrus per plures annos non mutatus & tolerabilis sine alia noxa, quam compressione indeque functione læsa affecti visceris adesse potest; si hoc ignobile sit & schirrus parvus, leve proinde sanitatis incommodum creatur, vice versa majus fit.

Curatio & inflammationem ipsam & morbos inde progenitos respicit.

Curatio ipsius inflammationis consistit in diminutione & reductione sanguinis in parte inflammata accumulati ad naturalem copiam; cum enim distendens & dolorifica sanguinis accumulatio inflammationem efficiat, per se intelligitur, quod oppositi status productio s. sufficiens accumulati diminutio inflammationem tollat s. illius medelam constituat. Hunc scopum promovent sanguinis missio, refrigeratio, dilutio & doloris per apta remedia sedatio.

1. Sanguinis missio s. venæsectio potentissimum contra inflammationes sistit remedium, modo proficuum, nempe diminuendo sanguinis copiam tam in parte inflammata, quam in toto

corpore, diminuendo vim motus sanguinis, utpote quæ copiae circulantis massae respondet, hinc minori impetu sanguis in vasa inflammata propellitur; & demum attenuando sanguinem, ita ut per vasa affecta melius permeare atque auferri valeat; repetitio venæsectionis in universum juxta gradum, & perseverantiam doloris, atque pulsus robur determinari debet; prima venæsectio largissima ad educationem sanguinis unciarum sedecim, postea duæ tertiæ partes vel dimidia sufficiunt, ter quaterve vel multò pluries requiritur, donec dolor notabiliter remittat vel cesset; quò citius administratur & ad intervalla breviora, ex gr. bis imò ter nyctemero, eo majoris efficaciae est. In periphericis inflammationibus et apud infantes loco venæsectionis sangvisugium per hirudines cum præstanti effectu adhibetur.

2. Refrigeratio, quatenus sanguinis impetum compescens, admodum utilis est, & efficitur remediis nitrosis, potu acidulo, alimentis vegetabilibus, aere temperato, abstinentia a calefacientibus sc. medicamentis talibus, victuque, animi & corporis motu; & alvum rite apertam servando.

3. Dilutio & attenuatio sanguinis prodest, quia attenuati humores ad motum & circulationem per inflammata vasa disponuntur; hoc scopo creber & copiosus potus ægroto svadendus & tepidus, ut eò citius per vasa absorbentia ad massam sanguinis ducatur.

4. Sedatio & diminutio doloris inflammatorii, cum enim dolor p^ræcipua fit causa inflammationis, per se patet, inflammationem sedando dolorem debellari, ideo adhibenda sunt remedia, quæ sensibilitatem nervorum frangunt & alterant, attamen alio modo innocua, quæ testante experientia sunt.

a) Camphora specifiçi contra inflammationes nomen merens, grana illius duo bihorio aut nitri scrupulo juncta, aut sub forma emulsionis, aut alterius mixturæ sc. camphoratæ acidæ vel non acidæ propinari possunt. Moscus eodem modo porrectus similem virtutem exferit, ideoque, ubi illud ab ægrotis respuitur, vel non sufficere videtur, sine vel cum camphora exhiberi potest; camphoram & moschum virtutem sedandi & alterandi possidere, & eatenus etiam theoretice inflammationibus prodesse, patet ex eorundem egregia efficacia in morbis nervosis & hysteriis, ubi sensibilitas nimia principale vitium est.

b) Vesicatorium vel unguentum sinapinum in vicinia inflammatæ partis imponendum sc. extus supra partem intus dolentem, latitudine affecti loci præditum; hoc modo internus dolor sopitur s. obscuratur, ejusdemque effectus s. inflammatio debellatur, tali ratione utilitatem præstare vesicatorium, ex eo probatur, quod dolor sub actu molesto vesicatorii silens, hoc absoluto sæpe redeat.

Applicatio vesicatorii haud svadenda est, antequam impetus febrilis venæsectione aliquoties instituta debilitatus sit, alias ex irritatione vesicatorii indeque citata circulatione majus malum timeri, quam bonum e sedatione doloris expectari potest.

Ratio suppurationis tres partes complectitur, sc. maturare vel perficere suppurationem; educere & auferre collectam & maturatam purulentam materiam; & demum effectus morbosos puris in massam sanguinis resorpti debellare.

1. Maturatio suppurationis modò locum habet in partibus externis & efficitur promovendo collectionem puris, donec durities dolens sublata sit; huic scopo quadrant.

a) Emollientia parti affectæ immediate applicata, quibus inflammata vasa relaxantur & eò melius exsudantem materiem, quæ ad suppurationem pertinet, transmittunt; partim cataplasmata sic dicta f. pulmenta aut e pane filigineo cum lacte parata aut ex herbis f. speciebus emollientibus cum granis avenæ coctis, quænam calida omni bihorio renovata applicari possunt, etiam emplastrum diachylon compositum & unguentum basiliconis in usum trahuntur.

b) Conservatio motus & caloris febrilis, utpote qui ad suppurationem perficiendam requiritur, suppuratione ideo incipiente venæsectio & nitrosa seponi debent, dum sine emolumento æ-

grotum debilitant, & suppurationis progressum tardiores reddunt.

c) Clausum tenere abscessum f. suppuratam partem, illamque non incidere, antequam maturatio supra descripta perfecta sit; pus enim balsami adinstar partem inflammata[m] emollit & colliquat; illô igitur præmature ablato reliquæ adhuc inflammatae partis suppuratio difficilior peragitur.

2. Eductio f. evacuatio puris ut plurimum spontanea naturæ vi post absolutam maturationem perficitur, interdum si profundius hæreat, incisio chirurgica requiritur.

3. Effectus e pure resorpto, si sese exferant sc. febriles motus, sudor, emaciatio corporis, debellantur cortice chinæ aut forma pulveris aut decocti ingesto, nec non aqua felterana lacte commixta.

Curatio gangrænæ desiderat.

1. Separationem partis corruptæ a sana, quod fieri solet scarificatione profunda, quæ sanguis putrescens effluere potest, et deligatione cum unguento terebinthinato.

2. Correctionem putredinis in parte affecta; herbæ amaræ & aromaticæ imprimis herba absinthii & cortex chinæ, quæ in vino & aceto coqui possunt, liquidum dein exprimi & mediante linteo sæpius imponi; etiam pulvis corticis purus ulceri inspergi vel aqua calcis mixtus applicari.

3. Conservationem virium, quæ sub gangrænoſo ſtatu deficiunt & tamen ad putredinem vincendam neceſſariæ ſunt. Decoctum chinæ acidum ideò duplici ratione & contra putredinem & debilitatem proficit & largiter ingeri debet, vinum & cereviſia fortis ſub increſcente debilitate etiam in uſum trahi poſſunt.

Diviſio inflammationum internarum juxta partium affectarum differentiam aptiſſime ad quinque genera referri poſſunt ſc. inflammationes capitis, colli, pectoris, abdominis & artuum.

GENUS Imm.

INFLAMMATIONES CAPITIS.

Huc duæ ſpecies ſc. Phrenitis & Otitis pertinent.

Species Ima.

PHRENITIS

Eſt febris continua inflammatoria cum delirio conſtanti ſ. eſſentialiter adjuncto.

Phrenitis dividi poteſt in 1) protopathicam, quæ ab alio morbo non dependet; deuteropaticam vel metaſtaticam ex depoſita materia alterius mor-

hi ad cerebrum, sub qva primitivus morbus cessat; et 3) symptomaticam, qvæ merus effectus est alterius morbi et cum illo cessat.

Symptomata:

1. Communia febrilia, fitis insignis, æstus pulsus celer tensus, qvandoqve depressus, urina intense rubra, etiam pallida observata est.

2. Particularia & specialia; qvandoqve præcurrentia symptomata in protopathica adfunt, ut capitis dolor notabilis, stupor vertiginosus, oblivio, susurrus vel tinnitus aurium, turbatus & impeditus somnus; qvandoqve morbus ipse sine his prænuntiis sese monstrat cum delirio s. perversa imaginatione, judicio, & animi pathematibus enormibus, privata conscientia sui ipsius, insomnia continua, tremore, imo convulsivo artuum motu.

Causæ remotæ.

1. Occasionales: abusus potus spirituosus, imprimis spiritus vini vel frumenti; insolatio s. expositio imprimis nudati capitis in solis radiis æstuantibus; mentis labor; studia nimia & pathemata, imprimis ira; vigiliæ diuturnæ; sanguinis fluxus quidam subito suppressus; metastasis morbofa, uti lactea in puerperis, aut a pleuritide (vid. diar. 1785. Mart. no. 1) aut in febribus putridis obveniens (vid. diar. 1783. Mart.; August. 1785. Jul. August. Sptbr. no. 1.)

2. Disponentes: temperamentum cholericum; ætas juvenilis; tempus æstivum; debilitas vaforum cerebralium, imprimis per acriora studia abusum spirituosorum, vel eundem morbum prægressum contracta.

Causa proxima est inflammatorius status cerebri vel ejusdem meningum, qvalis status & symptomatibus concludi potest & per sectiones demonstratur.

Diagnostica signa ex ipsa definitione depromuntur sc. acuta febre & delirio ab initio adjuncto; si symptomatica sit phrenitis, e subito illius aggreſſu sub altero jam præſenti acuto morbo cognosci potest (vid. diar. 85. Mart. 2.); difficilior cephalitis lente oboriens dignoscitur (vid. diar. 1785. Junii no. 3.)

Prognosis

1. Duratio hujus morbi brevis vix ultra septimum diem extensa, post quem in sanitatem vel alios morbos transit, quod imprimis de phrenitide protopathica valet.

2. Sanatio protopathici morbi fere semper speranda est sub usu tempestivo convenientis medelæ, natura ipsa illam promovet largo sanguifluxu, narium præsertim, vel alio, superveniente diarrhoea, effluxu purulento per nares vel aures; urina sedimentosa etiam boni ominis est. Phrenitis symptomatica dubii est eventus, metastatica præsertim.

3. Mortem timendam vel instantem designant neglecta tempeſtiva medela, convulſiones, ſingultus, ſtridor dentium, urina pallida, vomitus materiæ viridis, lethargus, ſudor pingvis, frigidus.

4. Reliquiæ poſſibiles ſunt mania, fatuitas, cœcitas, ſurditas.

Curatio phrenitidis protopatici paragenda eſt.

1. Miſſione ſanguinis larga & crebra; ad lipothymiam uſque inſtituta venæſectio ſub initio morbi miræ ut plurimum efficaciæ eſt, (vid. diar. 1785. Febr. n. 2, & Mart. n. 2); ſanguifugium per hirudines temporibus applicitas etiam valde prodeſt.

2. Remediis antiphlogiſticis, nitro, camphora, moſco, ex. gr. mixturæ camphoratae nitroſæ unciis octo cum quatuor granis moſchi ad cochlearia duo bihorio. Huc pertinent: aër purus, ſubfrigidus; potus largus, acidulus; victus vegetabilis.

3. Derivatione humorum efficienda: a) per alvi ſubductionem modice promotam, ſc. aut clyſmatibus aut mixtura camphorata laxativa, quæ cum moſcho juncta ut plurimum per totum morbi decurſum ad modicam alvi laxitatem ſuſtinendam convenit; b) unguentum ſinapinum artubus applicitum; pediluvia atque panni lanei aqua calida imbuti & artubus frequenter admoti etiam conveniunt.

4. Obtemperando naturæ moliminibus utilibus, incidentes ſc. evacuationes, hæmorrhagiam

narium, vel diarrhoem non impediendo; si tumores hæmorrhoidales adsint, hirudines illis applicare prodest.

5. Superstitem cerebri debilitatem & reliquias ex illa derivandas tollendo, cui scopo quadrant liquor nervinus ad guttas viginti bihorio vel rarius, abstinencia ab animi laboribus & spirituosus, atque si caput stupidum vertiginosum permaneat, vesicatorium cervici appositum.

Phrenitis deuteropathica eandem medelam ac protopathica exposcit; symptomatice autem cura juxta morbum primitivum determinanda est.

Species II^{da}.

O T I T I S

Est inflammatio aures internæ.

Symptomata & signa sunt: febris, dolor vehemens, constans, internus unius vel utriusque auris, adjuncta quandoque deliratio. Ab otalgia rheumatica distingvenda est per doloris modum, qui in hæc aut prorsus intermittit aut notabiliter remittit; dantur tamen casus dubii, ubi tutiorem viam incedere, et morbum ut veram otitidem tractare oportet.

Eventus salutaris vix non semper sperari potest per tempestivum ritæ medelæ usum; e neglecta illa præsertim timendus est abscessus, ef-

fluxus puris cito vel tardius finiendus, quandoque organi inde producta destructio, & auditus læsio; etiam in phrenitidem funestam transire potest morbus.

Curatio perficitur remediis solitis antiphlogisticis, venæsectione, hirudinibus pone aurem, nitroso camphoratis intus applicitis, & demum vesicatorio nuchæ; facta suppuratio injectionem frequentem decocti hordei vel avenæ desiderat, ut peregrina materies rite auferri queat.

GENUS. II^{dum}

ANGINA

Est dolor fixus, constans, internus faucium cum adjuncta febre continua.

Differentia anginæ ratione partium affectarum & modi affectionis præsertim quadruplex notanda est, sc.

1. Angina manifesta, ubi inflammatio in partibus faucium visibilibus locum habet, itaque sensibus detegi potest.

2. Angina occulta s. trachealis, a nonnullis membranacea vel polyposa, ubi inflammatio in larynge, vel trachea sedem habet.

3. Angina catarrhalis vel serosa, ubi fauces simili circiter modo, ac sub angina inflammatoria afficiuntur, verum fere absque ulla febre.

4. Angina maligna, ubi inflammatio citò ad gangrænam inclinat, vel febre, uti putrida, juncta vel sæpe sine ulla febre occurrens.

Symptomata & signa.

1. Anginæ manifestæ: febris cum pulsu celeri tenso, dolor faucium minor vel major sub deglutitione, hæc impedita aut difficilis, tumor rubens, dum lingua deprimitur, in partibus faucium, palato, uvula, tonsillis, aut omnibus, aut nonnullis apparens; majorem gradum designant dolor aurium propter inflammata simul tubam Eustachianam, loquela & motio maxillarum impedita, dum inflammatio linguam simul & musculos occupat, respiratio difficilis anxiosa ob inflammationem ad glottidem quoque extensam, unde sæpe facies & oculi tument rubentque.

2. Anginæ trachealis: præter febrem dolor pungens in sede trachæe, vox difficilis, rauca, tussis crebra, sicca, clangosa, respiratio celer, impedita, anxiosa, deglutitio fere illæsa, pulsus admodum celer, nullum vitium in faucibus apparens.

3. Anginæ serosæ: dolor faucium & impedimentum deglutitionis minoris gradus, quam in angina verè inflammatoria, tumor faucium pallido rubescens; absentia febris.

4. Anginæ malignæ: faucium ulcerosa constitutio in tonsillis aut velo palatino cinerei vel fusci coloris; deglutitio modice læsa, interdum quoque concomitantia febris putridæ vel scarlatinæ symptomata. Inspectio faucium in omni angina ad ritam diagnosis requiritur.

Causæ remotæ anginæ.

1. Aeris nociva indoles: aut frigus æstuantis & sudanti corpori admissum, vel nimis violente sub rapido contra ventum motu irruens, aut alia illius constitutio acris epidemica, cui febris anginosa quandoque vulgaris et maligna adscribenda est.

2. Motus fortis partium ad fauces pertinentium, uti per cantum, vociferationem, tubarum inflationem.

3. Acria & irritantia faucibus applicita, ut fumi tales caustici minerales, corpora peregrina, dura, acuta.

4. Morbi varii anginam secum ducentes vel generantes, uti imprimis febris scarlatina nec non morbillosa, phthisis; huc referri possunt arthritis retropulsa, rheumatismus, salivatio mercurialis refrigerio suppressa.

5. Dispositiones: plethora, juvenilis ætas, morbus idem prægressus.

Prognosis.

1. Sanatio speranda est in manifesta angina remediis aptis tempestive tractata, ferosa adhuc

facilior sanatu est, boni ominis habentur hæmorrhagia narium & tumor partium externarum.

2. Suppuratio exspectanda est, si antiphlogistica medela in angina inflammatoria negligitur, dolor tunc minuitur, tumor autem permanet, mollescit, albescit; in angina manifesta abscessus formatus sponte disrumpitur &, facto effluxu, morbus cessat; anginæ trachealis in suppurationem conversæ vel observatur felix eventus per excreationem puris (vid. diar. 1783. Septbr. No. 7;) vel rarius permanet ulcus tracheale pus in pulmones continuo destillans & pthisin producens.

3. Mors possibilis in summo anginæ etiam manifestæ gradu, unde aëris influxus impediri itaque suffocatio fieri potest; in angina tracheali infaustus ille morbi eventus adhuc sæpius et intra paucos dies imo horas occurrit, præsertim apud infantes; angina maligna periculum febris putridæ & adhuc majus habet, nam per se vix non et quidem sat cito lethalis est, ritis autem remediis tempestive adhibitis juxta meam experientiam semper cedit raro in suppurationem versa sub puris excreatione cessans vel etiam suffocans.

Curatio anginæ inflammatoriæ manifestæ perficienda est.

1. Sangvinis missione, quo citius, eò melius instituenda, & ad plures vices bis terve nyctemero repetenda, donec dolor cesset, vel notabiliter remittat; hirudines extus applicitæ, vel in

regione tonsillarum; vel circa laryngem citum juvamen afferre solent; quamdiu morbus nondum in suppurationem conversus sit hæc de venæsectione regula valet.

2. Antiphlogisticis internis solitis, potu diligenti acidulo, camphoratis, imprimis mixtura camphorata acida bihorio sumta.

3. Collutione oris crebra imprimis per infusum herbæ salviæ calidum cum admixtis melle rosato & aceto; solum hujus retentionem in ore præfero gargarisationi, utpote hinc motus & frictio in partibus inflammatis vix non noxia excitatur; quædoque mixtura camphorata acida pro tali collutione adhibita egregie juvavit.

4. Alvi subductione, quæ altero vel tertio die per laxans validius, derivationis scopo, efficitur, deinceps, ni sponte procedat, ad naturalem, normam promovetur; utrumque mixtura camphorata laxativa, primò largiori dosi, dein minutis, absolvit; etiam illius loco clysmata conveniunt.

5. Externis derivantibus & discutientibus, qualia sunt linimentum volatile camphoratum collo antico frequentè inunctum, unguentum sinapinum vel vesicatorium in nucha admodum utile, die circiter tertio vel serius post venæsectionem aliquoties repetitam applicandum; huc pediluvia quoque annumerari possunt et sinapismi furis vel plantis pedum quotidie admoti.

Curatio suppurationis, quæ præfertim in tonsillis locum habet, consistit primò in maturatione surgentis & observati abscessus, cui scopo imprimis quadrat crebrò in ore retentum lac calidum, in quo flores sambuci vel ficus decocti sunt; dein in apertura formati abscessus, quæ non sponte facta, & minante periculo suffocationis ob nimium abscessus volumen, ope lanceolæ & incisione chirurgica promoveri debet; & tandem in depuratione ulceris, quæ fit cito mediante allato collutorio absolvi solet.

Curatio anginæ serosæ s. catarrhalis peragitur pediluviiis, laxantibus repetitis, linimento volatili camphorato extus inuncto, linctu ex mellis rosati uuciis duabus et essentia pimpinellæ albæ drachma composito & frequenter ad cochlearia minora lente deglutiendo; quandoque vesicatorium in nucha etiam desideratur.

Curatio anginæ malignæ sive folius sive cum febre junctæ instituenda est juxta methodum de scarlatina supra traditam, quæ votis meis semper respondit.

Curatio anginæ trachealis perficitur sæpius sangvisugio hirudinum circa laryngem largo, repetito, sacculo aromatico camphorato collo applicito, emulsione camphorata cum moscho; sed vidi quoque, his frustra tentatis, mercurium juvasse ad granum vel grana duo cum opii grano dimidio bihorio porrectum, et dein, respiratione liberiori,

oxymell scilliticum, si opus est cum fyrupo man-
nato, ad alvum et excreationem movendam.
Emetica sufficiens experientia noxia probavit.

G E N U S III^{ti u m.}

INFLAMMATIONES PECTORIS.

Qvæ viscera in cavitate pectoris contenta af-
ficiunt, atqve juxta horum differentiam ad tripli-
cem speciem referri possunt: 1) Pneumoniam in
pleura vel pulmonibus vel utrobique locum ha-
bentem. 2) Carditidem, cor afficientem. 3)
Diaphragmitidem f. paraphrenitidem seu dia-
phragmatis inflammationem.

Species I^{ma.}

PNEUMONIA

Est febris continua cum dolore constanti fixo
pectoris, tussi, dyspnoea.

Plures medici distinguunt hunc morbum in
pleuritidem, ubi dolor pectoris punctorius est, &
sedes inflammationis in pleura statuitur; perip-
neumoniam, ubi dolor pressorius animadverti-
tur cum supposita sede morbi in pulmonibus; &
pleuro-peripneumoniam f. inflammationem pecto-

ris compositam ex conjunctis utriusque allatae partis affectione & dolore; cum verò hi morbi, excepta dicta doloris differentia, in reliquis omnibus sese prorsus referant, ut inutilis evitetur prolixitas, ad unicam speciem illos referre oportet.

Symptomata pneumoniæ.

1. Febrilia, frigus initio communiter sat grave, postea æstus continuus, fitis, lingua varia sæpius albescens, urina utplurimum rubescens, initio clara sub decremento morbi sedimentosa, pulsus celer tensus, quasi contractus in pleuritide, mollior quandoque depressus & irregularis in peripneumonia, rarò adjuncta est cephalalgia & aliqualis deliratio.

2. Pectoralia: a) dolor ipse fixus constans differentem regionem pectoris sæpius lateralem occupans, aut punctorius, aut pressorius, sub tussi & inspiratione profunda increascens; b) dyspnoea minor majorve quandoque anxietatem secum duccens; c) tussis aut sicca potissimum initio, aut humida cum sputo mucofo sanguine minus magisve tincto, d) decubitus utplurimum molestior in latere affecto quam in opposito.

Gradus morbi determinandus est secundum doloris gravitatem, extensionem, & imprimis concomitantem dyspnoeam; maximus est morbus, qui decubitum non permittat, sed ad situm erectum cogat.

Causæ remotæ.

1. Aeris inspirati nociva conditio, uti frigus gravior, vel diuturnum, imprimis æstuantis corpori admissum; vapores acres minerales sulphurei, arsenicales, aliique similes.

2. Infrigidatio notabilis corporis, præsertim calefacti; hujus expositio versus aspirantem aerem frigidum; aut potus largus frigidus sub tali statu ingestus.

3. Acrimonie & irritamenta varia ad pectoris viscera conversa, vel in iisdem collecta, uti tubercula pulmonis, miasma morbillosum, scarlatinofum, pus variolosum, vel ex ulceribus consolidatis, morbis cutaneis exsiccatis, materia arthritica, aut rheumatica.

4. Dispositiones; pectus angustum gibbosum, constitutio plethorica, vitæ genus laboriosum, abusus potus spirituosus, morbus idem prægressus.

Causa proxima pneumoniæ est ipse status inflammatorius aut pleuræ, aut pulmonum, aut utriusque partis simul; levior morbus ex inflammatione vasorum bronchialium, gravior ex inflammatione profundiore vasa pulmonalia simul occupante.

Nexus symptomatum pneumoniæ cum allata causa facile perspicitur; ex inflammatione dolor; e dolore tussis; ex accumulatione nimia sanguinis & vasis repletis compressio cellularum, aeris

hinc impeditus influxus atque dyspnoea; e vasis nimium distentis osculorum apertura vel ruptura, transmissus sanguis, ejusdemque expectoratio intelliguntur.

Diagnostica signa.

1. Generalia pneumoniam indicantia sunt notæ definitionis ejusdem sc. dolor constans pectorius vel pressorius, dyspnoea, tussis, pulsus febrilis ut plurimum tensus.

2. Levioris gradus: dolor quoad gravitatem & extensionem modicus, dyspnoea tolerabilis.

3. Gravioris gradus, dolor magnam pectoris regionem, vel latus integrum, vel utrumque f. totum pectus occupans, & opprimens; dyspnoea notabilis anxietatem & inquietudinem multam secum ducens, imo ad situm erectum cogens, interdum vomitum excitans, pulsus parvus irregularis, deliratio, gena alterutra vel utraque rubens, quæ circulationis in pectore summe difficilis effectus & signa sunt.

4. Latentis f. occultæ pneumoniæ, ubi nullus in circumscripta parte dolor sentitur, vel tantum levis quasi transitorius sub inspiratione profunda vel suspiriis; tussis sicca crebra brevis, dyspnoea, pulsus celer sæpe sat parvus, anorexia, incipiens corporis consumptio attento medico suspectum reddunt angvem sub herba latentem, qui non sat tempestive ablatus pthisin inducit.

5. Pneumonia infantum cognoscenda est ex causa prægressa, frigore febrili, respiratione difficili, pronitate decumbendi in uno latere; pulsu celeri, tusi sicca præsertim sub ejulatu.

Exitus pneumoniæ potissimum triplex possibilis est sc. in sanitatem, in abscessum, in mortem.

1. Sanatio pneumoniæ speranda est:

a) Sub modico morbi gradu, bona quodammodo ægri constitutione, & debitis remediis tempestive adhibitis.

b) Sub doloris notabili decremento intra primos præsertim septimos dies accidente, nec non sub migrante dolore ad alias pectoris regiones.

c) Sub evacuationibus levatoriis sc.: 1) expectoratione bene procedente, initio mucosa striis sanguineis mixta, sæpe dein puriformi largiori, hæc communis pneumoniæ crisis deprehenditur, etiam sed raro expectoratio biliosa observatur (vid. diar. 1785 Junii no. 3.) 2) sudore universali copioso diebus criticis incidente uti die 4to, 7mo, 9no, 11mo, etiam serius uti die 21mo (diar. 1784 Maj. no. 3.) Urina sedimentum deponens etiam criseos signum exhibet. Diarrhoea sub progressu morbi modica, nec non hæmorrhagia narium primis diebus occurrens & copiosa, potius pro levatoriis excretionibus, quam revera criticis censendæ sunt.

2. Suppuratio f. abscessus pulmonum pneumoniam finiens expectari potest, & indicatur perseverantia inflammationis ultra 14 dies, mutata doloris acuta & punctoria indole in gravativam, tusi sicca, dyspnoea, decubitu molesto vel intolerabili in latere sano, horripilatione crebra irregulari, febre continuante imprimis vespertina, sudoreque nocturno. Talis suppurati pulmonis status, vomica clausa nuncupatus, variam terminationem habere potest sc.

a) Rupturam abscessus pulmonalis in vasis trachealibus, ut plurimum hinc sequitur expectoratio purulenta post aliquod tempus & factam plenariam evacuationem in sanitatem finita; etiam possibilis, attamen rarissima, est tam copiosa puris effusio in trachea, ut suffocationem inducat.

b) Rupturam abscessus in cavitate pectoris cum effusione puris ibidem, quæ empyema vocatur (vid. diar. 1782 Mart. No. 5 & 1785 No. 9.) Hoc factum adsignant subita & singularis sensatio affecti pectoris, remissio temporaria molestorum symptomatum abscessui clauso competentium, cito autem recudescens & crescens pectoris oppressio tandem & necessario ægrotum suffocans.

c) Perseverantiam vomicæ clausæ ejusdemque tantum incrementum, ut pulmonis maxima pars in pus convertatur (vid. diar. 1783 Maj no. 5 & Jul. no. 8 atque 1784 Novbr. no. 9) vel suffocatus ob respirationis notabile impedimentum,

vel hecticus ob reſorptionem puris, vel apoplecticus ob ſanguinis impeditum deſcenſum æger moritur.

d) Extenſionem vomicæ ad partes pectoris externas, cujus ſignum eſt tumor quandoque inflammatorius in interſtitiis coſtarum, ex quo pus educi poteſt.

3. Mortem inducunt & prænunciant:

a) Summus inflammationis gradus ambos pulmones occupans, & reſpirationi ineptos reddens; primis morbi diebus talis eventus accidit.

b) Gangræna, quam minantem indicant magnus inflammationis gradus, remediis non minus atque ſputum malignum ſuſcum, nigreſcens, foetidum, imo quaſi fruſta dilacerata ipſius pulmonis ſecum ducens (vid. diar. 1782. Aug. no. 2;) præſentem gangrænam monſtrant doloris ſubita ceſſatio, ſuppreſſa expectoratio, reſpiratio anxia ſtertoroſa, a ſibilatione bene diſtingvenda, facies collapſa pallido-flaveſcens, pulſus celer parvus irregularis, artus frigide & viſcide ſudantes.

4. Reliquiæ morboſæ, pneumoniæ effectus poſt eandem perſiſtentes, eſſe poſſunt; a) collectio ſeroſa in cavitate pectoris, demum hydrothoracem efficiens (vid. diar. 1783. Mart. n. 7. & n. 8. & 1784. Maj. n. 5.) b) concretio pulmonum cum pleura, qualis læſio per diu ſine notabili fanitatis noxa aſſeſſe valet. c) quæ tubercula ſchirroſa pulmonum ſæpius in demortuis inventa, forſan

ut causa, forsan etiam ut effectus pneumoniæ æstimari queunt.

Curatio pneumoniæ perficienda est: 1) missione sanguinis tempestiva & sufficienti, 2) auxiliis febrem & dolorem sedantibus, 3) excretionibus salutaribus imprimis expectorationem promovendo & sustentando.

1. Venæsectionis conveniens usus respicienda exhibet.

a) Opportunum illius tempus, quod morbi initium s. primi dies præcipui constituunt; fera tamen venæsectio etiam tanquam utilis admittenda est, quamdiu sc. dolor est notabilis & pulsus fortis s. dum signa suppurationis & gangrænæ nondum præsto sunt; non raro pneumoniæ causam sistit rheumatica materies, cujus lentus est progressus in dictas terminationes, cuique ideo etiam fera venæsectio prodesse potest. (vid. diar. 1781. Maj. n. 2. 1785. Octbr. n. 2. & 1786. Maj. 3.) Fluxus menstruus forsan præsens venæsectionem haud prohibet.

b) Copiam mittendi sanguinis & missionis repetitionem; prima vice sedecim unciae educi possunt, postea duodecim vel octo quavis vice sufficiunt; repetitionem ipsam indicant & determinant gradus & perseverantia morbi sc. doloris, dyspnoeæ, & citati pulsus; donec hæc notabiliter remittant vel cessent, venæsectio repetenda est, etiam ad sex vel octo vices, imo pluries, quamvis

inferior terminus sæpius sufficiat; bis terve quotidie talis fieri potest repetitio, quæque eò innocentior & utilior æstimari debet, quò citius in morbo instituitur: in maximo pneumoniæ gradu, ubi pulsus valde depressus & celer observatur cum anxia & summa orthopnoea venæsectionem, saltem repetitam non svadebo, ne illi mors, per se necessaria adscriberetur. Apud infantes hirudines sex vel octo loco venæsectionis applicandæ sunt imo repetendæ in latere affecto seu in quo æger decubitus abhorret.

2. Auxilia febrem & dolorem sedantia sunt:

a) Remedia intus sumenda: nitrum & camphora indeque factæ compositiones; mihi potissimum in usu est emulsio camphorata ad cochlearia duo bihorio, vel mixtura camphorata nitrosa; si alvus forsan obstipata sit, pulvis e nitri & lactis sulphuris ana scrupulo, camphoræ grano paratus, bihorio, loco alterius medicinæ, exhiberi potest, donec alvus aperiatur.

b) Diæta antifebrilis, ut potus largus frequens tepidus, victus vegetabilis, aer cubiculi modice calidus, abstinentia ab omnibus calefacientibus, ut & a motu animi atque corporis imprimis locutione multa, quæ influxum noxium immediatum in affectos pulmones habet.

c) Vesicatorium vel unguentum sinapium dolenti loco, & hujus extensioni respondens, applicandum; in universum non ante quintum vel

sextum morbi diem, & postquam repetita venæsectione febris & dolor diminuta sint, hoc quadrat auxilium; interdum citius permitti potest, si nimirum rheumatica vel arthritica pneumoniæ indoles e doloribus artuum in hanc conversis manifesto demonstretur, in quo casu præmissa una alterave venæsectione vesicatorium admoveri potest. (Monita circa vesicatorium non nimis cito applicandum vid. diar. 1786. Novbr. 3, & 1787. Maj. 1.)

3. Expectoratio, pneumoniæ frequentissima crisis, juxta sequentes regulas tractanda est:

a) Ad sextum circiter morbi diem expectoratio sibi ipsi relinqvenda est, utpote nondum critica, & quia inflammatio hætenus cruda æstimari debet; hoc tempore methodus supra allata antiphlogistica quadrat & sufficit.

b) Expectoratione post hunc terminum valde sangvineâ observata, talique pergente etiam methodum solam antiphlogisticam continuare oportet, nec expectorationem ullis promoverè remediis, utpote quibus sputum adhuc magis sangvineum redderetur.

c) Expectorato autem sputo, vel non, vel leviter sangvineo, alias mucoso, flavescenti, densiore observato, sic dicta expectorantia ad depurandos pulmones & exsudantem materiem evacuandam apprime quadrant, aut decoctum radicis senegæ ad cochlearia duo bihorio vel trihorio,

aut kermis mineralis granum cum sacchari scrupulo bihorio alternatim cum emulsiōe camphorata exhibitum; hoc ultimum validius aestimo expectorans ideoque sub notabiliore expectorationis difficultate decocto fenegæ præfero, si alvus forsan laxa observetur, gummi arabicum loco sacchari kermi apponendum est; etiam scopo expectorandi quadrat & juvat vesicatorium amplum pectori medio vel inter scapulas applicandum, ideoque, etiamsi antea scopo doloris compefcendi adhibitum fuerit, attamen repetendum; etiam vapor emolliens per aptam machinam inspiratus in fummis angustis profuit. Tandem si expectoratio largior puriformis diuturna fiat, & vires decrescant, jusculum fecalinum mane sumendum atque decoctum chinæ cum fenega bihorio vel rarius in usum trahendum est; expectoratio etiam tanta esse potest, ut validiora roborantia & sistencia desiderentur (vid. diar. 1783 August no. 9.)

d) Expectoratione prorsus nulla proveniente, qvi casus perrarus est; remedia ad illa promovendum haud locum habent, sed solis, quamdiu febris permanet, antiphlogisticis uti oportet.

Diarrhoea modica nullam infert noxam, emulsiōem camphoratam absque nitro exposcit, & gummi arabicum expectorantibus adjunctum. Hæmorrhagiæ forsan incidentes sibi ipsi sunt relinquendæ.

Curatio suppurationis pulmonalis:

1. Vomica adhuc clausa signis supra allatis denotata vix aliam admittit opem, quam diætam antiphlogisticam, diligentem potum, quodammo-
do calidum & emollientem, uti jusculum fecali-
num & lac, etiam laudatur vapor aquæ calidæ
inspiratus, aut mediante spongia, aliave conveni-
enti machina, quibus omnibus ad rupturam, ab-
scessus disponitur; motum corporis uti unctionem,
equitationem, lectionem etiam ad abscessus rup-
turam promovendam medici commendant. (Candi-
datus quidam medicinæ nosocomii tali vomica af-
flictus & ad ultimas angustias reductus sella por-
tatoria per sat longam viam ad parentes duceba-
tur, ut in gremio eorundem moriretur, facto iti-
nere ruptus fuit abscessus cum insequenti expec-
toratione purulenta largissima, diuque continuan-
te, per copiosum lactis usum viribus pauxillum
restauratis, abscessus etiam in pectore affecto for-
mabatur ex interna sede pus effundens, quod
ulcus cauta deligatione tractatum demum conso-
lidabatur, itaque æger plenariò restitutus vices
utilis medici practici & physici per annorum se-
riem perfecit; mihi alterum occurrit exemplum
futoris, in quo materia vomicæ per integumenta
pectoris sibi viam fecit cum fausto eventu.)

2. Vomica apertâ in trachea s. ita disrupta,
ut pus in abscessu pulmonum collectum tussi ejici-
atur, requiritur victus blandus nutriens e lacte,
decoctis hordei vel avenæ, aut jusculo fecalino,

si expectorationis observetur difficultas, expectorantia supra allata contra ipsam pneumoniam commendanda sunt. Si vires nimis lente redire videantur, decoctum chinæ cum fenega prodest, præcipuum emolumentum ex oleo asphalti ad guttas sex mane & vespera sumtas observavi, si pus minus laudabile vel foetidum proveniat (vid. diar. 1787 April 3, Septbr. 3, Octobr. 3.)

3. Vomica aperta intra pectus cum effuso pure in cavitate pectoris, qualis status empyema dicitur, cito per mortem terminari solet, ideoque medicationem prævertit; si locus quidam e materie exteriora versus urgente tumeat, paracentesi ibidem instituere svadetur, verum parvam sanationis spem habet hæc operatio.

4. Vomica aperta extra pectus s. exitum quærens & habens in interstitiis costarum per integumenta communia primò, si tanquam abscessum nondum maturum sese monstret, ad mollietiem debitam cataplasmati usu perducendus est, & dein, ni sponte aperiatur, incidendus, subsequens deligatio ita administranda est, ut ipsi potissimum naturæ consolidationis opus relinqvatur, quod interdum absque noxa ut in supra allatis exemplis perficitur; interdum remanet ulcus diuturnum.

Peripneumonia maligna & notha distinctiones litteratorum potius, quam veræ in praxi occurrentes æstimandæ sunt; prior complicationem pneumoniæ cum febre putrida, posterior pneu-

moniam ex arthritica vel rheumatica causa orientem denotat.

Species II^a

C A R D I T I S

Inflammatiō cordis.

Symptomata & signa præter febrilia communia sunt dolor in regione cordis, pulsus intermittens, anxietas, palpitatio, tussis nulla.

Eventus rari hujus morbi ob nobilitatem affecti visceris ut plurimum letalis est, (morbum hunc apud demortuos detectum vid. diar. 1783. Februar. no. 4. & 1784. Octbr. no. 6 & no. 7. nonne sanatus fuit in exemplo diar. 1786. Jul. no. 5.)

Curatio instituenda est per methodum solitam antiphlogisticam potissimum venæsectiones largas & repetitas.

Species III^a

P A R A P H R E N I T I S

Inflammatiō diaphragmatis.

Symptomata & signa rari hujus & periculosi morbi præter ipsam febrem sunt dolor in una alterave regione diaphragmatis, respiratio celer brevis fere absque observato abdominis motu, tussis ficca, singultus, deliratio.

Curatio desiderat medelam solitam antiphlogisticam, cui etiam moscus quatenus spasmus noxium diaphragmatis compescens apponi debet.

GENUS IV^{tum.}

INFLAMMATIONES ABDOMINALES.

Quæ locum habent in viscere quodam ad cavitatem abdominis pertinente, e quanam differentia variæ surgunt species.

Species I^{na.}

HEPATITIS s. INFLAMMATIO HEPATIS

Est febris continua cum dolore fixo in regione hepatis, sive illius superficie convexa sive concava.

Symptomata & signa:

1. Communia utrique hepatitidis fedi sunt generalia febrilia, dolor in cardia vel hypochondrio dextro interdum ad lumbos, fitis, pulsus celer tensus, quandoque singultus & alvi segnities.
2. Propria inflammationem convexæ hepatis superficiei indicantia, augmentum doloris sub pressione externa, tussi, respiratione profun-

da, decubitus minus tolerabilis in latere affecto, nonnulla dyspnoea.

3. Propria hepatitidi internam jecoris superficiem occupanti, nausea, vomitus spontaneus, color ictericus cutis & urinæ, excrementa albida.

Causæ hepatitidis esse possunt.

1. Pathemata animi validiora, imprimis ira & terror.

2. Haustus largus frigidus incalescente corpore sumtus (vid. diar. 1783. April no. 7.)

3. Vomitus validus vel protractus sponte vel arte citatus.

4. Contusiones in hepar directæ (vid. diar. 1785. Sptbr. no. 12.)

5. Acrimonie variæ indolis ad hepar depositæ rheumatica, arthritica, metastatica, uti post retrogressum tumorem crurum (vid. diar. 1784. August. no. 12.)

Eventus hepatitidis.

1. In sanitatem sperandus est e rita medela tempestive adhibita, & dolore sub illa sensim decrescente. Diarrhoea biliosa, hæmorrhagiæ narium vel ani, fudor universalis calidus, urina sedimentum deponens, alvi antea obstipatæ restitutus fluxus, levatoriæ & salutares excretiones judicanda sunt.

2. In suppurationem s. abscessum hepatis limendum e neglecta debita medela, protracta duratione febris & doloris, atque hujus mutatione

in gravativum, qui decubitus in latere sinistro non tolerat, atque horripilatione crebro recurrente; hepatis abscessus fere semper letalem finem vario tamen modo habet.

a. Per ductus hepaticos pus ex abscessu in canalem intestinorum transmitti valet, indeque per vomitum & diarrhoeam evacuari, fanatio hinc quidem possibilis est, si modica suppuratio adfuerit (vid. diar. 1783. August. no. 3,) sæpius letalis est eventus imprimis per tabem concomitantem (vid. diar. 1784. Maj. no. 10. & 1785. Sptbr. no. 12.)

b). Abscessus ruptura fieri potest in cavitate abdominis, cuius effectum observavi subitanam mortem, aut enteritidem gangrænosam (vid. diar. 1785. Junii no. 9.)

c). Abscessus etiam extrorsum spectare potest & tumorem formare, nec non ad diaphragma propagari, illudque atque adjacentem pulmonem in suppurationem convertere cum lethali eventu (vid. diar. 1785. Sptbr. no. 12.) Aliud mihi occurrit exemplum, ubi insignis talis abscessus in cardia formatus et apertus largissimum pus cum numerosissimis hydatidibus effundebat posteaque tussis accessit purulenta foetida, attamen post plures quidem menses sanitas integra restituta fuit.

d). Abscessus hepatis permanens absque ruptura ob tabem letalis fit (vid. diar. 1784. Octbr. no. 8. & 1785. Junii no. 7.)

3. In gangrenam, & mortem ideo citius accedentem, sub qvâli terminatione subito cessat dolor cum pulsu celeri exili & artuum frigido sudore (vid. diar. 1783. Februar. no. 5 & April no. 3 & 1784. August no. 12 & 1786. April no. 8. citissime letalem ex inflammatione cystidis felleæ vid. diar. 1784. Jul. no. 13.)

4. In infarctum s. obstructionem hepatis (vid. diar. 1783. Junii no. 3. & 1785. Februar. no. 6.) qvæ seqvæla tamen curabilis æstimari potest, (vid. diaria ibidem.)

Curatio hepatitidis, uti alterius inflammationis, peragenda est.

1. Venæsectione ter qvaterve repetita, vix adeo frequenter ac in alia inflammatione ob circulationem sanguinis in hoc viscere tardiore, si forsan tumores hæmorrhoidales adsint, ibidem hirudines applicare prodest.

2. Internis antiphlogisticis, uti mixtura camphorata acida bihorio ad cochlearia duo, cui sub singultu pauxillum mosci apponi potest, qvæque si vomitus molestus urgeat, alternatim cum julapio salino adhiberi potest; potus copiosus sit, acidulus, uti serum lactis.

3. Externis talibus, primis diebus convenit diligens inunctio limmenti volatilis camphorati in regione affecta, quarto circiter die vesicatorium ibidem applicandum est, vix unqvam in hepatitide omittendum, qvippe non modo inflammationi ip-

fi conveniens, sed quoque ad indurationem insequentem prævertendam proficuum.

4. Laxantibus contra fegnitiam alvi huic morbo communem; sub doloris graviore gradu enematribus emollientibus oleosis quotidie injiciendis vel mixtura camphorata laxativa hic scopus impleri debet; dolore autem notabiliter diminuto confert per tres quatuorve dies exhibere pulverem e radicis rhei nitri depurati ana scrupulo, camphoræ granis duobus confectum omni mane & vespera; hoc non modo exoneratur alvus, sed circulatio humorum hepatis specifica rhabarbari virtute in ordinem debitum redigitur.

Curatio suppurati hepatis rarissime & in unico casu, ubi modicus abscessus ad canalem intestinorum pus contentum transmittit, locum habens desiderat promotionem evacuationis per lenissima remedia uti solutionem mannæ calabrinæ, serum lactis pro potu, & completa demum evacuatione, tincturam rhei aqvosam ad hepatis vasa & intestina corroboranda.

Curatio infarctus hepatis resolventibus peragenda est, cujus completior memoratio ad hepatalgiam pertinet.

Ad inflammationes abdominis adeo raras, ut singulari mentione haud opus habeant, pertinent Splenitis s. lienis inflammatio, nec non omenti, pancreatis & peritonei inflammatio, quæ omnes

e sede doloris & adjuncta febre dignoscendæ, atque cura antiphlogistica communi tractandæ sunt; inflammatio peritonei mihi aliquoties occurrit, cognita e triplici adjuncto signo sc. inflammatorio dolore abdomen fere integrum occupante, ejusdem expansione, alviqve illæso fluxu, qvalem diagnofin demortui fectio probavit (vid. diar. 1786. Sptbr. no. 7.; lienis fuppuratio notabilis occurrit in diar. 1787. Decembr. no. 5.)

Species II^{da}.

GASTRITIS

Inflammatio ventriculi etiam rarus morbus.

Symptomata & figna.

1. Febrilia communia, frigus initio, fitis notabilior, pulfus celer tensus, quandoqve non febrilis, urina rubra.

2. Particularia, dolor ipfe in regione ventriculi confans a preffione externa, & maxime ab ingeftis adauctus, vomitus partim fpontaneus, præfertim & mox poft ingefta, eructatio, fingultus, anxietas, alviqve obftipatio, attamen non confans. In lenta ventriculi phlogofi dolor præfertim ab ingeftis aggravatur et vomitus ex iisdem revocatur.

Caufæ gastritidis.

1. Ingesta acria, valide irritantia, ut venena, arsenicum, mercurius sublimatus, & similia, medicamenta drastringa, emetica, purgantia, etiam potus largus frigidissimus incalescente corpore haustus.

2. Morbosae acrimoniae ad ventriculum depositae imprimis arthritica, rheumatica, metastatica.

3. Externa violentia, contusio, vulneratio.

4. Animi pathemata graviora, ut ira, indignatio.

Eventus gastritidis:

1. In sanitatem possibilis sub iusta adhibitâ medela, morbiqve gradu & causa mitiori.

2. In gangraenam & mortem timendus ab omissa medela, gradu morbi enormi & validissime agentibus causis, uti venenis; terminus talis jam praesens indicatur doloris plenaria cessatione, pulsu celeri exili, sudore frigido, excretionem alvi involuntaria.

3. In suppurationem, cujus signa & exitus eadem sunt ac in hepatitide, a me ipso nunquam observatam & sine dubio rarissimam.

4. In scirrhum s. indurationem partis cuiusdam ventriculi circa pylorum praesertim vel circa cardiam; unde vomitus incurabilis demum vires prorsus consumens (vide vomitum hecticum.) Etiam enormem ventriculi tam expansionem quam

angustationem indeque natam hecticam consumptionem, ut effectus gastritidis observavi.

Curatio gastritidis perficitur

1. Venæsectione, quæ citò, copiose & frequenter instituenda est, donec dolor & reliqua morbi symptomata cessent; nulla inflammatio magis quam canalis intestinalis phlebotomiam desiderat, & tolerat; ad quatuordecim vices illam, si opus fuerit, repetii; etiamsi medela initio neglecta sit, & morbus diutius duraverit, tamen sola fere sanationis spes in venæsectione ponenda est.

2. Remediis camphoratis, ex. gr. emulsione communi unciis octo, cum camphoræ granis octo, ad cochleare majus omni hora, & si singultus simul adsit, mosci granis quatuor; solito minor dosis camphoræ huic morbo quadrat ad præcavendam irritationem; camphorata talia etiam post sublatum dolorem aliquot diebus continuanda sunt, ut inflammationis omne vestigium & dispositio deleri queant.

3. Ingerendis, potu & alimentis blandissimæ indolis; quamdiu dolor durat, solum decoctum avenæ aut hordei cum pauxillo sachari, infusum theæ, emulsionem amygdalarum dulcium permitto, & hæc quidem tepida, parca, sed eo crebriore dosi, ne pondus ventriculum affectum irriter; devicto dein morbo & redeunte appetitu juscula carnea leviora cum emollito pane triticeo, juscula alia e cerealibus solito modo confecta, pisces flu-

viatiles, pauxillum vini aqua commixtum; taleque vitæ genus ad octo saltem dies pro avertenda reversione morbi, alias sat facili, desideratur. (Comitem quendam tractavi, cujus ventriculus post sufficientes licet institutas venæsectiones adeo fiebat sensibilis, ut minimus ingestorum stimulus mox vomitum citaret, sola ideo emulsio amygdalina per aliquot dies sumebatur, quo modo enormis sensibilitas tollebatur, & curationem dein minutæ doses camphoræ complebant.)

4. Externis abdomini applicitis, uti linimento volatili diligenter inuncto, & post tres quatuorve dies atque venæsectionem repetitam imposito, si dolor perseveret, vesicatorio.

Curatio abscessus & scirrhi ventriculi haud alio modo quam per ingeste tenuia & blandissimæ indolis institui potest, unde tamen potius levamen, quam sanationem sperare oportet.

Species III^{ia}.

ENTERITIS

Est dolor fixus constans abdominis in regione intestinorum cum obstipatione alvi plenaria, & utplurimum adjuncta febre continua.

Symptomata præter communia febrilia sunt:

1. dolor ipse, fixus, constans, circumscriptus, pressionem externam haud tolerans, per intervalla

gravior sine dubio e flatibus contra inflammatum locum nitentibus, 2. expansio nonnulla minoris majorisve gradus abdominis, 3. alvi completa obstipatio & flatuum plenaria retentio per inferiora; 4. eructationes & vomitus etiam possibilis, sub maximo morbi gradu adeo increfcere valens, ut materia excrementitia evomatur, qualis morbi gradus Ileus, passio illiaca f. miserere, nuncupari solet; 5. pulsus ut plurimum tensus celer, quandoque haud febrilis.

Causæ remotæ enteritidis.

1. Ingesta acria, venena, vel medicamenta drastica; aliquoties hunc morbum ortum vidi e solutione resinæ jalappæ sub nomine tincturæ catharticæ a vulgo purgandi scopo usitari solita.

2. Suppressæ & retentæ excretiones variæ abdominales; diuturna alvi obstipatio, fluxus hæmorrhoidalis, aut menstruus subito suppressus; diarrhoea adstringentibus intempestive cohibita.

3. Acrimonie variæ ad intestina depositæ, uti rheumatica (vid. diar. 1786. August no. 5. Novbr. no. 4.); arthritica (vid. diar. 1785. Junii no. 12); metastatica imprimis a febribus putridis (vid. diar. 1784. Octbr. no. 1, & 1785. Januar. no. 1); materia lactea (vid. diar. 1786. April no. 9. & Novbr. no. 8.); serum hydropicum in asciticis (vid. diar. 1784. Jul. no. 12.)

4. Hernia inquilina vel incarcerata satis communis & cognita causa.

5. Violentia externa, contusio, paracentesis incauta manu facta, levatio gravis oneris (vid. diar. 1784. April. no. 5.)

Diagnostica signa enteritidis non fallentia sunt junctim sumta, 1. alvi & flatuum plenaria obstipatio & retentio, 2. dolor ipse fixus, gravis, circumscriptus, quo a colica spasmodica distinguitur inflammatio, 3. expansio nonnulla abdominis, quod etiam censendum est signum enteritidis distinctivum a spasmodica colica, ubi abdomen constringitur; 4. dictorum symptomatum duratio per unum alterumve diem, quandoque enim colica allatis signis prædita e saburra vel rheumatica acrimonia sine vera inflammatione oritur, medelæ hisce causis convenienti sc. mixturæ camphoratæ vel simul laxativæ cedens; quod vero si non cito observetur, morbus ut inflammatio tractandus est. Etiam causa præcedens examinata diagnosi certitudinem affert, sic opifices, qui plumbeas materias tractant, invadentem colicam pro spasmodica judicare fas est; quandoque sese adeo referunt hæ species colicæ, vel revera conjunctæ existunt, ita ut, quænam præ alia præsto sit, aut prævaleat, etiam exercitatisimus eruere nequeat, in tali casu ambiguo morbum statuere inflammatorium & qualem apta medela debellare tutissimum est (vid. diar. 1783. Aug. no. 8. Novbr. no. 6. Decbr. no. 6. & 1784. Aug. no. 3.); ad diagnosin enteritidis completam etiam pertinet exploratio & cognitio causæ ejusdem, præsertim, num hernia adsit?

Eventus enteritidis :

1. In sanitatem, qualis fere semper sub debita & tempestive applicata medicatione sperari potest, signa hujus terminationis sunt: a) doloris sensim factum decrementum & cessatio, b) flatuum emissio, c) dejectio alvi spontanea, d) pulsus in naturalem conversus.

2. In suppurationem, non verum abscessum, qualem in demortuis nunquam observavi, sed generationem puris in superficie intestinorum, ejusdemque effusionem in cavitate abdominis, (vid. diar. 1782. Octobr. n. 7. 1783. Novbr. n. 9. & 1786. April. 9.); quandoque pus ex abdomine ad alias corporis partes nobiles transfertur, (vid. diar. 1783. Januar. n. 11. & 1784. Mart. n. 10.); in utroque casu nil præter mortem expectari potest; signa hujus sunt continuatio modici doloris diuturna, febris, expansio abdominis, horripilatio intercurrentes.

3. In indurationes, aut in ipsis intestinis aut partibus vicinis, quales indurationes vel, ut bis observavi, prospere sanantur; vel occludendo canalem intestinorum alvi obstipationi, vomitui, ileo, novæ letali inflammationi ansam dant; vel in abscessum transeunt, & febrem hæticam letalem progignunt. (vide notabile exemplum in diar. 1735. Dec. no. 6.)

4. In gangrænam & sphacelum letalem, quam indicant subita cessatio doloris, pulsus valde

celer debilis, extremitates frigidae & viscide fundantes, quandoque alvus tunc sponte solvitur, etiam vomitus stercoreus jungi potest (vid. diar. 1783. Septbr. n. 9 & 10. Novbr. n. 10. 1784. April. n. 4 & n. 5.) Gangrænosus intestinorum status in dissectis consistit in colore livido vel atro rubescenti, constrictione tubi intestinalis, substantia molli, solubili vel reipsa disrupta & perforata, (vid. loc. cit. diar. 1785. Sept. n. 2.)

Curatio enteritidis eadem fere fit ac in gastritide:

1. Per venæsectionem bis terve per diem & toties repetendam, donec dolor fere cessaverit & flatus abeant, terminus alius phlebotomiæ in hoc casu definiri nequit, illam ad quatuordecim vices repetere me coactum fuisse recordor.

2. Per camphorata intus fumenda, sc. mixturam camphorata acidam, vel emulsionem camphorata ad cochlearia duo majora bi-horio, & devicto morbo tamen per aliquot dies continuandam, licet rarius, prophylaxeos ergo; mihi occurrit casus, ubi camphoræ vices subiit moscus, (vid. diar. 1783. Aug. 7.)

3. Per alvi aperturam rito modo promovendam; quamdiu dolor perseverat & flatus non abeunt, nulla remedia, nequidem clysmata in usum trahenda sunt ad solvendam alvum, indubitata enim constat experientia, nullum inde produci effectum, sed morbum pejorem fieri; quando

autem dolor prorsus vel fere cessavit, flatu abeunt, & alvi apertura, quæ tunc temporis ut plurimum sponte procedit, tamen retinetur; tunc & innocuum & utile est, artis ope alvum movere, aut per clysmata potissimum initio adhibenda, confecta ex oleo, decocto avenæ & saccharo, omisso sale ut nimium irritante; aut mixtura camphorata laxativa aut pulvere enitri depurati, lactis sulphuris ana scrupulo, camphoræ grano parato trihorio præbitum, donec effectum producat; oleum ricini americani ad cochleare majus trihorio quoque egregiam virtutem habet, quid! quod! juvit in casu, ubi dolor cum obstipatione post undecim venæsectiones ad summam debilitatem usque non mitigatus erat. Dantur casus ubi post venæsectionem, quantum vires permittant, repetitum dolor quidem cessat, attamen nec alvus aperitur, nec flatu abeunt, tunc clyisma et innocuum et efficax inveni. Devicta ipsa inflammatione intestina laudatis laxantibus bene et quotidie evacuanda sunt et a sordibus sub prægressa obstipatione largiter collectis liberanda, quæ neglecta cautela, facilis, quod quoque experientia me docuit, fit morbi relapsus.

4. Per diætam s. ingesta blandissimæ indolis, qualia in gastritide commendata sunt, adeoque abstinentiam ab omnibus irritandi vi præditis, non modo sub ipso morbo, sed quoque per aliquot posthac præterlapsos dies; omnia alvum laxantia præ-

ter supra allata damnanda sunt, utpote morbi relapsum suscitare valent (vid. diar. 1783. Aug. n. 7. & Nov. n. 3.)

5. Per externa abdomini applicanda, imprimis linimentum volatile camphoratum; vesicatorium etiam laudatur, illo autem raro opus habui; reliqua enim methodus, si sanatio possibilis sit, per se ut plurimum sufficit.

Curatio suppurationis & indurationis intestinalium raro contingit; illæ, quas sanatas vidi, indurationes imo notabiles linimento resolventi, cataplasmati emollienti internoque pilularum resolventium usu cedebant; levamen afferunt ingesta blanda, tenuia, & alvi per se in hoc casu communiter clausæ solutio pro necessitate promota, imprimis per oleosa ingesta, aut sub enemate applicita.

Species IV^{ta}.

N E P H R I T I S

Est dolor fixus, ardens vel punctorius, quandoque obtusus gravativus in regione renali utraque vel alterutra cum febre continua junctus.

Symptomata & signa adeoque sunt: 1. dolor ipse dicti loci profundus ad inguen quandoque testemque extensus, 2. stupor femoris affectu lateris, 3. urina impedita, vel parca rubra & in summo

malo alba, 4. vomitus vel vomituritio, 5. defec-
tus urinæ in vesica.

Causæ nephritidis :

1. Violentia externa, uti contusio in regione renum, fortis & protracta equitatio.
2. Calculi renales asperitate & pondere irritantes & inflammantes.
3. Diuretica validiora imprimis e cantharidibus parata.
4. Fluxus hæmorrhoidalis suppressus, & sanguinis congestio ideo ad renes conversa.
5. Materia arthritica ad renes deposita, uti alias partes, ita quoque renes inflammare valens.

Diagnosin e symptomatibus, causis prægressis & signis supra allatis depromitur; constantia doloris & febris concomitans nephritidem a mere affectione calculosa distinguunt; profunde sentitus dolor & depravata diuresis a rheumatica lumbagine nostrum discernere morbum docent. In casu dubio tutius est morbum inflammatorium habere et quatalem tractare.

Eventus :

1. In sanitatem, ut in aliis inflammationibus quamplurimum e rita & tempestiva medela sperandus, atque doloris decremento & liberiori reddita diuresi indicatus; urina tamen limpida nil boni portendit.
2. In suppurationem renum, quam timere oportet e morbo, ultra 14tum diem protracto,

dolore in obtusum prefforium mutato, horripilatione intercurrente, urina pus continente, qualis suppurationis terminatio vix alia quam hectica & letalis consumptio esse potest, imprimis si inflammatio notabilem renis partem occupaverit (vid. diar. 1782 Februar. n. 6, 1784 Januar n. 10 & 1785 Octobr. n. 6.)

3. In mortem, aut mediante gangræna cum hujus solitis signis, aut propter suppressionem urinæ, quæ cerebrum petit, & mediante lethargo aut delirio mortem infert.

Curatio nephritidis desiderat:

1. Venæsectionem repetitam, uti alia interna inflammatio.

2. Camphorata & nitrosa, imprimis emulsionem camphoratum omni hora præbitam, utpote quæ acrimonia urinæ imprimis temperari potest.

3. Potum copiosum blandæ & mucilaginosæ indolis etiam ad urinæ acrimoniam diluendam & involvendam; uti decoctum avenæ, vel potum theiformem e radice althææ & semine lini; acida haud conveniunt.

4. Clysmata emollientia oleosa semel aut bis quotidie injicienda, ad circulationem abdominalem promovendam perapta.

5. Externam inunctionem per linimentum volatile camphoratum solum, vel cum unguento althææ junctum et semicupium tepidum; unguen-

tum sinapium et vesicatorium ob specificam cantharidum vim renes irritandi haud quadrat.

6. Opium, uti laudanum liquidum Sydenhami, cuius guttæ nonnullæ cum emolumento porrigi possunt post venæsectiones sufficientes & reliquam allatam methodum adhibitas, & quando æger antea calculis renalibus subiectus fuit, adeo ut præsentem inflammationem e calculis talibus ortum trahere concludere queat, debellata enim inflammatione spasmodica renum affectio per continuatam calculorum irritationem producta, opiatum tollitur, ita ut calculosum irritamentum melius transmitti & evacuari queat.

Curatio suppurati renis:

1. Si pus per vias uriniferas effluat, conferunt aqua felterana cum lacte pro potu largiter ingerenda, nec non mixtura ex essentia corticis peruviani uncia, spiritus vitrioli drachma ad guttas septuaginta ter indies, si forsan alvus stricta sit, pilulæ e radice rhei cum sufficiente quantitate terebinthinæ venetæ ad grana quindecim mane & vespera commendandæ sunt.

2. Si exteriora versus tumeat ren suppuratus, incisio illius chirurgica desideratur, verum absque spe sanationis completæ perficitur.

Species V^{ta}.

C Y S T I T I S

s. INFLAMMATIO VESICÆ URINARIÆ

Est constans vehemens dolor vesicæ urinariæ cum adjuncta febre continua.

Symptomata & signa præter febrilia communia sunt: 1. dolor ipse urens fixus circa os pubis, vel in regione perinæi, 2. stranguria continua s. mingendi desiderium, quandoque sine vero mictu s. cum ischuria, 3. urina admodum saturata, sanguine interdum mixta & mucosa.

Causæ possibiles: 1. calculus vesicæ urinariæ & per illum producta irritatio, 2. suppressio fluxus hæmorrhoidalis vel menstrui, 3. materia arthritica ad vesicam deposita, 4. injectiones acres per urethram, indeque gonorrhoea suppressa.

Eventus ut plurimum votis non respondens propter irritationem ex affluente urina continuam & non impediendam: doloris notabile decrementum, & restitutus urinæ fluxus spem sanationis præbet; purulenta urina suppurationem factam demonstrat, unde haud alia terminatio præfagienda est, quam ulcus incurabile, diudurans, miseros cruciatus & hecticam consumptionem secum ducens; etiam citiore modo per gangrænam letalem morbus finiri potest.

Curatio peragenda est eodem modo & iisdem remediis, ac nephritis: catheterismus in hoc morbo effectu evacuante caret et irritatione morbum auget ideoque semel ab exercitata manu instituta et haud succedens vix repeti debet, antequam dolor sufficienti sanguinis missione notabiliter minutus imo sublatus fuerit, creber autem infusus super vaporem aquæ calidæ utilis et innoxius est, uti quoque inunctio regionis vesicalis cum linimento volatili camphorato, vel epithema aromaticum; hirudines circa perineum applicitæ etiam proferre valent, (exemplum hujus morbi gradu modici sanati, vid. diar. 1782. Jan. n. 4.)

Species VI^{ta}.

MÉTRITIS s. INFLAMMATIO UTERI

Est dolor fixus in regione uteri, vel partium ad illum pertinentium cum annexa febre continua.

Symptomata & signa: 1. dolor ipse inflammatorius, aut in collo uteri cum impedita diuresi, aut in corpore & fundo uteri pressionem abdominis haud tolerans, aut in postica uteri parte cum lumbagine & excretionem alvi difficili, molesta, aut in partibus lateralibus, atque ovariis cum dolore, imo tumore in regione ingvinali & iliaca, (vid. diar. 1784. Sept. n. 4. & 1786. Maj. n. 3.); 2. abdominis quandoque expansio, 3. suppressio fluxus

lochiorum vel menſtruorum, 4. febris acuta quandoque cum delirio.

Cauſæ: 1. refrigerium, imprimis frigus immediate partes uterinas tempore fluxus ſanguinei uterini aggrediens, 2. violentia externa utero inducta, uti per partum difficilem, rudem & incautam obſtetricationem, & placentæ ſolutionem; aut contuſiones, ictumve tempore graviditatis in uterum directæ.

Eventus non raro benignus evadit; ſub febris & doloris ſenſim obſervato decremento, nec non effluxu puris laudabilis per vaginam ſperandus; contrarius & letalis exitus timendus eſt ſub vehementi gradu morbi per debitam medelam non decreſcente, & accedentibus effluxu materiæ ichoroſæ ex utero, purpura alba, & ſignis gangrænæ generalibus.

Curatio perficienda eſt: 1. venæſectione crebro repetita, donec dolor prorſus vel fere ceſſaverit, 2. enematibus emollientibus oleoſis quotidie vel alternis diebus reiterandis, 3. camphoratis, aut mixtura camphorata acida, aut emulſione camphorata bihorio exhibendis, 4. diligenti inunctione abdominis per linimentum volatile camphoratum, etiam epithema ſ. pannus laneus aceto calido madefactus & frequenter repetitus abdomini cum emolumento applicari poteſt.

FEBRIS RHEUMATICA

Est febris continuea cum dolore vehement
& vagante artuum.

Symptomata sunt:

1. Communia febrilia, frigus initio, alias sitis, æstus, sudor spontaneus largus præsertim initio morbi, urina rubescens in genere sedimentosa, pulsus celer tensus, sanguis e vena missus phlogisticus s. crusta lardacea tectus; cephalalgia non essentialiter huic morbo competit.

2. Specialia:

a) Dolor ipse: sedes illius præcipua in juncturis artuum, rarissime omnibus simul, ut plurimum tantum in nonnullis, sese extendens ad musculos vicinos; migratio s. vagatio ab uno articulo ad alterum & quidem oppositi lateris ex. gr. a brachio sinistro ad pedem dextrum & vice versa, donec quandoque omnes juncturas pervagaverit; interdum ab artibus transit in truncum, pectus, abdomen, caput, eorumque internas vel externas partes occupat; raro rheumatismus febrilis in una parte v. c. junctura aliave ab initio ad finem hæret, in quo casu febris levior est; gradus diversus doloris, mox remittens mox exacerbatus.

b) Tumor dolentis partis, ipsi dolori succedens cum levamine, vagans ut ipse dolor, raro ru-

bens ut plurimum cuti concolor, admodum sensibilis, attactum & pressionem externam haud tolerans.

c) Immobilitas affecti membri, partim ob dolorem inde adauctum, partim ob musculos ipsos per morbum motui ineptos redditos. Duo hæc ultima symptomata non inseparabilia sunt.

Causæ remotæ:

1. Aëris temperies frigida, ventosa, præsertim ex oriente spirans; hinc in regionibus borealibus & hyemali tempore imprimis hic morbus sævit; nonne certa quoque constitutio epidemica? dum certis annis absque manifesta qualitate singulari atmosphæræ frequentior, quam aliis annis observatur.

2. Refrigeratio s. corpus imprimis calens, vel sudans frigori gravi vel diuturno expositum.

3. Dispositiones, ætas adulta, morbus idem prægressus, abusus bacchi & veneris.

Causa proxima haud immerito habetur serum acre viscidum ad partes articulares & musculos depositum, quod irritatione dolorem, febrem, affluxum humorum indeque tumorem, adeoque inflammatorium statum producere valet.

Diagnostica signa.

1. Rheumaticæ febris proprie talis s. artus occupantis sunt symptomata supra allata sc. 1. communia febrilia, 2. artuum dolor, tumor, im-

mobilitas, 3. subita morbi invasio, 4. prægressum manifestum refrigerium, quibus ultimis indiciiis potissimum rheumatismus ab arthritide distingvendus est, utpote hæc absque prægresso refrigerio manifesto, lentiusque provenit, & fixior est.

2. Rheumatismi non articularis, sed alias corporis partes occupantis s. anomali sunt, 1. dolor has partes subito & post refrigerium aggrediens, 2. alternatio doloris cum affectione artuum, vel aliarum partium et successio imprimis immediata post dolorem artuum evanidum, 3. vaga doloris indoles, ita ut mox fere cesset, moxque redeat, ita rheumatismus pectoris (vid. diar. 1785. Januar. 3. Junii 3. 1786. August 4.), abdominis (1784. August no. 5. 1786. August 5. Novembr. 4.) Rheumatismus anomalus cum vel sine febre adesse potest atque omnes trunci partes tam externas quam internas occupare, sic dantur cephalalgia, odontalgia, otalgia, pleurodyne, tussis, colica rheumatica cet, in quibus rheumatica indoles quandoque per omnia allata signa indicatur interdum modo per primum et tertium.

Prognosis.

1. Duratio hujus morbi præsertim proprietalis diuturna ad plures hebdomades, imo menses observatur, maxime ob superstites artuum dolores non febriles; rheumatismus non articularis citius finitur.

2. Exitus morbi in sanitatem fere semper sperari potest, sudor, urina sedimentum imprimis salinum continens, hæmorrhagia narium, diarrhoea, expectoratio larga mucosa, salutares & ad morbi finem promovendum aptæ excretiones judicandæ sunt.

3. Reliquiæ rheumaticæ febris ut plurimum sunt dolores artuum non febrilis cum tumore & immobilitate.

4. Letalis eventus rarissima sunt exempla, possibilis tamen ille est præsertim in ipsa rheumatica febre per depositionem materiæ ad partes nobiles cerebrum imprimis & pulmones, & eorundem inde productam læsionem notabilem, quod a refrigerio indeque suppresso sudore vel remediis topicis repellentibus imprimis timendum indicatur dolore subito vel notabiliter decrecente vel evanescente præsertim succedente partium nobilium affectione.

Curatio rheumaticæ febris ad triplicem partem referri potest sc. ad curationem, 1. febris rheumaticæ regularis, 2. rheumatismi anomali, 3. affectionis articularis post febrem superstitis.

Curatio ipsius febris rheumaticæ, quamdiu & febris & dolor præsto sunt, locum habens desiderat.

1. Venæsectionem præsertim sub dolore graviori, pulsu forti & initio morbi; bis terve facta repetitio sufficit ad levandum dolorem; si hic modicus sit, aut vires debiles videantur, nequi-

dem svadenda est phlebotomia, utpote qvæ tantum mere levatoria, haud curatoria in hoc morbo censenda est, sc. a) dum arthriticam originem & indolem rheumaticis doloribus subesse suspicari possumus, nimirum in subiectis senioribus, arthritidem antea passis, lautumque vitæ genus, huic morbo ansam præbens, degentibus; hisce vix ultra unicam, si doloris vehementia illud expostulat, venæsectionem svadeo; (qvondam ter illam repetii, dolor hinc artus reliquit, cerebrum morbus petiit & apoplexiam citò letalem induxit.) b) Dum biliosa symptomata, lingua sordida, sapor amarus, capitis dolor vel vertigo rheumaticis doloribus juncta sunt; illis nocet venæsectio plus, quam his prodest, ideoque prohibenda est, ejusque loco methodus antibiliosa eligenda.

2. Temperantia, resolventia, diapnoica sc.

a) Medicamenta talia, uti pulverem temperantem camphoratum trihorio, vel mixturam camphoratum acidam bihorio; vel si alvus observetur segnis, pulverem e nitri depurati, lactis sulphuris ana scrupulo, camphoræ granis duobus compositum, trihorio sumendum, qualis pulvis etiam singulari virtute contra oppressionem pectoris sub hoc morbo accedentem gaudere videtur.

b) Potum copiosum, aliquatenus calidum, uti in aliis morbis inflammatoriis; serum lactis, si alvus non laxa sit, tempore æstivo, et, pronitate

ad fudorem minuta, infusum florum sambuci appropriate conveniunt.

c) Victum vegetabilem, quamdiu febris durat; carnea noxia, dolores augere & renovare valentia, monstravit experientia.

d) Aërem, quo æger fruitur, etiam modice calidum, et stragula lecti ad promovendum sudorem in hoc morbo salutarem, atque ad refrigerium prævertendum sufficientia.

e) Vesicatoria vel unguentum sinapium, haud quidem initio sub notabili febris dolorisque gradu, sed in progressu imprimis, si inexpectata remissio vel cessatio doloris, morbi ad partes internas conversionem suspectam reddat.

Curatio rheumatismi anomali juxta hujus effectus accomodanda est.

1. Si symptomata hinc surgentia in abdomine, vel pectore, vel capite inflammationis notam præ se ferant, venæsectio crebra, ut in alia inflammatione desideratur.

2. In universum profunt camphorata supra allata, vel si febris prorsus, vel fere nulla adfit, liquor nervinus ad guttas viginti bihorio aut potus *Punch* dictus vespere sumtus; vesicatoria aut in artubus, unde dolor recessit, aut successive in utroque loco; vices cantharidum optime quoque supplet unguentum sinapium intra paucas horas requisitum effectum exferens; quandoque crebrior talis epispastici applicatio ad pertinacem rheuma-

tismum fugandum opus est, tusſi humidæ e rheumatismo ortum trahenti prodeſt decoctum radieis ſenegæ cum oxymelle ſquillitico, vel kermes mineralis, quæ, uti ſupra de inflammationibus pectoris notatum eſt, porrigi debent.

Curatio affectionis articularis poſt febrem ſuſperſitis, ſc. doloris, tumoris, immobilitatis perficienda eſt.

1. Antarthriticis remediis internis, uti liquore nervino aut ſolo, aut eſſentia ſtibii Huxhami & ſpiritu lavendularum compoſito junctis ad guttas ſexaginta ter indies, aut ſolutione gummi gvajaci aquoſa ad cochleare majus bis terve indies; horum mox unum, mox alterum juvare videtur.

2. Motu corporis diligenti, imprimis affectorum artuum, quò etiam pertinet eorundem crebra frictio mediante panno laneo.

3. Balneis, vel vaporario, potiſſimum conveniente artubus rigidis & dolentibus; vel ſtillatio tumori juncturarum non dolenti admittendo; quotidie aut alternis diebus repetitio talis balnei fieri poteſt.

4. Linteo vel ſerico cerato aut panno laneo duplici affectæ parti applicito, quod contra omnes dolores rheumaticos externos ſaltem incipientes merito commendatur.

Ad præcavendum hunc morbum valde recidivantem cautio, quantum potis eſt, a refri-

gerio, & indusia lanca corpori proxima fvadenda sunt.

CLASSIS II^{da}.

DOLORES. NON FEBRILES.

Dolor est molesta fenfatio in parte qvadam corporis sese exferens; propria experientia omni definitione clariorem & certiozem doloris ideam exhibet; nemo est illam non habens, qvique non eandem, dum præsto est, indubitato indicare valet.

Ad nomen dolorum proinde referendæ sunt omnes corporis molestæ fenfationes, qvalicunqve etiam modo ab ægrotis appellatæ & descriptæ, uti dolor pungens, urens, lancinans, tensivus, dilacerans, pressorius, anxius; varietas fenfationis non mutat essentiam dolorifici morbi.

Dolorum non febrilium clasfis comprehendit morbos, qvorum symptoma præcipuum dolor est, qvique per se absque concomitante febre existere possunt. Generalis dolorum therapeutica consideratio ad specialem eorundem tractatum aptam parat viam.

Symptomata & effectus doloris in universum duplicis indolis esse possunt.

1. Mentalia.

a) Motus & inquietudo animi insolita, indeque corporis & membrorum jactatio, sub majoris molestiæ gradu ad convulsiones increfcere valens; vividior imaginatio & idearum impressio, ideoque infomnia; actionum quoque vitalium, si fortis fit dolor, in motum febrilem excitatio.

b) Applicatio mentis sola & valida ad ideam doloris; illius ideo abstractio ab aliis sensationibus & functionibus; nil appetit, omnemque laborem odit dolore affectus, hinc macies, langvor, pallor, imo lipothymia e dolore valido & protrac-to intelligi queunt.

c) Desiderium constans validum dolorem, dolorificam causam, imo dolentem partem removendi.

2. Corporea ad partem dolentem limitata.

a) Motus excitatio & augmentum in partibus afflictis differens juxta earundem naturam; sic in arteriis pulsatio vi & celeritate adaucta, in venis osculorum constrictio, in musculis contractio vel constans s. spasmodica, vel inconstans s. convulsiva.

b) Affluxus humorum solito copiosior ad partem dolentem, juxta hujus functionem variam differens; in organis secretoriis hærens dolor secretionem adauget, mucum ad tunicam pituitariam, urinam ad renes, lachrymas ad oculos, fucos ad intestina, ferum ad cutim allicit dolor, at-

que in vasis ipsis accumulationem nimiam creat; hic tamen doloris effectus in congerendo humores, experientia satis comprobatus, mediate oriri videtur, quippeque e vaforum motu per dolorem mutato & adaucto deduci & intelligi potest.

Causæ externæ doloris testante experientia ad tria genera referri possunt sc.

1. Distenduntia f. prolongantia, quibus particulæ componentes ultra naturalem modum a se invicem dimoventur; flatus intestina, sanguis vasa, luxatum partes articulares distendendo dolorem excitant.

2. Vulnerantia f. peregrina corpora mechanica vi continuum nexum partium solvere nitentia, uti pungentia, scindentia, contundentia.

3. Penetrantia, f. acrimoniæ vi oculis occulta in interstitia fibrarum penetrantes, itaque earundem solutionem intendentes. Talibus dolorificis materiis meritò tribuitur solvendi vis & conatus, utpote experientia docet, easdem sufficienti tempore & gradu agentes veram solutionem efficere, ex. gr. acida mineralia, ignis; modus verò, quo hæc in efficiendo dolore agunt, etiam in aliis similibus sic dictis acrimoniis isdem videtur.

Causa interna f. disponens doloris est partium sensibilitas f. facultas impressiones percipiendi; hac dote sanæ non præditæ partes, uti ossa, cellulosa, ligamenta, doloris incapaces sunt; quo major partis est sensibilitas f. naturaliter f. morbose ta-

lis, eò facilius & eò gravius sub eadem causa externa excitatur dolor.

Causa proxima doloris, quæ necessario ex manifesta causarum externarum actione patet, est status partium sensibilibum, sub quo particulæ easdem componentes a naturali combinationis gradu dimoventur, unde virtus citatur motus per nervos ad animam propagatus, ideamque doloris excitans.

Curatio dolorum in universum ad causas illorum debellandas & tollendas dirigenda est sc.

1. Causæ externæ supra memoratæ, si adhuc præsto sint, aptis remediis sunt auferendæ, hæc principalis & radicalis ut plurimum est curatio; quæ verò tantummodo in speciali dolorum tractatione exponi potest.

2. Causa interna s. sensibilitas partium infringenda est, unde dolor etiam tolli vel levari potest; huic scopo quadrant.

a) Destruere nervos ad partem dolentem pertinentes, sic odontalgia fugatur urendo per cauterium actuale nervum dentis dolentis, sic quoque in certis vulneribus nervum pro parte læsum transcendendo dolor tollendus est.

b) Relaxare dolentem partem, ita ut minus apta reddatur ad motum e causis dolorificis impressum ad animam propagandum, oleosæ inunctiones, cataplasmata emollientia hoc modo dolorem levare videntur.

c) Stupefacientia præsertim opium, quibus pro tempore sensibilitas totius nervosi systematis, adeoque dolentis partis diminui, itaque dolor levare vel tolli potest.

d) Alterantia, quibus alia insolita sensatio, dolorem obscurans imprimatur nervis; hoc modo varia penetrabilia, & volatilia remedia, uti camphora, moscus, assa foetida, castoreum, dum dolores compefcunt, agere videntur.

Divisio dolorum ratione sedis diversæ convenientissime instituitur in duos ordines sc.

1. Dolores universales, qui, salva eadem essentia, in omni corporis parte locum habere possunt, ubicunque existunt, morbum tamen quoad essentiam eundem constituunt.

2. Dolores particulares, qui ad certam corporis partem limitati sunt, & ex hac sede propriam essentiam & nomen capiunt, s. juxta sedem diversam etiam indolis diversæ redduntur.

O R D O Imus.

DOLORES UNIVERSALES s. ARTHRITIS.

Arthritis s. dolor arthriticus est dolor non febrilis, certa sede non determinatus, in omni parte corporis possibilis, articulis præsertim inhærens,

e quonam tanquam potiori prædicato, nomine arthritidis f. articularis morbi insignitur.

Duo ad hunc ordinem pertinent genera sc. arthritis regularis, & arthritis anomala.

G E N U S I

ARTHRITIS REGULARIS

Est arthritis extremitates vel juncturas earum occupans.

Symptomata arthritidis:

1. Dolor ipse essentiam morbi constituens sequentibus attributis gaudens sc.

a) Non febrilis f. febrem haud necessario secum ducens; accidentaliter gradus doloris tantus esse potest, ut motus febriles pro tempore induci possint.

b) Inconstans f. vagus, ad certam corporis partem, quamdiu existit, haud limitatus, sed qui vel revera sedem suam frequenter mutat, vel saltem sub certis accedentibus causis ad sedem mutantam aptus est.

c) Artus f. extremitatum juncturas frequentissime occupans.

d) Periodicus sc. non idem ab initio ad finem permanens, sed per intervalla gravior, remittens, imo silens.

2. Tumor quandoque, non semper in dolenti parte, sub progressu doloris & cum ejusdem levamine exoriens, vel cuti concolor, vel rubens, ipseque præsertim ab attactu dolens, sensimque evanescens; huc quoque referri possunt nodi in juncturis præsertim digitorum, arthritide frequentis & inveterata afflictis surgentes, duri, indolentes, permanentes, raro in suppurationem sponte conversi & sub illa materiam, quam continent, calcareæ indolis effundentes.

3. Immobilitas s. rigiditas partis dolentis varii gradus juxta vehementiam doloris utpote hujus sub motu incrementum præcipua immobilitatis causa est; huc quoque pertinent juncturarum concrectiones s. ankylosis, inveteratæ arthritidis haud rarus effectus (vid. diar. 1784. Jul. no. 4.)

Causæ externæ arthritidis, quatenus e nexu hujus morbi cum prægressis concludi potest, sunt sequentes, præsertim illarum plures conjunctim agentes.

1. Refrigerium, sub quo vel integrum corpus, vel certæ ejusdem partes imprimis incalentes aut sudantes frigori gravi, crebro, protracto, humido, vel aspiranti aeri frigido exponuntur; notabilior hujus causæ gradus validiores affectus rheumaticos febriles producit; lentius verò agens eadem causa articulare morbum chronicum s. arthritidem creare valet, uti quoque suppressio sudoris soliti pedum, qualis igitur causa

etiam investiganda est, ut apta medela sc. pediluvio debellari possit.

2. Victus lautus ex alimentis valde nutrientibus, acribus, aromaticis compositus, præsertim sub omisso corporis labore ad debitam ingestorum digestionem requisito; multi hanc vitam degentes incremente ætate arthritide affliguntur, cujus alia causa quam antea talis diæta cogitari nequit.

3. Potus spirituosus, ut vinum simplex, vel adustum, copia nimia ingesti, Swietenius perhibet, arthritidem ante usum vini in Hollandia rarum fuisse morbum, postea frequentiore; vix alios, quam vini potatores in anglia podagricos esse refert Makbride, nec ab hac assertione quoad nostrates propria mea experientia multum discrepat. Spiritus fortes sine dubio præprimis sub coelo frigido arthritidis semina corpori inducunt, quod minus saltem valet de regionibus calidioribus, ubi largior transpiratio acres particulas humoribus per tales potus communicatas aufert & dissipat.

4. Animi affectiones validæ, protractæ, vel pathemata talia, vel labores & studia, ipse bis vidi malum ischiaticum subito post grave animi pathema exortum; Sauvage arthritidis, quam ipse patiebatur, haud aliam novit causam, quam studia acriora; communiter arthritici sunt ingeniosi, sine dubio quia diligens animi exercitatio hanc do-

tem acqvirens, simul dispositionem ad illum morbum producit.

5. Morbi varii articulare affectum secum ducentes, aut progignere valentes, uti malum venereum, scorbutus, suppressio fluxus sanguinis soliti menstrui vel hæmorrhoidalis, cancer, retro-pressa & exsiccata ulcera aut efflorescentiæ cutaneæ (vid. diar. 1784 Novbr. 7 & 8, 1775 August no. 3 & Jul. no. 5.) Arthritis ex his causis meritò symptomatice censenda est, ejusdemque ideo mentio ad principales morbos pertinet. (Arthritici affectus pertinacis exemplum post febrem intermittentem exhibent diar. 1786 Januar. no. 2.) Sensibilitate nervorum nimia laborantes, hysterici, hydochondriaci, veneris usu & onanismo debilitati teste experientia artuum dolores crebro qveruntur facile orientes, iterumque facile evanescentes; talibus enim personis parvum sufficit irritamentum, quod igitur eo facilius tollitur; etiam talis arthritis symptomatice est.

6. Dispositio arthritica an datur? s. status corporis quosdam præ aliis ad arthritidem disponens? naturalis, sive hæreditaria, sive congenita vix demonstrari potest; certa autem est morbosa per arthritidem prægressam acquisita, & quidem eo major, quo sæpius ille morbus adfuit, (vid. diar. 1784 Jul. n. 4.)

Causa proxima arthritidis vix alia esse potest quam humores subtiliores lymphatici depravati irritanti f. acri imprægnati indole, vi cujus in partibus, ubi præcipue congeruntur, dolorem inducere valent; hæc theoria sequentibus rationibus dilucidatur & demonstratur:

1. Humores ut involvant irritamentum arthriticum, necessario fluit ex huius morbi vaga natura f. potentia ab una ad alteram partem migrandi; nulla autem præter fluida f. humores in corpore humano existit materia talis motus & transitus capax, unde sequitur, arthriticum miasma, quatenus vagatur, non nisi humoribus inhærere posse.

2. Lymphatici quoque sint humores sc. systema vasorum lymphaticorum permeantes, qui miasmatis arthritici involucrum constituunt; duplex tantum certo cognoscitur systema circulantium humorum sc. sangviferum & lymphaticum; in alterutro proinde necesse est, ut resideat miasma arthriticum: priorem sedem haud admittit summe volatilis arthritidis indoles, non possibilis, si materia arthritica ad transitum faciendum integram sangvinis massam percurreret & per renovatam secretionem in altera parte deponeretur; posterior ideo locus f. systema lymphaticum solus probabilis est, quinimo ad phænomena arthritidis declaranda valde aptus: immediate enim, ideoque celeriter materia arthritica per absorptionem lym-

phaticam ab una ad alteram partem transponi potest; et nonne integra lymphæ massa in arthriticis vitata est? ita ut illius varia congestio ad dolores in morbis, ubi lymphæ vitium manifestum adest, sc. syphilide, cancro, etiam probabile reddunt, reliquam arthritidem similem habere sedem; nonne balneationes calidæ arthriticis adeo proficuae sunt, quia absorptioni aquei humoris, quæ lymphaticum vitium diluitur & resolvitur, anfangant. Swietenius statuit sedem arthriticæ materiæ in fluido subtili ipsos nervos circumdante & humectante, quænam hypothesis tamen haud excusat, sed potius accusat lymphaticum systema, ad cuius circulationem allatum fluidum sine dubio pertinet.

3. Indoles tandem vitata dictorum humorum necessario ad constituendum arthriticum irritamentum requiritur; naturaliter enim comparati humores nullius morbi causam continent, vitium humorum morbificum duplex est sc. spissitudo & acrimonia, aut alterutrum ideo, aut utrumque efficeret miasma arthriticum; perpenſa arthritidis ratio utriusque præſentiam monſtrare videtur, dolor sc. acrimoniam irritantem, & frequens huius morbi pertinacia materiæ spissitudinem solutu difficilem arguunt. Non verò eadem requiritur indoles acrimonie, sufficit enim quæcunque, dum irritat; varii imo morbi, variaeque causa ex-

ternæ arthritidem procreantes probant, variam acrimoniam hunc morbum inducere valere; malum venereum, cancrum, scabiosum, herpeticum, unde arthritici dolores sæpe ortum trahunt, propria unumquodque acrimonia gaudet; in alia arthritide materia peccans forsan multiplex est, atque vitiis diætæ, unde contrahitur, conformis; arthritis e refrigerio perspirabile pro materia habere videtur; victus superfluous, sufficienti corporis motu non digestus, alterius sine dubio naturæ impuritatem f. acrimoniam lymphæ inducendo arthritidis causa evadit, & nonne adhuc aliud ex abusu spiritus fortis, toties arthritidis causa, inquinamentum generatur? Lymphatici humores natura sua coagulabiles sunt, nonne in arthriticis nimia ad tale coagulum lymphæ pronitas statui potest? morbi hujus facilis relapsus e tali lymphæ constitutione optime explicari potest.

Nexus symptomatum arthritidis cum allata causa proxima f. modus, quo ex hac phænomena in arthritico morbo obvia declarari possunt.

1. Dolor ipse est acrimoniæ cujuslibet, adeoque arthriticæ in partes sensibiles agentis necessarius effectus; illius intensitatem & durationem variam acrimoniæ diversa vis & spissitudo declarant.

2. Vaga doloris arthritici indoles f. ejusdem potentia etiam celerrimo pvasi motu ab una ad alteram partem migrandi, comprehenditur e sede

materiæ morbificæ in humoribus lymphaticis, quorum congestio a leviter agentibus causis mutari, mox ad unam, mox alteram partem dirigi, itaque dolorem transponere potest.

3. Periodica doloris arthritici indoles e materia morbifica mox in certa parte magis collecta & mox in massa integra lymphæ distributa produci potest.

4. Possibilis arthritidis sedes forsan in omnibus corporis partibus e vasorum lymphaticorum ad totum corpus extensione, eorumque mutua communicatione, quæ depravati lymphatici humoris ad cunctas corporis partes congestionem admittit, intelligi potest.

5. Crebrior in juncturis artuum arthritidis sedes adscribenda est causis, quæ ibidem magis quam in aliis corporis locis motum lymphatici humoris retardant, itaque illius stagnationi & congestionem anam dant; rigiditas harum partium naturalis dilatationem vasorum pro transmittenda lymphæ spissiori difficilem reddens; earundem minor calor s. major expositio ad frigus, quo lymphatici humores inspissari possunt, & demum forsan longa a corde distantia, ob quam motus humores propellens in artubus minus validus est.

6. Tumor manifestus, quodammodo inflammatorius, arthritidi sæpe nexus, solitus doloris est effectus; salutaris hic & levatorius est, quia & vasorum circumjacentium adauctum mo-

tum & majorem calorem, quibus causis materia arthritica dissolvi & dissipari potest, secum ducit.

7. Nodi arthritici perennes per inveteratam arthritidem producti merito adscribuntur lymphæ & materiæ arthriticæ adeo viscidæ, ut resorberi nequeat, hinc prorsus stagnanti, lapsu temporis sub refluxu tenuioris partis magis magisque inspissatæ, quinimo ob adjunctam, attractam & accrescentem terrestrem affluentium humorum partem, calculorum renis vel vesicæ adinstar, adauctæ, & concrementa notabilia materie terrea composita efficienti; coalescentia juncturarum in arthriticis ex lymphâ vitiatâ simili modo in cavo articulorum effusa & inspissata facile intelligitur.

8. Motus impotentia vel difficultas in partibus arthriticis, partim a tensione per motum inducta & dolentibus partibus intolerabili declarari potest; in certis tamen casibus validior causa ad hoc phænomenon producendum requiri videtur, an sedes materiæ juxta nervos secundum mentem Swietenii incusaretur?

Diagnostica arthritidis signa sunt symptomata hujus morbi supra allata imprimis, quæ definitionem constituunt sc. dolor, non febrilis, vagus, periodicus, articulos s. juncturas artuum minus magisque constanter occupans.

Distinctio arthritidis a rheumatismo apyreto haud desumi potest a sede doloris, quæ, ut nonnullis statuere placet, in priori tantum juncturas, in

posteriori musculares partes occupat, verum quis expertus nescit contrarium sc. arthritidem æque ac rheumatismum, & hunc æque ac illam, & juncturas & reliquas corporis partes occupare posse; sola distinctiva nota est origo mali; dolor sc. articularis apyretos post febrem rheumaticam superstes, etiam rheumaticus censendus & nuncupandus est; absque hoc signo distinctio, nec possibilis, nec quidem opus est, utpote eadem medela in utroque malo convenit.

Prognosis:

1. Duratio arthritici morbi diversa; primi illius accessus uti mitiores, ita quoque in genere breviores observantur; reversio fere quævis diuturnior fit, & juxta incrementem ægroti ætatem quoque ad durationem incrementum.

2. Transitus arthritidis in sanitatem fere semper lentus observatur, five soli naturæ fuerit commissus, five arte debellatus, hinc difficultas remedia antarthritica inveniendi.

3. Periculum arthritidis consistit præsertim in transitu illius, ejusdemque materiæ, a partibus externis ad internas, unde harum læsio, & destructio ad funestum gradum five acuto five lentiori modo produci potest; & fractæ naturæ vires imprimis in senioribus, & perversa medela talis periculi causa fieri valent.

4. Relapsus arthritidis semper timendus est. Sola arthritis e refrigerio, vel si mavis, rheu-

matica exceptionem quandam ab hac regula admittit, semper tamen dispositionem recidivantem post se relinquit; reliqua autem arthritis aut sponte aut accidentibus causis externis revertitur; anni tempora & aeris constitutio etiam in hunc morbum influxum exerunt; in aliis hyemale frigus, in aliis æstivus calor dolores revocat; etiam tempestates procellosas, austrinas, nivales moleste sentiunt arthritici.

Medicatio morbi arthritici duplici parte constat:

1. Medicatione curatoria, quæ morbus arthriticus præfens debellandus est.

2. Medicatione prophylactica, quæ ad arthritidis relapsum prævertendum tendit.

Medicatio arthritidis curatoria duplicem scopum, cui obtemperandum est, continet:

1. Sedem morbi præsentem in partibus externis s. extremitatibus conservare, utpote præcipuum hujus morbi periculum e materia ad internas partes directâ dependet.

2. Materiam morbi per remedia experientiâ comprobata dissolvere & evacuare.

In artubus tanquam convenienti & maxime infanti sede arthriticus morbus conservatur evitando causas, quibus conversionem ad interiora effici experientia docuit.

1. Topica varia dolenti parti applicata, dissipantis & constringentis indolis, uti frigus, aquam

frigidam, linimenta volatilia, spirituosa epithemata, facculos aromaticos & fumigationes similes. Hisce aut constrictio & resistentia nimia efficitur, ita ut jam deposita materia retropelli & deponenda haud admitti queat, aut resolutio præmatura materiæ, indeque ejusdem absorptio & ad alias partes conversio producat. Dantur quidem casus infra memorandi, ubi nonnulla ex allatis topicis non nocent, imo juvant: verum eorundem usus indiscriminatim & absque debita cautione factus damnandus est.

2. Phlebotomiam imprimis sæpius repetitam sine dubio noxiam, quia absorptionem præmaturam depositæ materiæ promovet. In plethoricis tamen et ad congestiones in partes nobiles pronis venæsectio prophylactica una alterave vice per annum instituta juxta meam experientiam arthritidem non auxit.

3. Purgantia fortiora, quibus humores, adeoque arthritica materia nimium interiora versus diriguntur.

4. Opium; quod modo caute et sub dolore insigni adhiberi potest.

Antarthritica remedia stricto sensu, quæ causam proximam vel materiem arthritidis efficientem tollerent, talia essent, quæ lympham spissam resolvere, & acrem corrigere, aut e corpore eliminare valerent. Huic scopo conformia auxilia theoretice determinare, medicaminum haud satis

perspecta agendi ratio vix permittit. Casu potius, & analogia inventa, atque experientia quodammodo comprobata sunt illa, quæ arthritidi proficua novimus, remedia sc.

1. Interna variæ indolis, quorum tamen electio secundum certam arthritidis indolem saltem non semper definiri potest, sed quæ ideo potius successe juxta effectum inde observatum in usum trahi possunt.

a) Antimonialia ex. gr. kermis mineralis grana quatuor cum pulveris temperantis camphorati uncia ad cochleare minus ter quaterve indies exhibitum; aut essentia stibii Hnxhami cum æquali parte spiritus lavendularum compositi ad guttas sexaginta ter indies. Arthritidi e refrigerio potissimum hæc medela convenire videtur.

b) Camphorata, quo pertinet supra dictus pulvis, vel liquor nervinus ad guttas circiter triginta ter quaterve per diem solus vel cum æquali parte essentiæ stibii; etiam hic arthritidi e refrigerio, atque illi, quæ in hystericis occurrit, præsertim sine dubio quadrat.

c) Gvajaci gummi & refina sc. solutio gummi gvajaci aquosa ad cochleare majus bis ter vel sæpius per diem, ita tamen ut non plus quam modica alvi laxitas citetur. Multis profuit, quandoque excretiones imprimis alvinam augendo, quandoque absque manifesto tali effectū (vid. diar.

1782. Junii 2. 1783. Mart. 5. 1784. Sptbr. 13. April 3.) quandoque nil juvat (vid. diar. 1788. August 3.); tempore æstivo maximam efficaciam exferere videtur. Etiam spirituosa solutio sc. refinæ gvajaci uncia dimidia soluta in spiritus sachari libra ad cochleare majus bis per diem in usu est, validius hoc & magis purgans remedium vix nisi fortioribus quadrat; illud alternatim cum solntione aqvosa cum bono effectû adhibitum vidi; amoniata vero seu volatilis gvajaci tinctura juxta meam experientiam minus efficax habenda est; in universum gvajacina remedia arthritidi luxurioso vitæ genere contractæ præsertim convenire videntur.

d) Elixirium antarthriticum ad guttas sexaginta ter indies, reliquis frustra adhibitis profuit, maxime illis, qui ob vitam prægressam vel concomitantia symptomata in suspicionem scorbuti cadunt (vid. diar. 1784. Sptbr. 7. nec non 1786. Januar. 2,) adjuncto tumore oedematoso imprimis crurum, allato remedio dimidiam vel æqualem aceti squillitici partem apponere convenit.

e) Ex allio vel in substantia sumpto vel in spiritu vini infuso etiam bonus effectus observatur.

f) Salis cornu cervi uncia tres in vini rhenani libris duabus solutæ ad cochleare majus ter quaterve per diem in pertinaciori morbo.

g) Potus medicati varii cum reliquis appropriatis conjuncti, ut serum lactis, si febrile aliquid præsto sit; thea sambuci et potus *Punch* in arthritide a refrigerio & incipiente; infusum concentratum ligni sassafras in arthritide admodum vaga; infusum trifolii fibrini sub scorbuto suspecto; decoctum mundificans ad partellam ter die sumptum morbo inveterato cum suspitione venereæ originis præsertim conveniens.

h) Mercurialia sc. mercurius dulcis ad salivationem sat copiosam exhibitus, [demum tentandus, quando supra allata non juvant, in junioribus, etiam si vera signa syphilidis prægressæ, vel præsentis detegi nequeant (vid. diar. 1783. Decbr. 6. & 1785. Aug. 5.)

2. Externa topice prope dolentem partem applicita sc.

a) Veficatoria aut unguentum sinapium præsertim apta, si dolor fixus & limitatus ad certas partes uti humeros, lumbos, ischium, genu; suppuratio ita producta quandoque utiliter per unguentum basiliconis pulvere cantharidum acuatam promovetur & conservatur. (vid. diar. 1784. August 6. & 1786. Januar. 2.) si verò affecta pars simul cutaneo laborat tumore dolente & imprimis rubente uti in podagra, ipsa natura supplet vices veficatorii, cujus ideo effectus supra modum & nimius esset.

b) Involutio partis dolentis in tegumento calido præsertim laneo, aut linteo vel serico cerato, aut lana molli superimposito dicto serico sæpius renovanda, vi cujus promotus & conservatus æqualis calor ad solvendam materiem inservit; cannabis recens vel picea hoc scopo etiam adhibetur imprimis sub inveterato dolore & rigiditate juncturæ.

c) Fumigia s. vapores aromatici ad partem affectam ducti, fragmenta succini igni immissa adhibentur & pannus laneus hujus fumo imbutus parti circumdatur, quale auxilium semel per diem repetitur; verum illud haud commendo, nisi in debilitate juncturarum rebeli post arthritidem ipsam relicta & aliis remediis non cedente, narrantur etiam exempla illius innocentiae & mirabilis efficaciae in arthritide e refrigerio s. rheumatica.

d) Sangvinis missiones topicæ ex. gr. cucurbitæ cruentæ dorso vel lumbis sub horum dolore applicitæ, & hirudines ad podagricam summe dolentem partem admotæ, verum ex hisce vix nisi temporarium levamen expectari potest.

e) Ventosa s. cucurbitæ siccae juxta partem affectam tractæ, & repetitæ; præsertim in brachiis post arthritidem debilibus cum emolumento applicari solent.

f) Fonticulorum summam utilitatem in arthritide pertinaci & inveterato etiam observavi;

sed larga tunc promovenda est suppuratio tribus vel quatuor pisib. simul ulceri injectis.

g) Balnea vaporaria f. vapores aquæ calidæ, præfertim cum decoctis herbis aromaticis f. speciebus pro balneo vaporis convenienti modo ad partes arthriticas admitti cum insequenti sudore in lecto calido promoti; quod auxilium quotidie vel alternis diebus reiteratum in arthritide fixo diu durante, qualescumque etiam artuum juncturas occupante, prodest; talis balneatio inter antarthritica remedia & tutissimum, & testante experientia fere efficacissimum est; rationi etiam convenit, vaporem subtilem, e vasis lymphaticis susceptu facilem, itaque ad spissitudinem & acrimoniam resolvendam & diluendam aptissimum esse. Semipitium quoque, ut in lumbagine arthritica, convenit. Nonnulla mihi occurrunt exempla arthritici doloris et rigiditatis in maleolis, cui, omnibus aliis remediis frustra adhibitis, demum profuit quotidie repetita immisio pedum in aqua frigida, donec perfrigerint; juniores vero hi fuere ægroti. Simile vidi emolumentum ex repetito aquæ frigidæ usu in odontalgia arthritica per plures menses protracta omnes dentes occupante.

h) Motus & exercitia corporis præfertim ipsorum artuum affectorum tunc servandus & locus habens, cum dolor quodammodo minutus illum sufferat; ad spissos humores commovendos & resolvendos, & rigida flexibilia reddenda hoc ad-

miniculum quadrare per se comprehenditur. Frictiones diligentes per pannum laneum vices motus aliquatenus suppleant.

Medicatio arthritidis prophylactica, quæ scilicet illius reversio, quantum potis est, impediretur, consistit in evitando supra allatas arthritidis causas & electione diætæ hisce causis oppositæ scilicet.

1. Victus ita comparandus est, ut utilem inde blandumque chylum digerentes naturæ vires extrahere valeant, itaque humorum spissitudo & acrimonia præverti possint; carnis bovinæ & suillæ frequens & copiosus usus, aromata, spiritus sive vina ustulata damnanda sunt; vinum non prorsus prohibendum præsertim illi assuetis, eoque ad roborandum ventriculum opus habentibus; minor tamen dosis syadenda est; optimus potus est cerevisia clara tenuis, fortis tamen debilioribus commendanda, nec damnosum imo proficuum observavi spiritum vini modica dosi porrectum vinoque præferendum iis, qui ad fermentationem acidam ventriculi sese pronos sentiunt, utpote hæc arthriticis noxia priori potu compefcitur, haud vero posteriori. Spiritus vini gallicus et quidem aqua mixtus præsertim huic scopo quadrat.

2. Corporis motus & exercitia crebra summe sunt salutaria, quippequæ & digestionem & excretionem promovent, itaque generationem & collectionem materiæ morbosæ avertunt; caven-

dum tamen est a nimia sub motu incallescencia & sudore, qui refrigerio arthriticis adeo inimico an-
sam præbet.

3. Animi graviora pathemata & intenrior labor, utpote quæ primum arthritidis aggressum, ideo etiam reversionem producere valent, vitanda sunt.

4. Somnus sufficiens fit, nimis enim parvus perspirationi obstat; somnus optimus est maxime quietus, qui sc. ante mediam noctem incipit; ferius captus somnus ob vigilias protractas indeque circulum magis citatum, minus tranquillus & minus utilis est; somnus post prandium etiam convenit, utpote concoctionem promovet.

5. Aer arthriticis conveniens censendus est, qui transpirationi præsertim favet, adeoque modice calidus & ficcus; juxta hoc principium determinari potest electio regionis, domus, tempestatis, quibus uti & non uti oportet.

6. Excretionum naturalis ordo promovendus & conservandus est; alvus non rite fluens ec-
coproticis uti electuario aperiente, lacte sulphuris, pulvere anticolico, præsertim autem magnesia cum rheo pro necessitate solvenda est, quia arthritici vix non semper ad acrimoniam acidam proni sunt; perspiratio autem cutanea maxime curanda est; ad æqvabilem illius progressum merito commendantur indusia lanea cuti proxima.

Differentiæ arthritidis e partibus affectis depromuntur & denominantur, sic chiragra est arthritidis manuum; gonagra, quæ genua occupat; speciali autem tractatu tantum digna sunt podagra & ischias.

Species I^ma.

P O D A G R A

Est dolor arthriticus fixus in junctura quadam pedis præfertim halucis.

Symptomata commodo distinguuntur in

1. Prænuntia, e quibus hic morbus imprimis recurrens timendus est.

a) Primarum viarum incommoda, oppressio inflatio, nausea, stricta alvus, aliquot sæpe septimanis aggressum morbi præcedentia; cito instantem morbum appetitus enormis, urina pallida portendunt.

b) Corporis ipsius gravativus sensus magis magisque increfcens cum singulari langvore femorum & sensatione quasi a flatibus ibidem descendentibus; copiosus acris feri ad oculos fluxus huc computatur.

c) In pedibus ipsis fudoris soliti cessatio & varicosa venarum cruralium intumescencia.

2. Dolorem ipsum, cujus modus & decursus sequenti modo observari solent.

a) Tempus invasionis ut plurimum nocturnum est & quidem cum gallus canat.

b) Locus doloris genuinus f. communissimus est halux, rarius talus vel calcaneum, imo genu.

c) Indoles doloris varia; sub accessu mitis est quasi ab inspersa aqua calida, mox verò gravior dilacerans, mordens, urens cum adjunctis tumore & rubedine.

d) Duratio paroxysmi junioris morbi ad viginti quatuor horas, inveterati verò ad plures dies extenditur; insequitur tunc partis affectæ fudor cum decremento doloris & tumoris, ita ut tantummodo sub motu pes doleat.

e) Renovatio allati paroxysmi fere semper expectanda post unum vel plures dies incidit præsertim vespertino tempore, eodem modo ac primus paroxysmus procedens. Talis renovatio aut tantum in uno pede, aut primum in uno, deinceps simili ratione in altero locum habet itaque ad plures vices: ultimi paroxysmi leviores & breviores fiunt, quo junior morbus, eo pauciores paroxysmi quandoque modo unicus, & vice versa.

3. Concomitantia symptomata, frigus aliquale sub aggrediente morbo, motus nonnulli febriles sub adaucto & fixo dolore cessantes, alias inquietudo, urina parca rubra, anorexia, langvor, alvus stricta.

Causæ externæ podagræ habentur luxuriosum vitæ genus, vini largus usus, venus præmatura et immodica, neglectus corporis motus, affectus animi & studia immoderata.

Dispositiones sunt sexus virilis, rarissimæ sunt feminae podagricæ; ætas adulta sc. ultra quadraginta annos; num hæreditarium, num contagiosum aliquid huic morbo ansam dare potest? Licet hoc minus constet, non superflua videtur cautio a decubitu cum subjectis podagra inprimis inveterata affectis.

Causa proxima podagrici doloris s. illius sedis in pede nonne habenda est præcipua hujus loci ad stagnationem & collectionem humorum aptitudo sc. ob ejusdem distantiam a corde, compressionem a calceis, constrictionem a frigore.

Diagnosticæ signa podagræ sunt allata illius symptomata per se satis manifesta & propria, inprimis ipsius doloris descripta sedes, indoles, spontanea origo sc. absqvo externæ causæ violenta actione in partem dolentem.

Prognosis

1. Transitus præsentis podagræ in sanitatem ut plurimum & quidem ipsius naturæ viribus perficitur; aptissime inquit Sydenhamus: podagra est podagræ amarissimum remedium; dolor enim ipse affluxum humorum, motum vasorum, caloremque augendo efficit resolutionem impactæ

materiæ morbificæ, ejusdemque dein exudationem.

2. In arthritidem vagam apud debilia & seniores subjecta podagricus morbus lapsu temporis immutari potest, ita ut ad alios artus vertatur dolor, eosdemque haud adeo stricto ordine, sed diutius affligat, quam ipsa podagra.

3. In læsiones partium internarum, five acutas, five chronicas quandoque funestas converti & terminari potest podagricus morbus, vel male si retropellentibus tractatus, vel ob depravationem lymphæ sub incrementa ætate ad summum fastigium protractam; tali modo in funestas inflammationes, aut obstructiones hepatis, vel pulmonum cum insequenti hydrope, vel asthma letali incidunt podagrici.

4. Tumorem oedematofum indolentem perennem crurum, cujus retrogressus summum periculum habet, nec non nodos duros arthriticos supra descriptos inveterata podagra generare & post se relinquere potest.

5. Recidivans demum indoles podagræ essentialiter competit; quotannis ut plurimum redit semel aut bis, præsertim vernali vel autumnali tempore; interdum alternis annis recurrit, diuturnior protractio minus boni ominis est, quia tunc materiæ podagricæ ad alias & internas partes conversio & depositio timeri potest.

Curatio podagrici morbi potiffimum ipfi naturæ committenda eft; artis medendi regulæ funt.

1. Promovere resolutionem & evacuationem materiæ morbificæ per diaphoresin modicam, cui scopo conveniunt potus largus, uti ferum lactis, infufum florum sambuci, mixtura camphorata vel diapnoica, involutio pedis dolentis in panno aut lana molli fuperinposito ferico cerato.

2. Avertere & evitare omnia quibus dolor a pede retropelli poteft, uti fortiora purgantia, venæfectionem repetitam, opiata, topica, vi frigida, confringenti, volatili agentia.

3. Motus febriles, fi adfint, compefcere & avertere; junioribus plethoricis hac ratione convenire poteft venæfectio femel initio adminiftrata, alias pulvis temperans camphoratus ad cochleare minus ter quaterve per diem, cui, fi alvus obftipata fit, dimidia pars lactis fulphuris apponitur. Doloris vehementia et infomnium mofcho interdum levantur.

4. Diu protractam, nec ut fieri folet, fpon- te evanefcentem podagram, five illi fuccedentem arthritidem vagam fupra allatis remediis antarthriticis imprimis e guajaco paratis debellare.

5. Intervallis a podagrico morbo liberis, regulis medicationis prophylacticæ contra arthritidem fupra commendatis obedire, ut regressus huius morbi averti, faltem mitior reddi poffit; huic

scopo etiam convenientem judico usum guajaci, uno alterove mense æstivo faciendum.

Species II^{da}.

ISCHIAS s. MALUM ISCIATICUM

Est dolor spontaneus, quodammodo fixus in alterutra, rarò utraqve articulatione femoris cum acetabulo.

Symptomata ischiadis:

1. Dolor ipse allati loci, sponte f. absque violentia externa aggressus, vel articulationem ipsam modo occupans, & ischias simplex vocatus, vel dolorem secum ducens in partibus vicinis femoris posticis vel anticis; tunc ischias nervosa a Cotunnio nominatur sc. ischias antica cum dolore protenso ad inguen & anticam partem femoris, & extrorsum ad genu quandoque ad pedem fere usque extenditur.

2. Motus affecti femoris ideoque ambulatio difficilis, imo prorsus impedita.

3. Tumor dolentis loci perraro adjunctus, quandoque autem contabescencia femoris infra eundem.

Causæ externæ ischiadis sine dubio eædem sunt, quam ipsius arthritidis generaliter, quarum actio modo non semper cognito ad juncturam ischii dirigitur; sic apud futores hunc morbum

crebriorem, quam apud alios observavi, & derivavi e more eorundem saltem apud nos sedendi in sella dura lignea, unde vasa ischiatica comprimuntur, itaque ad stagnationem humorem disponuntur.

Causa proxima merito censetur lymphæ acris spissa, remorans, quandoque forsan effusa circa partes ad juncturam ischii pertinentes; Cotunnus haud injusto statuit, ischiadem nervosam produci e materia morbifica liqvore nervos circumdantem & humectantem contaminante.

Diagnostica signa satis manifesta sistunt, doloris descripta sedes, & spontanea origo, quam ultima mali arthritica indoles patet atque distinguitur ab alia hujus articulationis læsione per contusionem, vel luxationem inducta.

Prognosis:

1. Duratio ischiadis communiter longum tempus continet, imprimis si initium illius aptis remediis haud oppugnetur; ischias postica pertinacior & diuturnior quam antica observatur.

2. Eventus ischiadis possibilis

a) In sanitatem ut plurimum sperandus, imprimis sub apta medela; migratio doloris ad alias partes boni talis exitus indicium est.

2. In immobilitatem juncturæ ob ankylosin ejusdem vel paralyfin, pravæ imprimis medellæ effectum (vid. diar. 1784. Septbr. 9.)

c) In corruptionem funestam juncturæ sc. vel suppurationem, indeque productam hecticam

febrem, vel monstrosam excreſcentiam, quæ vaſa & viſcera cum lethali effectū comprimere valet, (vid. diar. 1784. Febr. 8. 1783. Febr. 9.)

Curatio mali iſchiatici promovetur

1. Externis topicis.

a) Linimento volatili camphorato ſæpius ad partem dolentem applicito; incipienti & arefrigerio derivando morbo præſertim hoc convenit; iſchiadi ſimplici & anticæ quandoque ſufficit; illud nunquam noxium vidi, etiamſi enim ad alias partes propellat dolorem, minus tamen hinc creatur incommodum, utpote arthritiſ iſchiatica pejor & pertinacior eſt arthritide alterius loci. Pannus laneus duplex incipientem morbum non raro profugatur.

b) Balneo vaporis ad locum affectum ducendo & alternis circiter diebus repetendo, quod in omni iſchiade convenit, & inſigne emolumentum præſtat; quandoque ſemicupium tepidum præ aliis deſideratam opem affert.

c) Veficatorio præſertim contra iſchiadem poſticam deſiderato, haud in loco dolenti ſed juxta methodum Cotunni in exteriori parte cruris ad duos pollices infra genu applicando; magnitudinem volæ manus hoc habeat, & ad ſuppurationem exinde promovendum ſæpe convenit, illi ſubjungere unguentum cantharidum, (vid. diar. 1784. Januar. 4. & Februar. 4.); quandoque pluries applicare veficatorium requiritur; in inveterato ma-

lo balneum aliquoties repetitum vesicatorio præmittere convenit, ut evacuationi per hoc efficiendæ aptior sit materies per balneum resoluta.

d) Emplastro de hyoscyamo cum æquali parte emplastri miraculosi, triduo vel quatruiduo renovando, diuque gerendo, unde levamen saltem notabile observavi; etiam in rebeli malo cataplasma emolliens mitigat dolorem imo ad resolutionem confert: quinimo aliis non juvantibus unguentum mercuriale vel resolvens ad drachmam dimidiam quavis vespera applicandum est.

e) Tandemque, omnibus aliis frustra tentatis, ex fonticulo vel fetaceo infra acetabulum applicito optatum effectum observavi. Nec, quæ svadentur inustiones ope ferri candentis cuti appliciti, spernendæ videntur.

2. Internis, quorum camphorata, uti pulvis temperans camphoratus, vel liquor nervinus incipienti morbo quadrant; his frustra adhibitis, supra allata antarthritica, antimonialia & gvajacina in usum trahenda sunt. Etiam venæsectio initio morbi, imprimis apud plethoricos vel febricitantes locum habet, quin imo juxta effectum inde observatum & indolem phlogisticam missi sanguinis aliquoties repeti potest.

ARTHRITIS ANOMALA

Est dolor vel affectio morboſa in loco quodam capitis aut trunci externo vel interno ſeſe exſerens, artuum dolorem immediate excipiens & cum eodem alternans.

Symptomata arthritidis anomalæ multiplicia, juxta partem, quæ afficitur, differentia.

1. In capite, unde cephalalgia quandoque enormis vel univerſalis, (vid. diar. 1786. Octbr. 3,) utplurimum particularis ſc. hemicrania, odontalgia, otalgia, ophtalmia, vertigo, (vid. diar. 1785. Jul. 6.); apoplexia, citaque mors, (vid. diar. 1786. April. 14.); quo referri poſſunt tremor, (vid. diar. 1783. April 3.); & paralyſis (vid. diar. 1782. Adril 5.)

2. In collo & faucibus, uti dolor nuchæ perſtinax, faucium frequens levior vel gravior affectio cum difficultate deglutitionis vel voce rauca; raro apud nos arthritidis ad hunc locum directio obſervatur.

3. In pectore effectus arthritidis anomalæ admodum frequentes, tam ſub acuto, quam chronico morbo ſeſe exſerentes, uti veræ inflammationes, dolores non febriles, tuſſis ſicca vel humida, aſthma, (vid. diar. 1782. Auguſt. 3.); imo hy-

drothorax. (Septuagenarium tractavi, qui a solita podagra per aliquot annos liberatus incidit in tussim molestantem per expectorationem kerme minerali largiter promotam demum evanidam, verum brevi posthac supervenit peripneumonia paucis diebus lethalis; alter septuagenarius loco podagræ per annum circiter dyspnœa laborabat cum intercurrente paroxysmo gravi asthmatico tandem in hydrothoracem letalem finito; vid. diar. 1784. Januar 8.)

4. In abdomine dolor colicus varius, partim inflammationem simulans, vel revera efficiens, singultus, expansio molesta, (vid. diar. 1683. Jul. 4. 1785. Novbr. 3. 1784. April. 3. 1784. Mart. 5. 1786. Mart. 8. 1785. Junii 12.); probabile est, materiam arthriticam in hepate vel pancreate depositam sæpius horum infarctus efficere, itaque hydropem demum funestum; ad vias urinarias conversa materia arthritica dysuriam, stranguriam, doloresque lithiasi similes inferre valet.

Causæ externæ & antecedentes arthritidis anomalæ esse queunt:

1. Retropellentia topica artubus arthritide affectis applicita, uti aqua frigida, spirituosa, linimenta volatilia, fumigationes. (Comes quidam inter nostros ditissimus clanculum, in seipsis me aliisque illius medicis, per frictionem & fumum aromaticum dolorem podagricum levavit & dissipavit,

primum cardialgia cum frequenti vomitu mox surrexit, & post paucos dies apoplexia letalis.)

2. Virium decrementum, & materiæ arthriticæ increfcens copia; in fenefcentibus præfertim arthriticis utraqve hæc caufa conjungitur, ita ut natura haud amplius ad exteriora valeat propellere materiam morbificam, & ut hæc quatenus abundantior etiam internas occupet partes. Venæfectio repetita debilitando vires occasio arthritidis anomalæ evadit.

3. Attrahentes certæ conditiones in ipsis partibus internis, quibus huc verſus materia morbi allici poteſt, uti irritamenta primarum viarum, five cruditates morboſæ, five purgantia fortiora, nec non debilitas & laxitas viſcerum.

Cauſa proxima arthritidis anomalæ eſt depositio & collectio materiæ arthriticæ acris & irritantis in partibus capiti, vel trunci, unde juxta regulas irritationis ſolitas dolor, affluxus humorum, & læſio functionis affectæ partis citantur.

Diagnosticæ ſigna ſc. e quibus dolorem & affectionem morboſam capitis vel trunci arthriticæ indolis eſſe cognoscitur, ſunt ſequentia ſeparatim vel præfertim & certius conjunctim præſentia.

1. Periodica & inconfans talis affectionis indoles ita ut mox adſit, & mox evaneſcat; (quereretur quidam dolorem internum laryngis modicum, matutino tempore præſentem, interdium prorfus ſilentem, non recordans dolorem ullum

prægressum artuum, nilominus incommodum arthriticum esse declaravi & dein illum cum dolore manus nexum fuisse mihi innotuit.) Verum non semper periodica est affectio arthritidis anomala, sed quandoque sat fixa, nec omnis periodicus dolor est arthriticus, quandoque enim spasmo debetur maxime in hystericeis, ideo hoc signum minus perfectum, attamen indicativum in viris vel ipsi arthritidi vel causis ejusdem subiectis putandum est, & semper ansam cetera inqvirendi signa exhibet.

2. Successio immediata doloris vel affectionis morbosæ post dolorem articulare, sive sponte, sive arte incongrua evanidum, præsertim si subito hæc cessatio facta sit.

3. Alternatio & migratio doloris & affectionis; ita ut mox unam mox alteram corporis partem sive articulare sive aliam occupet; hæc ultima duo signa tam separatim quam conjunctim æque certo arthritidem anomalam indicant.

Prognosis:

1. Externæ partes capitis & trunci ex arthritide anomala nullum periculum incurrunt, & per artem convenientem restitui possunt.

2. Interna viscera præsertim cerebrum, & pulmones maxime hoc morbo periclitantur, & vel acuto, vel lentiore modo ad functiones vitales inepta fieri possunt; abdominalia viscera tempestitiva & rita medela non raro juvantur, (vid. diætaria

supra ad symptomata arthritidis abdominalis citata.)

3. Gravior & subito ad interiora conversa arthritidis majorem perniciem inducit, quam levior & iamiam decrescens, per se enim intelligitur, gradum affectionis internæ æqualem fieri dolori externo prægresso, utpote eadem est causa.

4. Junioribus minus damni inducit anomala arthritidis, quam senioribus & arthritide sæpius afflictis, major enim in his est materia morbi, & vires naturæ minores; interiorum funesta destructio, ni alia mortis causa interveniat, finalis arthritidis effectus evadit. (Memorabile hujus exemplum æstimo virum quendam nobilem; podagricus apud illum insultus debito citius evanescens levem apoplexiam induxit, quæ, cujusque paralytici effectus superveniente febre intermittente, illique accomodatis remediis prorsus tollebantur; quatuor posthac annis per venæsectionem & eccoprotica crebro & tempestive applicita quodammodo sanus conservabatur, quinto anno ad tempus autumnale accessit hemicrania molesta tandem auris fluxu seroso modico soluta: sexto anno ad idem tempus rediit hemierania gravior diuturnior, demum etiam finita in auris fluxum, sed iam purulentum, tandem post aliquot menses sensim, & sponte terminatum; ab hoc vero tempore levis palpitatio cordis sentiebatur cum dyspnœa lente incrementum, quæ anno elapso cum gravibus par-

oxysmis astmaticis nocturnis, ad ultimum letiferis jungebatur; num fonticuli brachiis tempestive appliciti ad materiæ morbificæ fluxum versus pectus prævertendum utiles & sufficientes fuissent?)

Curatio arthritidis anomalæ continet regulas, & universales, cuicumque hujus morbi sedi convenientes, & speciales juxta singularem ejusdem sedem accomodandas.

Universalis medicatio in arthritide anomala duplici auxilii genere promovenda est:

1. Externis morbum ad artus derivantibus; qualia sunt pediluvia, sinapismi, præsertim vesicatoria ad magnitudinem volæ manus potissimum membris, unde dolor recessit, aut brachiis aut suris applicanda cum suppuratione, si opus sit, per unguentum cantharidum diutius promota; quandoque hoc modo dolor revera ad membra reduci-tur, interdum suppuratio materiam morbi absque renovato arthritico dolore evacuat. Vesicatorium quoque vel unguentum sinapinum amplum et sæpius repetitum ipsis trunci partibus tam pectori quam abdomini applicandum convenit. Etiam involutio pedum nocturna in cannabi ad crassitiem digiti quibusdam profuit.

2. Internis, humores, & materiam morbi ad superficiem corporis propellendi vi gaudentibus; volatilia, sudorifera hoc scopo conveniunt & commendantur. Mihi solitum & experientia satis comprobatum remedium est liquor nervinus

bihorio vel rarius ad guttas circiter triginta exhibendum; moscum quandoque simul in auxilium voco. Efficaciam hujus methodi testantur exempla arthritidis anomalæ supra e diario citata. Etiam spiritus luvendularum compositus cum æquali parte liquoris nervini vel spiritus falis ammoniaci vinosi laudem meretur.

Specialis in arthritide anomala medicatio respicit differentem sedem, nec non indolem affectionis.

1. Inflammatio, five pectoris, five abdominis arthritidi evanescenti immediate succedens, suisque signis denotata eadem ac alia inflammatio requirit remedia, prætereaque externa derivantia supra commendata.

2. Capite affecto, si cutanei & fugaces dolores sese exferant, balneatio crebra dolentis loci per aquam frigidam sæpe sufficientem opem affert, si verò fixior reddatur dolor, cucullus ex linteo vel serico cerato et vesicatoria requiruntur in brachiis magis quam in nucha efficacia (vid. diar. 1786. Octbr. 3.), eadem valet regula de odontalgia, otalgia & interna encephali affectione arthritica; (Singularem ophtalmiam ex hac origine mihi contigit observare in comite quodam; post dolorem oculorum aliquot horarum insignis copia feri sub tunica adnata colligebatur, formans notabilem vesiculam interpalpebras proninentem, quæ, ne claudi possent oculi, impediēbat; per incisio-

nem promoti feri effluxu, dein balneatione oculi per mucilaginem feminum cydoniorum aqua rosarum mixtam, hirudinibus circa oculum & vesicatoriis ille affectus debellatus fuit. Apud alium nobilem fere octogenarium podagræ evanescenti successit pertinax & notabilis tumor oculi dextriculi rubedine & palpebras & scleroticam tingente, sangvisugio per hirudines, & aqua ophtalmica comphorata maxima pars hujus mali tollebatur, reliquæ sensim evanescebant sub usu vitrioli albi soluti in aqua rosarum cum admixto albumine ovi. Alii enormi tali cephalalgia afflicto inprimis profuit sacculus e sulphure contuso paratus capiti impositus.) Externis talibus remediis convenit interna adjungere: uti liqorem nervinum, moschum, & in morbo lentius progrediente gvajacina.

3. Abdominis affectus arthritici, inflammatorii supra dicta ratione qvatales tractandi sunt, verum non inflammatorii requirunt expurgationem cruditatum, quæ forsan arthriticam materiam attraxerunt, vel per clysmata, imo emeticum (vid. diar. 1785. Novbr. 3.); alias medicatio universalis qvadrat; si forsan diarrhoea retrogressæ arthritidis vices subeat, fistentia damnosa habeantur, etiam tunc liqvor nervinus qvadrat, vel anima rhei cum quarta parte liqvoris anodynii mineralis ad guttas sexaginta ter indies convenit, et, si diuturnior fiat diarrhoea, tinctura rhei vinosa cum

dimidia parte liquoris nervini; in univcrsum inunctio frequens abdominis per linimentum volatile camphoratum contra arthriticas illius affectiones utilis est. (Expansio abdominis arthritica gvajaco sanata occurrit in diar. 1784. April. 3.)

4. Urinariæ viæ arthritide moleſtatae etiam medicatione univcrſali tractandæ ſunt, nec non inunctione allati linimenti, atqve potu largo mucilaginofa acrimoniam involvere & diluere valent, uti, thea plantaginis aquaticæ cum radice athææ, vel emulſionibus; derivantia quoque uti pediluvia & unguentum ſinapium artubus admota conveniunt.

5. Aſthma & dyſpnoea in arthriticis ſubito vel lente oborta, initio quidem cura univcrſali, nec non veſicatorio amplo inter ſcapulas vel pectori antico applicito tentari poſſunt; gvajaci uſus quandoque prodeſt (vid. diar. 17y3. April 5.); aliquoties ex ſpiritu lavendularum compoſito cum ſpiritus ſalis amoniaci vinoſi æquali parte bonum effectum obſervavi; ſimul in uſum trahi poteſt cortex mezerei vel ſenticulus large ſuppurans in brachiis applicitus; ad ipſos paroxyſmos aſthmatis ex hac cauſa moſcus ad grana tria vel quatuor bihorio exhibitus convenit, vel emetica (vid. aſthma convulſivum.) Tuſſis arthritica ſicca remedia ut aſthma, humida autem expeſtorantia deſiderat. (Aſthma diuturnius poſt evaneſcentem podagram ortum, multis fruſtra tentatis, ſeminis ſi-

napis anglicani haud contusi uncia dimidia omni mane per plures menses fumta, revertente podagra, sanatum fuit. Tussis gravissima ab eadem causa orta largo vini de champagne usu, primaria revertente affectione, evanuit.)

Arthritis symptomatica dicitur dolor artuum vel juncturarum, imo aliarum partium externarum modo dependens ex alio concomitante morbo, nec aliam quam primarii morbi medelam desiderans, quales sunt dolores membrorum in venereis, hysteriis, hypocondriacis, hæmorrhoidariis, scorbuticis, imo ictericis &c. & quandoque locum intermittentis febris fubeunt.

O R D O II^{dus}.

DOLORES PARTICULARES.

Sunt dolores ad certam, quamdiu durant, sedem s. partem corporis limitati, fixique, & ex hac ideo denominati.

Divisio horum haud incommoda fit juxta regiones, quæ afficiuntur, diversas in sequentia genera.

G E N U S I^{mum}.

CAPITIS DOLORES

Ad quos referendæ sunt plures, juxta partem capitis affectam distinctæ & nuncupatæ species sc.

CEPHALALGIA

Est dolor capillatæ partis capitis non febrilis five internus, five externus, five totam hanc partem occupans, five magis circumscriptum illius locum, qui hemicrania dicitur.

Causæ cephalalgiae diversæ, quibus ipsius morbi dijudicatio & tractatio conformandæ sunt sc.

1. Cephalalgia plethorica, cujus causa proxima est sanguinis plenitudo universalis; remotæ causæ: bona nutritio imprimis absque sufficiente labore, inhibitæ solitæ evacuationes sanguinis five menstrui five hæmorrhoidalis five nasalis, neglecta consveta venæsectio, æstivus calor, ingesta calefacientia, cibi multi, imprimis spirituosæ, vehementes animi affectus imprimis ira; signa illius diagnostica partim ipse dolor, partim causæ remotæ & præsertim concomitantes molestiæ sc. faciei rubedo & inflatio, gravativus capitis sensus, quandoque vertigo, insomnia & incrementum doloris post prandium, atque ex aliis causis incitantibus, primæ viæ sanæ. Auxilium est duplex, a) sanguinis diminutio, vel & primò per venæsectionem, vel si pertinacius & gravius sit malum, per hirudines temporibus vel naribus, si ex solita epistaxi suppressa oriatur, applicitas, b) sanguinis

temperatio per pulverem refrigerantem, potus acidulos, abstinentioniam a calefacientibus.

2. Cephalalgia congestionis, cujus causa proxima est affluxus, & collectio nimia sanguinis ad caput ob impeditum illius circulum in aliis corporis partibus, uti e refrigeratis pedibus, diuturna alvi obstipatione, tussi molesta, vomitu enormi, dyspnoea, graviditate, quænam causæ morbi ipsius indolem designant; in primo casu pediluvium calidum, & dein causæ vitatio, in altero eccoprotica, quoties opus est; & in duobus ultimis sanguinis missiones profunt, & si incommodum notabile videatur, requiruntur.

3. Cephalalgia debilitatis, quæ sc. e laxitate & debilitate vasorum capitis & cerebralium derivanda est, propter quam facilis & nimia collectio sanguinis indeque distentio dolorifica producuntur. Hujus cephalalgiae remotæ causæ sunt vitia diætæ sanguinem ad caput allicere valentia, & crebro commissa, uti studia intensiora protracta, vigiliæ, spirituosorum abusus, capitis nimis calida obductio; medela conveniens in avertendis causis, & roboratione capitis topica per balneationem ex aqua frigida consistit.

4. Cephalalgia ex acrimonia, quæ variæ indolis esse potest, præsertim aliunde ad capitis nervos deposita, uti ex ulceribus & efflorescentiis cutaneis consolidatis & exsiccatis; (talis e scabie retropulsa occurrit in diar. 1786. Jul. 4.); reme-

dia ad artus derivantia imprimis veficatoria cum protracta suppuratione, nec non interna depurantia conveniunt; (exemplum v. diar. 1783. Maj. 14., ubi veficatorium magnum capiti cerafo applicitum demum post alia frustra adhibita profuit, huc sine dubio referendum est.) Huc proque pertinet cephalalgia frontalis ortum trahens e materia nociva in finibus frontalibus hærente v. c. colluvie mucosa vel purulenta imo vermiculis, qualia exempla per effluxam et emunctionem talis materiæ sanata ipse observavi.

5. Cephalalgia cerebralis e vitio ipsius encephali ortum trahens, ex eo dignoscenda, quod constans sit cum stupore & vertigine communiter adjunctis, nullius remediis cedens, sensim increfcens, tandemque per lethargum vel apoplexiam finita in mortem; causa efficiens in defunctis inventa est varia, uti serum effusum (vid. diar. 1784. April 7. & 1786. April 15.) serum & sanguis simul effusa (vid. diar. 1782. Jul. 5. 1783. Novbr. 7.) sanguis merus effusus (vid. diar. 1783. Maj. 7.) abscessus cerebralis (vid. diar. 1783. April 8.)

6. Cephalalgia stomachica, cujus causam sistunt fordes primarum viarum imprimis biliosæ; hanc designant indicia solita saburræ biliosæ, ejusdemque curatio per emetico-cathartica, quoties opus est, repetenda peragi debet, (vid. sat notabile hujus exemplum in diar. 1785. Februar. 3.)

7. Cephalalgia symptomatice, quæ aliorum morborum simul præsentium effectus & symptoma est, uti cephalalgia febrilis, nec non rheumatica, arthritica, hysterica, syphilitica, verminosa, quæ omnes e concomitantis principalis morbi signis dignoscendæ & per hujus curationes debellandæ sunt; ex hisce causis hemicrania ut plurimum ortum trahit; (mihi nota est ægrota optime contra tale malum hystericæ s. nervosæ indolis se habens ex infuso theiformi corticis peruviani, rasuræ ligni quassia, radicis valerianæ sylvestris cum pauxillo feniculi feminis.) In plurimis hemicrania nullis remediis cedit, irregulariter periodica intra paucas horas imprimis sub lecti calore et somno transiens; ex fonticulo brachiali tamen habentur tanationis exempla; senescente ætate decrescit. Idem ferendum est judicium de prosopalgia seu faciei dolore, atroci, per intervalla recurrente.

S p e c i e s II^{da}.

O P H T A L M I A

Est dolor oculorum, unius vel utriusque sine vel sæpius cum adjunctis rubedine, intolerantia lucis, & lachrymatione.

Plures hujus differentia dantur, quæ omnes chirurgo oculistæ exacte cognoscendæ sunt, communes tantum varietates medico cuivis dijudicandas & juvandas attingo.

1. Ophthalmia accidentalis f. taraxis e principio cognito externo, uti fumo & vapore acri, corpore peregrino illapso, vento frigido, oculorum nimio labore inducta, sæpe sponte & remotis causis transiens, si permaneant dolor & rubor, balneatio frequens per aquam frigidam vel saturinam juvare solet; etiam aqua ophthalmica simplex v. camphorata conveniunt. Dantur non raro ophthalmiæ remediis humidis peiores redditæ, quibus facculus aromaticus camphoratus optime quadrat.

2. Ophthalmia, trikiasis f. dolor oculorum e ciliarum directione versus bulbum oculorum; evulsio ciliarum talium singulatim instituta per aptum instrumentum requiritur.

3. Ophthalmia tuberculosa f. hordeolum, cujus causa est tuberculum in palpebra ortum, sæpius rubrum, per emollientia, imprimis lac tepidum cum croco coctum, ad suppurationem perducendum; etiam tale notabile vidi in canto interno oculi frustra allato modo tractatum, sensim verò unguento neapolitano dissipatum; interdum tubercula hæc pellucida sero claro plena per puncturam facile sananda.

4. Ophthalmia dentitionis, quæ apud infantes non ratò observatur tempore, quo dentes prorumpere solent; nullius hæc est periculi, & sponte cessat perfecto naturæ molimine.

5. Ophthalmia inflammatoria, quæ gravem secum ducit dolorem atque rubedinem & palpebrarum & bulbi oculi, ortum in genere trahens e materia acri ad oculos conversa, uti rheumatica, arthritica, tineosa, herpetosa, variolosa aliaque metastatica; curatio peragenda est, sanguinis missionibus, imprimis sangvisugio hirudinum e palpebris inferioribus, catharticis interpolatis, vesicatoriis vel in nucha, vel in brachiis, quandoque cum protracta suppuratione; facta sic per aliquot dies depletionem vasorum optime convenit cataplasma saturninum sæpius per diem, quoties sc. sicum sentitur, applicandum & renovandum; oculos ab irritante lumine cavendos esse per se intelligitur; in pertinaci ophthalmia, etiam si haud venerea, bonum effectum e mercurio dulci observavi, protractio malo fonticuli in brachiis applicandi sunt. Cum chronica talis ophthalmia debilitati vasorum non minus quam acrimoniæ irritanti adscribenda est, roborantia conveniunt, uti aqua ophthalmica cum floribus zinci v. mercurialis; unguentum ophthalmicum rubrum, imprimis congruum ad inunctionem vespertinam in marginibus oculorum quando muco spisso noctu agglutinantur. In ophthalmiis chronicis ex variis acrimoniis uti scrophulosa cet: infusum radicis altheæ ut optimum involvens commendari meretur. Rariorem ophthalmiæ causam mihi observare contigit sc. pediculos ex avicula, supra puellam ægrotam posita delapsos palpebra-

rum marginibus obfidentes; omnibus remediis frustra tentatis, detecta tandem et remota causa, oculi brevi restituti sunt.

6. Ophthalmia venerea, quæ quandoque effectus est miasmatis hujus nominis; chronica hæc est, non adeo dolens, stillationem feri visceri fluido per gonorrhoeam effuso similes secum ducens, præsertim e genuinis syphilidis signis præsentibus vel prægressis cognoscenda, & medela huic morbo convenienti tantum tollenda.

Species III^{tia}.

O T A L G I A

Est dolor auris internus absque febre, cujus absentia distinguitur ab otitide supra inter inflammationes memorata, quoad causas præsertim duplex est.

1. Otalgia catarrhalis e refrigerio cognito exorta modica quandoque remitteus, sanabilis per diaphoretica uti camphorata, pediluvia, extus applicitum fermentum panis calidum vel micam panis spiritu vini camphorato humectatam vel faculum aromaticum camphoratum, pertiuacior requirit venæsectionem, hirudines pone aurem, cataplasma emolliens, vel vesicatorium in nucha.

2. Otalgia ab intrusis peregrinis corpusculis imo infectis sanabitur tollendo causas per in-

jectionem fluidi cujusdam ut lactis, vel extractionem, si potis est. Mihi nota sunt exempla, ubi pulices aurem ingressi enormes turbas & dolorem produxerunt, per spiritum frumenti immisum illico ejecti; simile emolumentum sperari potest ex oleo vel gossypio auri immisso, cui animalculum inhærens extrahi potest.

Species IV^{ta}.

ODONTALGIA

Est dolor ad sensum ægroti ipforum dentium, plurium vel unius, veram sedem habens in nervis dentium vicinis.

1. Odontalgia cariiosa, unicum modò in genere dentem occupans, e carie f. corrosione ejusdem ortum trahens, certissima medela est dentis affecti evulsio; alterum auxilium est ferrum fili-forme candens sæpius foramini dentis cariosi immisum; oleum caryophyllorum cum æquali parte laudani liquidi sydenhami ad guttas nonnullas gossypio exceptum, & denti carioso immisum, levamen saltem pro tempore affert, opium ipsum in pilulam aptam formatum eadem spe adhiberi potest.

2. Odontalgia catharralis f. rheumatica & refrigerio ut plurimum cognito exorta, plures communiter dentes sive sanos sive cariosos occupans,

ſæpius cum tumore gingivarum vel genarum; ſudorifera camphorata, pediluvia, veſicatorium vel unguentum ſinapium in nucha, inunctio genæ per linimentum volatile camphoratum, venæſectio præfertim in plethoricis, vel etiam hirudines gingivis impositæ, adhiberi debent, mox horum unum, mox aliud juvat; interdum evulſio dentis cujuſdam carioſi, qui occaſionem dolori præbuit, promptiſſime malum tollit, quandoque circa gingivas formatur tumor circumſcriptus durus ad abſceſſum tendens, ideoque emollientia, uti lac calidum ſæpius in ore tenendum, ficum in lacte coctum gingivis admotum, vel cataplasma emolliens genæ applicandum deſiderans; maturato ſic abſceſſu paucum puris effunditur & dolor omnis ceſſat. Huic ſimilis eſt odontalgia arthritica, veſicatoriis præfertim juvanda.

3. Odontalgia gravidarum non raro in prægnantibus obvia, e plethorico ſtatu probabiliter derivata, ideoque potiſſimum venæſectione tractanda; ſi forſan quædam ex ſupra allatis aliis cauſis concurrat, caute hæc, nec nimis violentis modis auferenda eſt.

3. Odontalgia dentitionis, infantibus a ſexto circiter, imo quarto ætatis menſe ad annum & ultra propria. Symptomata & ſigna illius ſunt, oblatoꝝ omnium verſus dentes admotio & appreſſio, morſus ſolito fortior papillarum, ſalivatio multa, ardor oris, fitis, inquietudo, vigiliæ, ejula-

tus, quandoque diarrhoea boni ominis, etiam vomitus, ecclampsia sæpe letalis. Frictio frequens gingivarum, ipsius naturæ instinctum imitans, ad indolentiam producendam inservit; alvi fluxus, utpote salutaris observatus, non impediendus, & sponte non præfens arte, uti syrupo rhei vel mannae vel pulvere infantum cum rhei promovendus; periculosa nervorum irritatio prævertenda, vel tollenda est, cui scopo confert moscus ad aliquot grana allatis syrupis admixtus, vel syrupus diacodii, aut solus, aut si alvus minus fluat, cum æquali parte syrupi de rheo, cujus compositi unciis duabus apponuntur mosci grana quatuor vel sex, unde cochleare minus vel duo porriguntur bihorio vel rarius, loco moschi flores zinci interdum, cum fructa adhibentur; etiam anima rhei cum quarta parte liquoris anodyni mineralis a guttis decem ad viginti ter bisve die exhibita laudabilis est, imprimis si fluxus alvi profusior observetur.

G E N U S II^{dum}.

DOLORES COLLI ET PECTORIS

Qvo referuntur duæ species sc.

Species I^{ma}.

DYSPHAGIA

Est molesta, dolorifica quandoque prorsus impedita deglutitio, a causa vel obstaculo in loco

quodam viæ alimentariæ hærente producta. Varietates hujus sequentes notabiles sunt:

1. Dysphagia spasmodica, quæ intermittit, hystericiis admodum sæpevens & antispasmodicis circa hunc morbum referendis juvanda; huc annumeranda est dysphagia in putridis quandoque obvia, (vid. diar. 1782. Junii 1. & 1783. Febr. 1,) ubi liquor nervinus profuit. Absente febre laudanum liquidum convenit.

2. Dysphagia paralytica continua sine dubio rarissima. Diagnosin hujus exhibent absentia doloris & sensationis obstaculi, quod etiam instituta exploratione haud occurrit. (Semel hunc morbum vidi in juvene sedecim annorum, qui plures menses durans, modo liquida admittens, plurimis remediis frustra tractatus demum sponte cessavit. Sine dubio causa ejus erat enorme corporis incrementum intra annum ad dimidiam ulnam factum, quo absoluto malum sensim evanuit; verosimiliter fibræ musculares oesophagi per allatam causam debilitatæ et elongatæ functioni suæ haud respondebant.) Alias in hac dysphagia remedia solita antiparalytica adhibenda sunt et cibi masticati per oesophagum propellendi ope brachille e balæna spongiam in extremo gerentis, donec vires sensim restaurentur.

3. Dysphagia a deglutitis, quando sc. aliquod ingestum in via alimentaria fixum hæreat, adeoque descensum aliorum impediens; prægressa

causa fat manifestum hujus signum est; & auxilium ex allato instrumento pharyngi & œsophago immittendo petendum est vel a pulsatione forti inter scapulas, quo, a plebe adhibito remedio quandoque solutionem et ejectionem ingesti efficitur; hæc dysphagia quandoque vitam exstinxit ob compressas simul vias aeriferas.

4. Dysphagia inflammatoria sc. ab inflammatione oesophagi ortum trahens; hæc mihi ipsi licet rarius occurrit, sensum molestum in tractu oesophagi pressorium, excoriationis, vel ardentem secum ducens, nec non pulsum tensum, & sanguinis missi phlogisticam indolem; phlebotomia repetita & camphorata juvarunt. Alia, anginæ effectus, supra memorata est.

5. Dysphagia e tumoribus, variæ indolis, schirris, vel excrecentiis, cujus exempla apud autores plura obveniunt attamen fat rara, e constanti indole, fixo loco, & diuturnitate doloris & obstaculi hæc dysphagia facile satis cognoscitur, nullis remediis tollitur, & tandem ingestionem nutrimenti impediendo necessariam & letalem consumptionem inducit.

6. Dysphagia aphtosa s. ex aphtis os internum & fauces occupantibus. Aphtæ sunt ulcuscula alba, vel discreta, dum incipiunt, & tunc parva rotunda; vel sub progressu confluentia, linguam sæpius & præsertim, etiam labia, palatum, tonsillas, fauces obsidentes; ex hac descrip-

tione, & imprimis si sub dicto nomine semel observatae sunt, facilis est diagnosi. Oriri possunt in ætate infantili, febre biliosa, & stricte putrida; febre phtifica omnis generis sc. e suppuratione viscerum internarum, ut & ulceribus inveteratis consolidatis, hydropis ultimo gradu, atque dysenteria. In tribus ultimis casibus morbum, unde dependent, ad letalem terminum proVectum aphtæ denotant; in aliis autem prioribus aut innocuæ, imo criticæ judicari possunt. Curatio earundem vel radicalis est consistens in medicatione, si possibilis sit, primitivi morbi, aut levatoria localis in aphtis e qualicumque origine productis conveniens, topicis absolvenda, e quibus se optime præstitit linctus boracinus mediante penicillo aliquoties per diem aphtosis partibus applicatus; aphtosus mucus ita solutus collutione oris per aquam simplicem subfrigidam abstergitur & expuitur. Laudatum linctum etiam collutorio commixtum in ore agitare prodest; si aphtæ altiore sedem in faucibus habeant, ut remedium deglutiat, necesse est. Citum quoque auxilium vidi ex aluminis crudi drachma dimidia in aquæ unciis sex soluta contra ardorem faucium intolerabilem et pronitatem ad aphtas post febrem intermittentem cortice abactam orta, aliis remediis frustra tentatis.

7. Dysphagia habitualis seu constans, chronica non tollenda oesophagi affectio, tenuia ali-

menta modo admittens, forsan callosæ indurationi post inflammationem superstiti adscribenda.

Species II^{da}.

PLEURODYNE.

Est dolor in regione quadam pectoris modicus absque concomitante febre. Differt juxta causas diversas. sc.

1. Pleurodyne plethorica a plenitudine sanguinis in genere, vel per retentum fluxum hæmorrhoidalem aut menstruum orta, ex ultima causa fit diuturnam pleurodynen observavi; a sanguinis missione auxilium petendum est.

2. Pleurodyne flatulenta imprimis post cibos largiter ingestos oborta, & cum alvi segnitie juncta, factaque evacuatione per clyisma aut eccoprotica cessans.

3. Pleurodyne scorbutica quandoque fit diuturna morbum hujus nominis interdum concomitans, & præsertim remediis illi adaptatis tollenda (vid. diar. 1684. Februar. 5.)

4. Pleurodyne scabiosa e materia hujus tituli retenta vel retrogressa ortum trahens, & remediis præsertim sulphureis morbum ad cutem propellentibus juvanda (vid. diar. 1784. Mart. 6.)

5. Pleurodyne metastatica per materiam purulentam alibi in corpore generatam & in pec-

tore depositam inducta; hæc letalis est (vid. diar. 1786. Januar. 6.)

6. Pleurodyne ex concretione, hanc puto modicum dolorem, quandoque post inflammationem pectoris superflitem, absque febre aut signis suppurationis & fere sine ulla respirationis difficultate; lapsu temporis sponte cessat, vel obscuratur.

7. Pleurodyne spasmodica subito aggrediens vehemens, sine causis allatis et sine ullo febrili symptomate, antispasmodicis uti liquori nervino crebrius sumpto cedens. (Cardiognus s. molesta præcordiorum affectio & pectoris pulsatio, imprimis sub motu, vitioque ipsius cordis imputandus ad asthmata referri potest.)

GENUS III^{tium}.

DOLORES GASTRICI.

Quos in stomacho sedem habere æger sentit.

Species I^{ma}.

PYROSIS.

Est sensus ardoris molestus ventriculi per oesophagum ascendens, quandoque largam salivationem excitans.

1. Pyrosis ex acido, vel ingestis nimis hujus indolis; huic conveniunt antacida, imprimis magnesia, cui sub alvo seigniori apponitur pulvis rhei, ad cochleare minus aliquoties ad productum juvamen exhibita; vel ob defectum bilis acidum corrigentis (vid. diar. 1783. August. 5.), ubi remedia hepatis medentia adhiberi debent.

2. Pyrosis e pingvibus sc. ingestis cibis pingvibus vel rancidis oriens, sponte quidem transit, citius per vinum ustulatum vel acidos fructus juvatur, eccoprotica perseverans malum requirit.

3. Pyrosis periodica loco intermittentis febris, perrara (vide exemplum in diar. 1786. Jun. 2. eccoproticis sanatum.)

4. Pyrosis gravidarum, vario graviditatis tempore possibilis; multa pro levamine, sed fere incassum assyati; quippe ventriculum vacuum praesertim hoc malo laborare observatur, jentaculum prima luce, nec non potum chocolade commendavi.

5. Pyrosis habitualis, frequenter, imo quotidie recurrit cum aut sine salivatione multa, vel sponte, vel per occasionem ingesti cibi acidi & pingvis; abstinentia ab hisce, & usus frequens lactis & piscium incommodum hoc levant; ipse talem pyrosin praesertim noctu molestant diu passus demum, aliis frustra tentatis, spiritu vini modica dosi ad coenam sumpta fugavi. Alium despe-

ratum sanavit ovum recens omni mane; quandoque salutaris est, ad integritatem reliquæ sanitatis ferviens.

Species II^{da}.

CARDIALGIA.

Est sensatio molesta, anxia in regione epigastrii lipothymiam minitans, imo inferens.

1. Cardialgia a saburra varii generis sc. ingestione cibi nimii, pravi, viscerum mox producta, vel biliosa lentius generata & symptomatibus biliosis solitis designata; hanc emetica & eccoprotica juvant, & desiderantur, ni malum cito sponteque transeat.

2. Cardialgia a veneno gravis, neglectâ citâ medelâ, transiens in inflammationem funestam; lacte dulci & præsertim oleo et saponis solutione largiter & continuo ingerendo, unde vomitus salutaris quandoque citatur, illico huic infortunio succurrendum est (vid. diar. 1787. Februar. 12.)

3. Cardialgia symptomatologica ab alio simul præsentente morbo ortum trahens, uti cardialgia hysterica, arthritica, verminosa, scirrhusa, febrilis; quæ omnes principalis morbi indicia cognoscuntur, ejusdemque medela debellari debent.

Species III^{tia}.

GASTRODYNIA.

Est dolor prefforius in regione stomachi continuus sæpius cum aliquali tumore ejusdem junctus.

1. Gastrodynia saburralis, ex iisdem causis & eandem requirens medelam ac cardialgia ex saburra, hujus indolis est dolor epigastrii febri biliosæ frequentissime junctus.

2. Gastrodynia e retento fluxu menstruo; hæc mihi sæpius obvia, intumescientiam epigastrii secum ducens, optime adjuta pilulis aperientibus cum marte vel folis vel cum æquali parte pilularum gummifarum unde grana quindecim ter indies sumuntur. Huic similis est gastrodynia hæmorrhoidalis etiam crebra illis, qui hæmorrhoidibus cœcis vel fluentibus retentis laborant. Lac sulphuris cum æqua parte salis polychresti ad cochleare minus bis terve indies juvare solet.

8. Gastrodynia flatulenta dyspepsiæ effectus quandoque per se existens, varii gradus, sensum expansi ventriculi secum ducens, nec non emissionem flatuum præsertim sursum cum levamine mali, præprimis in illis, qui liquidis tepidis nimium utuntur, occurrit, per aquas aromaticas, uti menthæ, appositis viginti guttis liquoris anodini mineralis levatur; pertinacior & frequentior requirit medelam roborantem per

animam rhei, vel corticis peruviani, rasuræ ligni quassia ana unciam dimidiam, feminis feniculi drachmam pro infuso frigide ingerendo; vel aquam pyrmontanam, & abstinentiam a liquidis relaxantibus.

4. Gastrodynia symptomatrica, alterius se. compræsentis morbi effectus, uti gastrodynia verminosa, quæ cura primitivi morbi adaptata debellari debet.

Species IV^{ta}.

DYSPEPSIA.

Est chronica crebra & molesta affectio ventriculi & intestinorum ab ingestis.

Symptomata.

1. Aëris nimia in tubo intestinali expansio, unde inflatio abdominis, & molesta flatulentia, anxietas, tristitia, & animi depressio, & ob impeditum in vasis abdominalibus circulum, sanguinis versus caput congestio, indeque vertigo, susurrus aurium, insomnia, incubus.

2. Ingestorum mala digestio, pravaque inde imprimis acida contracta indoles, unde cardialgia, eructationes frequentes, male sapida, sæpius acidæ, appetitus depravatus, ob prædominantem acrimoniam acidam non raro debito major, malus tamen ventriculi habitus mox post in-

gestionem, & corporis potius consumptio & debilitas, quam bona nutritio.

3. Alvi difficilis exoneratio, unde sensus molestus pressorius abdominalis, affectiones hæmorrhoidales, incrementum aliorum ex hac causa malorum.

Causæ remotæ sunt sequentes separatim, imprimis conjunctim agentes.

1. Vita sedentaria; quapropter hic morbus litteratis maxime competit; & defectus motus corporei, summi sanitatis adminiculi, & situs diu incurvatus viscera comprimens, in sedentariis ad dyspepsiam producendam conspirant.

2. Protracti animi labores, ejusdemque tristitia pathemata; validus mæror testante quotidiana experientia mox appetitum prostermit, itaque efficaciam nervis stomachi nocendi manifestam exserit, per se ideo patet, protractum talem mentis statum adhuc damnosiores esse; dyspepsia a mærore communiter inapetentiam sibi junctam habet. Animi autem labores similem vim ventriculo nocendi habere demonstrat dyspepsia in litteratis præ aliis, quoad reliqua eodem vitæ genere utentibus.

3. Victus inconveniens sc. nimius vel digestu difficilis, uti lardum, pisa, poma terrea, olera & similia debito largius & crebrius ingesta, vel aqvosius, potissimum aqua multa tepida, ut potus thee; hisce omnibus distenduntur & relaxantur

fibræ musculares; & nervi itaque vim debitam perdunt.

4. Debilitas intestinorum post alios morbos relicta & superstes, imprimis post dysenteriam, diarrhoeam, febrem intermittentem quandoque observata. Huc referri potest dyspepsia e læsione hepatis & defectu bilis, quæ tamen mere symptomatica est.

5. Defectus masticationis et debitæ alimentii in ore comminationis et triturationis.

Causa proxima merito habenda est laxitas atque debilitas tubi intestinalis, ejusdemque fibrarum muscularium, utpotequæ et e causis prægressis, distendentibus, relaxantibus, debilitantibus facile intelligi & declarari potest; quæque ad declaranda hujus morbi symptomata apprime convenit & sufficit; aeris enim expansio nimia, ejusdemque effectus necessario surgunt, dum vires musculares illam coercentes deficiunt, ingestorum prava indoles, & debito segnior egestio non minus probabiles labefactati motus peristaltici effectus sunt.

Diagnosys dyspepsiæ e symptomatibus ejusdem supra memoratis sat facile eruitur; vix enim cum alio morbo confundi potest, excepto hepatis morbo chronico, cujus compræsentia signa dyspepsiam symptomatice indicant, illis autem absentibus dyspepsia vera & idiopathica censenda est.

Prognosis. Periculi expers hic morbus per plures annos imo longam vitam durare potest, interdum ægroti ipsi vitia diætæ, unde malum surgit, observantes, proprio Marte vitando causas, morbum frangunt, sive medicum petunt & medicinam, quæ rite electa & adhibita certior & completior curatio promoveri potest.

Curatio dyspepsiæ promovenda est.

1. Eccoproticis s. alvum modice subducentibus remediis. Indicans horum duplex est sc. vel cruditates, earumque signa, lingua nimirum fordida, sapor & ructus pravæ indolis; vel exoneratio alvi non sponte procedens; indicata sunt medicamina non modo vim catharticam, sed simul roborantem habentia, uti pulveris rhei scrupulus cum æquali parte salis neutrius, aut si acidum ructus indicent, magnesia alba cum vel sine rheo, quandoque plures doses ad effectum desiderantur; a protracto illius usu nil mali timendum est.

2. Roborantibus remediis, quæ principalem & radicalem curam hujus morbi efficiunt, quo præsertim pertinent amara & astringentia sc. cortex peruvianus vario modo adhibitus, mox enim una mox alia forma prodesse videtur; aut pulvis illius ad drachmam dimidiam bis terve die porrectus; aut illi simul apposita grana quinque limaturæ martis subtilis, aut tot grana radicis rhei, aut illius decoctum, aut infusum simplex, vel ex adjuncta æquali parte ligni quassiae in usum

trahi possunt. Quandoque anima rhei sola bis terve per diem sumpta ad guttas sexaginta ipso cortice melius juvat. Alia amara haud contemnenda sunt; sc. pulvis zingiberis albi ad cochleare minus aut aquæ aut vino vel spiritui vini admixtus ante meridiem ingerendus. Pluribus profuit tinctura aperiens amara; (adhuc recordeo exemplum puellæ pertinaci anorexia & dyspepsia laborantis, quæ post multa alia frustra tentata infuso summitatum absinthii quotidie hausto sanabatur.)

3. Diæta convenienti.

a) Alimentis, quantitatis modicæ, quæ sc. sumpta nullas vel vix notabiles molestias creat, qualitatis itidem conuenientis, quam ægri ipsi sæpe melius, quam medici juxta effectum inde animadversum definire possunt; pingvia tamen, viscida, acida, flatulenta fugienda sunt; aromata ut semina piperis grosse contusa crebro adhibenda sunt.

b) Potu modico roborantis indolis; pro jentaculo cerevisia fortis aut potus caffè, aut thea carminativa inserviunt, pro prandio modica vini rubri dosis, non inter fercula, sed post illa sumenda, vel ejus loco cerevisia fortis, aliquot post prandium horis elapsis, potus thee fere frigidus minus nocet, laudabilior verò est aqua frigida simplex; post cænam major copia liquidi convenit sc. aut vinum rubrum aqua frigida mixtum, aut cerevisia fortis.

c) Motu corpori sufficienti quacunque ratione instituto, equitatio merito maxime laudatur, aut brevi ante prandium, aut aliquot post illud præteritis horis talis motus eligendus est, mox enim post prandium somnus tamen haud nimis protractus valde convenit ad concoctionem promovendam.

d) Vitando omnes reliquas supra allatas dyspepsiæ causas, & quamdiu morbus durat, & post illum devictum, ne, quod jure timendum est, recidivet.

4. Aquis pyrmontanis, aut ad fontem ipsum quod efficacissimum est, aut ad nos translatis; nil certo hoc remedio contra dyspepsiam præstantius est; & ut roborans, & ut acrimonias diluens & auferens agit; æstivo tempore adhibendum est ad tres quatuorve hebdomades continuas, primis diebus ad dimidiam dein ad integram lagenam; alvi fluxu non procedente drachma salis sedlifensis simul sumitur; post exhaustam definitam quantitatem potum caffè aut chocolade bibere convenit, sub aere libero potissimum & motu corporis modico haurienda est illa aqua, vegetabilia non cocta prohiberi solent, animique quies imperari. Bis ipse maximo cum emolumento hisce aquis contra dyspepsiam usus fui.

G E N U S IV^{turni}

COLICA s. DOLORES COLICI.

Est dolor in regione intestinorum fedem habens, plures hujus morbi dantur species juxta originem differentes & denominatæ; omnis ideo colica quoad causam exploranda, dijudicanda, & tractanda est.

Species I^{ma}.

COLICA INDIGESTIONIS.

Est dolor colicus s. intestinalis ex ingestis nociva & irritante potentia agentibus obortus; e tali prægressa causa cognoscendus, ejusdemque indoli variæ adaptatis remediis tractandus & juvandus. Nimia ingestæ quantitas, si in culpa sit, auferenda est, vel emesi, præsertim dum ipsa natura illam molitur, vel enemate, si periculum in mora est, alias pulvere digestivo; si acida ingestorum indoles hanc acrimoniam peccantem indicat, magnesia alba vel sola ad cochleare minus bihorio aut trihorio usque ad levamen porrigatur, vel illi apponatur dimidia pars rheii; si pingvia vel rancida malum creaverint, modica dosis spiritus vini præsertim cum admixta quadam essentia amara quandoque juvat; pertinacior dolor evacuantia deside-

rat clysmata aut pulverem eccoproticum. Huc pertinet colica flatulenta; cui occasionem præbent certi cibi aere pleni uti pisa, brasica aliæque legumina, expansione abdominis inde frequente, levamine per flatus sursum vel deorsum emissos dignoscitur; aqua menthæ præsertim cum liqore anodyno minerali levatur, quandoque pro tempore tollitur; si alvus segnior sit, clyfma vel pulvis eccoproticus simul in usum trahenda sunt; crebrior illius reversio dyspepsiæ signum est, ejusdemque curam supra memoratam desiderat.

Species II^{da}.

COLICA E REFRIGERIO.

Est dolor abdominalis s. rectius intestinalis immediate ortus post refrigerium cognitum notabile pedum, vel alterius corporis partis; lectus & potus calidi, mixtura camphorata acida bihorio ad cochlearia duo majora, vel si alvus segnis sit mixtura camphorata laxativa, vel liqor nervinus huic casui medentur vel, si a suppresso sudore solito pedum colica oritur, repetita pediluvia in usum trahenda sunt; si pertinacior reddatur, tanquam enteritis considerata & curanda est.

Species III^{ta}.

COLICA PANCREATICA.

Est dolor fixus modicus medii abdominis, admodum chronicus in casu, quem observavi (vid. diar. 1782. August. 5.) juncta habens pyrofin, salivationem notabilem, tabem demum letalem; maxime resolventia remedia intus sumta præscripsi, forsan efficaciora contra malum minus inveteratum. Certum hujus morbi indicium possibile creditur per explorationem abdominalem jejuno ventriculo & femoribus ægroti antrorsum ductis institutam, dum induratum pancreas ita palpari & distingvi potest.

Species IV^{ta}.

COLICA STERCOREA.

Est dolor intestinalis post diuturnam alvi obstipationem atque e scybalis copiosis ortum trahens, partim e causa prægressa partim e dolore minus quam in enteritide vivido dignoscitur; etiam effectus clysmatis oleosi, quod in hoc casu principale remedium efficit, juvando nominatam morbi indolem designat; quod si non observetur, inflammatorium aliquid fuisse credere licet. (Mihi occurrit exemplum vetulæ tali colica labo-

rantis demortuæ, cujusque diffectæ colon integrum fcybalis duris prorfus plenum & notabiliter expanfum inveni; in altera tali colica demortua præternaturalis coli curvatura evacuationem impediēbat. Aliam observavi in puerpera cum vomitu omnis ingefti et materiæ vicidis; e clysmatibus fo- litis et ftimulantibus nullus effectus; demum poft largum ufum cataplasmatidis emollientis in abdo- mine et dein injectum oleum lini ad uncias octo, quod per duodecim horas retentum nonnullam, et dein repetitum fimul adhibito clysmate emolli- ente largam et fufficientem evacuationem pro- duxit.)

Species V^{ta}.

COLICA HYSTERICA

Est dolor colicus gravis, intermittens, vel notabiliter remittens apud hyftericas personas oboriens, communiter fymptomata hyfterica fibi juncta habens, uti frigus crurum, fingultum, car- dialgiam, vomitum alvumque fegnem; intermiffio doloris illam diftingvit a colica inflammatoria f. enteritide; fordes intestinales illius præcipuam caufam efficiunt, ideoque fanatio peragenda est per apta evacuantia, uti clyfma, in quo drachmæ duæ affa foetidæ folutæ funt; etiam mixtura e fa- lis mirabilis Glauberi unciis duabus folutis in aquæ

destillatæ menthæ unciis octo cum addita uncia animæ rhabarbari ad cochlearia duo bihorio exhibita, & per plures quandoque dies continuata; vel oleum ricini laudabilem effectum exferit; si reliquæ hystericæ dein permaneant, liquor antispasticus ad guttas quinquaginta ter per diem porrigatur (vid. diar. 1783. Aug. n. 6. 1784. Aug. 3. & 1785. Febr. 5. Talem colicam ex animi pathemate subito ortam sine prægressis junctisve fordibus intestinalibus laudani liquidi guttis quinque in aqua menthæ omni hora præbitis cito fugatam vidi.)

Species VI^{ta}.

COLICA NERVOSA, s. PICTONUM

Est dolor intestinalis atrox, constrictorius cum obstipatione alvi & adjuncta affectione artuum morbofa, dolorifica vel paralytica, (vid. diar. 1782. Sept. n. 2. 1783. Nov. 5. 1785. Jul. 12. & 1786. Octbr. 6.)

Symptomata in hoc morbo possibilia:

1. Dolor ipse gravis constans præsertim mediæ abdominis etiam extensus ad epigastrium & hypochondria, constrictionem s. retractionem abdominis secum ducens, a pressione externa non crescens.

2. Obstipatio alvi & retentio flatuum; sub modico morbi gradu alvus licet segniter & cum excrementis duris aperitur, sub adultiore morbo plena adest constipatio.

3. Artuum affectio morbosa; sævientem dolorem abdominalem sæpe comitatur dolor crurum vel genuum, illum autem potissimum decrescen-tem excipiunt debilitates paralyticæ sæpius extremitatum superiorum, unius vel utriusque, vel manuum, vel certorum digitorum, quandoque artus inferiores simul debilitantur, semel totalem ex hac causa vidi paralyfin sc. & artuum omnium & lingvæ, oris, spinæque dorsi integræ.

2. Accidentalialia uti vomitus & singultus in magno morbi gradu, ut plurimum inquietudo, insomnia, facies pallido-flavescentes, anorexia, pulsus varius, indifferens, quandoque naturalis, quandoque celer tensus.

Causæ remotæ antecedentes:

1. Metallica materies præsertim plumbea aliquo modo in corpus introducta, opifices ideota-lem materiem frequenter tractantes uti pictores præsertim, figuli, typothetæ; etiam vina falsificata per admixtam materiem metallicam accusantur.

2. Refrigerium notabile & hinc conjecta quædam acris materia ad nervos; quod præsertim accidit in regionibus calidis; nautæ nonnulli ab

hisce reduces & hoc morbo afflicti mihi occurrerunt (vid. diar. 1785. Julii 12; num exemplum diarii 1785. Januarii 7. ex eadem origine derivandum est?)

3. An spasmodica affectio nervorum mera etiam incusanda est? absque supra allatis saltem irritamentis efficax; (num exempla diarii 1782. Mart. 4. & 1786. Octbr. 6. tale quid arguunt?)

Causa proxima vix alia haberi potest quam nervorum intestinalium irritatio ex acrimonia illis tenaciter adhærente, indeque suscitatae contractiones partim idiopathicae, partim sympathicae per consensum & mediante forsan nervo magno intercostali ad artus propagatae.

Diagnostica signa:

1. Dolor ipse colicus supra descriptus, per constrictionem abdominis & tolerantiam pressionis externae praesertim ab inflammatorio dolore distingvendus.

2. Causa praegressa s. quod ægroti supra allato modo materiam morbificam tractaverint, quandoque hoc morbo antea afflicti fuerunt, unde etiam indicium praesentis casus depromi potest.

3. Artuum concurrens supra allata affectio; hoc certissimum est signum, quandoque autem tantummodo sub progressu colicae sese exferens.

Dantur rariores tamen casus, dubii praesertim ob defectum symptomatis artuum, ubi reipsa inflammatorius morbus apparet nervo-

lus, & vice versa; tunc a juvantibus & non juvantibus de indole illius iudicium deducere oportet (vid. diar. 1783. August. 8. & Novbr. 6.)

Pregnos. Artis ope convenienti semper sanabilis est hic morbus, sola autem natura sanatum exemplum mihi haud occurrit, abdominis afflictio facilius & citius tollitur; artuum verò debilitas pertinacior est, tandem verò & prorsus vincibilis, ni malum sibi ipsi diuturno nimis tempore relictum fuerit.

Curatio duplici parte constat:

1. Contra affectum abdominalem, qui primò tollendus est & semper tolli potest remediis emollientibus oleosis; incipiendum est a solutione mannato-oleosa ad cochlearia duo majora, vel melius oleo ricini a unciam dimidiam, omni hora vel bihorio porrigenda; optimum quoque effectum vidi ex mixtura camphorata laxativa, etiam post oleum frustra tentatam; si post diem alvi apertura & levamen inde non producat, vel si dolor gravis urgeat, simul clyfma oleosum applicandum est; inunctio oleosa abdominis etiam utilis est, vel cataplasma emolliens illi applicitum, balneum universale tepidum cito & notabiliter juvat; opiata raro et tunc alternatim cum remedio laxante porreximus. Plane devicta colica convenit usus olei olivarum bis terve de die per duas tresve hebdoma-

des ad morbum eo certius extirpandum et præcavendum.

2. Contra debilitatem artuum superflitem, quæ si universalior sit, balnei integri tepidi usum alternis diebus faciendum desiderat; partialis affectus unius vel alterius brachii balneo vaporis quandoque melius balneo stillatio, vel utroque alternatim adhibito, invabitur; electrificatio, quæ affectibus paralyticis ex hac causa ortis optime convenit, cucurbitæ siccae, frictio crebra sine vel cum essentia cantharidum camphorata etiam in usum trahantur; intus essentia sibi cum æquali parte spiritus lavendularum compositi ad guttas sexaginta ter indies, quæ medicina non solum paralyticæ debilitati externarum partium, sed simili quoque intestinorum post hunc morbum superstiti prodest, nec non infusum theiforme florum arnicæ adhibeantur.

Species VII^{ma}.

COLICA VERMINOSA.

Est dolor intestinalis inconstans, vagus, ut plurimum punctorius e vermibus in canali intestinorum hospitantibus ortum trahens.

Symptomata per vermes possibilia;

1. In ipso abdomine

a) Dolor intestinalis supra descriptæ indolis sc. vagus mox unam in genere mox alteram abdo-

minis partem moleſtans, nec non inconfans, id eſt, non ſemper præſens, ſed per intervalla re-
currens.

b) Tumor ſ. expansio aliquatenus dura abdominis, præſertim apud pueros, vix autem in adultis notabilis.

c) Magis accidentalia; cardialgia imprimis jejuno ventriculo, appetitus irregularis quandoque enormis, alvus itidem irregularis, non raro laxa; etiam ſputatio multa, ſenſus ponderis cardiæ, ſymptomata bilioſa quin imo vomitus habitualis (vid. diar. 1785. Jul. 5.)

2. In reliquo corpore ſymptomata multiplicis generis citari poſſunt, haud immerito po-
tiſſimum nervis per conſenſum irritatis adſcripta, uti circulus lividus in palpebris inferioribus, pupillæ dilatatæ, creber naſi pruritus, urina albida turbida; minus ſolita ſunt vertigo, ſufurrus aurium, lipothymia, convulſiones, vera epilepſia, (ſingulares tales vermium effectus exhibet diar. 1783. Junii 5.); etiam macies & pallor faicei in verminofis sæpe occurrunt, nec non color mutabilis.

Cauſæ remotæ ſunt vermes varii generis in tubo inteſtinorum præſentes ſc. 1. vermes longi rotundi lumbrici appellati, 2. vermes lati fasciæ ſimiles e pluribus fruſtis ſ. vermiculis, ſeparatim quoque viventibus compoſiti, ad plures ulnas longi, qui tæniæ dicuntur; ſeparata hujus fruſta cucurbitini nuncupantur 3. tenues breves acubus

similes, qui ascarides vocantur, imprimis in intestino recto sedem habentes.

Causa proxima colicæ verminosæ indeque fluentium symptomatum est morbifica vermium actio sc. 1. irritatio rosione vel suctione producta, unde dolor & motus irregularis varius & idiopathicus & per consensum in aliis corporis partibus citatus, 2. moles, quandoque in glomeres convoluti sunt vermes, quibus transitus contentorum per per intestina impeditur, unde expansio & relaxatio intestinorum facile intelliguntur, 3. consumptio materiæ nutritivæ, indeque tabes; tanta interdum vermium est cohors, ut ille effectus haud mirus videretur.

Diagnosticæ signa sunt symptomata supra allata constantiora, imprimis tamen duo: dolor nempe allata ratione in abdomine sese exferens, atque ejectio ipsa vermium, sursum vel quod sæpius fit, deorsum facta.

Prognosis:

1. Per artem sanatio quidem possibilis, non raro difficilis quandoque impossibilis est, quod maxime valet de specie vermium tænia dicta; interdum remedia expulsionem vermium itaque curationem radicalem efficiunt, quandoque absque tali expulsionem etiam juvare videntur.

2. Sponte interdum sub incrementa ætate molestiæ verminosæ, puerilibus annis potissimum familiares, diminuuntur, imo cessant.

3. Duratio verminosi morbi ad plures annos quinimo præfente tænia per longam vitam extendi poteft.

4. Funestus illius exitus, licet rarus tamen poffibilis eft aut per diarrhoeam colliqvativam, aut ob epilepfiae violentos motus, qvalis eventus in pueris potiffimum timendus eft.

Curatio verminosi morbi peragenda eft.

1. Vermifugis fic dictis remediis, qvibus nimirum vermes necari vel fopiri creditur, qvalia funt femina tanaceti, fanthonici, fabbadillios, brafficae rubrae, fal martis & ex his compofita varia; mihi potiffimum in ufu eft pulvis vermifugus pharmacopoeae danicae cum aequali parte cremoris tartari, unde cochleare minus ter per diem porrigitur, duplex dofis adultioribus; affa foetida, uti illius pilulae ad grana qvindecim bis per diem potius ad fymptomata e vermibus tollenda, qvam ad illos expellendos conveniffe mihi videbantur; rafurae flanni drachmae duae, falis martis grana quinque bis per diem fumtae commendantur contra tæniam; aliud præfertim contra hanc eft remedium Noufferi: vefpera nimirum fumitur pulmentum cum butyro mixtum, in fequenti mane pulveris filicis maris drachmae duae, bihorio ab hinc elapfo bolus e mercurii dulcis & scammonii ana granis duodecim, gummi guttae granis quinque, confervae cujusdam ut rofarum fcrupulo paratus, & dein infufum theae viridis largiter hau-

riendus est, qualem methodum cum optimo effectu aliquoties, sed sæpe frustra tentavi. Etiam mercurius vivus contra vermes commendatur & quidem uncia illius coquitur cum aquæ simplicis mensura ad ebullitionem; hæc aqua dein lacte & saccharo mixta porrigitur per aliquod tempus pro potu ordinario; etiam ipse mihi videor aliquod emolumentum exinde observasse, verum absque evacuatione vermium. Profunt porro infusum vinosum fumitatum absinthii, vinum rubrum ad cochleare majus cum pauxillo salis marini jejuno ventriculo sumptum, et electuarium ex pulvere feminis fanthonici, anisi, foliorum rutæ, fennæ et radicis rhei optimi ad partes aquales cum melle mixto, quod mane et vespere præsertim cum cerevisia porrigendum est. Oleum terebinthinæ ad unciam dimidiam bis per diem, contra tænias præsertim, laudatur. Contra ascarides oleum ricini per intervalla exhibitum commendatur.

2. Purgantibus remediis; mihi solitus est pulvis radicis jalappæ, sacchari canariensis ana drachma dimidia, mercurii dulcis grana decem pro adulto, & minor dosis juxta ætatem ægroti conformanda, nec salina contemnenda sunt; etiam aliis frustra tentatis efficax inveni electuarium e feminis fanthonici, brassicæ rubræ ana uncia dimidia radicis jalappæ drachma mellis communis sufficiente quantitate paratum, cujus cochlearia

duo minora omni mane jejuno ventriculo sumi debent, nec immerito landatur largior olei ricini usus; circa mere purgantium contra vermes usum illa regula recepta est, quod ad diem quartum vel quintum vermifugis interponantur, eo scopo, ut vermes anthelmenticis necati vel debilitati evacuantur.

3. Emeticis solitis præsertim indicatis, si biliosa symptomata verminoso morbo annexa sunt, vel si e pressorio sensu cardiæ aut ejectione vermium per os sedes eorundem in ventriculo suspecta reddatur.

4. Clysmatibus imprimis contra ascarides commendari solitis, atque ex assa foetidæ drachma una vel altera in decocto avenæ vel lacte solvenda cum admixtis duabus unciiis olei olivarum, etiam allium loco assæ foetidæ cum lacte coctum vel extracti aloes scrupulus in sufficiente quantitate lactis solutus cum fructu adhibentur. Decoctum mercurii supra dictum lacte & melle mixtum quoque laudatur.

5. Symptomaticis remediis, quæ sc. symptomatibus notabilioribus verminoso morbo productis medentur; ubi convulsivi vel epileptici motus juncti fuerunt, bonum percepi effectum e mosco pulveri supra allato vermifugo commixto; si diarrhoea simul præsto fuerit, pulverem radicis gei ubani ad æqualem partem cum vermifugo jungere prodest.

COLICA INFANTILIS

Ejulatibus sponte obortis apud infantes extrudentitionis tempus hæc colica indicatur, præsertim e triplice causa, cui medela accommodanda est.

1. E meconio nondum sufficienter evacuato, quod recens natis intra sex primas hebdomades accidere solet; tunc syrupus de rheo vel de manna ad cochlearia minora aliquoties per diem porrigi debet donec bene evacuatus & quietus reddatur infans.

2. Ex acrimonia acida in primis viis per viridia excrementa dignoscenda; in quo casu pulveris magnesiæ albæ vel absque rheo vel si viscida appareat dejectio cum rheo ad cochleare minus bis per diem exhiberi debet, donec causa morbi tollatur, & infans quietus reddatur. Post alvum medicamine bene solutam etiam convenit uncia syrapi diacodii cum drachma dimidia olei tartari per deliquium ad cochleare minus bihorio vel rarius.

3. E flatulentia, quam suspicari fas est, si infans absque allatis causis ejulet, & inquietus sit, tunc anima rhei uncia dimidia, liquoris anodini drachma mixta juvant ad guttas duodecim vel plures bis terve per diem porrectas.

Species IX^{ma}

COLICA SYMPTOMATICA.

Est dolor intestinalis, qui ex aliis compræsentibus morbis ortum trahit, & medela principali morbo accomodata tractari debet, uti colica inflammatoria, hæmorrhoidalis, catamenialis, arthritica & ex aliis retrogressis materiis ad intestina conversis, uti scabiosa (vid. diar. 1785. Aug. 4. vel alia vid. diar. 1783. Octobr. 3.)

GENUS V^{tum}

HEPATALGIA

Est dolor diuturnus obtusus in genere, & gravativus in regione hepatis, cardiæ sc. vel hypochondrio dextro præsens; varia hepatis læsio docente sectione cadaverum hujus doloris causa esse potest, e quanam differentia species hepatalgiæ plures exfurgunt.

Species I^{ma}

HEPATALGIA INFARCTUS

Est dolor chronicus constans, modicus, pressorins in regione hepatis, hæc frequentissima species est.

Symptomata :

1. Dolor f. fenfatio moleſta ſupra deſcriptæ indolis rarò totam regionem hepatis occupans alias certas illius partes, aut lobum dextrum, aut mediam cardiacam partem, aut lobum finiftrum verſus coſtas ſpurias finiftras; augmentum doloris obſervatur a preſſione externa, incurvatione corporis, & ſæpe poſt cibos largiter ingeſſos.

2. Intumeſcentia & nonnulla durities tamen æqvabilis, haud tuberculofa ſæpe in affecta parte palpantibus digitis occurrit; ſi vitium autem in concava ſuperficie hepatis hæreat, talis tumor non præſto eſt.

3. Functionis hepaticæ læſæ indeque deficientis bilis effectus ſc. ſegnities alvi, appetitus proſtratus; qvo referri poſſunt faciei & oculorum color pallido-flaveſcens e bilioſo humore in ſanguinis maſſa retento: nec non collectiones hydro-picæ, diu duranti morbo annexæ, aut in ſuperficie aut in cavitatibus corporis obortæ partim impuritati humorum bilioſæ, partimque impeditæ reſorptioni per venam portæ adſcribendæ, unde etiam moleſtiæ hæmorrhoidales citari & intelligi queunt.

4. Vicinarum partium incommoda mole & pondere præternaturali hepatis citata, uti dyſpnoea cum vel ſine tuſſi ob nexum hepatis cum diaphragmate, decubitus moleſtus in latere finiftro propter preſſionem a nimis ponderoſo hepate;

vomitus, interdum etiam ex affecto hepate ventriculum molestante derivandus.

Causæ remotæ infarctus hepatis meritò statuuntur sequentes separatim, imprimis conjunctim agentes.

1. Vita sedentaria, præsertim cum corpore antrorsum incurvato; unde circulus humorum in hepate haud debitò promovetur, vel impeditur; naturaliter lentior est motus humorum in hepate, quam in aliis corporis partibus, atque crebra diaphragmatis actione adjuvandus, hoc ideo deficiente humores hepatis ad stagnationem tendere per se intelligitur.

2. Pathemata animi injucunda protracta; violenta hæc icterum subito inducendo influxum in vasa hepatis efficacem demonstrant, moeror lentius eodem modo agit, nec non circulationem sanguinis in universum debilitando.

3. Materia varia morbifica ad hepar deposita, uti arthritica, rheumatica, scabiosa, metastatica (vid. diar. 1786. Decbr. 4. 1787, Januar. 2. & Februar. 5. 6. 7.)

4. Abusus potus spirituosus imprimis vini ustulati s. spiritus frumenti, plures apud nos huic dediti hepatalgiam exinde & demum hydropem letalem sibi contrahunt (vide ex. gr. diar. 1786. August 13. & 1782. Sptbr. 3.)

5. Febres intermittentes diu protractæ, præsertim cortice vel aliis adstringentibus minus tem-

pestive tractatæ (vid. diar. 1786. Maj. 2. & Julii 2.)

6. Inflammationes hepatis prægressæ (vid. diar. 1783. Jun. 3. August 5. & 1785. Februarii 6.)

7. Contusiones externæ versus hepar directæ (vid. diar. 1784. Decbr. 5.)

Causa proxima infarctus hepatis juxta extispicia demortuorum est duplex vitiatu status sc. moles enormis (vid. diar. 1782. Octbr. Decbr. 7. & 1786. April 12 & 13.) vel durities nimia (vid. diar. 1784. Novbr. 11. & 1783. Decbr. 3 & 4.) Hac experientia & casto ratiocinio ductus causam proximam strictius determinatam statuo, 1. qvoad indolem consistentem in circulatione humorum, ad hepar pertinentium, debitò tardiori vel ob vasorum nimiam resistentiam & rigiditatem vel ob humorum viscositatem producta; ex qua retardata circulatione impedita bilis secretio, impedita resorptio per venas portæ, distentio vasorum dolorifica, ipsum volumen hepatis si laxum sit, adauctum & reliqua infarctus symptomata declarari possunt. 2. Qvoad sedem hæc retardatio maxime probabilis est in ramificationibus venæ portæ, & qvia in hisce humorum motus naturaliter segnior fit, qvam in aliis hepatis vasis & qvia contenti in illis humores immediate ab intestinis resorpti variam pravam indolem & spissitudinem ad stagnandum pronam habere possunt.

Diagnostica signa infarctus hepatis sunt ejusdem symptomata supra allata, præsertim dolor ipse descriptæ indolis & sedis lente increfcens, quo signo distingvitur a dolore rheumatico et metastatico regionem hepatis quandoque occupante sed subito graviusque; dolori adjuncta intumescencia affecti loci, atque durities æqvabilis.

Prognosis:

1. Sanabilis per artem hic morbus haberi potest & quidem eo certius & facilius, quo recentior est atque vice versa, adeo ut inveteratus nimium inprimis in senioribus subjectis curationis haud capax declarari possit.

2. Sponte s. ipsius naturæ viribus incurabilis morbus sensim juxta amplitudinem infarctus tendit ad hydropem varium, abdominis, pectoris & totius corporis tandem funestum (vide exemplum diarii de causa proxima citata); talis hydropis ortus e resorptione impedita per venas portæ obstructas, & e compressione aliorum vasorum per volumen & duritiem hepatis producta forsan declarari potest; an etiam moles hepatis enormis pectoris viscera lædere, comprimere & ipsius cordis vim potest ita labefactare, ut circulationem haud amplius promovere valeat? (exemplum diarii 1786. April 13. huic sententiæ ansam præbet.)

Curatio infarctus hepatis causæ illius proximæ supra stabilitæ opponenda est, adeoque pro scopo habeat restitutionem liberæ & naturalis cir-

culationis humorum in ramificationibus venæ portæ, cui scopo duplex indicatio infervire potest, sc. vasorum, si rigida sint, emollitio; & humorum, quorum spissitudinem semper suspicamur, resolutio; hæc ultima principalior est, per experientiam comprobata, & remediis bili similibus amaro saponacea virtute gaudentibus promovenda sc.

1. Tinctura aperiente ad guttas sexaginta bihorio vel trihorio exhibenda, quæ in malo incipiente & modico quandoque sufficit.

2. Pilulis saponaceis, nimirum resolventibus nostris, quæ ad morbum notabiliorem & magis inveteratum desiderantur sequenti ratione; si alvus prorsus libera sit, tinctura aperiens ter die porrigitur, & pilulæ resolventes simplices mane & vespera ad grana quindecim vel plura; si alvus etiam sub hac medicina stricta maneat, pilulas resolventes cum aloe in usum traho ad dosin mox memoratam, imo adauctam; fel bovinum inspissatum a nonnullis laudatur et dictis pilulis apponitur; in universum horum medicaminum usus ita determinandus est, ut alvi fluxus quodammodo naturalis inde promoveatur, illius enim excessus medicamenta simul evacuat, adeoque eorundem juvandi vim impedit.

3. Decoctum resolvens e radicibus graminis & taraxaci paratum, ad libram quotidie adhibendum simul cum aliis supra laudatis; præsertim si hisce morbus haud decrescere videatur;

etiam hujus decocti loco tempore vernali succus recens pressus herbæ & radice taraxaci vel solus vel cum succo cherefolii & acetosæ junctus cum notabili emolumento propinari potest.

4. Externis affectæ parti applicitis; levi-ori & incipienti morbo prodest inunctio frequens linimenti volatilis camphorati vel melius linimen-ti resolventis; semel suppuratio per vesicatorium citata & diu protracta mihi admodum utilis con-tra hepatalgiam videbatur. Per se intelligitur, allata remedia tamdiu, licet per plures quando-que menses, continuanda esse, donec symptomata morbi cessaverint. (Exempla hac methodo sanata vid. diar. 1783. Junii. no. 2. & no. 3. August 5. Sptbr. 6. 1774. Sptbr. 12. Decbr. 5. 1785. Febr. 6. 7. April 3. & 1786. Debr. 4.)

5. Diæta convenienti sc. victu attenuanti s. tenui, potissimum jusculis carneis, abstinentia a spirituosis, motu corporis crebro præsertim equi-tatione, frictione diligenti abdominis per pannum laneum, qualis diæta etiam ad recidivam hujus morbi sat facilem præcavendam convenit.

6. An clysmata methodo Kæmpfiana con-veniant & commendanda sint? saltem medela hæc plurimis adeo incommoda, vix comendanda, an-tequam supra allata remedia absque sufficienti ef-fectu tentata sint. Species huic scopo aptatæ, ab autore propositæ, sunt radices taraxaci, graminis, valerianæ, lapati, acuti, herbæ cardui benedicti,

anagallidis, marrubii albi, millefolii, fumariae; flores chamomillae, verbasci, arnicæ; mihi maxime placent radices graminis, taraxaci, lapati acuti, flores verbasci, quarum manipuli duo cum parvo manipulo farraginis (*Kliid*) fecalinæ vel triticiæ leni igni coquantur cum aquæ simplicis vel calcis libra una & dimidia ad libram; tale dein decoctum tepidum bis per diem post naturalem excretionem, sponte vel mediante alio clysmate peractam, sub forma clysmatis applicetur & quamdiu ægro potis est, retineatur, cui scopo etiam decubitus in latere dextro cum corpore incurvato quadrat, sæpius plures menses ad effectum hujus medicationis requiri docet ille auctor; alia interna uti supra memorata vel similia etiam simul adhibenda convadent. Contra inveteratum infarctum hac jam fere obsoleta methodo frustra usus fui.

Species II^{da}.

HEPATALGIA STEATOMATOSA

Est hepatalgia e tumoribus steatomatosis in substantia hepatis hærentibus; dignoscenda est per modicum dolorem & tumores discretos duros hepatis, exploranti manui percipiendos; his non inventis morbus ab hepatalgia infarctus distingvi nequit; etiam obstaculum contra descensum ingestorum prope cardiam sentitum affectus hujus he-

patalgiæ esse potest ob fteatoma ventriculum vicinum comprimens; qvoad reliqva symptomata & eventum refert infarctum, nullius verò curationis capax est. (Exempla illius vid. diar. 1783. Mart. 10. Sptbr. 8. & 1787. Junii 9. qvo referri potest casus diar. 1783. Dcbr. 14.)

Species III^{ta}.

HEPATALGIA CALCULOSA

Est hepatalgia e calculis in ipsa substantia hepatis generatis & præsentibus orta; symptomata eadem ac infarctus habet; vivente ægroto dignosci neqvit; incurabilis est, & ni alia mortis causa præveniat, per hydropem letalis (vid. diar. 1786. Jul. 10.)

Species IV^{ta}.

HEPATALGIA CANCROSA

Est hepatalgia e schirro, & cancro hepatis ortum trahens, per diuturnitatem, constantiam & vehementiam doloris dignosci debet, incurabilis & letalis; pro levamine opiata admitti possunt. (Exempl. vid. diar. 1786. Novbr. 10.)

G E N U S VI^{um}.

S P L E N A L G I A

Est dolor chronicus non febrilis in regione lienis sc. infra costas spurias sinistras prope dorsum.

S p e c i e s I^{ma}.

S P L E N A L G I A F E B R I S E Q V A

Est gravativus sensus regionis lienalis junctus cum ejusdem tumore duro non rarò admodum lato, post febres intermittentes diurnas oriri solitus; in Holfatia hic morbus frequens perhibetur, haud adeo periculosus est, dummodo remediis modice resolventibus tractatur, rarò mihi occurrit; exemplum tamen nigritæ recordor, qui hanc noxam in insulis americanis sibi contraxerat, quique mixtura aperienti & decocto resolventi longo tempore adhibitis quodammodo restituebatur; in altero autem simili subito demortuo inveni lienem enormis magnitudinis disruptum cum multo effuso sanguine.

S p e c i e s II^{da}.

S P L E N A L G I A S P A S M O D I C A

Est dolor lienalis gravis absque mutatione externa, remittens, imo intermittens, sub exacer-

batione dolorem reliqui abdominis secum ducens. In casu, quem observavi (vid. diar. 1783. August 4.) pilulæ e saponis venetæ drachmis duabus, gummi ammoniaci, assæ foetidæ, extracti chamomillæ ana drachma & aloes aqvosi drachma dimidia paratæ, & ad grana quindecim ter indies exhibitæ sex hebdomadum spatio morbum tollebant.

Species III^{ta}.

SPLENALGIA SPURIA

Est dolor lienalis sat molestus, per intervalla exacerbatus, vomitum, imo sangvineum, & singultum producere valens, ex ipsius lienis vitio non exurgens, sed ex adjacente colo tenacibus scybalis abundante; ex antecedente specie vix dignosci potest, nisi effectû medicaminum evacuantium huic ultimæ utilium, quæqve ideo sub hoc apparente dubio mox propinare oportet, & ex eorum effectû proficuo hanc, & non juvante illam concludere speciem. Occurrit mihi casus (vide diar. 1783. August. 6.) ubi mixtura e salis mirabilis unciis duabus aquæ destillatæ menthæ unciis octo, animæ rhei uncia media ad cochlearia duo bihorio sumta intra duos dies morbum pertinacem & protractum purgando sanavit. Nomen splenalgiae spuriae s. symptomaticæ meretur ille dolor brev-

durans hyftericis paroxysmis admodum frequenter
annexus & principalis morbi cura juvandus.

G E N U S VII^{num.}

L I T H I A S I S

Est dolor in viis uriniferis productus e calculis & materia calculosa ibidem hærentibus, juxta sedem differentem doloris, ejusdemque causæ duplex hinc formatur species.

S p e c i e s I^{ma.}

LITHIASIS RENALIS s. NÉPHRALGIA CALCULOSA

Est dolor in regione renum, vel ad illos pertinentium ureterum e materia calculosa ibidem hærente citatus.

Symptomata:

1. Dolor ipse in alterutra vel utraqve regione renali variæ indolis, tensivus, punctorius, exacerbatus sub corporis motu, imprimis equitatione, vel vactione in locis lapidosi, remittens imo filens sub quiete corporis præsertim decumbentis in latere affecto. Quandoque dolor hic sentitur in tractu ureterum, quando sc. per hos calculus descendit.

2. Diuresis a debita norma mutata; quandoque quidem facta naturalis est; alias impedita, cruenta observatur; vel calculos secum ducit, vel materiam calculosam rubram, vel albescentem aut oculis cognitam, aut palpantibus digitis, colligitur talis transmittendo urinam per chartam bibulam.

3. Sympathicus quandoque dolor [f. tractio dolorifica testiculi, nec non stupor molestus femoris affecti lateris.

4. Exacerbatio doloris intercurrentis, quando sc. calculus e renibus in ureterem descendit, cum annexis horripilatione, vomitione, vomitu, dolore colico, ischuria, post quæ ad diem alterumve interdum duranti tandem cum urina larga calculus provenit; hæ exacerbationes paroxysmi nephralgici appellantur.

Causa efficiens nephralgiæ est calculus f. calculosa materies in renibus hærens vel per diuresin se prodens, vel per sectionem cadaverum, quæque pondere aut figura aspera dolorem excitat, & sub cujus propulsione in ureteres maximæ molestiæ f. paroxysmi nephralgici surgunt, e consensu nervorum pro parte declarandi.

Causæ remotæ calculi renalis sunt vita sedentaria, imprimis diuturnus decubitus in dorso, quibus expurgatio renum impeditur; senium sub quo humores terrestribus particulis abundant; constitutio arthritica, etiam congenita vel hære-

ditaria dispositio accusatur forsan tubulis uriniferis propria; an alia diætæ vitia etiam in culpa esse possunt? uti vina acida tartarum multum continentia; ren sinister dextro sæpius calculosus invenitur forsan ob pressionem a colo adjacente.

Diagnostica signa nephralgiæ sunt: 1. dolor ipse descriptus ab alia lumbagine per exacerbationem sub motu & mitigationem sub quiete corporis distinguendus. 2. Accidentes paroxysmi nephralgici. 3. Urina alienata præsertim calculos vel calculosam materiem secum ducens.

Prognosis nephralgiæ:

1. Plena curatio possibilis licet rara est, dum sc. calculus generatus per vias uriniferas evacuetur ejusdemque regeneratio apta arte præcavetur.

2. Sæpissime recidivans est morbus, ita ut aliquo post ejectum calculum præterlapso tempore novus sensim renascatur, unde etiam novæ timeri possunt molestiæ.

3. Quandoque calculus renalis major est quam ut per vias uriniferas transmitti possit, unde experientia teste duplex eventus expectari potest: vel per plures annos ibidem morari valet fere absque ullo incommodo, vel, quod sæpius existit, tandem funestos effectus producit, aut urinae fluxum impediendo, ita ut hæc ad cerebrum conversa delirationem, lethargum et mortem in-

ducat, aut renes inflammando, indeque five gangrænam five suppurationem hæcticam cum urina purulenta producendo.

Curatio nephralgiæ ad duplicem partem reducitur sc. in paroxysmis ejusdem, & extra illos convenientem.

Curatio paroxysmi nephralgici, sub quo natura calculum ejicere molitur, scopos habeat avertere inflammationem, conatibus naturæ optemperare & dolores pertinaces molestos & noxios sublevare; congrua ideo remedia censenda sunt.

1. Venæsectio, si nimirum dolor notabilis sit & corpus plethoricum, quinimo juxta perseverantiam doloris ad plures vices instituenda est, ut eo certius inflammatio ex irritatione timenda avertatur. Dantur etiam leviores citoque transeuntes paroxysmi venæsectione vix opus habentes.

2. Remedia emollientia, modice & absque stimulo diuretica uti clyisma oleosum, inunctio frequens abdominis per oleum calidum vel unguentum althææ, & in pertinaci casu femicupium tepidum; intus mixtura ex oleo olivarum albo & succo citri ad partes æquales parata & ad cochleare majus omni hora vel bihorio exhibita, infusum theiforme ex herba plantaginis aquaticæ partibus duabus, radicis althææ parte una largiter haustum quadrant, etiam spiritus salis dulcis in mitiori malo ad guttas quinquaginta trihorio juvat.

3. Opiata, quæ indicantur, si dolor post allata remedia non mutatus permaneat, laudani liquidi Sydenhami guttæ quindecim una alterave vice imprimis vespere tunc exhiberi possunt.

Curatio nephralgiæ extra paroxysmos duplicem partem continet sc. regenerationem calculi prævertere, & molestias e calculo magno non evacuando mitigare & debellare.

1. Regeneratio calculi, ejusdemque tale incrementum ut notabiles molestias creet, præverti debent auxiliis & remediis, quibus diuresis larga promovetur, indeque viæ uriniferæ eluuntur & a materia calculos efficiente vel revera calculosa tempestive depurantur. Huc pertinent potus largus præsertim aquæ frigidæ mane aut vespere hauriendæ, frequens usus succi citri, & aliarum plantarum & fructuum diuretica vi præditorum quales sunt raphanus rusticanus, asparagi, fragæ, cerasa, fructus ribesiae nigræ, allii recentis frequens usus. Motus corporis creber etiam summe proficius est, quatenus renes inde commoti a materie stagnante liberantur, verum si urina sangvineâ posthac observetur, vel dolor renum notabilis, calculus ibidem hærens & irritans indicatur, motum non tolerans.

2. Molesta symptomata e calculo magno non evacuando citata juxta variam indolem tractanda sunt; si dolor tolerabilis sit, quies tamen corporis & abstinentia exacta ab omnibus diure-

ticis stimulo quodam præditi requiruntur, ne commotus calculus dolorem graviolem, inflammationem aliaque mala producat; si inflammationis indicia sub hoc statu sese exferant, venæsectio & emulsiões camphoratae in usum trahantur, si diuresis sanguinea exfurgat, mixtura acida ad cochlearia duo omni hora vel bihorio exhibita quadrat, aqua frigida pro potu & forsan venæsectio, si urina purulenta observetur, eadem mixtura convenit, vel essentia corticis peruviana uncia cum tincturæ antiscorbuticæ drachma ad guttas sexaginta ter indies, licet in hoc casu nullum remedium sufficiat.

Varia sic dicta lithontriptica etiam commendata sunt ad calculum dissolvendum, uti sapo venetus larga dosi sensim ad unciam ter per diem sumtus, aqua calcis pro usu interno ad mensuram integram per diem, remedium Steffenianum e testis ovorum calcinatis paratum, a drachma dimidia ad integram ter die sumtum, etiam ante plures annos aliud provulgatum sc. salis tartarigrana quindecim aquæ, unciis tribus mixta & ter die sumta, & mox postea ingestæ spiritus vitrioli guttæ quindecim eadem copia aquæ dilutæ; verum hæc & alia lithontriptico titulo ornata attributam laudem non servarunt & sine dubio nunquam meruerunt; rationi enim minime convenit, vim ullius medicamenti ad solvendos calculos sufficien-

tem per integram humorum massam ad renes propagari posse.

Species II^{da}.

LITHIASIS CYSTICA

Est dolorifica affectio vèsicae urinariae e calculo ibidem hærente ortum trahens.

Symptomata :

1. Urinae fluxus depravatus, quandoque guttatim exstillans, vel ad unum alterumve latus profiliens.

2. Urinae indoles quandoque depravata sc. muco multo mixta, & interdum præsertim post motum validiorem sanguinea; interdum copia insignis; (vid. diar. 1787. Maj. 4.) evacuatio calculi vel calculosæ materiei.

3. Molestæ sensatio vesicæ ut plurimum stranguriosa s. ad mingendum debito frequentius cogens, quandoque gravativa in regione perinei, quandoque adjunctus tenesmus, etiam pruritus singularis in glande penis communis est.

Causa proxima hujus morbi est calculus in vesica urinaria contentus & retentus, qui mole & figura aspera urethram obturare, vesicam irritare itaque diuresin alienatam, impeditam, variosque allatos dolores producere valet.

Causæ remotæ calculi vesicæ urinariae præsertim duæ sunt.

1. Quæcunqve corpora peregrina in vesica hospitantia, quibus materia calculosa in omni etiam sanissima urina præsens attrahitur, adhæret, sensimqve in majus volumen colligitur; communissimum tale calculi vesicalis stamen est calculus renalis in vesicam delatus & postea haud evacuatus; alias pus & sanguis condensata, bacillum cereum per urethram introductum in vesicam fundamenta calculorum præbere possunt.

2. Effluxus urinæ per urethram difficilis, pro parte impeditus, indeque diuturnior urinæ in vesica remora, & calculorum minorum renalium retentio, ob hanc causam mares angustiore urethra præditos præ fæminis crebrius calculo vesicæ obnoxios esse creditur; etiam observatum est, urethram morbo quodam præsertim venereo angustatam calculo vesicæ ansam præbuisse.

Diagnostica signa calculi vesicæ sunt:

1. Symptomata supra allata, quæ etiam si haud certa calculi indicia, tamen illum suspectum reddunt & ut exploratione chirurgica inquiratur & detegatur malum, occasionem exhibent.

2. Causæ prægressæ, præsertim calculus renalis in vesicam translatus nec postea evacuatus.

3. Exploratio chirurgica partim catheteris ope, qui per urethram in vesicam introductus calculum ibidem hærentem offendit; combinatur

etiam exploratio per digitum in intestino recto intromissum.

Prognosis:

1. Sanabilis habendus est morbus si calculus ita constitutus sit, ut evacuari possit aut per urethram, si nimirum parvus urethræ capacitatem haud superans judicari possit, aut per operationem chirurgi.

2. Incurabile est malum si neutrum e dictis auxiliis admittat, tandemque funestam præsertim mediante inflammatione per irritationem calculi vel urinæ retentæ citata, & per gangrænam aut suppurationem vesicæ, diuturnas calamitates & consumptionem hæcticam terminata.

Curatio morbi e calculo vesicæ triplici scopo accomodanda est.

1. Contra calculum minorem, cujus expulsio per urethram possibilis judicari valet, præsertim quia nuper e renibus depositus est, in tali casu remedia diuretica supra contra calculum renalem laudata conveniunt, nec inepte æger per aliquod tempus retineat urinam, ut dein majori vi ad dilatandam urethram & expellendum calculum ageret, etiam injectio olei in urethram quatenus viam emolliens & amplificans quadrat, & præsertim desideratur, si calculus in urethra ipsa hæreat. Proficua quoque sunt semicupia tepida et infusus frequens super aquam calidam.

2. Contra calculum majorem, qui per urethram transmitti & exire nequit; huic non alia opitulatur medela quam operatio chirurgica lithotomia dicta.

3. Contra symptomata molesta. Sub dolore vehementi solamen subinde ex opio s. laudano liquido Sydenhami quaerendum est; etiam prodesse mixturam acidam exemplum e diario supracitatum docet; urina sangvineae eandem mixturam & quietem corporis desiderat; inflammatio exurgens antiphlogisticis solitis compesci debet; ulcus & suppuratio vesicae indeque summæ miseriae opii crebrum usum permittunt, imo desiderant.

Lithontriptica eadem contra calculum vesicae ac contra calculum renalem commendata sunt, ut pulvis foliorum uvæ ursi ad drachmam dimidiam ter indies; verum etiam de eorum efficacia idem valet iudicium, quod supra de calculis renalibus tulimus.

GENUS VIII^{vum.}

HYSTERALGIA

Est dolor non febrilis in regione uteri. Species illius ex differenti causa formantur.

Species I^{ma.}

HYSTERALGIA MENSTRUALIS

Est dolor ille abdominalis, lumborum, femorum tempore menstruationis sese exscrens e diffi-

cili vel impedito hoc fluxu dependens, distentioni vasorum haud debita cum facilitate sanguinem transmittentium adscribendus, sponte post aliquot dies transiens, remedia, si illis opus est, infra ad dysmenorrhæam dicenda requirens.

Species II^{da}.

HYSTERALGIA LOCHIALIS

Est dolor f. tormina periodica circa regionem uteri mox post partum sese exferentia, unumque vel alterum diem raro diutius præsertim in fæminis sæpius enixis durantia, ex uteri contractione derivanda, ejectionem sanguinis lochialis secum ducentia, sæpe nullo auxilio opus habent; si graviora videantur, emulsionem camphorata bihorio porrigere soleo.

Species III^{ta}.

HYSTERALGIA SCHIRROSA

Est dolor gravativus constans diuturnus in regione uteri.

1. Allatus dolor & hypogastrium, quandoque ingvina & lumbos afficiens.

2. Durities perceptibilis, aut per vaginam aut etiam extus per integumenta abdominis palpabilis, quandoque admodum notabilis, (vid. diar.

1788. Maj. 8, ubi uteri schirrositas enormis graviditatis speciem habebat.)

3. Excretio molesta dolorifica tam urinæ, si ita positus sit schirrus ut collum vesicæ compri-
mat, quam alvinæ, si versus intestinum rectum
spectet tumor schirrosus; (nobilissimam tractavi
matronam hoc morbo diu cruciatam & demum
necatam, tumores duri schirrofi in abdomine ma-
nifesto palpari potuerant, et per explorationem
vaginalem, præcipua & molestissima incommoda
e compressione canalıs intestinalis surgebant, vo-
mitus creber, inappetentia plenaria fluxus hæ-
morrhoidalis & summi dolores, quoties alvus ex-
oneranda erat, quamvis illa artis ope liquide aper-
ta fuerit. Novem circiter mensibus ad notabile
volumen increvit tumor absque ullo conjuncto va-
ginali fluxu, febris demum hectica cum tussi &
aphtis, forsau a suppuratione demum aggressa mi-
ferrimam vitam cum morte optata commutabant.
Sectio cadaveris haud permıssa fuit.)

4. Doloris incrementum in acutum lanci-
nantem, pungentem intolerabilem, per intervalla
affligentem, qui schirri mutationem in cancerum
indicat.

5. Fluxus vaginalis sub hoc statu adjunc-
tus, partim albus acris, excorians, foetidus, par-
tim sanguineus sæpe & irregulariter accedens,
quandoque valde largus.

Causæ remotæ hujus mali sunt animi gravia pathemata, moeror protractus, libidinosum vitæ genus, apud meretrices mihi frequentius hic morbus occurrit, & ætas ultra tempus menstruationis; rarò ante hunc terminum sese exferit.

Causa proxima est tumor vel rectius plures tumores schirrofi in utero surgentes & lapsu temporis carcinomatofam suppurationem concipientes (vid. diar. 1782. Sptbr. 4.)

Diagnostica signa sunt allata symptomata sc. dolor uterinus, fluxus vaginalis et tumores duri exploratione detecti.

Prognosis immedicabile declarat malum diu durans quandoque perplures annos, summe calamitosum & demum mediante consumptione hectica vel rarius menorrhagia funestum.

Curatio proinde mere palliativa f. symptomatica est; dolor enormis opiata desiderat, sangvifluxus & febris mixturam acidam.

Species IV^{ta}.

HYSTERALGIA e LAXITATE

Est dolor f. dolores illis ad partum similes, per intervalla recurrentes, præsertim & forsan unice ab exoneratione alvi, illamque comitante nisu depresorio citati; haud inique laxitati latiorum ligamentorum adscribendi, ideoque alvi fa-

cilem reddendo fluxum, quæ simul ligamentis occasio sese contrahendi præbetur, (vid. diar. 1787, April 7.)

Species V^{ta}.

HYSTERALGIA AB UTERI PROLAPSU

Est dolor lumborum inguinum & regionis uteri productus ex utero in vaginam prolabente; facile dignoscitur ipsius ægrotæ sensu vel exploratione vaginali, e laxitate partium merito derivatur, ideoque roborantibus variis topicis juvabitur, uti sacculis adstringentibus aromaticis, e speciebus resolventibus in vino & aceto calidis infusis & vulvæ applicitis, vaporibus aromaticis uti e speciebus pro suffitu igni inspersis, ita ut vapor inde proveniens versus uterum ascendat; quies simul, & decubitus corporis horizontalis desideratur, ut ligamenta distensionem haud exposita ansam sese contrahendi habeant; his non juvantibus pessarium in vagina applicetur; uterus prorsus prolapsus, & inversus, sæpe nullam medelam admittit.

G E N U S IX ^{hum.}

PROCTALGIA

Est dolor intestini recti in fine illius, partibusque vicinis.

Oriri potest e variis causis, quibus medela conformanda est, uti:

1. Ex inflammatione præsertim in hæmorrhoidariis; hujus signum est dolor insignis constans, medela sit antiphlogistica per venæsectionem repetitam hirudines, nitrum & camphoram; extus inungatur unguentum camphoratum album, si abscessus & fistula oriantur, res ad chirurgum pertinet.

2. E schirrofa & cancrofa constitutione intestini recti cum dolore chronico lancinante, pungente, & effluxu acris humoris, (unicum hujus mali mihi occurrit exemplum hectica febre demum funestum); opiata intus & unguenta e cerussa parata uti unguentum camphoratum album extus pro levamine inservire possunt, uti quoque mucilaginis feminis cydoniorum uncia cum drachmis duabus laudani liquidi.

3. Ex ani prolapsu apud infantes vel pueros præsertim locum habens, diligenti lotione per vinum rubrum frigidum vel decoctum corticis querci juvari solet.

4. E diarrhoea quandoque oboriens sponte transit vel lotione aquæ frigidæ; idem auxilium

contra dolorem podicis ex intertrigine f. motu nimio præsertim eqvitatione ortum adhiberi debet; etiam proctalgiam ex osssepiscis in intestino recto hærente, per explorationem detecto & ablato observavi.

CLASSIS III^{ia}.

NEUROSES.

Sunt morbi, & læsiones functionum, quæ ex hominum arbitraria f. voluntaria facultate dependent.

Divisio hujus clasfis juxta aberrationis differentem modum in tres ordines fieri debet sc.

1. In adynamias f. debilitates functiones voluntarias peragendi.
2. Spasmos f. excessus motuum voluntati subditorum.
3. Paronoias f. læsiones actuum ad animam immediate pertinentium.

ORDO I^{mus}.

ADYNAMIAE

Sunt morbi, quorum præcipuum symptoma est impotentia functiones f. motus voluntarios perficiendi.

VERTIGO

Est impotentia minoris, vel majoris gradus corpus erectum sustentandi juncta cum timore lapsus, & ut plurimum apparente motu objectorum externorum, revera quiescentium.

Symptomata :

1. Impotentia allata & sensatio ejusdem, in majori gradu tremorem corporis & verum lapsum secum ducens, in quo casu vertigo caduca dicitur.

2. Error visus quoad objecta externa, quæ licet quiescentia moveri tamen apparent, aut in gyrum, aut sursum & deorsum, quandoque simplex objectum videtur duplex, vel alterius coloris quam veri.

3. Auditus quandoque in graviore malo per fusurrus, tinnitus, bombi sonum turbatus.

4. Nausea, vomitus quandoque majorem vertiginis gradum comitantes.

Causa proxima videtur esse motus tremulus encephali, præcipuum & primum effectum exferens in maxime sensibilibus nervis opticis & retina, in majori gradu etiam reliquos nervos afficiens.

Causæ remotæ differentes sunt, indeque variæ species vertiginis exfurgunt.

Species I^{ura}.

VERTIGO PLETHORICA

Est vertigo e plenitudine s. abundantia sanguinis derivanda.

Dignoscitur e diæta lauta, facie rubra, pulsu pleno sæpius tardiore, gravitate corporis, exacerbatione calefacientibus, mitigatione e frigido regimine, & quandoque retentione soliti cujusdam sanguifluxus menstrualis vel hæmorrhoidalis, venæsectionisqve assvetæ.

Exitus illius per se in apoplexiam possibilis est, arte verò convenienti in sanitatem determinandus.

Curatio peragenda est 1. sanguinis copiam minuendo per missionem ejusdem variam sc. phlebotomiam, hirudines temporales, cucurbitas cruentas nuchæ & inter scapulas ponendas, victuqve parciori non nimium nutriente, potissimum ideo e vegetabilibus depromendo 2. sanguinis æstum & rarefactionem debellando & impediendo per remedia refrigerantia, uti cremorem tartari, mixturam acidam, nec non per abstinentiam a calefacientibus, spirituosis, vino, aromaticis, aëre calido, motu corporis violento animiqve pathematibus 3. sanguinem ad alias corporis partes derivando, ejusdemqve in illis circulum liberum promovendo; huic scopo conveniunt situs corporis erec-

tus, calor extremitatum inferiorum pediluviiis, tegumentis efficiendus; maxime autem juvat alvi fluxus ad modicam laxitatem eccoproticis productus; (Fratrem hac vertigine gravi, pertinaci supra allatis auxiliis non prorsus cedente afflictum, tandem plenario restituit aqua Seidschitzensis omni fere mane ad libram vel minorem dosin hausta, indeque alvus modice laxata); cujus aquæ locum subire potest salis anglicani unciae duæ in aquæ fontanæ mensura solutæ. Huc quoque pertinet capitis modica vel nulla obductio, ejusdemque capillis denudati frequens imo quotidianum per aquam frigidam lavacrum. Medela prophylactica similis sit allatæ curativæ sc. per venæsectionem quater circiter quotannis repetendam, lavacrum capitis frigidum & reliqua; quo notabilior fuit vertiginosus talis insultus, eo magis necessaria & exacta prophylaxis desideratur.

Species II^{da}.

VERTIGO NERVOSA

Est vertigo per intervalla recurrens debilitati vel mobilitati nimie encephali, & nervorum tribuenda.

Causæ antecedentes sunt, intensiores animi labores, & studia, veneris usus immodicus, & onanismus, atque hysseria.

Dignoscitur causis allatis, absentia signorum vertiginis plethoricæ, exacerbatione per evacuantia quæcunque, potius quam levamine.

Eventus haud periculosus timendus est, literatos novi per plures annos illa molestatos; incremente ætate sponte mitescit, imo cessat hoc incommodum.

Curatio vel mitigatio mali promovenda est
1. per roborantia interna & externa topica uti corticem peruvianum, radicem gei urbani per intervalla, quando & quamdiu ægroti inde bene se habere videntur, fumenda, radix valerianæ sylvestris, aut sola aut supra allatis mixta etiam commendatur, pulveres hi ad drachmam dimidiam bis terve per diem ingeri possunt, maxime verò proficuae aquæ pyrmontanæ tempore æstivo sumtæ reperiuntur; hisce jungendum est lavaerum capitis frigidum quotidianum, quinimo balneum frigidum superinfusum (*Styrte-Bad*) cujus præcipuum emolumentum proprio exemplo illustrissimus apud nos medicus attestatur; 2. per abstinentiam a causis hujus mali supra memoratis, nec non ab aliis debilitantibus, nitrosis, potu relaxanti, evacuationibus notabilioribus sanguineis, alvinis, imo per vesicatoria productis.

Species III^{ta}.

VERTIGO STOMACHICA

Est vertigo s. vertiginosus capitis status productus & cognoscendus ex adjunctis impuritatibus biliosis ventriculi & earundem effectibus, ut nausea, sapore amaro, lingua mucosa, anorexia; cremor tartari, emeticum in hoc casu propinanda sunt & juvant; ipse nondum medicus hoc incommodo sat diu afflictus sero lactis per cremorem tartari parato sanabar, quod forsan ocyus perfectum esset, si emeticum sumsissem.

Species IV^{ta}.

VERTIGO EX ACRIMONIIS

Est vertigo ex acri quadam materia aliunde a corporis partibus ad nervos capitis transposita, uti ex ulceribus consolidatis (vid. diar. 1784. Aug. 7. 1785. Jul. 6,) vel sudore pedum solito suppresso, (vid. diar. 1784. Jul. 9.) Dignoscitur hoc malum e prægressis, & juvabitur derivantibus præsertim illis, quæ antecedentem acrimoniæ evacuationem restituunt, vel aliam illi similem substituant, uti fonticulis. Maxime hinc speciei analogæ est vertigo arthritica quamvis etiam ad symptomaticas referenda, methodo de arthritide anomala memorata tractanda.

Species V^{ta}.

VERTIGO SYMPTOMATICA

Est vertigo, quod tanquam merum symptoma aliis morbis competit, ideoque medela illis convenienti sananda, uti vertigo febrilis biliofas, putridas & exanthematicas febres concomitans; vertigo febricosa f. intermittentis vices supplens; vertigo febrisequa admodum crebro post putridas febres remanens; vertigo epileptica paroxysmos convulsivos, epilepticos præcedens vel subsequens, vertigo lethargica vel hydrocephalica extravasationem feri in cerebro pro causa habens (vid. diar. 1784. Jul. 10.)

GENUS II^{dum}.

LIPOTHYMIA

Est dejectio vel abolitio virium animalium & vitalium subitanea.

Symptomata & signa;

1. Animalis vis & sese & alia objecta extra se percipiendi vel quam maxime obscuratur, vel prorsus cessat; vis motrix arbitraria prorsus perditur, ita ut stantes ad terram prosteruantur & quamdiu morbus durat, sese nec moveant, nec movere queant.

2. Vitales actiones respiratio, & arteriarum pulsatio vel maxime debilitantur, vel prorsus cessare videntur, hinc pallescunt ægroti imo frigescent, qvæli statu actionum vitalium lipothymia ab apoplexia discernenda est.

Causa proxima lipothymiaë alia esse neqvit, quam impeditus influxus vis vitalis f. fluidi nervei in partes corporis; quandoqve mens ipsa, dum sc. ex illius pathematibus morbus oritur, in culpa esse videtur, alias causæ physicæ ratione haud explicanda fluidi vitalis motum alterant, & pro tempore sistunt.

Gradus hujus affectionis diversus est, indeqve duplex species ejusdem distingvenda.

Species Ima.

S Y N C O P E

Est lipothymia cum superstitute aliquali ictu pulsuum & respiratione brevi intra aliquot minuta transiens.

Causæ antecedentes esse possunt:

1. Animi pathemata violenta, indignatio, terror; antipathia, uti contra felem, mures, ca-seum; qvo pertinet dolor enormis.

2. Venæsectio vario modo lipothymiaë causa evadit, interdum instans & facienda, sine dubio mediante illius metu, quandoqve ob sangvinis nimiam & subito detractam copiam, quandoqve

finito sanguinis fluxu, & obturata vena oritur hæc affectio, forsan alterationi cordis per renovatum ad illud fluxum sanguinis antea e vena profilientis adscribenda.

3. Affectiones ventriculi & primarum viarum ob ingestorum & contentorum nimiam molem, pravam indolem, vermes, flatus in quo casu cardialgia lipotymiae præcursor est.

4. Debilitatio notabilis vel subitanea aut per evacuationes largas sanguineas vel alias uti vomitum, diarrhæam, salivationem, quo referri potest evacuatio feri hydropici per paracentesin, partus acceleratus, aut per morbos varios virium iacturam acuto, vel lento modo secum ducentes, imprimis febres putridas graviores, & magnum scorbuti gradum, sphacelum.

5. Mobilitas nervorum, uti in epilepticis hysteris, quibus admodum frequens symptoma est lipothymia; quo pertinet syncope febricosa s. febribus intermittentibus annexa vel earum locum subiens.

6. Vapores maligni putridi, mephitici, carbonum; (horum fumus nobilissimam matronam instanti morte minabatur, sponte vomitus salutaris superveniebat, dein acetum vini intus & extus largiter applicitum periculum avertebat.) Huc pertinent axhalationes mineralium.

Prognosis. Syncope per se transitorius est affectus periculo carens; quatenus ab aliis morbis

dependet, eventus juxta horum indolem dijudicandus est.

Curatio syncopes duplex:

1. Symptomatica contra ipsum insultum adhibenda, quæ stimulans sit, uti spiritus salis ammoniaci vel acetum forte naribus apposita, vel in hystericeis gummi assæ foetidæ; inspersio vel effusio aquæ frigidæ in facie, frictio per pannum laneum rarius, aër præterea liber frigidiusculus utpote in pulmones maximum vim exferens, nec non decubitus horizontalis, sub quo pondus sanguinis venosi versus cor majus esse videtur, conveniunt: etiam mediante pluma nares titillati possunt; lipothymia hysterica, quæ in convulsiones sæpius transire solet, sponte cessat et stimulantibus non tractanda est, quippequæ insequentibus convulsiones graviores reddunt; ad se parum redeuntibus ægrotis & deglutitione restituta, vinum, liquor anodynus mineralis, imo acetum vini ingeri possunt.

2. Radicalis, quæ tantum modo locum habet si syncope effectus sit alterius morbosæ affectionis, cui prophylactica syncopes medela adaptanda est.

S p e c i e s II^{da}.

A S P H Y X I A

Est lipothymia subitanea mortis veræ imaginem, ceu nulla vitæ signa secum ferens. Ca-

lor, pulsus, respiratio cessant, perque tempus notabile uti plurimum horarum imo diutius non redeunt.

Causæ efficientes & antecedentes:

1. Quædam earum, unde syncopen oriri dictum est, uti animi pathemata & hysteria.

2. Exhalationes fortes, mephitici, e musto recenti fermentescenti orientes; nec non e tumulis diu clausis provenientes; asphyxiæ tali uti syncope medicandam est.

3. Aliæ, violentæ causæ dicendæ, nimirum demersio in aquis, indeque nuper facta vitæ cessatio, hæc enim ad horam protracta vix mutatur; nec non congelatio; frictio & calor modicus corpori applicanda præcipuam in his casibus medicationem efficient; pro demersis mihi maxime proficuum videtur auxilium a vulgo receptum corpus scilicet super orcam rotando, quæ ratione et motus diaphragmatis citatur et aqua ex trachea evacuatur. Neonatis asphycticis convenit balneatio in aqua calida, inflatio aeris per os compressis naribus, agitatio costarum, frictio valida, ictus fortes natum, stimulatio plantarum pedum ope penicilli et narium per fortiora odora; si facies illis rubet sanguis ex umbilico ad unciam vel unciam dimidiam prius mittendus est.

In universum subitaneo tali modo morientes biduo triduove saltem servari debent, donec putrescere incipiant.

Huc referre licet duos similes morbos vel morboſa ſymptomata raro occurrentia ſc. catalepfim, quæ dicitur ſuppreſſio ſenſuum & motuum arbitrariorum cum pulſu & reſpiratione obſcuris, flexibilitate artuum, eorumque pronitate ad ſitum aliena vi impreſſum retinendum; atque exiſtaſim in eo a catalepfim discrepantem, quod ſitus membrum impreſſus non retineatur, ſed poſitura corporis aggrediente inſultu præſens permaneat eadem: ex animi pathemate, hyſteria, quandoque in morbis acutis hi affectus exſurgere obſervati ſunt brevi durantes & ſponte tranſeuntes.

G E N U S III^{tinui.}

A P O P L E X I A

Eſt plena abolitio ſenſuum, motusque arbitrii, ſalvo motu vitali, cum adjuncto ſtertore ſ. reſpiratione ſtertoroſa.

Symptomata apoplexiæ ſtriſte talis:

1. Privatio omnis ſenſus externi & interni, adeo ut æger nec fui ipſius conſcius ſit, nec res extra ſe agentes percipiat.

2. Ceſſatio omnis motus arbitrii, ita ut talis æger immobilis jaceat.

3. Plena talis abolitio, non ſomno ſimilis, cauſis excitantibus vincendo. Hæc in apoplecticum ſtatum nullam efficaciam exerunt.

4. Vitalium functionum status illæsus, vel rectius incrementum saltem quoad respirationem; quæ vehementia majori peragitur & cum stertore; pulsus variam conditionem habet.

Levior quoque datur apoplexiæ gradus, a nonnullis parapoplexia dictus, ubi conscientia sui ipsius non omnino perditur, nec respiratio stertorosa adest, sed vel notabilis vertigo vel cephalalgia cum insequenti debilitate cujusdam facultatum animalium sc. motus vel sensus.

Causæ antecedentes :

1. Internæ prædisponentes.

a) Ætas increfscens versus sexagesimum circiter annum, non rarò tamen termino hoc juniorem apoplexiam observavi.

b) Corporis certa structura, magnum caput, breve collum, corpus obesum, quibus causis nimia copia & vi ad caput propellitur sanguis.

c) Plenitudo humorum, aut & præsertim sanguinis boni, aut pravi ferofi, cacochymici.

d) Animi labores & pathemata ingrata, crebra, violenta, quibus etiam sanguis ad caput trahitur, & vasa sensim distenduntur & debilitantur.

2. Externæ occasionales.

a) Abusus potus spirituosus, aut vera hinc oriri potest apoplexia, aut spuria, etiam apoplexia temulenta dicta, status sc. apoplexiæ genuinæ simillimus, e prægressa copia ingesti spiritus, &

ejusdem post somnum sufficientem evanescencia cognoscendus.

b) *Æstus solaris* s. solis radii æstivi præsertim ad caput directi, quò etiam referri potest alius similis calor in cubiculis e congregatione multorum hominum, aut altero modo productus.

c) *Oppletio nimia ventriculi*, indeque vasorum abdominalium compressio & nimius sanguinis ad caput affluxus.

d) *Pectoris morbi*, tussis molesta, dyspnoea imprimis in senibus aliisque ad apoplexiam dispositis utpote illa causa descensus sanguinis e capite impeditur & difficilis redditur (vid. diar. 1782. Jul. 6.)

e) *Acrimonie variæ ad cerebrum conversæ* uti arthritica (vid. diar. 1786. April. 14.) metastatica (vid. diar. 1782. Januar. 1. 1783. Februar. 1. & Jul. 1. 1785. Maj. 7. & Junii 11.) necnon e miliaribus albis (vid. diar. 1783. Decbr. 15.) urina suppressa huc computatur & aliæ acrimonie (vid. diar. 1786. Febr. 14.)

f) *Animi pathemata violenta præsertim ira & terror*; quo forsitan hystericus morbus referri potest.

g) *Læsiones capitis violentæ, contusiones & fracturæ.*

Causa proxima apoplexiæ est impedita illa encephali actio, quæ ad functiones animales perficiendas requiritur. Hujus impedimenti causa

efficiens in multis casibus est manifestum in cada-
veribus detegendum extravasatum, quo substantia
cerebri comprimitur itaque transfluxus liquidi vi-
talis intercipitur, (vid. multa exempla ad indicem
diarii circa titulum apoplexiæ relata, ubi serum,
sanguis, pus apud cerebrum eorum, qui apoplexia
defuncti fuerunt, inventa sunt.) Verum etiam
absque tali ut ita dicam, mechanico vitio apo-
plexia induci potest, testantibus & extispiciis, qui-
bus cerebrum absque læsione visibili repertum est
(vid. diar. 1785. Mart. 9. & April. 9.) & multis
apoplexiæ sanatæ exemplis. Duplex præter me-
chanicam cogitari potest causa sc. congestio tran-
sitoria humorum ad encephalum tanta vi agens,
ut pro tempore compressio circulum fluidi vitalis
impediens oriatur, vel etiam spasmodica enceph-
ali contractio eundem effectum produciens, quæ
merito statuenda est, quando neutra aliarum cau-
sarum præsto est, quinimo inopia humorum.

Diagnostica apoplexiæ signa ad triplex genus
referre prodest.

1. Prænuntia, unde huic morbum timere
fas est.

a) Causæ prædisponentes supra allatæ.

b) Vertigo crebra, vel cephalalgia gravati-
va cum susurru & tinnitu aurium.

c) Somnolentia insolita, præsertim in obe-
sis & cum oblivione s. memoria debilitata.

d) Infolita debilitas functionum animalium uti stupor, torpor, tremor unius, vel alterius membri, loquela difficilior, oris ad alterutrum latus retractio.

e) Concurfus plurium dictorum signorum.

2. Indicativa f. præsentem morbum denotantia funt fympptomata apoplexiæ fupra allata; a lipothymia dignofcitur per actiones vitales non debilitatas, ut & refpirationem ftertorofam, qua ultima a morbis comatofis infra memorandis facile diftingvitur.

3. Signa caufarum externarum fupradictarum, quarum cognitio, ad curationem illis conformandam utilis, rita antecedentium exploratione acqvirenda eft.

Prognofis. Eventus apoplexiæ triplex poffibilis eft.

1. In fanitatem, qui tamen rariffimus eft, in junioribus, bona alias conftitutione corporis gaudentibus, & fi paroxyfmus levior cito tranfiens fit, faltem haud ultra diem duret, expectandus; e febre intermittente fuperveniente bonum obfervavi effectum, qui etiam ex evacuationibus fpontaneis fudore largo, diarrhoea, fanguifluviis fperari poteft.

2. In mortem vel cito vel lentiore modo evenientem, prioris metum faciunt, a) gradus morbi notabilis cum refpiratione valde profunda difficili, oreque fpumefcente, b) diuturnitas paroxyfmi,

quandoque quidem citissime intra quadrantem horæ interficit, interdum transit in soporem lethargicum qui intra quartum saltem diem per renovatum apoplexiæ insultum morte terminatur, c) morbi varii prægressi uti epilepsia, lethargus, febris putrida. (Exempla apoplexiæ cito funestæ vid. diaria. 1783. Octbr. 9. 1784. Mart. 9. & Sptbr. 14. atque 1786. Februar. 5.) Tardius funestam apoplexiæ terminationem expectare licet, si finito paroxysmo æger quodammodo ad se redeat. attamen stupidus & soporosus permaneat, tunc aliquod cerebrale vitium post nonnullas hebdomades raro diuturnius tempus letiferum timere fas est (vid. diar. 1782. Mart. 9. & Jul. 4. 1783. Octbr. 10. & 1784. August 13.)

3. In paralyfin, quæ finito paroxysmo apoplectico sæpissime observatur, ut plurimum artus unius lateris occupans, hemiplegia dicta, quandoque faciem ejusdem lateris cum retractione oris in latere opposito, quandoque instrumenta vocis afficiens & vim loquendi plenariò vel pro parte suppressens, oculi alterutrius coecitas & memoriæ debilitas etiam tanquam apoplexiæ reliquiae observantur. Paralytici tales affectus intra nonnullas hebdomades sponte vel arte quandoque evanescent, diutius autem protractæ perennes evadunt, memoria restitutionis maxime est capax, dein loquela; artus, imprimis brachium difficillime motricem vim recipiunt.

4. In recidivam valde pronus est apoplecticus morbus.

Curatio apoplexiæ triplicem partem continet f. ipsius paroxysmi, prophylaxin & curationem effectuum.

Paroxysmus f. insultus ipse apoplexiæ debellandus est remediis sangvinis & humorum copiam in capite diminuentibus sc.

1. Sangvinis missionibus sc. venæsectione juxta ægroti constitutionem magis vel minus plethoricam accommodanda, in priori casu larga & repetita phlebotomia requiritur, in posteriore unica & modica quandoque sufficit, hirudinibus ad tempora applicandis, etiam arteriotomia temporalis in casu pertinaci, allatis non mitigato olim commendata fuit, vix tamen laudanda quia venæsectione minus tuta et commoda, hanc vero efficacior.

2. Alvi purgatione sat valida, utpote quæ humores deorsum trahuntur & medicaminis vi irritanti atque laxanti, & quia ablata contentorum mole ad liberiores circulum vasa disponuntur, hoc scopo, si deglutitio impedita sit, enemata sale multo acuata conveniunt; alias per os ingerenda est aqua laxativa cum adjuncta nitri quarta circiter parte in plethoricis, vel alio sale neutro, vel mixtura camphorata laxativa vel solutio salis angelicani imo marini, si alia non ad manum sunt, un-

de aochlearia duo majora bihorio fumuntur & ad effectum sat largum repetuntur.

3. Regimine temperante, frigido, aer sit liber, ingesta acidula subfrigida, vegetabilis indolis; si alvus sponte fluens allata purgantia haud desideret, pulvis refrigerans bihorio exhibeatur ad cochleare minus apud plethoricos solus, in aliis cum mosci granis quatuor ad unciam maritatus, calefacientia omnia tam alimenta quam medicamenta vitanda sunt.

4. Derivantibus aliis, quo referri possunt situs corporis, quantum potis est erectus; capitis denudatio imo per aquam frigidam lavatio, ablatio omnium collum, pectus, abdomen comprimentium, indeque ad caput sanguinem dirigentium, sinapismi cruribus vel plantis pedum appositi, vel eorum loco vesicatoria attamen haud in sanguine plenis ægrotis f. ut dicunt apoplexia sanguinea, in aliis autem præsertim arthritide antea afflictis aptissima censenda.

5. Emeticis, quæ autem non ad paroxysmum apoplecticum pertinent, ni certi simus, ingluviem morbo ansam præbuisse, tunc præmissis evacuationibus sanguineis admitti possunt; alias devicto garoxysmo apoplectico contra superstites paralyfes emeticum quandoque convenit.

Curatio prophylactica apoplexiæ, qua reversio illius impedienda est ad causas supra allatas debellandas & avertendas tendere debet, atque ap-

plicari tam apud eos, qui ob prægressam apoplexiam quam apud alios, qui ob signa prænuntia ad hunc morbum dispositi judicari possunt.

1. Incitantia omnia tanquam hujus morbi occasiones vitanda sunt, uti animi fortiora pathemata & labores, potus spirituosus imprimis largioris, et ante meridiem sumti, potus caffè, calor externus notabilioris gradus, ut & excercitationes corporis nimium æstum producentes.

2. Sangvinis plenitudo præcavenda & tempestive diminuenda est; victus ideo modicus sit magis e vegetabilibus quam carneis depromendus, venæsectio apud plethoricos s. ad plethoram pronos exceptis illis, quos natura ipsa per fluxum hæmorrhoidalem evacuat, quater quotannis repetatur vel sæpius, quoties signa apoplexiæ prænuntia sese exferunt, aut sangvinis insolita agitatio animadvertitur, dum cremorem tartari bis terve per diem ingerere etiam prodest.

3. Plenitudo serosa in personis pallidis sub-tumida timenda desiderat intermissa laxantia, diuretica, uti infusum vinosum amarum, theam amarum, cremorem tartari; modica & crebra corporis exercitatio, ejusdemque frictio etiam conveniunt.

4. Congessio sangviuis & humorum versus caput avertenda; ideo pedes semper calidi fervari debent, caput autem & collum frigidiora quoniam per lavationem ex aqua frigida quotidie instituentiam, huc pertinet liber alvi fluxus, eccoproticis,

uti solutione falis anglicani vel cremore tartari cum rheo, quoties opus est, promovendus.

5. Arthritidis, si hæc modo anomalo apoplexiæ occasionem præbuerit, renovata ad caput conversio præpedienda, hoc scopo liquor uervinus bis terve indies cum admixto pulvere refrigerante in sanguine plenis per aliquod tempus adhiberi debet, porro balneatio capitis frigida, suppnratio protracta in artubus per cantharides aut corticem mezerei promovenda, quinimo fonticuli.

Curatio affectuum apoplexiæ s. affectionis paralyticæ hunc morbum subsequens infra ad tractatum de paralyfi memoranda venit.

G E N U S IV^{tum.}

P A R A L Y S I S

Est defectus vis vitalis vel sensitivæ vel motivæ, vel utriusque in certa quadam corporis parte; in priore casu incompleta & in posteriore completa audit.

Differentia nomina huic morbo juxta partem affectam imposita sunt sc.

1. Hemiplegia s. paralyfis artuum unius lateris.

2. Paraplegia s. paralyfis artuum corporis inferiorum utplurimum ischuriam sibi junctam habens.

3. Aponia, impotentia loqvendi morboſa vel completa, ita ut nulla verba æger pronunciare valeat, vel incompleta, dum vel tantum nonnullas vel diſtinctu difficiles voces edere poteſt; huc referri poteſt certum loqvendi vitium, ſub quo verba ideis non reſpondentia ſ. alia, qvam vult, æger profert.

4. Amauroſis ſ. coecitas abſque ullo apparenti vitio oculi.

5. Cophoſis ſ. plenaria audiendi impotentia.

6. Anæſteſia ſ. privatio ſenſus tactus (vid. diar. 1785. Jun. 8.)

Cauſæ antecedentes paralyſeos poſſibiles.

1. Cerebri ipſius læſio partialis, unde certi ſurgentes nervi vi ſua orbat & ad functiones incapaces redduntur; mediante tali vitio cerebrali communes apoplexiæ effectus & ſeqvelæ ſunt paralyſes variæ, imprimis hemiplegiæ, rarius aponia & amauroſis; ſectionibus demonſtratur, vitium cerebrale unius lateris paralyſin corporis in latere oppoſito inducere (vid. diar. 1783. Octobr. 10. 1782. April. 6. Jul. 4. & 1784. Auguſt 13.) Aponia febri putridæ adjuncta vel ſuccedens etiam debilitati ipſius cerebri imputanda eſt.

2. Medullæ ſpinalis læſiones variæ vel ob vertebrarum adjacentium vitium, luxationem, rupturam, cariem, quibus medulla vicina comprimitur aut alio modo afficitur, vel ob tumores, humoresque effuſos in theca vertebrarum inde-

que compresionem medullæ; paraplexia ex hac causa ut plurimum nascitur, utpote nervi extremitatum inferiorum e læsa medulla unde proveniunt, vis vitalis participes fieri nequeunt (vid. diar. 1783. Junii 7. & 1784. April. 6. Etiam paraplexiam absque apparenti vitio medullæ exhibent diaria 1783. Mart. 10. & 1785. Sptbr. 11. e congestione sanguinea eandem ortam fuisse probabile reddit exemplum diar. 1785. Jun. 5.)

3. Nervorum læsio varia in decursu eorundem ad partes illis subordinatas locum habens; uti compresio ex adjacentibus tumoribus, vel vasis sangviferis nimium repleis, (Smuckert quandoque post exercitia valida militaria surgentem observavit transitoriam coecitatem, quam sangvini in arteriis ophthalmicis rarefacto haud inique attribuit); dissectio, ita paralyfin incurabilem digitorum observavi post incisionem abscessus cujusdam brachialis; crispatura, ut ita dicam, seu strictus quidam nervorum habitus acri & irritanti quadam materia forsan inductus; huic causæ paralyfin colicæ nervosæ seqvelam (vid. diar. 1782. Mart. 4. 1785. Januar. 7. & Jul. 12.) nec non arthritidi succedentem (vid. diar. 1782. April. 5.) atque illam, quæ e vaporibus metallicis arsenicalibus, mercurialibus & plumbeis oriri observatum est, adscribere oportet; etiam paralyfes post febres putridas observatæ vel oculorum (vid. diar. 1784. Mart. 1. & 1786. Octbr. 1.) aut alterius membri

(vid. diar. 1786. April 1.) materiæ morbosæ ad nervos depositæ tribuendæ sunt; nonne simili nervorum læsioni s. distentioni incusanda est paralygia post partum laboriosum orta (vid. diar. 1785. Decbr. 5.) et aphonia in morbo hysterico.

4. Arteriarum notabilium læsio etiam inter causas paralyseos affertur saltem post aneurismatis brachialis curam subligatione peractam, aliqualis status paralyticus manus exsurgit, sensim circulatione per vasa collateralia substituta & adaucta quodammodo evanescens.

5. An cutis singularis affectio & laxitas anæsthesiæ causa?

Causa proxima paralyseos meritò habetur impeditus transfluxus nervei fluidi ad corporis certas partes, sive hoc impedimentum in origine sive in decursu nervorum locum habeat; præsertim nerveos tubulos compressos, constrictos, destructos, itaque ad transmittendum fluidum non idoneos cogitare licet; an etiam fluidum ipsum tanquam spissum inerte functioni ineptum fieri queat?

Diagnostica signa paralyseos & in universum & specialia facile e definitionibus supra memoratis depromuntur.

Prognosis:

1. Sanitas sperari potest, si læsionem incurabilem cerebri vel nervorum haud suspicandi occasio sit; in paralyfi post colicas spasmodicas su-

perſtite, (vid. hujus exempla ſupra citata); in junioribus hemiplegia quandoque curationis capax (vid. diar. 1782. Mart. 3. O&br. 5. & 1786. Januar. 3. & Mart. 6.); plura obſervavi exempla paralyſeos ſanata (vid. diar. 1783. Januar. 2. Septbr. Debr. 5. & 1785. Febr. 4.) Dolor varius, tenſivus, formicatorius boni ominis & redeuntis vis vitalis indicium exhibet, in univerſum diuturnum tempus ad ſanationem perficiendam requiritur modo ſemel vidi ſpontaneam et ſubitam paraplegiæ ſanationem poſt acceſſum epilepticum haud recidivantem; (ſudoris benignum effectum vid. diar. 1784. Jul. 8.)

2. Immedicabile cenſendum eſt malum, jam diu protractum, juncta habens indicia læſionis irreparabilis cerebri, medullæ, vel nervorum, in ſenioribus, quinimo in junioribus hemiplegia non raro perennis fit (vid. 1786. Jul. 8.) Amauroſis, ni citò tranſeat, vix unquam curabilis fit.

Curatio paralyſeos remediis, quæ emolliendo vaſa pervia reddunt, & irritando vim vitalem alliciunt, promovenda eſt; qualia ſunt.

1. Interna; mihi in uſu ſunt aut liqvor nervinus ad guttas triginta ter indies aut eſſentia ſlibii Huxhami cum æquali parte ſpiritus lavendulæ compoſiti ad guttas ſexaginta ter indies, ſimulque infuſum florum arnicæ; in hemiplecticis alvi quotidiana ſubductio per eccoproſtica uti cremorem tartari cum dimidia rhei parte mane & vespere porrectum mihi admodum utilis apparuit. Amau-

rosis post febrem orta ope essentiae colyeinthidis primum ad guttas octo sensim ad octodecim aucta dosi bihorio porrectae sanata est.

2. Externa:

a) Balneum vaporis, cui iunctae sunt species aromaticae, uti nostrae ad balneum vaporis; quodque ter circiter septimana in usum trahitur, in paralyfi absque encephali praegressa affectione maxime convenit & prodest; etiam in hemiplecticis adhiberi potest, rita habita attentione ad ejusdem effectum in caput, cujus molestiae si exsurgant, a balneo cavendum est, uti quoque, si paralyfis sit verae apoplexiae sequela. (Singularis unius oculi affectio cum amblyopia juncta, qua illi semper figura numeri octo apparuit, ceteris frustra tentatis, sanata fuit cuculla e gossypio parato et continuo capiti imposito, quo notabilis ejus transpiratio promota est.)

b) Balneum stillatitium s. instillantis aquae frigidae, cujus praecipuum emolumentum ad debilitatem juncturarum manuum pedumve tollendam observavi. Hoc scopo etiam immersio membri afflicti inter viscera animalis nuper mactati convenit.

c) Spiritus fortes affectis partibus inungendi, frictio frequens mediante panno aspero, urticatio s. verberatio partium per urticas, cujus notabilem percepi utilitatem, uti in exemplo anaesthetiae supra allato; electrificatio, quae in paralyfi ex colica ner-

vosa commendanda, sed in illa post apoplexiam orta ut omnia alia topica frustra adhibetur. (Aphonia hysterica biennis, post omnia incassum tentata, ope moxæ, in utroque latere colli prope laryngem inusta cum diuturna insequente suppuratione, lente quidem sed prorsus sanata fuit.)

d) Motus diligens partium affectarum, quantum fieri potest.

GENUS V^{tum.}

COMA

Est somnus modum vel gradum naturalem excedens.

Differentiæ ejusdem imprimis ratione gradus varia imponi solent nomina sc.

1. Carus, etiam apoplexia minor vocatus, ubi symptomata apoplexiæ adsunt excepto stertore.

2. Lethargus, somnus continuus facile excitabilis oblivionem junctam habens.

3. Cataphora, somnus naturali profundior, tamen excitabilis.

4. Typhomania, somnus apparens junctus cum deliratione, hoc merum & crebrum symptoma est febris putridæ s. malignæ.

Causæ antecedentes comatis.

1. Plenitudo humorum vel boni sanguinis vel pravi, uti feri hydropici, materiæ arthriticæ

vel exanthematicæ retrogressæ, aut urinæ retentæ conversio & actio in encephalum, obesitas notabilis sangvinem versus internas partes & cerebrum urgens.

2. Extravasationes variæ juxta cerebrum post mortem detectæ, uti puris, sanguinis, ferosæ materiæ (vid. diar. 1785. Octbr. 5.)

3. Abusus medicaminum s. rerum somnum inducentium, qualia sunt opiata spirituosæ & similia.

Causa proxima quoad indolem eadem sed gradu minor quam in apoplexia sc. quodammodo impeditus transitus fluidi vitalis ab encephalo in nervos ob illius compressionem.

Diagnosıs comatis tam generalis quam specialis e porrectis supra definitionibus abunde patet, verum etiam causas exploratione antecedentium detegere oportet, utpote illis judicium de eventu & medela superstruendum est.

Prognosis secundum causas comatis ferenda est; si vitium cerebri irreparabile suspicari licet, mors ocyus vel serius & quidem mediante apoplexia expectari potest, e reliquis causis exortum malum sanationem præsertim e tempestiva arte admittit.

Curatio etiam causas morbi respiciat:

1. Plethora si in culpa sit, suisque detegatur signis, sanguinis missiones & reliqua medicatio apoplexiæ conveniens requiruntur.

2. Serosi humores vel certæ acrimonie morbosæ causam efficientes evacuantibus & derivantibus debellari & auferri debent, uti purgantibus, diureticis, vesicatoriis diu suppurantibus, fetaceo in nucha applicito, atque foniculis. Obesitas nimia per diætam extenuantem, restrictam minuenda est.

3. Si somnifera medicamenta vel venena morbum induxerint, emeticum quo citius eo melius exhiberi debet, & dein acetum vini largiter hauriendum, solum vel potui immixtum. Contra effectum opii noxium decoctum coffeæ commendatur. In plethoricis venæsectio convenit.

GENUS VI^{tum}:

ASTHMA

Est chronica respirandi difficultas s. morbus chronicus, cujus præcipuum symptoma est respiratio difficilis.

Symptomata hujus morbi possibilia sunt:

1. Respirationis ipsius difficultas ad varium gradum, vel modica tantum sese sub motu corporis exferens, vel major etiam quiescente corpore præsens, & loquelam retardans, vel maxima ad situm erectum & antrosum incurvatum cogens,

decubitus non tolerans, & desiderium frigidi, liberique aëris secum ducens, qualis gradus orthopnoea dicitur; vel demum intermittens sc. certos periodos habens, & per intervalla longiora filens, cui a nonnullis asthmatis nomen sensu proprio tribuitur.

2. Incommoda alia pectoris sæpe concomitantia, uti anxietas, palpitatio cordis, fibrillatio, tussis humida, aut sicca.

3. In reliquo corpore imprimis sub graviore morbo languor, debilitas, fudor frigidus, pulsus irregularis.

Causa proxima asthmatis in genere haud alia cogitari nec ab infra memorandis causis remotis deduci potest, quam impedita s. difficilis aeris & sanguinis per pulmones circulatio, indeque nata vasorum & nervorum distensio hisce partibus convenienti modo dolorifica, nempe oppressione anxiam & naturæ conatum illi congruum sc. pectus dilatandi inducens. Corporis motus asthmatici cuicunque intolerabilis, illud inducens vel augens, allatam causam mihi probare videtur, utpote accelerato motu sanguis eo magis in pulmonibus accumulatur & vasa distendit.

Diagnosim & definitionem asthmatis & descriptionem symptomatum facile depromitur.

Prognosis juxta specialem indolem & causam asthmatis mox memorandam tantummodo formari potest.

Curatio eidem ac prognosis regulæ accomodanda est; attamen in univcrsum valet utilitas venæsectionis saltem levatoria, quatenus enim copia sanguinis minuitur, etiam distensio vasorum pulmonalium dolorifica, asthmatis proxima causa, decrefcit.

Divisio asthmatis præsertim ratione differentis causæ sequentes species complectitur.

Species I^{ma}.

ASTHMA PULMONALE

Est chronica & continua respirandi difficultas e vitio substantiæ pulmonum inhærente producta.

Origo illius varia pulmonum læsio esse potest, uti tubercula, v. obstructio in minimis (vid. diar. 1784. Jul. 11.), steatomata, vomicæ, concretiones notabiles pulmonum cum partibus vicinis (vid. diar. 1782. Jul. 7.)

Diagnosîs tuberculi e compræfente tabe, vomicæ ex adjuncta vel prægressâ inflammatione pectoris, suspecta redduntur, steatoma & concretiones vix propriis signis gaudent.

Prognosis vix ullam sanationem promittit; de tuberculoso asthmate infra circa phthisin agendum est, de vomicis in tractatu pneumoniæ dictum est, reliqua haud sanabilia aut subitanæam

aut lento modo mediante hydrothorace mortem inducunt.

Species II^{da}.

ASTHMA PECTORALE

Est constans respirandi difficultas e vitiis variis in pectore tamen extra pulmonum substantiam locum habentibus.

Causæ hujus variæ sc. extravasati humores ferrosi, qualis morbus hydrothorax dictus infra in tractatu de hydrope memoratur; extravasatum pus sub nomine empyematis supra circa pneumoniam descripti; extravasatus sanguis, unde proveniens asthma cito accedit & lethale fit (vid. diar. 1783. Maj. 5. & 1786. August 14.) Cordis ipsius vitia, uti laxitas nimia & magnitudo (vid. diar. 1786. Mart. 10. April 13. Jul. 11.) vel ossificatio (vid. 1785. Jul. 15.) vel polypus (vid. diar. 1783. Sptbr. 12. & 1785. Novbr. 6.) vel aneurisma aut ipsius cordis aut arteriæ majoris adjacentis, talia vitia vix nisi post mortem & sectione cadaverum eognoscenda & discernenda sunt, & licet suspecta haberentur nullius curationis capacia sunt.

Species III^{tia}.

ASTHMA ABDOMINALE

Est respirandi chronica difficultas e vitiis viscerum abdominalium ortum trahens.

Causa hujus communissima est infarctus & enormitas hepatis, cujus pondere & mole tam diaphragmatis actio impeditur, quam adjacens pulmo comprimitur (vid. diar. 1786. Mart. 10. & April 12. & 13. 1784. Novbr. 2.); expansio flatulenta intestinorum & ventriculi dyspepsiæ non rarum symptoma etiam temporariam dyspnœam inducere valet, ubi ex infuso corticis chinæ cum vino maderensi bonum effectum observavi, & demum collectio abdominis hydropica. Hæc asthmatis species proinde mere symptomatica ex alia principali affectione quoad indolem innotescens, & illius medelam requirens.

S p e c i e s IV^{ta}.

ASTHMA HUMORALE

Est chronica respirandi difficultas e vitio sanguinis f. humorum universali ortum trahens.

Triplex humorum constitutio in culpa esse potest.

1. Acrimonia eorundem varia forsan spasmodicam constrictionem producendo asthma creans, uti materia rheumatica (vid. diar. 1786. Septbr. 4.) arthritica (vid. diar. 1782. August 3.), retrogressa cutanea (vid. diar. 1782. Februar. 3.)

2. Spissitudo, ob quam humores ad vasa pulmonalia permeanda minus apti sunt, uti scorbutica fere semper dyspnœam secum ducens, &

alia, chlorotica dicta, apud puellas pallidas male vel haud menstruatæ imprimis obveniens.

3. Plenitudo f. plethora, unde vasa pulmonalia haud focus ac reliqui corporis moleste expanduntur, mediante hac abundantia retentus fluxus menstruus vel hæmorrhoidalis causa asthmatis quandoque evadit; etiam hæc asthmatis species merum est symptoma alterius concomitantis morbi, cujus signis cognoscenda, cujusque medela juvanda est.

Species V^{ta}.

ASTHMA CONVULSIVUM s. NERVOSUM

Est chronica respirandi difficultas periodice recurrens f. per aliquot horas affligens vel brevius, iterumque cessans.

Symptomata:

1. Subita invasio paroxyfmi.
2. Sensatio pectoris constringens molesta & anxietas quandoque enormis, adeo ut malum hoc fere magis ipsa morte timeant ægroti.
3. Respiratio sibilans difficilis ut plurimum ad situm erectum cogens cum summo desiderio aeris liberi frigidioris & difficultate loquendi.
4. Tussis ut plurimum adjuncta valde frequens cum sputo aquoso in genere parum sanguineo; semel tantum hunc morbum absque tussi observavi.

5. Accidentalialia paroxysmum concomitantia esse possunt dolor brachiorum, (in viro quodam dolor talis a vola manus dextræ per integrum brachium se extendit); urina sub ipso paroxysmo multa pallida, post illum sedimentum deponens; pulsus quandoque naturalis, quandoque incitatus; frigus crurum, langvor, sudor frigidus etiam adesse possunt.

6. Duratio paroxysmi varia rarò intra horam finita, sæpius ad tres vel plures horas extensa.

7. Reversio mali spontanea ad plures vices imprimis tempore vespertino vel nocturno atque demum illius cessatio plenaria per aliquod haud definiendum tempus, remanente tamen illius dispositione, e variis causis occasionalibus facile ad actum perducta.

8. Dyspnoea modica continua apud plurimos extra paroxysmos remanet; mihi unica tantum exceptio nota est in ægro juniore.

Causæ remotæ:

1. Occasionales s. irritamenta, quibus enormis & difficilis respirandi actus excitatur, sunt.

a) Vitia hepatis, quod diaphragmati adhærens etiam influxum in illius actionem exserere potest (vid. diar. 1782. Sptbr. 3. & 1784. Novbr. 2.)

b) Materia arthritica s. podagrica, (septuagenarium novi antea podagricum, hoc morbo demum afflictum, nec aliam morbi occasionem detegere potui, quam materiam arthriticam ad pectus

conversam); huc referri potest materia catarrhalis vel rheumatica, quæ eundem effectum sub dispositione insigni procreare valet.

c) Aer frigidus imprimis sub motu corporis citatiore; (virum novi, qui prima vice ex hac causa in asthma periodicum incidit.)

d) Expansio ventriculi s. ingestis nimis s. flatulentia producta, unde etiam adjacentia diaphragma & pulmones insolito modo affici possunt.

e) Animi pathemata vehementiora ingrata, quorum efficaciam aliquoties observavi.

f) Concurfus plurium dictarum occasionum.

2. Disponens, quæ non potest non esse nimia nervorum diaphragmati & pulmonibus pertinentium mobilitas & sensibilitas, vi cujus allatæ causæ occasionales, in plurimis aliis casibus absque tali effectu præsentem, spasmum pectoris irritamentum præbent.

Causa proxima asthmatis convulsivi haud immerito habetur spasmus s. irregularis actio partium respirationem efficientium vel diaphragmatis, vel fibrarum muscularium in vasis trachealibus, e quibus, constrictis & indebita ratione agentibus, circulatio pulmonalis impedita declarari potest, temporaria hujus mali duratio spasmum talem pro causa etiam indicare videtur.

Diagnosim asthmatis convulsivi facilis e symptomatibus pectoris supra descriptis, & eorundem transitoria indole desumitur.

Prognosis:

1. Junioribus & extra paroxysmos quodammodo sanis minus periculofus censendus est hic morbus, potius nimiae nervorum sensibilitati quam vitio notabili viscerum adscribendus, inter hos dantur exempla curata & quæ licet non curata tamen per plures annos vitam protraxerunt.

2. In proVectiore ætate aggreDiens morbus, dyspnoea continua notabili inter paroxysmos continuante, podagra solita emanente, damnosior haberi debet; possibilis licet raro observatus est interitus sub ipso paroxysmo; etiam in phthisin transitus sit, sæpius tamen in hydropem tam pectoris quam reliqui corporis funestum. Fluxus hæmorrhoidalis superveniens admodum salutaris censendus est ad morbum vel prorsus sanandum vel saltem levandum et per plures annos tolerabilem reddendum.

Curatio asthmatis convulsivi ad duplicem partem commodissime referri potest sc. symptomaticam & prophylacticam.

Symptomatica curatio sub paroxysmis ipsis præsentibus vel instantibus adhibenda est, requirens.

1. Venæsectionem imprimis indicatam sub incipiente malo, paroxysmo graviori & in plethoricis, a nimis repetita plebotomia cavendum est utpote & non utili & ad hydropem disponente.

2. Antispasmodica, quæ causæ proximæ huius morbi, spasmo jure putandæ, potissimum convenire videntur, et quidem sub ipsis paroxysmis; hoc scopo naphtha vitrioli, liquor nervinus, liquor cornu cervi fuccinatus, oleum cajeput, flores zinci ad grana duo vel tria præsertim vespere ad præcavendum paroxysmum solitum nocturnum, elysma ex asafœtida, inprimis autem, hisce nil juvantibus, opium levamen afferunt; optimum vero effectum e mosci orientalis granis duobus cum sacharo bihorio vel omni hora prorectis observavi; ni sputum sanguinis paroxysmos comitetur, kermis mineralis granum pulveri moscato appositam apprime quadrat; imo e kermis pulvere solo utilem effectum observavi; alterando actionem nervorum s. illis motum spasmo pectorali oppositum inducendo antispasmodicam virtutem in hoc casu kermes minerale exferere videtur; hæc medicamina ad dosin minorem aliquot diebus post paroxysmum sublata cautionis ergo quoque quadrant. Cum æger paroxysmum instare sentit, situs erectus extra lectum mox eligendus est, ut ille avertatur vel levetur.

3. Emetica, quæ sæpe mirabilem opem non modò ad levandum sed etiam ad extirpandum morbum præstant; paroxysmi ipsius tempore non quadrant, sed tempore ab illo libero, uti mane quando paroxysmus vespera vel nocte insequenti timetur; forsan æqua virtute hoc respectu gau-

dent tartarus emeticus & ipecacuanna, hæc tamen mihi præsertim in usu est; quandoque bis terve facta emetici repetitio sufficit, quandoque crebrior opus est; (easum maxime memorabilem præbuit sexagenarius asthmatico morbo per dimidium annum maximi gradus afflictus, nulla nocte in lecto decumbere aut dormire valens, tandemque post varia frustra tentata per ipecacuannæ grana quindecim omni fere mane sumta, donec uncia integra consumta esset, sanatus, subsequente tamen podagra prorsus regulari, qua nunquam antea laboraverat. Alio octogenario simili modo afflicto levandi non juvandi spe laudanum liquidum, omni vespere et mane pilulas scilliticas præscripsi, somnus mox rediit, sed ex pilulis vomitus citabatur quotidie revertens et post octo circiter dies morbus plane cessavit.)

4. Vesicatorium amplum antico pectori vel inter scapulas appositum et pro necessitate repetendum vel diu suppurans; imprimis, quando acrimoniæ cuidam ad pectus conversæ morbus imputari potest, proficuum habendum (vid. diar. 1783. Jul. 6. & 1786. Jul. 5.)

Prophylactica asthmatis convulsivi medicatio ad causas illius imprimis occasionales tollendas & avertendas spectare debet.

1. Morbosus corporis status, qui ut ansa morbi suspecta est, convenienti medela dabellabitur; infarctus hepatis resolventia desiderat (vid.

diar. 1784. Novbr. 2.; semel tale asthma ex ascaridibus productum per pillulas ex assa foetida paratas sanavi.) Arthritis retrogressa derivantia in artubus. ut vesicatoria diu suppurantia; corticem mezerei eorum loco in brachiis applicitum bis saltem valde proficuum inveni, fonticuli autem potius eligendi sunt. Præterea extra paroxysmos comendandæ sunt pilulæ resolventes cum quarta parte gummi asæfoetidæ ad grana quindecim vel plura mane et vespere sumtæ et spiritus lavendularum compositus cum spiritu salis amoniaci vinosi vel essentia digitalis purpureæ aliquoties interdum. Vidi quoque asthma spasmodicum infuso quassiaë bis die sumto sanatum. Maximum emolumentum observavi e tinctura nostra antasthmatica ad guttas sexaginta ter per diem cum pilulis supra allatis vespere.

2. Diætæ varia ratio, quæ teste experientia hunc affectum revocare valet, sc. copiosus cibus, vel talis, qui stomacho flatulentiam citò inducit, potus multus, tepidus, relaxans, animi ingrata & vehementia pathemata, corporis notabilis motus, imprimis contra ventum & in aere frigidior, vitari debent; alvi debitus fluxus etiam procurandus est, ne oppletio intestinalis eodem modo ac flatulentia diaphragma irritet & paroxysmo an-
sam præbeat.

ORDO II^{us}

SPASMI

Sunt violenti involuntarii motus & contractiones partium corporis muscularium.

Divisio hujus ordinis quinque genera complectitur sc. Tetanum, Convulsionem, Epilepsiam, Hysteriam, Tussim.

GENUS I^{um}

TETANUS

Est valida involuntaria perdurans contractio musculorum cum rigiditate & immobilitate partium affectarum.

Diversa nomina huic morbo pro diversa illius sede tribui solent, sic trismus appellatur, qui maxillas constringit, rigidas & immobiles reddit, emprostotonus, si corpus antrorsum, & opisthotonus si retrorsum flexum sit, tetanus verò stricte talis si omnia membra afficiantur, sub diversis his gradibus & modificationibus tamen eadem est morbi essentia.

Symptomata tetani:

1. Contractio ipsa musculorum, raro subitanea & universalis, ut plurimum gradatim procedens, sensimque sese extendens sc.

a) Initium faciunt percepta & increfcens rigiditas nuchæ moleſta, atqve crebro recurrens cardiæ dolor ad dorſum tranſiens.

b) Sub altero gradu cum allatis jungitur contractio mufculorum ad maxillas pertinentium ſenſim tanta reddita, ut oris aperturam ne minimam quidem permittat, tunc mufculi dorſales ſimul contrahuntur & rigefcunt, ita ut æger corpus antrorſum flectere, erigere vel erectum tenere haud valeat.

c) Sub maximo gradu artuum mufculi etiam contracti & rigidi omni voluntario motui obſtant, mufculi abdominales itidem conſtringuntur; terminatio tunc, ſi letalis ſit morbus, ſub convulſionibus univerſalibus perficitur.

d) Quandoque trismus ſolus adest ſine aliis tetani ſymptomatibus, præſertim in neonatis et graviter vulneratis.

2. Concomitantia:

a) Dolor moleſtus partium affectarum.

b) Exacerbatio frequens contractionis & doloris non raro incipiens a renovato dolore cardiæ brevi durans & ſubſequentem nonnullam remiſſionem habens.

c) Alvi & urinæ difficilis vel impeditus fluxus.

d) Reliquæ functiones fere illæſæ appetitus naturalis, mens ſana, pulſus ſat bonus, ſub exa-

cerbationibus tantummodo irregularis, sanguis missus bonæ indolis.

Causæ antecedentes teste experientia esse possunt:

1. Læsiō nervorum per vulnerationem; quandoque adhuc aperto vulnere, quandoque illo fere vel prorsus consolidato infurgit morbus; in primo casu disruptio incompleta nervi adesse videtur, reliquæ illius fibrillæ igitur debito minus cohærent, unde sub tensione earundem major & insignis irritatio derivari potest, in altero casu forsan coalitio nervi cum partibus vicinis insolitæ tensioni ansam præbens statui potest.

2. Refrigerium & forsan per illud generata acris quædam materies, quæ ad nervos deposita irritationem morbificam producit, qualis causa in regionibus calidis multo magis quam in nostris sese efficacem monstrat, (exemplum diar. 1787. Jun. 9. tali origini tamen adscribendum est; ex retropulsa scabie ortum tetanum exhibet diar. 1785. Jun. n. 6.)

Causa proxima, s. modus, quo irritatio nervi limitata tam violentam & universalem actionem totius systematis efficit, possibilis quidem ob consensum jam satis cognitum perspicitur, verum ulterius explicari nequit.

Diagnosī e symptomatibus sat facile depromitur; ad initium mox attendendum est, ut eo citius tam gravi morbo medicina opponi queat.

Prognosis:

1. Per se absque remediis tetanus letalis est; quo vehementius aggreditur & intra quartum diem, eo majus habet periculum & vice versa, damnosior itidem habetur e læsione mechanica ortus quam per refrigerium productus.

2. Sanabilis quandoque, per artem nuperiore tempore inventam, redditus est morbus, lenteque decrescendo cessat.

Curatio efficienda est:

1. Opio, quod præcipuum in hoc casu sistit auxilium, magna talibus ægrotis singulari modo innocua atque tolerabili dosi, illaque sensim augenda porrigendo, ex. gr. initio granum extracti opii bihorio propinatur, post duos dies grana duo, deinceps grana tria tamdiu continuata, donec morbus, evanescat quo facto prophylaxeos ergo minor dosis per aliquot dies exhiberi debet; effectus opii augetur, si alternatim cum uno alterove ejus grano decem salis tartari grana omni hora ingerantur; si initio morbi deglutitio forsan simul impedita fuerit, clysmatis forma extractum opii ad grana quatuor vel plura in parco vehiculo solutum applicandum est.

2. Emollientibus; commendantur sc. balnea tepida, nec non lintheamina aqua calida imbuta & artubus crebro applicita; motus autem ægroti & refrigerium inde facile oriens efficit irritationem, qualis minima in nostro morbo nocet.

verum clysmata oleosa quotidie, si opus est, injicienda & innocua & utilia deprehendi.

3. Abſtinentia ab omnibus irritanti vi præditis, uti veſicatoriis, ſalinis, ſpirirituoſis, aromaticis; pro alimento optime quadrant blandiſſima, juſcula carnea, e cerealibus parata & piſces; venæſectio etiam damnosa declaratur, ſaltem nullum ex ea emolumentum obſervavi.

4. Diſſectio vel per cauterium facta plenaria ſolutione nervi irritati, e cujus vulnere morbus derivari poteſt.

Etiam contra hunc morbum laudatur unguentum mercuriale, larga ſc., ut ſalivatio cito oriri queat, doſi applicandum, & dein repetendum atque continuandum, donec morbus evaneſcat; cujus methodi efficaciam haud ipſe expertus fui. (Opio autem curatæ exemplum vid. diar. 1787. Junii 9., alterum lethale 1785. Junii 6.)

GENUS II^{dum.}

CONVULSIO

Eſt motus involuntarius, violenter agitans, unius vel plurium partium, ſalva in ægroto conſcientiâ ſui ipſius.

Differentia ratione modi, quo ſeſe hic morbus exſerit.

1. Convulsio communis, per quam membra sine certo ordine involuntariò agitantur.

2. Chorea Sti. Viti f. convulsio sese exferens in uno, imprimis sinistro corporis latere & quidem maxime, dum motum quendam voluntariam æger intendit, sub gressu hinc inordinatus saltui similis motus adest, unde sine dubio denominatio morbi facta est (vid. diar. 1783. Octbr. 5.)

3. Convulsio universalis et vere mirabilis, sub qua omnes corporis partes, quarum motus intenditur, irregulari & violento modo agitantur (vid. diar. 1787. Junii 10.) Pluries illam observavi, semel ex eadem causa eademque sanatam medela accusus in diariis allatus, alia vice ex celata scabie, qua erumpente evanuit.

Causæ antecedentes esse possunt:

1. Læsiones cerebri & nervorum per causas violentas externas, vulnera, contusiones quo referri potest distentio partium genitalium in primiparis.

2. Acrimoniae variae nervos irritantes uti variolosa, unde apud infantes non rarò convulsivi motus instante eruptione producuntur; retropulsa efflorescentia cutanea variae indolis scabiosa, herpetica, tineosa, imo arthritica (vid. diar. 1783. Octbr. 5. 1784. Octbr. 3 & 1786. Februar. 3.) ad quas causas irritantes etiam vermes referri possunt (vid. diar. 1783. Junii. 5.) & retenta menstrua (vid. diar. 1785. Jan. 5.)

3. Evacuationes notabiles, sangvineæ præfertim, vel aliæ.

4. Sensibilitas enormis systematis nervosi uti imprimis in morbo sic dicto hysterico, ob quam quæcunque irritamenta sive mentalia, sive physica convulsiones provocare valent.

Causa proxima convulsionis haud melius quam tetani causa explicari potest.

Diagnos e definitionibus exhibitis facile habetur, verum etiam causæ hujus morbi explorandæ sunt, utpote juxta illas morbus dijudicandus & tractandus est.

Prognosis:

1. Per se considerata convulsio vix ullum periculum involvit s. effectum vitæ nocuum non producit.

2. Qvoad causas præsertim dijudicandus eventus varius esse potest, benignus ut plurimum expectandus, ni cerebrum ipsum irreparabili modo læsum sit.

Curationis partes sunt:

1. Nervorum dispositionem s. mobilitatem nimiam, quæ fere semper ad morbum convulsivum efficiendum concurrit, debellare remediis sic dictis antispasmodicis; moscus maxime laudandus est; grana illius quatuor cum uncia pulveris refrigerantis mixta ad cochleare minus bihorio levioribus convulsionibus opponere soleo, in perti-

naciori morbo pulverem radicis valerianæ fylvestris ad dimidiam partem allato pulveri jungo; liquor nervinus vel antispasticus, cum vel sine essentia assæfoetidæ, quandoque profunt ad guttas 30 vel 40 bihorio circiter porrigendi; interdum oleum animale Dippelii ad guttas sex bis indies reliquis præstantius est; clyisma ex asafoetida non omittendum est; convulsionibus parturientium opitata opponunt obfetricantes. (Chorea St. Viti aliis frustra tentatis purgantibus, uti cremore tartari et pulvere radicis jalappæ ter indies porrectis sanata est. In alia morbus pertinax aliis remediis non cedens, floribus zinci ad grana tria ter per diem tollebatur).

2. Causas occasionales s. irritamenta supra allata tollere per remedia illis congrua; si vermes in causa sint, vermifuga, si acrimoniæ retropulsæ, balnea, vesicatoria, sulphurea in usum trahantur & combinentur cum ipsis laudatis antispasmodicis, (vid. diar. supra citata & 1785. Novbr. 4.), universalis convulsio, multis aliis frustra tentatis per decoctum corticis peruviani cum liquore nervino atque balneo frigido sanabatur.

Hujus morbi species est *raphania* seu convulsio cerealis annis, quibus messis humida fuit, occurrens, farinæ humidæ imputanda, sese exferens per crebrum sensum formicatorium in digitis extremitatum propagatum ad truncum et tunc sæpe convulsiones inducentem, quandoque junc-

tum cum delirio, molesta cardiæ oppreffione et interdum diarrhoea funefta, quandoque paroxysmus epilepticus vitam finit; cura perficitur depuratione primarum viarum fc. emetico, quo citius, eo melius porrecto et dein rhabarbaro cum fale juncto.

G E N U S III^{tium}.

E P I L E P S I A

Est motus artuum violentus involuntarius cum ignorantia fui ipsius f. abolitione sensuum internorum & externorum junctus.

Differentia epilepsiæ triplex statui potest:

1. Epilepsia genuina, quæ consistit in paroxysmis allato modo convulsivis, brevi durantibus, incerto tempore recurrentibus, quæque utrique sexui æque communis est, & apud personas extra paroxysmos optime valentes locum habet.

2. Epilepsia hysterica, quæ personis hysteriam passis & patientibus adeoque feminis proprie competit.

3. Epilepsia infantilis f. ecclampsia, quæ infantibus supervenit, quandoque breviter durans quandoque ad plures dies protracta.

Symptomata epilepsiæ:

1. Modus invasionis vel subitaneus absque notis prænunciis, qualis in epilepsia genuina po-

tiffimum adest, vel lentior cum signis instantis mali uti gravativo & vertiginoso capitis flatu, somno profundiore vel insomniis terrificis conjunctis, anxietate, cardialgia, palpitatione cordis, oscitatione frequenti; datur etiam epilepsia initium habens a singulari sensatione formicatoria vel frigore membri cujusdam, quæ venti instar, ideoque aura epileptica dicta, e membris ad caput propagatur & tunc epilepsiam ipsam producit.

2. Sensationis omnis privatio, ita ut maximi stimuli, cauteria ipsa sub paroxysmis epilepsiæ haud percipiantur.

3. Motus partium violenti involuntarii, omnis generis possibiles, communissimi sunt artuum motus, lingua sæpius extenditur & mordetur, oculi celerrime moventur; urina, alvus, imo semen excernuntur involuntariò; quandoque motus hi limitati sunt; novi virum, qui in circulum currebat, donec in terram procideret; alii recta via procurrunt, vel perversa loquuntur; clamores etiam, voces animalium referentes non rarò epilepsiæ paroxysmos comitantur; sufficit ad essentiam epilepsiæ, motus tales insciis ægrotis fieri; alia regula illis haud definita est.

4. Duratio paroxysmi epileptici diversa; genuina communiter brevior; hysterica epilepsia diuturniores accessus habere potest, quandoque plurium horarum, eclampsia etiam per plures dies protrahi valet.

5. Reliquiæ post paroxysmum finitum sunt langvor, stupor, imo somnus apoplecticus, quandoque aberratio nonnulla mentis, sponte transeuntia.

Causæ antecedentes s. principia epilepsiæ sunt:

1. Dispositiones, nimirum hæreditarias, ætas infantilis & puerilis, sexus sequior, passio hysterica, morbus ipse prægressus.

2. Occasiones s. irritamenta in cerebrum ipsum agentia, aut in nervos certarum partium, a quibus mediante sympathia motus irregularis toti systemati nervorum imprimitur, uti:

a) Animi affectus violenti, ira & terror præsertim ab aspectu alterius epileptici; novi familiarum ubi plures personæ tali modo communicativa epilepsia corripiebantur; idem in nosocomio mihi videre contigit, quapropter epileptici merito ab illo excluduntur.

b) Cerebri læsiones variæ, uti impresiones cranii; extravasationes variæ puris vel feri, indurationes substantiæ cerebrealis, excrecentiæ ossæ in superficie interna cranii.

c) Irritamenta intestinalia imprimis vermes, acrimonia acida apud infantes, nimia copia ingesti imprimis cibi, duri, rudioris; (exemplum epilepsiæ in diar. 1783. Maj. 8. hanc originem habuisse videtur.)

d) Acrimoniae, quæ e corpore eliminari solebant, retentæ & subito in massam humorum atque nervos retrogressæ & conversæ, uti efflorescentiæ cutaneæ, scabies, tinea, herpes, vel ulcera inveterata intempestive ficcata & consolidata; etiam salivatione mercuriali per frigus subito suppressa hunc surrexisse morbum observatum est.

e) Dolorosæ affectiones certarum corporis partium, uti dentitio infantum; etiam ex osculis ad nervos coalitis epilepsiam produci potest.

f) Abusus potus spirituosus, sic inebriatio frequens tandem epilepsiam progignere valet, junior ætas præsertim huic noxæ exposita est; medicus sui puellæ epilepticæ, cui morbus inductus erat a potu *Punch* dicto, anno ætatis, ni fallor, tertio largiori dosi ingesto.

Diagnosis:

1. Ipsius morbi, quæ e definitionibus & descriptione supra exhibitis facile depromitur; quandoque simulatus est morbus, quod, si suspectum sit, stimulis fortioribus imprimis ex igne, indeque surgenti ægroti sensatione certum reddi potest.

2. Causarum, præsertim irritamenti epileptici per explorationem reliqui epileptici status antecedentis & concomitantis acqvirenda est; cerebri vitium suspicari licet, si alias allatas causas detegerè haud valeamus.

Prognosis:

1. Reversio hujus morbi f. paroxysmi epileptici semel aggressi semper timenda est, & quo crebrior fuit reditus, eo major timoris causa; ut plurimum certa regressus regula non datur; quandoque spontaneus esse videtur, sæpius ex accedente quodam inter allata irritamenta provocatus; dantur exempla illius recursus regulariter periodici instar febris intermittentis (vid. diar. 1785. Junii 5. & 1783. Jul. 7.)

2. Effectus & eventus spontanei epilepsiæ; si frequentior & validior sit, mentis facultates læsæ uti oblivio, fatuitas, nec non membrorum paralytica debilitas (vid. diar. 1783. Maj. 8.); quandoque per longam vitam durare potest, in senioribus tamen rarefcens, quandoque superveniente apopente apoplexia in mortem terminatur.

3. Sanatio epileptici morbi in universum dubia censenda est, e qualicunque etiam causa ortum trahit.

4. Spes sanationis haberi potest.

a) De epilepsia infantili f. eclampsia, sæpius in adolescentem ætatem sese haud extendit, etiam epilepsia puerili tempore orta quandoque circa annum pubertatis 15tum vel 16tum sponte cessat.

b) De epilepsia hysterica quæ remediis quidem raro, sæpius sponte & lapsu temporis cessat, quod multiplex experientia me docuit.

c) De epilepsia ex animi pathemate originem habente, plures novi, qui ob terrorem ex

altero epileptico ipso hoc morbo correpti, & demum sanati fuerunt.

d) De epilepsia ex aliis causis f. irritamentis, quæ auferri possunt, uti retropulsa efflorescentia cutanea, quæ quandoque in salutem ægroti revocari potest, aut vermibus, si auxiliis congruis evacuari possint.

e) De epilepsia recentiori f. quæ brevius duravit, antequam apta medela in usum trahatur.

f) Si epileptico superveniat febris quartana, hac epilepsiam tolli jam docuit Hippocrates, taleque exemplum unicum mihi ipsi observare contigit.

5. Nulla spes sanationis adest, si morbus jam diu & per plures annos duraverit, si post ætatis annum supra notatum persistat; si malum sit hæreditarium, & si vitium aliquod cerebrale suspicari liceat.

Curatio epilepsiæ duplicem partem continet sc. curationem ipsius paroxysmi & curationem prophylacticam in hoc morbo radicalem.

Paroxysmi epileptici curatio pro scopo habet ejusdem terminationem accelerare, & effectus noxios avertere; membra, quantum potis est, in quiete tenenda sunt, corpus durum, ut cochleare argenteum inter dentes ponendum, ne lingua mordeatur; si paroxysmus fortior sit vel æger plethoricus, venæsectio ad præcavendam apoplexiam confert, quandoque asperfus aquæ frigidæ in faciem paroxysmum finit. Infans epilepsia vel

ecclampsia correptus in balneo tepido teneatur, epithema f. linteum aceto & aqua frigidis madefactum capiti diligenter imponatur, syrupus e manna vel dialthæa cujus unciae grana quatuor mosci apposita sunt, ad cochleare minus omni hora vel sæpius, si possibile sit, ingeratur, & continuante paroxysmo hirudines temporibus applicentur; cujusdam medelæ faustum effectum sæpius observavi.

Prophylactica & principalis epilepsiæ curatio ad paroxysmos epilepticos avertendos & infringendos tendere debet; qualem scopum duplici modo attingere conandum est.

1. Irritamenta f. causas epilepsiæ excitantes debellando & avertendo.

a) Animi affectus ira & terror, atque occasiones quibus citari possunt, evitanda sunt: quinimo conveniret, novos animi affectus, quibus alii paroxysmos epilepsiæ provocare soliti delentur, excitare; quali modo Boerhavius olim pueros in orphanotrophio Harlemensi sanavit minando ferri igniti applicationem.

2. Calefacientia quæcunque tanquam epilepticis noxia fugienda sunt, uti potus caffè, spirituosa, athmosphæra calida, imprimis exhalatione plurimum hominum referta, e contra frigus capitis admodum proficuum, qualicunque modo, etiam per linteum aqua frigida humectatum & capiti frequenter impositum promovendum.

3. Plenitudo sanguinis bene respicienda & tempeſtiva venæſectione minuenda eſt, attamen in epilepſia hyſterica exceptio ab hac regula locum habet; & caveatur, ne congeſtio ad caput, quæ ſpasmus eſt, pro indicio plethoræ habeatur; vidi amauroſin inſanabilem ex venæſectione ter in tali caſu inſtituta.

4. Irritamenta abdominalia auxiliis congruis debellanda ſunt; ſaburra ventriculi ſuis indicata ſignis emeticum deſiderat, (puella ultra annum convulſionibus epilepticis afflicta et pluribus remediis fruſtra tractata a diætæ errore corripiebatur vomitu enormi et diarrhoea, et ex hoc tempore morbus ceſſabat); vermes anthelmintica imprimis aſam foetidam poſtulant, acrimonia acida apud infantes magnesia vel pulvere infantum oppugnari debet.

5. Aliæ cauſæ irritantes etiam auferendæ ſunt vel effectus earundem infringendus; ſi dentitio infantum ſupponatur, ſupra allata contra ecclampſiam commendata methodus tamen ſufficit, ni forſan ſyrupum diacodii ſimul applicare placeat; ſi cauſa irritans in extremitate quadam corporis ſupponatur, e ligatura ſupra locum affectum inſtituta paroxyſmum præcaveri poſſe creditur. Ulcus artificiale, uti fonticulus vel inuſtio per moxam etiam conveniunt. (Tiſſot refert exemplum abſciſſi halucis, quia ex illo ob oſſiculum nervi adhærens provenit irritatio ad epilepſiam.)

2. Dispositionem nervorum epilepticam, quæ sc. præcipue ad epilepsiam generandum conspirat tollendo. Huic scopo propria, sed pro dolor! nimis rarò sufficientia remedia commendantur frequentia:

a) Oleum animale Dippelii ad guttas sex ante & post meridiem sumendas, diu imo per plures menses continuandum, hoc præstantius aliis remediis inveni sive solum adhibitum, sive apud feminas hystericas vel male menstruatas cum adjunctis pilulis antihystericis ad grana decem mane & vespera.

b) Radicis valerianæ sylvestris pulvis vel solus ad drachmam dimidiam ter indies, vel ut mihi sæpius in usu est compositus sc. pulveris refrigerantis uncia, radicis valerianæ uncia dimidia mosci orientalis grana quatuor ad cochleare minus trihorio vel sæpius.

3. Flores zinci a grano sensimque dosi ad grana sex adaucta ter indies porrigendi, pluries hoc remedium absque optato effectu, interdum cum aliquali successu tentavi.

4. Folia aurantiorum vel forma pulveris ad drachmam dimidiam ter indies vel forma infusi, dum sc. foliorum manipulus uncis viginti aquæ calidæ infunditur, qualis dosi per diem consumenda est, verum etiam illud, quippe nec mihi nec aliis medicis manifestam efficaciam monstravit, iterum obsoletum est. De floribus gallii

lutei quoque ante aliquot annos commendatis idem ferendum est iudicium.

5. Extractum hyoscyami, quod ad granum dimidium bis terve per diem sumtum apud infantes cum fructu porrectum vidi.

Ex salibus metallicis, uti cupro amoniacali, saccharo saturni nullum effectum observavi, sed ex hoc colicam demum funestam.

GENUS IV^{tum.}

H Y S T E R I A

Est perturbatio motum & sensationum multiformis subito mutabilis, per intervalla cessans & facile recurrens.

Symptomata in hoc morbo possibilia & ad animam & ad corpus, omnesque fere hujus partes sese extendunt sc.

1. In capite dolor praesertim limitatus ad pollicis circiter magnitudinem vertici inhaerens, clavus hystericus appellatus, alias vertigo, tinnitus aurium, obnubilatio visus vel scintillis obversantibus turbatus, odoratus sublatum vel alienatum, imo apoplexia, quam mihi ipsi ut effectum hysteriae observare haud contigit.

2. In collo faucium constriction, vel quasi obturatio per corpus peregrinum cum deglutitio-

ne impedita vel difficili; etiam salivatio sat larga jungi potest.

3. In pectore, stricture ejusdem quasi a circumligato vinculo, respiratio difficilis, suspiriosa, oscitatio frequens, palpitatio cordis, anxietas, vocis mutatio, risus coactus, tussis sicca, molestissima.

4. In ventriculo pyrosis, cardialgia, gastrodynia, nausea, vomitus, eructatio, appetitus irregularis quandoque rerum insolitarum, quandoque miro modo per longum tempus prostratus absque macie ægrotæ.

5. In regionibus hypochondriacis, potissimum lienis dolor valde frequens.

6. In canali intestinorum sæpe enormis exurgens dolor, ardor, expansio notabilis transitoria, sensatio globuli ab imo ventre versus fauces ascendentis, diarrhoea, borborygmi sonum notabilem sæpe edentes.

7. In lumbis sæpius dolor, in viis uriniferis, interdum fluxus urinæ impeditus sc. v. renalis v. vesicalis ischuria, ut plurimum urina limpida, multa.

8. Nervorum in universum & stricte dicenda læsio atque functio anomala multiplex, uti lithymia, convulsio, tremor, catalepsis, ipsa epilepsia, teneritudo singularis in partibus quibuscunque antea ob symptomata hysteriæ dolentibus superstes ac si fustibus inslictae fuissent.

9. In extremitatibus varia præternaturalis

fenfatio, formicatoria, arthritica; præfertim & sæpissime frigus crurum.

10. Animi ipsius læsiones permultæ, pathemata enormia imprimis ingrata, triflitia, ira, timor, terror, rarius gaudium, tamen etiam in excessu, lachrymatio quandoque spontanea, interdum alienatio mentis ad insaniam usque.

11. Allata symptomata vix unquam simultanea, verum alia & alia occurrunt, interdum ita disparent, ut nil mali ægra sentiat, aut qveratur.

Causæ antecedentes:

1. Dispositio f. nervorum mobilitas; nimia ad sentiendum nempe & agendum pronitas, cujus origo esse potest.

a) Teneritudo congenita & hæreditaria, pulchras in genere feminas, rubro & candido colore gaudentes, imprimis hysteriæ subjectas observavi.

b) Educatio mollis sub vita sedentaria, otiosa, & imprimis nimia parentum indulgentia, quibus occasionibus animi pathemata sibi ipsis relicta ad enormem & noxiam actionem disponuntur.

c) Nervorum variis causis inducta debilitas, uti animi protractis desideriis & moeroribus, evacuationibus nimis, sanguinis, alvinis, lactis mammarum, abortu crebro.

2. Irritamenta f. causæ excitantes uti:

a) Primarum viarum impuritates quæcun-

que, biliosæ, acidæ, verminosæ, pituitosæ, excrementitiæ.

b) Infarctus viscerum hepatis præsertim vel lienis, ut & uteri, ejusdem aut schirrositates, aut retentus menstruus fluxus.

e) Affectus animi violenti subitanei, terror, ira, indignatio; qui non minus occasionales quam prædisponentes causæ esse possunt.

d) Arthritica materia nervos ipsos jam ad hysteriam dispositos afficiens.

Causa proxima efficitur conspiratione dictarum disponentis sc. & occasionalium, unius vel plurium causarum; magis determinata explicatio nec possibilis & nequidem praxi utilis esset.

Diagnostica hysteriæ signa sunt:

1. Symptomata ejusdem propria & constantiora uti frigus pedum, urina limpida, pulsus lentus, cardialgia, constrictio gulæ f. globus faucium.

2. Origo ejusdem & facilis reversio imprimis ex animi pathematibus et vaga symptomatum indoles.

Prognosis f. judicium de morbi eventu juxta illius durationem & causas ferendum est.

1. Recentior morbus, tempestiva medicina tractatus, non raro curabilis est.

2. Inveteratus difficiliorem & vix constan-

tem fanationem admittit, & pro tempore licet filens, datis occasionibus facile recidivat.

3. E causis transitoriis si ortus sit, uti impuritate primarum viarum, animi pathematibus, spei respondere potest eventus, cujus contrarium timendum est, si causæ non tollendæ, uti viscerum schirrositates & similia in culpa sint.

Curatio hysteriæ perfici debet tollendo ejusdem causas, aut utramque & disponentem & occasionalem aut saltem alterutram, si prius non possibile sit.

Disponens hysteriæ causa s. nervorum nimia mobilitas duplici modo: sedantibus & roborantibus remediis debellari potest.

Sedantia hysteriæ remedia pertinent ad illius paroxysmos jam præsentis mitigandos vel tollendos, atque stupefacientis, emollientis & alterantis indolis esse possunt sc.

1. Opium vel ipsum vel illius præparatum Laudanum liquidum Sydenhami, præcipue utile in vomitu hysterico vel dolore tali abdominis; guttæ illius quinque in aqua menthæ omni hora vel bihorio, donec levamen producat, porrigi possunt, maxime autem convenit contra ischuriam hystericam utriusque generis, imprimis cum adjunctis quinque granis salis succini volatilis, quod propria experientia me docuit.

2. Camphora imprimis illius solutio in liquore anodyno minerali; quæ sub nomine liqvo-

ris nervini nobis in usu est, & maxime cardialgiæ & doloribus artuum hystericis convenit ad guttas triginta ter quaterve aut sæpius exhibendus.

3. Assa foetida, illius drachmæ duæ in decocto avenæ solutæ & sub forma clysmatis contra fortio rem colicam hystericæ indolis citum levamen afferunt; pilulæ inde confectæ ad grana quindecim bis terve indies sumtæ imprimis contra hysteriam cum adjunctis vermibus quadrant, essentia assæ foetidæ præsertim cum dimidia liquoris nervini juncta ad guttas quadraginta propinanda est.

4. Volatilia alia, uti liquor antispasmodicus ad guttas 50 porrectus, naphta vitrioli, oleum Cajepu, ad guttas decem exhibenda, in cardialgiis & anxia oppressione hystericarum cum emolumento in usum trahi possunt.

5. Moscus a grano uno ad quatuor bihorio vel rarius sumtus contra tussim & singultum e causa hysterica vel nervosa non modo levatoriam sed curatoriam opem affert (vid. diar. 1785 Septbr. 3. & 1786. Octobr. 9.) Moscus vel ejus loco, quandoque cum meliore effectu, castoreum magnesiæ conjunctum contra quoslibet spasmos hystericos optime convenit.

6. Extus in regione cardiæ sacculi ex herbis aromaticis confecti in vino & aceto calidis imbuti contra vomitum & cardialgiam hystericam

applicari possunt, etiam frustum panis fecalini tostum spiritu vini humectatum & pulvere nucis moscatae inspersum huic scopo quadrat. Emplastrum ex asa foetida paratum merito commendatur.

7. Semicupia & pediluvia modice calida, quatenus relaxantia, tensis per morbum hystericum nervis prodesse possunt, maxime tamen conveniunt sub impedito fluxu menstruo.

Ufus dictorum perfectius determinari nequit, mox enim aliud & aliud prodest, quod modo tentamine ipso & successiva applicatione innotescere potest.

Roborantia contra hysteriam remedia, quibus nervi fortiores, minus mobiles & sensibiles, ideoque minus ad symptomata hysteriæ concipienda apti redduntur; præsertim conveniunt & applicari debent extra paroxysmos hystericos sc.

1. Cortex peruvianus forma pulveris, infusi vinosi, uti cum vino maderensi, aut decocti, si alvus ad laxitatem prona sit, sive molesta abdominis expansio post cibos adsit, huic medicamini aptus est locus; castorei grana tria singulis dosibus roborantis talis medicaminis addita aliquoties miram opem præstiterunt.

2. Martialia diverso modo applicando, quandoque limaturæ martis grana circiter quinque drachmæ dimidiæ corticis apposita & ter indies adhibita impune & cum fructu sumuntur, aquæ

pyrmontanæ tempore æstivo in usum tractæ meliorem effectum producunt. Inter præcipua autem antihysterica habeo pilulas aperientes cum marte ad grana decem bis terve indies, utpote quæ & sedante & roborante vi pollent, imprimis si alvus strictior sit, conveniunt & multiplici experientia comprobatae sunt. Mihi notum est exemplum talis affectionis abdominalis biennis sanatum limatura martis saltem ad integram drachmam pani butyrato inspersam omni mane sumtam cum insequente fortiori corporis motu; centum tamen tales pulveres ad integram restitutionem desiderati erant.

3. Balnea frigida præsertim ex altiore loco illabentia (*Styrtebad*); in morbo pertinaci cum adjunctis motibus convulsivis hoc auxilium quadrat, & aliis frustra adhibitis juvat.

4. Diæta conveniens, corporis diligens exercitatio, alimenta roborantia, cibi solidiores, potus ex aqua frigida, cerevisia forti, vino rubro; abstinentia a relaxantibus & debilitantibus uti potu multo tepido aquoso, potu caffè, jusculis carnis saltem notabili copia ingestis, acida & pingvia etiam hystericis noxia esse solent; aer ruralis siccus, haud calidus, quoque eligendus est; somnus multus & stragula lecti mollia nimis & calefacientia vitanda sunt.

Altera pars curationis hyſteriæ ad occaſiones & irritamenta hujus morbi avertendas & tollendas tendere debet.

1. Impuritates inteſtinales, ſi ſub exploratione morbi ſuſpectæ reddantur, ante uſum alterius hyſterici remedii appropriata medela debellare oportet; ſi bilioſæ ſint, emeticum non timendum eſt, ſi alia ſaburra pituitoſa vel excrementitia, ex alvo diu ſegniore concludenda, pro cauſa affectus hyſterici ſupponatur, mihi potiffimum profuit mixtura e ſalis mirabilis Glauberi unciis duabus ſolutis in aquæ menthæ unciis octo cum adjuncta animæ rhei uncia, cujus cochlearia duo bihorio vel rarius per aliquot dies quandoque cum interpoſito liquore antiſpastico, donec ſufficiens juvamen & effectus producta ſint, exhibentur (vid. diar. 1784. Auguſt 3. præſertim 1785. Februar. 5. & 1786. Octobr. 6.); ſi vermes ſuſpicari licet, illis contraria auxilia præſcribere faſt eſt, imprimis aſſam foetidam utpote utriqve cauſæ & allatæ occaſionali & diſponenti convenientem.

2. Infarctus viſcerum & retentio fluxus menſtrui optime ſupra laudatis pilulis, non minus reſolventi quam antihyſterica vi præditis, debellantur, in caſu poſteriore balnea tepida quoque commendari merentur.

3. Animi pathemata violenta, ingrata, tanquam hyſtericis maxime damnôſa omni modo vitanda ſunt; labor utilis, continuus; proba & in-

dulgens amicitia, ratio & religio in auxilium vocentur; attamen datur violentus amor, hujus morbi causa, non nisi completionem voti tollendus.

GENUS V^{t. m.}

TUSSIS

Est violenta sonora thoracis concussio per alternativam atque solito fortiolem expirationem & inspirationem producta.

Divisio hujus morbi principio conformiter in plures species fieri debet.

Species I^{m. a.}

TUSSIS CATARRHALIS

Est tussis, quæ mox post refrigerium susceptum & in genere manifestum ægris ipsis cognitum exsurgit, vel subito plures invadit, atque ex cognita causa.

Symptomata sunt: tussis ipsa satis violenta, attamen haud adeo dolorifica, sputum initio tenuius aquosum spumescens, dein crassius, mucosum, flavescens, interdum præcedunt vel junguntur coryza, rauco.

Causæ remotæ observatæ sunt, 1. mutatio atmosphæræ imprimis calidioris in frigidam, vel

vice versa, 2. incalescentis corporis, ejusdemque partium, præsertim pedum perfrigeratio; 3. aeris constitutio vernalis vel epidemica certis annis præ aliis sæviens & morbum hunc inducens.

Causa proxima vix probabilior statui potest, quam materia acris vasis trachealibus adhærens, eademque irritando mucum copiosorem attrahens & naturæ nisum s. tussim ad noxiam materiem ejicendam provocans. Talis acrimonia & ex alata mutatione atmosphærae, qua larga trachealis perspiratio subito retinetur, & e frigore aliarum partium, ad quas pertinet perspirabile suppressum versus internas, imprimis simili officio fungentes partes convertitur, & demum e qualitate acri & irritante ipsius aeris asperam arteriam immediate tangentis & afficientis declarari & deduci potest.

Diagnosim partim e causis sc. origine a manifesto refrigerio, vel indole epidemica, partim ex indole ipsius tussis gravi mox ab initio, quo signo etiam a tussi phthifica discerni potest, utpote hæc initio admodum mitis apparet.

Prognosis

1. Prosper eventus ut plurimum sperandus est, morbigue duratio vix ultra duas tresve hebdomades sese extendens, etiamsi diuturnior in debilioribus, medelam tamen suscipit.

2. Neglecta, omiſſis sc. juvantibus, illisque opposito regimine adhibito phthisi præsertim in

personis ad hanc dispositis hæc tussis ansam præbere valet.

Curatio tussis catarrhalis potius ipsius naturæ, quam artis opus dici meretur; juxta sapientes enim conservationis regulas machinæ humanæ inditas irritamentum morbificum mucum, quo involvitur, allicit, & motum tussientem, quo ejicitur, provocat; salutaria hæc molimina promovere, & quicquid illis oppositum est, avertere, medicum oportet; ideo convenire videntur.

1. Aer modice calidus & abstinencia a contrario frigido; hoc enim spissior factus mucus evacuationi resistit, morbumque ideo saltem diuturniorem reddit, quinimo e remora excernendi peior effectus sc. irritatio inflammationi ansam datura timeri potest.

2. Potus copiosus, subcalidus, mucilaginosus, qui materiem exhibet principio mucoso, quo ad morbum debellandum natura utitur; huc pertinent decoctum avenæ admodum crebra sed parca dosi sumendum, infusum pectorale atque lac calidum cum semine anisi coctum; huic scopo etiam quadrat linctus pectoralis ordinarius, quatenus & involvens & vi scillæ modice irritante salutarem tussim quodammodo provocans, ad cochlearia duo minora sæpius per diem ingeri potest; Elixir pectorale Ph. dan. ad guttas 60 ter die vel syrupus diacodii, qui præsertim ad unciam dimidiam vespere sumtus optime contra tussim molestantem noc-

turnam convenit; in casu pertinaciori jusculum fecalinum jejuno ventriculo fumendum; in raucedine catarrhali, sine annexa febre, essentia pimpinellæ albæ, ad guttas octo cum saccharo vel syrupo althææ aliquoties de die fumta, commendari meretur.

3. Perspirationem cutaneam præsertim, si ex illa impedita morbus ortum traxerit, promovere; pediluvia modice calida, pulvis temperans camphoratus vespera vel bis indies sumtus, calor lecti tali scopo conveniunt.

4. Vires naturæ sustentare, quod in diuturniore morbo & debilibus, senescentibus, quandoque opus est. Decoctum corticis peruviani cum fenega paratum ad unciam ter, quaterve porrectum per diem votis respondere solet.

5. Attentum esse ad possibilem hujus tussis effectum, statum puto inflammatorium pectoris, quem sedulo explorare, e dolore accedente fixiore suspicari atque dignoscere, & tempestitiva medela antiphlogistica, pleuriticis congrua, tollere debemus.

Species II^{da}.

TUSSIS PITUITOSA s. HABITUALIS.

Est tussis chronica absque causa externa proveniens cum expectoratione sat larga mucosa, & valetudine alias illæsa.

Originem illi præbent senium, sub quo vasa peripheriæ forsan minori copia perspirabile emittunt, quod ideo largius ad interiora deponitur; conversio materiæ cujusdam morbosæ imprimis arthriticæ ad vasa trachealia, & forsan singularis laxitas pulmonum, affluxum debito faciliorem reddens.

Diagnosis e spontanea origine, diuturnitate, pituitosa indole & sanitate ceterum bona depromitur.

Prognosis bona esse potest quamdiu tussis hæc solito modo procedit; illa autem cessante noxia excernendi directio ad cavitates ipsas internas, indeque exfurgens hydrops timeri possunt.

Curationis triplex est regula.

1. Nullam facere medicinam, quamdiu tussis tolerabilis est cum expectoratione & euphoria solitis; relaxantia enim evacuationem enormem & debilitantem efficerent, stringentia & roborantia debitam & assuetam excretionem minuendo nocerent.

2. Expectorationem promovere, si infra modum impedita & retenta observaretur; relaxantia tunc & mucilaginosæ supra ad tussim catarrhalem commendata convenirent, porro oleosa, kermes minerale ad granum bi v. trihorio cum saccharo vel linctui pectorali admixtum, solutio ammoniacalis ad unciam simili modo ingerenda.

3. Expectorationem limitare, si nimirum enormis videretur, debilitans & hectica, caute tunc roborantia in usum trahi possunt, uti decoctum corticis peruviani simplex, vel cum fenega si sputum spissum observetur, vel cum rheo, si alvus segnior sit.

Species III^{ia}.

TUSSIS STOMACHALIS.

Dicitur illa tussis, quæ e saburra, acri, pituitosa ventriculi, per consensum tussim excitante, originem trahere creditur.

Symptomata & signa illius sint halitus malus oris, lingua alba, sensus titillationis in scrobiculo cordis, tussim præcedens & annuncians, vomitus concomitans, levatorius; ætas infantilis & puerilis huic malo tantum subiecta.

Eventus morbi sibi ipsi relictæ vires sensim depascendo lethalis fieri potest, tempestitiva autem & rita medela vix unquam damnosus.

Curatio convenientem irritamenti evacuationem præsertim desiderat & dein debilitati ventriculi roborationem, quibus scopis apta sunt.

1. Emetica, uti solutio tartari emetici, vel grana quædam radicis ipecacuannhæ quoad dosin ætati congrua, triduoque quovis repetenda, donec notabile morbi decrementum productum fuerit.

2. Laxantia, uti pulvis infantum cum rheo vel syrupus de rheo aut e manna laxativus diebus a vomitu liberis ad modicam alvi subductionem porrigendus.

3. Decoctum vel infusum corticis peruviani sub finem hujus morbi ad cochleare majus ter quaterve indies fumendum; etiam mihi proficua apparuit extracti corticis peruviani drachma soluta in aqua anisi sesqui uncia cum apposita liquoris anodini mineralis drachma ad guttas triginta vel plures ter indies exhibitas.

Species IV^{ta}.

PERTUSSIS s. TUSSIS CONVULSIVA.

Est tussis violenta, epidemica, contagiosa.

Symptomata & decursus hujus morbi.

1. Initium illius tolerabile, tussis catarrhalis speciem præ se ferens, sensim intra duas tresve septimanas ingravescent.

2. Progressus morbi s. propria & essentialis forma componitur accessibus, irregulari tempore, pluries nycthemero, imprimis noctu recurrentibus; cujuslibet accessus signum prænuntium in genere est titillatio faucium vel pectoris, illi mox succedit tussis admodum crebra, violenta, sonum singularem specificum, vix describendum, cantui galli haud dissimilem secum ducens, tumet interea

& livescit facies, oculi protuberant & rubescunt, & nares quandoque sanguinem fundunt, atque paroxysmus demum vel expectoratione quadam vel vomitu finitur.

3. Accidentalibus: uti motus febriles, quorum tertianum typum nonnulli statuunt, ipse haud observavi, oppressio molesta pectoris quinimo illius status inflammatorius, expectoratum initio tenuius, sensim spissius, flavescens, quandoque aliquali sanguine tinctum.

4. Duratio morbi haud infra mensem, alias ad tres menses & ulterius extendi solet; vulgo creditur, novem septimanas ad incrementum & novem ad decrementum morbi requiri, quod experientiae tamen haud omnino respondet.

Causae remotae sunt.

1. Disponens: sc. morbus antea non habitus, semel enim devictus nunquam, variolarum adinstar, recurrit; nec non aetas infantilis & puerilis, quae praeter adultioribus huic malo multo magis subiecta est.

2. Occasionalis & efficiens nempe certa aeris nociva qualitas, ideoque in omnes influens s. epidemica, nec non, uti certa exempla docent, ab aegrotis ad sanos propaganda s. contagiosa.

Causa proxima sine dubio est singularis acrimonia atmosphaerae adhaerens & per inspirationem mucosae tracheali communicata, ibidemque irritando violentos tussis motus provocans; vix alteri

causæ quam consuetudini adscribi potest, quod hæc materia nociva non plus quam simplice vice effectum morbosum producat.

Diagnos. partim ex epidemica indole, partim ex accessibus ipsis imprimis sono illis adjuncto specifico depromitur, hic enim semel auditus semper cognoscibilis est.

Prognosis

1. Probabilis & juxta experientiam frequentior est benignus hujus morbi eventus, imprimis sperandus:

- a) Sub ætate ægroti duos annos superante.
- b) Remanentibus extra paroxysmos vigore, appetitu, somno aliquatenus naturalibus.
- c) Expectoratione mediocri sese exferente nec parca nimis, nec admodum copiosa; sanguis intermixtus, & puriformis indolis sputi per se nil mali portendunt.

2. Possibilis & rarior morbi exitus in mortem observatur vel mediante apoplexia, lethargo hydrocephalico, vel suffocatione, vel inflammatione pulmonum, & phthisi, qualia præsertim timenda sunt.

a) Tempore infantili eò magis periculoso quo biennio inferius est.

b) Apud debiliores & e parentibus phthisicis natos.

c) Compræsentibus febre continuante, atque dyspnoea molesta extra paroxysmos, aut ma-

gis declarata & manifesta inflammatoria affectione pectoris.

Curatio tussis nostræ ad irritamentum ejiciendum, violentos inde citatos pectoris spasmos, lapsu temporis forsan idiopathicos s. consuetudinarios compescendos, atque demum alios magis accidentales & periculosos effectus tollendos tendens rationi convenit, & ipsa experientia comprobatur.

1. Ejectio materiæ morbificæ promovenda est emeticis, quorum actione mucus faucium & ipsius tracheæ melius quam alio modo solvitur & excutitur; hæc arte facta excretio potissimum necessaria videtur infantibus, qui tussi salutari materiam ejicere nesciunt; ad emesin citandam æquo jure inservire possunt & tartarus emeticus, & radix ipecacuannhæ ad dosin ætati congruam; applicationem hujus remedii initium morbi desiderat, repetitio alternis vel quarto quovis die facienda est, & quidem pluries, donec morbi notabile decrementum productum fuerit.

2. Spasmodica hujus tussis indoles, quippe quæ enormitatem valde molestant periculo plenam & vix tamen utilem continet, remediis antispasmodicis debellanda est; emesi supra allato modo quater vel quinquies instituta, horum usus fieri potest, & quidem, si, quod non raro requiritur, sæpius emeticum præbeatur, diebus a vomitu liberis continuari; sub progressu morbi s. eo-

dem jam aliquot hebdomades protracto meliorem effectum præstant antispasmodica, quam si prius exhibeantur; juxta meam experientiam ceteris palma dignior est moscus ad granum aut grana duo bihorio porrigendus; pulvis pectoralis antispasticus ad cochleare minus ter die sumtus etiam convenit; nullum autem manifestum emolumentum vidi ex inunctione cardiæ cum tartaro emetico axungiae admixto, sed e contra ulcera molesta diuturnia, imo excrescentias inde ortas. Vehementia morbi mitigatur interdum inunctione pectoris cum oleo tepido. Declinanti, diuque protracto morbo etiam multi opponunt corticem peruvianum, qui formâ decocti potissimum huic casui convenit, sic ex decocto chinæ cum fenega et syrupo diacodii vel solo vel alternatim cum moscho, cæteris frustra tentatis, optimum effectum observavi. Ex assafoetida et cicuta temporarium levamen vidi, vix autem a floribus zinci.

3. Accidentalibus hujus tussis morbosus effectus, qualis potissimum est status pectoris inflammatorius, suis dignoscendus signis, nimirum febre notabili, oppresione molesta vel fixo dolore punctorio medelam pneumoniæ convenientem desiderat, phlebotomiam pro necessitate repetendam, emulsionem camphorata cum mosco, & vesicatorium magnum antico pectori applicandum.

4. Diæta adaptata exigit nutrimenta blan-

da digestu facilia, abstinentiam a salitis, & acidis, nec non ab aere frigidiorē, cujus irritamentum pulmones jam affectos facile læderet & inflammationi exponeret.

Datur etiam alia tussis spasmodica dicenda scilicet violenta ut plurimum sicca, quandoque catarrhali affectioni adjuncta, præsertim infantes, fæminas teneras et hystericas invadens, quæ interdum emeticum desiderat, alias moscho, assafoetida imprimis autem floribus zinci ad granum vel grana duo bihorio porrectis juvanda: nec raro opiata requiruntur, sic pulvis ex opii et ipecacannhæ grano compositus omni vespere imo sæpius per diem porrectus talem tussē, per plures hebdomades gravissimam, nec aliis remediis cedentem sanavit.

Species V^{ta}.

TUSSIS SYMPTOMATICA.

Est tussis, quæ merus est effectus alterius compræsentis morbi; uti tussis arthritica, rheumatica, phthifica, hysterica s. nervosa, hydrothoracica, hepatica &c., quales omnes juxta morbum, unde dependent, dijudicari & tractari debent. Huc referri potest tussis e retrogressis efflorescentiis cutaneis imprimis scabie, cujus medicatio ad cutem per sulphurea & balnea tepida revocando

malum promovebitur, & ulterius, dum infra de scabie agimus, memoranda venit.

O R D O III^{tius.}

PARANOIA s. INSANIA.

Est manifesta, involuntaria aberratio functionis cujusdam mentalis.

Functiones mentales s. quas mens proprio sensu operari habetur, sunt judicium, affectus, & recordatio. Qui hos actus, eorumque unum vel plures ratione insolita, s. sensui, ut dicunt, communi opposita, involuntario, idest: erroris proprii non conscius exferit, insania laborat.

Divisio hujus ordinis ratione functionis, quæ læditur & modi, quo læditur, in sequentia fieri potest genera, Melancholiam, Maniam, Ametiam, Amnesiam & Hydrophobiam.

G E N U S I^{mm.}

MELANCHOLIA.

Est pertinax animi applicatio ad unum objectum cum judicio circa illud erroneo, & pathemate enormi.

Specialis divisio, rectius accidentalis differentia hujus morbi consistit in varietate objecti, quod falso dijudicat, cuique inhæret anima, uti amor, religio, suspicio, divitiæ paupertas, honor, ignominia, morbus &c. circa quem ultimum versans melancholia hypochondriaca s. hypochondriasis appellari meretur; ex omnibus hisce singulares melancholiæ species formare, uti nonnullis auctoribus placuit, prolixitatem praxi medicæ inutilem & molestam creat.

Symptomata melancholiæ.

1. Unius objecti & rerum ad illud proxime pertinentium constans cogitatio & meditatio; vel de illo tantum loquuntur, vel quoque prorsus taciturni observantur melancholici.

2. Judicium de tali objecto erroneum, quoad cætera illæsum; varius hujus erroris est gradus, minor, qui quantitatem, major, qui qualitatem s. naturam objecti falso dijudicat, minor est melancholicus salutem desperans, quam sese jam condemnatum credens; fuerunt melancholici, qui sese pecudes & jam demortuos, deum, imperatores, reginasve habuerunt, talis melancholiæ gradus maximus est, universali insanie s. manie proximus.

3. Pathema animi objecto melancholiæ adhærens enorme, communissimum tristitia vel metus est, rarius gaudium illis nimirum, qui sibi magnas divitias, honores principum vel perfectio-

nes divinas tribuunt, pathema hoc objectionibus contra falsam ideam exasperatur, non minuitur.

4. Tædium & incuria aliarum omnium rerum & functionum, quæ ad objectum melancholiæ non pertinent, hinc solitudinis amor, fuga hominum, vita defidiosa & revera ad utilia opera peragenda inepta; conspirante tristitia hoc tædium illum gradum quandoque attingit, ut sibi ipsis mortem inferre tentent melancholici.

5. Inquietudo animi singularis plurimos melancholicos ad motum fere continuum, qui tamen certum scopum haud intendit, pellens, aut manibus aut pedibus agitur melancholicus; hypochondriacus & medicos & alios indefinenter narratione symptomatum affligit.

6. Mala corporea sæpius nulla melancholicus incusat, quandoque multa vel omnia, fallitur autem medicus talibus querelis fidem habens.

Causæ remotæ melancholiæ duplicis generis sunt.

1. Disponentes ut, a) labes hæreditaria a parentibus ad natos propagata, (mihi nota est talis familia nobilis, ubi & mater & plures puerorum hoc malo affligebantur.) b) Temperamentum sic dictum melancholicum sc. fibris rigidioribus & capillis nigris donatum.

2. Efficientes & occasionales.

a) Animi pathemata immoderata, uti terror ingens, subitaneus, ira, amor infanus, ambitio

honorum & dignitatum immodica, spes frustrata; desiderium enorme, ut patriæ, unde melancholia, quæ nostalgiae nomine insignitur, vel nuptiarum, vel infantum; moeror ex infortunio irreparabili, vel metus præsertim ob commissa peccata; ex omnibus fere istis causis ortam melancholiam ipse observavi.

b) Otium f. defectus occupationis præsertim differentis & adurgentis, quia anima modo aliquatenus necessario ad varias ideas cogitur, itaque ab unius meditatione diuturniore impeditur, quaque deficiente contrarius surgit effectus.

c) Voluntaria & protracta animi applicatio ad objectum aliquod injucundum, vi cuius coacta sensim pronascitur & maturatur melancholica pronitas.

d) Status corporis morbosus potius causa adjuvans, quam efficiens habendus, uti obstructio soliti sanguifluxus hæmorrhoidalis vel menstrui, dyspepsia, nervorum debilitatio morbo quodam inducta, plethora &c. (quidam per aliquot annos se prophetam eliam credidit et in litteris editis subscripsit; in defuncti cerebro inveniebatur abcessus.)

Causa proxima f. læsio ipsa melancholicos actus produciens num mentalis? num corpora? num utraqve possibilis? & qualis? hisce quaestionibus probabilis responsio ob conditam & animæ

& cerebri naturam excogitari nequit, & vix illa medico practico prodesset.

Diagnos. ipsius melancholiæ e definitione ejusdem & symptomatibus allatis per se fat manifestis facile eruitur. Diagnos. causarum remotarum tam mentalium quam physicarum ad praxin utilis habenda, & exploratione antecedentis & præsentis ægroti status acqvirenda est.

Prognosis.

1. Incertus in universum est omnis melancholiæ eventus, haud tamen funestus, quandoque in maniam factus.

2. Facilius sanatur recentior morbus ad summum gradum nondum provectus, e vitio corporis sanabili quodammodo dependens, vel ex animi pathematibus, quibus satisfieri potest; quandoque lapsu temporis deletur, obscurior redditur & vim perdit melancholica idea, quandoque apta adminicula curam accelerunt.

3. Minus & vix curabilis censendus est morbus inveteratus, increfcens, maximum gradum habens, ex ira, ambitione, irreparabili infortunio ortum trahens.

Curatio melancholiæ promovenda est.

1. Mentalibus auxiliis, quibus

a) Pathema animi, morbi causa, tollitur, qualis est desiderii, si potis sit, expletio, amanti optata puella, nostalgico patria concedenda esset,

(novi feminam desiderio infantum melancholicam redditam, post partum sanatam.)

b) Pathemia morbificum turbatur, & dissipatur, cui scopo convenit, novas, plures, valide agentes ideas ægrotis communicare, uti per colloquia amicorum jucunda, musicam, motus corporis varios, peregrinationes, nec incongruum esset, vehementis citare affectus animi a melancholiæ objecto alienos; novi matronam, quæ aliquoties passa fuerat melancholiam nullis remediis cedentem, sed semper casu quodam inopinato s. grato, s. ingrato animum fortiter movente abactam; (similis curationis notabile exemplum exhibet diar. 1784. Maj. 4.)

2. Corporeis s. physicis remediis.

a) Cuicumque morbofo statui in melancholicis præfenti & rita exploratione detecto accommodatis, impuritates primarum viarum, segnities alvi, hysteria, hæmorrhoides, obstructio viscerum, suppressio menstruorum, plethora inquiri, suis signis cognosci, aptaque medela debellari debent.

b) Specificis, si talia dentur; quibusdam profuit spiritus lavendularum compositus cum dimidia parte balsami vitæ Hofmanni ad guttas quadraginta ter die sumtus unacum thea carminativa.

G E N U S II^{dm.}

M A N I A.

Est infania universalis, non febrilis, cum vehementi, & pertinaci pathemate animi & audacis nifu nocendi imprimis illis, qui voluntati horum ægrotorum obstant.

Symptomata.

1. Judicium erroneum circa omnia vel saltem plura objecta; erroris hujus est varius gradus; quidam sub omni sermone illum exferunt, alii per intervalla & quoad nonnulla objecta sana loquuntur, omnes vero attentione carent & sub protracto colloquio infaniunt. Melancholicus nimia saltem circa suum objectum, maniacus nulla & circa nullum objectum attentione gaudet, & hoc discrimine & extensione erroris illi infanientes a se invicem distinguuntur.

2. Pathemata animi vehementia, pertinacia, quandoque scelesto modo celata, ad actus omnigenos scopo utili destitutos, ut plurimum noxios, nitentia summa vi, nec ratiociniis, nec persuasionibus ullis coercenda. Hinc clamant miseri, vel continuo musitant; sibi ipsis relictæ ab uno ad alterum locum circumvagantur, vestes dilacerant, obviosque percutiunt.

3. Insensibilitas singularis, & robur impune patiendi summa & sanis fere funesta diætæ vitia,

uti diuturnum & intensissimum frigus, abstinentiam a cibo & potu, insomniam, retentionem excretionum; (novi talem, qui septem diebus prorsus nil ingesit, eodemque tempore nec dormivit, nec urinam, alvumve exoneravit.)

Causæ remotæ.

1. Disponentes similes illis, quæ de melancholicis allatæ sunt.

2. Efficientes & occasionales.

a) Melancholia ad summum gradum perducta.

b) Pathemata animi vehementia, imprimis opposita sibi succedentia; uti summe ambitiosi contemptus & humiliatio, suspicio apud perditæ amantes; lætis superveniens notabilis tristitia & vice versa.

c) Materia quædam peregrina & morbosa ad encephalum translata. Puerperas mania correptas aliquoties observavi, quod forsan lacti ad cerebrum deposito imputandum est; etiam ut sequela febris scarlatinæ mihi occurrit, in alio tinea capitis ficcata supervenit & hac reversa cessavit. Huc referri potest abusus potus spirituosus, non rara maniæ causa, onanismus, tandemque venenatæ plantæ, ut semina hyoscyami, stramonii, belladonnæ & similia, quæ effluviis acerbis cerebrum irritando maniam producere videntur.

Causa proxima s. læsio ipsius cerebri sub hoc

morbo non minus occulta, quam melancholiæ causa cenferi debet.

Diagnofis e definitione & fymptomatibus manifefta eft, itaqve facilis, ut etiam vulgus maniacum mox dignofcere valeat.

Prognofis

1. In univerfum maniae fanatio incerta & difficilis eft, in multis perennis nunquam definens, quandoque periodicus f. per intervalla rediens, atque recidivantis naturæ, teſte experientia, judicandus eft hic morbus.

2. Spem fanationis dant recentior morbus, ejusdem fubitanea invaſio, & origo aut ex aliis prægreſſis morbis, aut e pathematibus, quæ tolli vel expleri poſſunt.

3. Metum immedicabilis mali faciunt diuturnitas, origo a melancholia protracta, & a pathematibus, de quibus fatiſ faciendis nulla ſpes ægrotis ſupereſt, aut communicari poteſt, ad quæ amor, ſuſpicio & ambitio imprimis referri poſſunt.

4. Mors rarus quidem maniae eventus præfertim locum habere poteſt, ſi morbus e materia nociva ad cerebrum deſoſita, vel ex abuſu potus ſpirituofî ortum traxerit; conſultio hunc terminum prænunciat.

Curatio maniae requirit.

1. Moralia adminicula ad mentem ſedandam, ejusdemque actus effrenos & noxios domandos & impediendos.

a) Pacans & mitior methodus initio saltem tentanda est, intervallis, quæ sæpe dantur, lucidis adhibenda, amica nempe conversatio & quantum potis est, obtemperatio; a multis autem verbis & protractis colloquiis, & contradictionibus, utpote quibus maniacy adhuc magis incitantur, abstinendum est; pathematis, quod morbum induxit, obiectum tollere optimam facit medicinam, (novi virum, qui reprehensione magni præpositi ex instanti maniacus reddebatur, & crebris recuperatæ clementiæ nuntiis sensim & prorsus restituebatur.)

b) Severior & quodammodo violenta tractatio sæpius opus est sc. minatio, inclusio, ligatio, quibus furibundi a noxa sibi ipsis & aliis inferenda impediri possunt. Huic scopo optime quadrant thoraces, ita parati et appliciti, ut brachia in certo situ stringantur et ad nocendum moveri nequeant.

2. Physica auxilia duplici scopo sc. virium robori & congestioni sanguinis ad caput, quæ utraqve in maniacis normam debitam excedunt, diminuendis conformanda.

a) Robur nimium frangitur 1) sanguinis missione varia, larga, secundum gradum virium repetenda, atque per phlebotomiam ad lipothymiam usque inprimis sub morbo subito invadente; hirudines temporales, cucurbitas cruentas in dorso efficienda, 2) per cathartica fortiora, jalappina, aloetica, salina, crebro ingerenda, 3) per medicamenta antiphlogistica s. temperantia, nitri lar-

gam copiam, acida vegetabilia, imprimis acetum vini ad unciam unam alteramve quotidie fumen- dum; et ubi inflammatio phrenitica lenta partim ex causis prægressis partim ex statu febrili timen- da est, mixturam camphorata acidam cum mo- scho utilem inveni, 4) per diætam parce nu- trientem e vegetabilibus imprimis cibis potuque multo aqvofo frigidiori, quem ut eo magis appe- tant ægroti, alimenta salita, uti haleces tales sva- dentur.

b) Congestio sanguinis ad caput debellatur, 1. derivantibus variis uti pediluviiis, vesicatoriis amplis vel artubus vel medio dorso integro ap- plicandis, præsertim ne stimulo nocerent, post factas supra memoratas depletiones congruis, 2. repellentibus frigidis capiti imprimis derafo ad- motis, uti epithemate tali s. linteo aqua frigida vel simul aceto imprægnato & frequenter impo- sito, vel effusione larga aquæ frigida per aptam machinam effecta.

c). Ad somnum, quo hi ægri interdum carent, producendum, opium modo convenire potest, si morbus subito ortus est ex animi pathemate et tunc post largam sanguinis evacuationem, ad granum vel dimidium cum pulveris refrigerantis scrupulo junc- tum; alias largior moschi dosis opii vices in hoc morbo tutius supplet.

Juvenis maniacus, omnibus frustra adhibi- tis, causa morbi scilicet onanismo tandem detecta,

intra paucas hebdomades prorsus restitutus est, manibus nempe thoracis ope ita ligatis, ut illas ad dictum vitium adhibere nequiret, et frequent genitalium lavatione cum aqua saturni.

G E N U S III^{ium}.

AMENTIA. s. FATUITAS.

Est infania universalis cum defectu attentionis & pathematis.

Symptomata

1. Judicatio aut erronea saltem quoad plurima objecta, aut nulla; dantur fatui nunquam loquentes, omnes paucis utuntur verbis, quæ raro sensui communi conveniunt, eodem modo comparati sunt illorum actus s. corporis motus adeo quandoque absurdi, ut risum moveant.

2. Attendendi impotentia notabilis vel plenaria; interrogata vix audire videntur & raro ad illa respondent fatui, atque factorum inscii & immemores reperiuntur.

3. Pathematis, nec utilis, nec noxii ullum apud fatuos est vestigium, nec pavent, nec moerent, nec curam ullius rei agunt, nec irascuntur, nec appetunt nisi cibos & potus.

Causa proxima amentiae videtur esse ineptitudo illius encephali partis, quæ ad operationes

mentales conspirabit, hanc functionem absolvendi & suscipiendi; vitia physica, quibus culpa verti potest, sunt laxitas, rigiditas, compressio varia.

Diagnosıs facillime e definitione eruitur.

Causæ remotæ, quibus prognosıs & curatio conformandæ sunt.

1. Senium, e quâ causa fatui repuerascere dicuntur, & nullam medelam admittunt.

2. Epilepsia & melancholia prægressa, in quo casu malum protractum etiam immedicabile censendum est.

3. Onanismus, qualis originis exempla aliquot mihi obvia fuerunt, incurabilia reperta.

4. Abusus potus spirituosı, unde orti morbi dubius est eventus; abstinentia a tali potu, camphorata, vesicatoria & setaceum non nimis inveteratum malum juvare possunt, quod propria experientia didici.

5. Febris putridæ magnus gradus prægressus, cujus plures vidi casus, vesicatorio in nucha, lapsuque temporis juvatos; liquor nervinus & acetum vini aliquoties per diem sumta etiam proficua apparuerunt.

6. Frigus enorme hyemale; tres puellas ex hac causa per quatuordecim dies fatuas Bartholinus curavit pelle vervecina calente singulis caput obvolvendo.

7. Mechanica encephali læsio s. compressio per extravasata varia, tumores, malumve cranii

conformationem, quorum aliquod sub inveterato morbo, & si aliæ memoratæ causæ non præsto sint, suspicari & pro incurabili declarare licet.

GENUS IV^{tum.}

AMNESIA.

Est memoriæ abolitio s. imminutio notabilis vel impotentia facta, modo sanorum, ut facta recognoscendi.

Origo hujus defectus, juxta quam ille dijudicandus & tractandus est, varia observata fuit, sc.

1. Veneris abusus, imprimis manu stupratio; abstinentia ab hoc vitio, diæta nutriens, imprimis potus chocolade, confortantia, ut cortex, balneatio frigida conveniunt & quandoque juvant.

2. Moeror & studia intensiora protracta, feliciora tempora, animique quies & relaxatio, ut in nonnullis expertus fui, non raro restitunt.

5. Apoplexiæ vel epilepsiæ insultus, unde quandoque orta amnesia, paralyticæ indolis censenda, interdum sponte cessat, alias remedia interna contra paralyfin commendata requirit.

4. Ætas senilis interdum oblivionem secum ducens imprimis in illis, qui vitam degerunt otiosam & voluptuosam; vix ulla medicina juvandus est talis causæ effectus.

5. Febris putridæ vel malignæ prægressæ notabilis gradus, in quo casu infirmitas memoriæ dependet e fracta vi nervorum in universum, atque hujus restitutione lapsu temporis & roborantibus remediis effecta sanatur.

G E N U S V^{tum.}

HYDROPHOBIA.

Est insignis potulentorum omnium averfatio cum vel sine delirio.

Causa antecedens est contagium animalis rabidi, utplurimum canis, per salivam ejusdem, morfu vel linctu ad hominem communicatum.

Symptomata & progressus morbi.

1. Post factam infectionem elabitur aliquod tempus, quo nil mali sentitur, vulnusque morfu inflictum prorsus consolidatur; si vulnus factum sit in facie, vel per linctum contagium salivæ immediate communicatum sit, post paucos dies morbus sese exferit, si vero alia pars corporis sedes infectionis fuerit, plus quam mensis spatium ante morbi evolutionem præterire solet; Hafniæ ante plures annos quodammodo grassatus hic morbus semper sex a suscepto contagio exactis septimanis effectus suos prodidit.

2. Morbi incipientis symptomata sunt languor, moeror, cibi potusque negligentia, anginae levior gradus cum deglutitione recusata.

3. Progressus morbi citus cum averfatione & timore liquidorum tanti gradus, ut illa vel res illis similes solo adfpectu ægros afficiant & inquietos reddant, & salivæ continua exfcreatione, furore quandoque & prurigine mordendi; plurimi devotas preces ad deum fundunt & amicos monent, ut a morfu & fputo sibi caveant.

4. Terminatio morbi communis sub convulsionibus funestis perficitur, sæpius intra unum alterumve diem, quandoque ad plures dies extenditur.

Diagnofis e definitione, caufa prægreffa, defcriptis symptomatibus fponfe fluit.

Prognofis: qvoad præfentem morbum nullum curationis exemplum habemus; timendum vero ob fufceptum contagium avertiffe & avertere poffe creditur mox memoranda methodus.

Curatio ideo tantum prophylactica, quam primum fufpicio infectionis adefl, inflitui debet & qvidem duplice via.

1. Vulnus morfu factum incidendum, imo pars morfa excidenda efl, ejusdemque dein fuppuratio digeflivis, uti nngvento cantharidum, ophthalmico rubro promovenda, qvod nunqvam omitti debet.

2. Mercurius quoque mox in usum trahendus est, balneum tepidum quotidie ingrediatur aeger, & mox drachma unguenti neapolitani inungatur, qualis medicinæ per quindecim vel viginti dies repetitio fieri debet, indeque modica citari salivatio.

CLASSIS IV^{ta}.

MORBI EXCRETIONUM.

Sunt morbi, quorum præcipuum symptoma est vitium excretionis.

Divisio hujus classis me iudice commodissime in tres dispescitur ordines sc. 1. Sangvisfluxus vitiatos. 2. Alvisfluxus præternaturales. 3. Serisfluxus morbosos.

ORDO I^{mus}.

MORBI SANGVISFLUXUS.

Comprehendit hic ordo morbos, quorum principale symptoma est sanguinis excretio contra normam naturæ aut procedens aut retenta, quo sequentia genera referri possunt.

1. Hæmorrhagia s. sangvisfluxus nimius in universum.

2. Suppressio fluxus menstrui.
 3. Hæmorrhoidalis affectio.
-

G E N U S Imm.

HÆMORRHAGIA.

Est profluvium sanguinis e qualicunque corporis parte aliud vel largius, quam, quod secundum sanitatis regulas fieri debet.

Symptomata & effectus hæmorrhagiæ in genere.

1. In fluidis.

a) Diminutio massæ humorum imprimis ipsius sanguinis rubri, qui immediate per hæmorrhagiam auferitur, e cujus defectu, si notabilis sit, frigus & pallor oriuntur & facile intelliguntur.

b) Attenuatio sanguinis, cruore enim s. densiore illius parte deperdita, relative major fit copia serosæ s. aquosæ partis, quæ proinde totam massam tenuiorem reddit.

c) Vis motus s. circulationis sanguinis imminuta; cruor enim quatenus densior pars præ tenuiore merito aptus judicatur ad motum e solidis suscipiendum & conservandum, illo illo igitur detracto, ut circuitus lentescat, necesse est, exhinc stagnatio & collectio feri hydropica imprimis in artubus post notabiles & protractas hæmorrhagias orta haud inepte explicatur.

2. In solidis

a) Laxitas f. relaxatio eorundem, nam ad justam tensionem debita vasorum repletio requiritur, exinanita vero vasa & solida collabuntur & flaccescunt.

b) Langvor, partim laxitatis productum, partim forsan fluido nerveo ob inopiam sanguinis justo parcius secreto adscribendus.

c) Lipothymia, imo mors, hæmorrhagiæ insignis possibilis effectus, me judice tribuenda est ipsi cordi a minuta sanguinis massa haud sufficienter irritato, ideoque motum vitalem haud debito gradu efficienti.

3. In parte ipsa affecta sanguinem fundente.

a) Vasorum, quæ sanguinem transmittunt, vel dilatatio nimia, indeque debilitatio; vel ruptura, vulneratio, indeque possibilis inflammatio & suppuratio.

b) Effusi sanguinis, ni liber concedatur effluxus, extravasatio, collectio, indeque partium adjacentium compressio, varium juxta harum nobilitatem effectum & eventum, quinimo funestum procreare valens, nec non extravasati corruptio, indeque varia mala.

Causæ antecedentes hæmorrhagiæ, quæ separatim vel conjunctim agendo hunc morbum producere valent, sunt

1. Impetum sanguinis ad tantum gradum augmentia, ut continentium vasorum, vel oscula

supra modum dilatentur, qualis status anastomosis dicitur, vel parietes fibris a se invicem diductis poros pervios capiant, qualis conditio Diapedesis appellatur, vel vera ruptura fiat, quam Rixin vocare solent, quæ omnes læsiones vasa ad sanguinem transmittendum & effundendum s. hæmorrhagiam inducendam disponunt; incitantes hæ causæ duplicis indolis esse possunt:

a) Impetum universalem s. totius sanguinis massæ augentes, nimirum: plethora aut per se, aut per suppressionem soliti & naturalis sanguifluxus generata, vehemens corporis animique motus, validæve febres.

b) Impetum particularem & accumulationem sanguinis in certa corporis parte efficientes; impeditus sic & difficilis sanguinis circuitus in una parte auget congestionem ad alias imprimis vicinas, hæmorrhagiæ haud raram causam; hinc obstructio lienis vomitum cruentum creat, hinc obstipatio alvina, intestinorum nimia repletio, adipis abdominalis enormitas sanguifluxum hæmorrhoidalem excitat, hinc obstructio, vel compressio pulmone sanguinea expectoratio producitur.

2. Sanguinem attenuantia & resolventia, quibus nimirum sanguis nimis aptus redditur ad oscula vasorum permeanda, hoc modo in febribus putridis, scorbuto, morbo maculoso hæmorrhagico hæmorrhagiæ nascuntur.

3. Væforum locale vitium & infufficiens refiftentia contra fangvinem irruentem, vel eorundem laxitas congenita, & acquifita; vel ruptura f. folutio continui caufis quibuscunque vulnerantibus aut acri erodenti materie inducta, vel ablatum fulcrum ex. gr. placenta uterina.

Caufa proxima hæmorrhagiæ, ex allatis antecedentibus fponde fluens, eft væforum vis includendi & continendi minor, quam contenti fangvinis nifus profluendi.

Diagnofis hæmorrhagiæ externæ facilis ex apparenti & manifefto fangvinis profluvio habetur; interna f. effufio fangvinis in cavitatibus internis e caufis prægreffis & vehementibus fymptomatibus fubito orientibus præfertim debilitate enormi tantummodo concludi poteft. (Vide diar. 1783, Maj. 5, & 1786, Auguft 14.)

Prognofis

1. Externæ hæmorrhagiæ, quibus fangvis extra corpus effunditur, in univerfum curabiles morbi funt, completior dijudicatio e loco fangvifluxus determinanda eft & ad fpecialem hæmorrhagiarum mentionem pertinet.

2. Internæ hæmorrhagiæ qualemunque cavitationem capitis, pectoris vel abdominis occupantes, uterina excepta, abfolute mortiferæ cenfendæ funt, aut cito tales, fi extravafatus fangvis comprimendo viscera functionem quandam vitæ neceffariam fupprimat, aut lentius per corruptionem

effusi, indeque partium adjacentium irritationem; inflammationem & destructionem.

Curationis in hæmorrhagia duplex est pars 1. principalis præsentem hæmorrhagiam tollens; 2. accidentalis morbosos illius effectus post eandem quandoque remanentes debellans.

Curatio principalis & essentialis hæmorrhagiæ efficitur debellando causas ejusdem supra memoratas sc.

1. Impetus & motus sanguinis sive per se, sive relative ad vasa debilia nimius imminuendus est, cui scopo quadrant.

a) Venæsectio juxta perseverantiam & vires ægroti repetenda, quæ tamen in hæmorrhagia resolutioni sanguinis adscribenda haud convenit.

b) Medicamenta refrigerantia, vel nitrosa, imprimis spiritus vitrioli aqua dilutus, uti mixtura acida mineralis ad unciam circiter omni vel alternis horis porrigenda, quod remedium in omni hæmorrhagia convenit & vix non omnia alia virtute superat. Hisce forsan non satis cito acqvirendis sal culinare larga dosi, uti ad unciam dimidiam aqua frigida mixtum, ingeri potest; porro comendandus est liquor stypticus Looffii ad drachmam dimidiam aquæ unciis octo conjunctus et ad unciam omni hora vel bihorio porrectus, si reliqua supra laudata effectū careant.

c) Diæta refrigerans, sc. potus frigidorum imprimis ipsius aquæ, alimenta blanda vegetabilis

indolis, abſtinentia a ſtimulantibus, carneis, butyro, aromaticis, ſpirituofis, potuqve caſſe. Atmoſphæra frigida pura, integumenta corporis modica, qvies corporis animiqve, & alvi demum debita excretio, qva enim deficiente ſangvinis in abdomine minus libera circulatio congeſtionibus ad alias corporis partes anſam dat.

2. Conſiſtentia ſangvinis augenda eſt, ita ut minus aptus ſit ad vaſa permeanda, qvalis ſcopus ſupra laudatis remediis refrigerantibus & imprimis ſpiritu vitrioli etiam obtinetur.

3. Conſtriſtio ipſorum vaſorum, qvæ debilitata, dilatata, ſoluta ſangvinem transmittunt, efficienda eſt, qvalis curationis ratio præſertim in hæmorrhagiis ſuperficialibus ſ. peripheriæ corporis locum habet, & per chirurgica auxilia promovebitur; adſtringentia nonnulla, raro congrua ad uſum internum, in ſpeciali hæmorrhagiæ mentione memoranda veniunt.

4. Continuanda eſt hæc medicatio per regimen frigidum non modo tempore, qvo hæmorrhagia durat, ſed aliquot poſthac elapſis diebus, ut de reſtituto debito æqvilibrio inter continentium vim & contentorum impetum eo certiores redamur.

Curatio reparativa accidentaliter deſiderata, ſi nimirum gradus & duratio hæmorrhagiæ notabiles fuerint, ad vires inde perditas ſc. ſolidorum

robur & fluidorum v. sanguinis copiam restituenda; hanc absolvunt.

1. Alimenta digestu facilia, bene tamen nutritia modica quantitate, sed eo crebrius ingerenda, uti pisces, carnea teneriora, potus parcior.

2. Motus corporis modicus, sed frequens, qui & ad solida roboranda, & ad ritam assimilationem ingestorum promovendam inservit.

3. Roborantia remedia, donec pristinum robur restitutum fuerit, adhibita, inter quæ decoctum corticis peruviani vel pulvis corticis inprimis cum dimidia parte nitri aliquoties die sumtum præstantissimum est.

Divisio hæmorrhagiæ juxta diversum locum f. partem e qua sanguis effunditur, sequentes continet species; 1. hæmorrhagiam narium; 2. hæmoptysin; 3. hæmatemesin f. vomitum cruentum; 4. hæmaturiam f. mictum cruentum; 5. hæmorrhagiam uteri f. menorrhagiam; 6. morbum maculoso-hæmorrhagicum.

Species Iura.

HÆMORRHAGIA NARIUM s. EPISTAXIS.

Est profluvium sanguinis per nares, five modicum five largius,

Symptomata præter effectus hæmorrhagiæ communes gradui ejusdem conformes possunt esse

affectiones capitis variæ accidentaliter adjunctæ, uti gravitas capitis, stupor, somnolentia, fufurrus & tinnitus aurium, pruritus narium.

Causæ antecedentes.

1. Externa violentia naso vel capiti ipsi allata.
2. Plethora, imprimis junioris ætatis, vel commota per corporis notabilem incalescentiam, validos motus, ingesta agitantia, præsertim spiritus, febresve violentas.
3. Resolutio sanguinis, quæ præsertim in febribus putridis, scorbuto, hydrope locum habere potest.
4. Infarctus viscerum abdominalium imprimis hepatis vel lienis.

Causa proxima vel in vasis ipsis narium solutis & disruptis, quod tantum sub violentia externa evenit, vel in sanguine, qui mediante plenitudine aut tenuitate naturalem vasorum resistantiam superat, cogitari potest.

Diagnosis ipsius hæmorrhagiæ sat manifesta est; causarum vero ad ritam dijudicationem itidem requisita cognitio explorando ægri statum antecedentem & concomitantem haud difficulter eruitur.

Prognosis & curatio hujus hæmorrhagiæ secundum causas ejusdem determinari debent.

1. Per violentiam externam inducta curatio facilis, sæpe sponte transiens, alias externis topicis frigidis & adstringentibus juvanda, uti linteo

aqua & aceto frigidis humectato capiti frontique imposito, attractione aquæ frigidæ per nares, in graviore & perseveranti malo lintum carptum vel spongia solutione aluminis aut vitrioli martis madafacta & in naribus introducta; venæsectio tunc etiam locum habere potest.

2. E plethora simplici absque alio morbo superveniens sibi ipsi tanquam naturæ beneficium relinqvenda, nec tollenda est, anteqvam nimis protracta & debilitans animadvertatur, tunc convenit methodus refrigerans contra hæmorrhagiam in genere commendata, epithema frigidum capiti & nuchæ applicitum, pediluvium tepidum aliaque in præcedenti casu laudata topica; pertinacem talem hæmorrhagiam etiam magno vesicatorio inter scapulas applicito tantummodo sedare potui.

3. E resolutione sanguinis orta noxia censenda est, & frigidore regimine, frigido capitis epithemate, & largo usu mixturæ acidæ tolli debet.

4. E febrium magna vi, vel obstructionibus viscerum proveniens hæc hæmorrhagia eodem modo dijudicanda & sananda est, ac quæ ex plethora simplici prodit, interdum topica allata desiderantur.

Species II^{da}.

HÆMOPHTHYSIS.

Est ejectio puri sanguinis e pulmonibus mediante tussi.

Symptomata

1. Tussis miuoris vel maioris gradus quandoque adeo mitis, ut sanguis quasi spontanea vi in fauces ascendere videatur, & levi exscreatione proveniat.

2. Sanguis ejectus communiter spumescens, purus s. mucos non mixtus, lucide rubescens, falsi quodammodo saporis, tenuis crebrius, quam grumosus, & differentis quantitatis.

3. Affectio pectoris crebro hæmopthyfin præcedens, aut concomitans, uti dolor tensivus vel gravativus, anxietas, palpitatio, æstus internus, pruritus faucium, quandoque absque ullo tali incommodo sanguis projicitur.

Causæ antecedentes.

1. Plethora vel commota per valida animi pathemata, labores corporis, potus stimulantès spirituosos, vel subito oborta per citas suppressiones sanguifluxus alterius consueti ex. gr. menstrui vel hæmorrhoidalis (vide diar. 1787, August. 7.)

2. Violentia externa præprimis immediate agens in pectus, vel pulmones uti valida pectoris percussio, sublevatio gravis oneris, diuturna fortisque clamatio, tubarum inflatio, violenta tussis.

3. Acrimoniarum variarum vasa pulmonalia erodentes, uti scorbutica, purulenta, retropulsa exanthematica scabiosa, herpetica, quinimo metastatica per putridas febres generata, (vide diar. 1782. & 1783, April. 1), quo referri potest materia dura,

lapidea casu infortunato in asperam arteriam illapfa vel fenfim generata, solutionem vaforum imprimis ob agitationem continuam pulmonum inducere valens.

4. Impedita fangvinis circulatio in vasis pulmonalibus ob caufas aut in ipsis pulmonibus aut partibus ab aliis adjacentibus hærentes, vi illius enim fangvis ab aliis ramis exclusus in aliis abundantius colligitur, illosque uimium dilatat, vel difrumpit. Hoc modo pulmonum tubercula, hydrothorax, infarctus hepatis hæmopthyfi anſam præbere valent.

5. Congenita forſan & hæreditaria debilitas, & teneritudo vaforum pulmonalium impetum fangvinis haud debito modo ſufferre valens.

Cauſa hæmopthyſeos proxima eſt vaforum pulmonalium vel nimia dilatatio, vel difruptio, vel corroſio per unam aut plures ex allatis cauſis antecedentibus inducta.

Diagnosticæ ſigna

1. Ipius morbi ſunt duo ſc. fangvinis meriſputum, quo diſtingvitur ab inflammatione pectoris, in qua unacum febre expectoratio mucoſa ſangvine mixta eſt, atque tuſſis aliaque affectio pectoris, quibus a vomitu cruento diſcerni poteſt.

2. Cauſarum antecedentium ſ. efficientium, quarum cognitio ad debitam medicationem deſideratur & rita exploratione acquiritur.

Prognosis; eventus hæmopthyseos possibilis triplex est

1. Restitutio integra, nunquam certo præfagienda, attamen speranda si plethoram solam ut causam suspicari liceat, si nullus alius pectoris morbus, vitium pulmonum indicans, hæmopthyfin præcedat, si modica sit & si ægri reliqua constitutio quoad indolem humorum bona supponi possit. In hoc casu, quod sæpius expertus fui, non valet illa regula: pus sequitur sangvinem.

2. Suppuratio & ulcus pulmonum cum infrequenti phthisi, quæ timeri potest sub origine morbi ab acrimoniis erodentibus, vel ab obstructis pulmonibus per tussim siccam diuturnam et dyspnœam indicatis, nec non in iis, qui e parentibus phthificis nati sunt.

3. Mors subitanea, licet rara, tamen possibilis præsertim in phthificis sub effusione sanguinis larga vasa aerea prorsus obturante.

Sanatio hæmopthyseos duplicem partem continet, curatoriam sc. & prophylacticam.

Curatoria medicatio ad morbum præsentem tollendum tendens efficienda est

1. Venæ sectione vel in brachio, vel in pede instituenda, & crebrius, ratione habita ad perseverantiam morbi, virium pulsusque robur repetenda; juxta eandem circiter regulam phlebotomia in hæmopthyfi, ac in peripneumonia determinari potest, prima vice largior sanguis detraha-

tur, dein parcior & toties, ut affectio dolorifica pectoris cesset, & effusio sanguinis notabiliter minuatur.

2. Medicamentis refrigerantibus, quorum efficacissimum, ut plurimum sufficiens, ideoque primo eligendum est spiritus vitrioli dilutus s. mixtura acida cum mucilagine gummi arabici ad unciam omni hora vel dimidia hora, in graviore casu, ingerenda, & sedato morbo rarius prophylaxeos ergo sumenda; raro hoc spem fefellit, & tunc ex electuario ad hæmopthoen ad cochleare minus omni hora, vel bihorio porrectum, vel solum vel alternatim cum mixtura acida optatum effectum expertus fui; convenit quoque serum lactis aluminosum crebra et larga dosi ingerendum, si sanguinis profluvium modicum fuerit, sed dolorifica affectio pectoris gravior, mixturam camphoratam nitrosam vel emulsionem communem, cujus unciis octo nitri drachmæ duæ & camphoræ grana octo apposita erant, ad unciam omni hora vel bihorio ideo & prospere propinavi, ut adjunctus inflammatorius status eo melius dissipari potuerit.

3. Diæta refrigerante & temperante

a) Potus & alimenta sint frigida indolis, aqua simplex frigida sæpius sumta non modo innocua sed valde proficua est, reliqua ingesta vegetabilis tantum naturæ sint, & abstinencia ab omnibus calefacientibus ægris imperetur.

b) Atmosphæra circa ægrotum fit frigidior pura, non multorum hominum exhalatione inquinata.

c) Quies perfecta requiritur tam animi, quam corporis, & abſtinentia a locutione, quantum potis eſt, utpote qua pulmo immediate commovetur.

d) Integumenta corporis modica ſint haud nimis calefacientia, nec comprimentia, ne circulus in externis impediatur.

4. Excretionem alvi quotidie & ſufficienter procedente; ſub hujus enim defectu ſanguis difficilius in vaſis abdominalibus excipitur, unde major affluxus ad pectus timeri poteſt; hoc igitur ſcopo, ſi opus ſit, lac ſulphuris cum dupla parte nitri pro neceſſitate & ad effectum adhiberi poteſt, vel pulvis radicis rhei, quem electuario ſupra laudato adjungere ſoleo.

5. Roborantibus tunc congruis, cum hæmophthiſis memorata methodo ſedata fuerit, & per aliquot dies non redierit, ad talem finem decoctum chinæ ſimplex, cujus unciiſ octo nitri drachma adjuncta eſt, quater vel quinqvies per diem ad unciam ſumtum quadrat; vel pulvis corticis ad ſcrupulum cum nitri & lactis ſulphuris ana ſcrupulo medio bis terve per diem, præſertim ſi alvus ſegnſ ſit, ſumendus.

Prophylactica medela contra morbum hunc

facile recidivantem desiderat venæsectionem crebram ter quaterve quotannis repetendam, & aliàs, utprimum notabilior quædam pectoris affectio sese exferit, nec non cautionem ab omnibus, quæ ut causas hujus morbi antecedentes attulimus.

Species III^{tia}.

HÆMATEMESIS. s. VOMITUS CRUENTUS.

Est sanguinis utplurimum nigrescentis, grumosi per vomitum ejectio.

Symptomata præter vomitum ipsum possunt esse nausea, anxietas, cardialgia ad lipothymiam usque, concomitans dolor lateris sinistri sc. regionis lienalis.

Causæ antecedentes.

1. Lienis obstructio f. impedita illius circulatio, ita ut sanguis per illum haud transmittendus eo majori vi & copia vasa vicina, brevia dicta ad ventriculum pertinentia petat, eaque ita nimis dilatata, vel rupta permeet (vide diar. 1787, Jul. 5 & Decembr. 5.)

2. Menstrui fluxus retentio

3. Spasmodicæ vel hystericae constrictiones tubi intestinalis, quibus sanguis a quibusdam vasis excludi, ideoque nimius ad alia congeri potest (vide diar 1783, August 6.)

4. Schirrosæ affectiones ipsius ventriculi, quibus etiam circulus turbatur, (vide diar. 1784, Martii 13, & 1786, Januar. 5.)

5. Vulneratio ventriculi e causa violentæ mechanica producta.

Diagnos.

1. Ipsius vomitus per definitionem ejusdem facile patens.

2. Causarum, lienis vitium e concomitante constanti dolore regionis lienalis suspicari licet; constrictiones spasmodicas indicat adjuncta hysteria, nec non vagus abdominis dolor; ventriculi ipsius affectionem chronicam e dolore ejusdem pressorio diuturno cum annexo utplurimum vomitu chronico concludere licet.

Prognosis

1. Restitutio possibilis sub origine morbi a menstuis retentis, spasmodica affectione abdominis, atque leviori & recentiori vitio lienis.

2. Letalis autem eventus timendus est, vel citior per largitatem hæmorrhagiæ, vel lentior per hydropem, imo tabem, quando ex induratione ipsius ventriculi, vitioque inveterato lienis ortum trahit morbus.

Curatio perficienda est

1. Venæsectione semel vel pluries pro ratione virium, si largior sit hæmorrhagia.

2. Remediis refrigerantibus, mixtura acida omni hora porrigenda, & per aliquot dies post devictum morbum continuanda, licet rarius; scopo per hanc forsan haud impleto serum lactis aluminosum ad unciam bihorio sumtum, quo auxilio semel hunc morbum aliis non vincendum sanavi.

3. Alimentis blandissimis frigidis & sub morbo, & post illum per aliquod tempus adhibendis; potus aquæ frigidaë, decocta e cerealibus parata, piscesque conveniunt parca sed frequentiori dosi sumenda.

4. Laxantibus; sub morbo ipso tantummodo clysmatibus agendum est, quæ in graviore malo ex aqua frigida cum aceti vini unciis duabus parantur; verum biduo circiter ab illo præterito ad sanguinem, qui forsan extravasatus est, evacuandum opus est laxanti remedio & quidem antiphlogistico, ut mannæ calabrinæ unciis duabus cum nitri drachmis duabus in aqua, vel decocto avenæ solutis.

5. Roborantibus, imprimis decocto chinæ simplici ad cochleare majus omni hora exhibendo, postquam ejectio sanguinis sedata est.

6. Mucilaginosis congruis, si vomitus talis parvus chronicus e schirro ventriculi, vel ulcere oriri credatur; talia sunt infusum radicis saleb, mucilago gummi arabici.

Species IV^{ta}

HÆMATURIA s. MICTUS CRUENTUS.

Est ejection sanguinis cum urina mixti per urethram.

Symptomata in hoc morbo possibilia sunt dolor lumborum varius, pressorius, lancinans, similis in regione vesicali, stranguria, ischuria, sanguis ipse ejectus, vel parvus, vel largior, tenuis aut densior excretionem vix et cum summo cruciatu admittens.

Causæ hæmaturiae diversæ sunt & juxta has ejusdem dijudicatio & tractatio varia.

1. Plethora universalis vel particularis in vasis hæmorrhoidalibus, & aliis cum his communicantibus, per causas differentes in abdomine comprimentes, obstruentes & circulationem impedientes; (novi virum obesum, plethoricum crebro hac molestia afflicto, haud immerito ab ingenti adipis abdominalis mole derivanda.) Venæsectio etiam crebra, nitrosa, si alvus segnis sit, cum lacte sulphuris mixta, pulvis refrigerans mixtura acida, potus largus aquæ frigidæ, clyisma ex aqua frigida cum aceto commendari merentur.

2. Corporis vehementes & protracti motus, ut equitatio, vectio in curru, sublevatio oneris nimis gravis; etiam in hoc casu phlebotomia, quies, mixtura acida conveniunt.

3. Diuretica remedia fortiora adhibita imprimis e cantharidibus parata, extusque vel intus applicata; potus largus mucilaginosus, lactea, emulsiones præsertim cum camphora juvant; similia remedia quadrant, si ex alia acrimonia haud definienda morbus induci videatur.

4. Calculus renalis aut vesicalis suis cognoscendus signis, & vulnerando sangvinem provocans; venæsectio, quies, emulsio nitroso-camphorata & mixtura acida indicata sunt, largior & crebra per hanc causam inducta hæmorrhagia ulcus exoriens timendum facit.

5. Resolutio sanguinis morbosa, ut in putridis febribus, variolis putridis, scorbuto, quale symptoma vim morbi periculosissimam declarans largo usu decocti corticis peruviani cum appposito spiritu vitrioli debellari debet.

Species V^{ta}.

HÆMORRHAGIA UTERI s. MENORRHAGIA.

Est profluvium sanguinis ex utero diuturnius, vel largius, quam naturali termino convenit.

Symptomata & effectus.

1. Sangvisfluxus ipsius varius modus a) ratione temporis, dum aut perdurans s. constans est menorrhagia, vel tantum ad certa tempora rediens, & enormis b) ratione progressus, dum vel largus,

vel stillando sanguis provenit, c.) ratione indolis effluentis sanguinis, qui vel tenuis vel grumofus, purus vel materia purulenta mixtus esse potest.

2. Aliæ concomitantes molestiæ, ut dolor lumbaris, ingvinalis, hypogastricus, langvor, pallor, anorexia, tumor hydropicus, sterilitas.

Divisio menorrhagiæ triplex facienda est 1. menorrhagia extra graviditatem, 2. menorrhagia sub graviditate, 3. menorrhagia parientium.

Menorrhagia extra graviditatem e variis surgit causis, juxta quas dijudicanda & tractanda est

1. E laxitate & debilitate uteri, aut congenita, aut per vitam otiosam, usum largum potus aqvosi tepidi, partum crebrum, moerorem protractum acquisita; frigida & roborantia hunc casum juvant, (vide diar. 1784, Septembr. 8, & 1786, August 7,) sc. mixtura acida, infusum corticum aurantiorum ficcatorum, essentia cinamomi vel sola vel cum essentia corticum aurantiorum et spiritu vitrioli juncta; quarta pars grani radice ipecacuanhæ cum saccharo trihorio exhibita etiam profuit; pulchram octodecim annos nondum habentem, hoc fluxu valde molestatam, alias sanam, aliis frustra adhibitis, per mixturam ex essentia corticis peruviani, aurantiorum ana uncia, spiritus vitrioli drachmis duabus compositam & ad guttas sexaginta ter die sumptam perfecte restitui. Si menorrhagia ex hac causa consistat in fluxu menstruo quoad tempus rito, sed ratione quantitatis enormi,

excessum illum præcavere oportet, allata roborantia aliquot diebus ante expectatam menstruationem porrigendo.

2. Ex motu & impetu sanguinis nimis violento, citato per commotiones insignes corporis vel animi, vehementes febres, plethoram, aerem & medicamenta calida, abusum veneris, quo referri potest violentia externa in uterum directâ, in quibus casibus venæsectio etiam crebrius repetita, regimen temperans frigidum, atque mixtura acida opem sufficientem afferunt.

3. E resoluto sanguine per scorbutum & febrem putridam, tunc e decocto corticis peruviani unciiis sex cum spiritus vitrioli drachma ad unciam omni hora vel bihorio sumtam auxilium petendum est. Pluries in his casibus internæ medicinæ haud cedentibus clyσμα ex aqua frigida et aceto repetitum cum optato effectu adhibui.

4. E schirro & carcinomate uteri, quæ causa ex ætate ægrotæ provectiore versus quinquaginta annos & ultra, dolore continuo lumbari, ingvinali aut hypogastrico, fluxu raro desinente, ichorosam foetidam materiem secum ducente cognoscitur; verum nec tolli, nec illius effectus s. menorrhagia ullo remedio mitigari potest; ægrotæ desiderio satisfaciendi gratia allata temperantia porrigi queunt.

Menorrhagia gravidarum ortum habere potest.

1. E plethora, ob quam nonnullæ primis graviditatis mensibus fluxu ordinario adhuc gaudent, contra evacuationem hanc per se innocuam nil moliendum est, nec aliud præter quietem corporis imperandum et, si fluxus notabilior sit, venæsectionem.

2. Ex abortu instanti versus finem tertii mensis graviditatis cum prægresso & adjuncto dolore lumborum, atque abdominis, quies & pulvis refrigerans præscribi possunt; in reliquis, ut partus incipientis opus perficiatur, ipsi naturæ committendum est, opposita conamina inutilia sunt, quinimo tempus protrahendo debilitant & nocent.

3. E solutione placentæ uterinæ versus finem graviditatis, quando sc. placenta more debito hand fundo uteri annexa est, sed inferiori illius segmento, a quo sub incipiente contractione uteri versus finem graviditatis separatur, ita ut communicantia vasa libera & aperta fiant & sanguinem fundant. Huic casui integra quies, nutritiæ largæ blandæ indolis & mixtura acida conveniunt, atque obstetricans partus opus attentissime observet, illumque quamprimum possibile sit, debita encheiresi absolvat. Venæsectio, quod per se intelligitur, contra causam hanc hæmorrhagiæ nil valet, sed vires simul cum sanguine detrahendo nocet.

Memorrhagia post partum oriens.

1. E partu præcoci f. cito nimis procedente & finito, ita ut debitæ uteri contractioni haud sufficiens sit tempus, vasa ideo ejusdem in statu dilatato permanentia sangvinem enormem, quandoque subitam mortem efficientem, emittunt; periculum hoc dolorum parturientis vehementia & celeri reversione, nec non nimis cito effecta & perfecta dilatatione orificii uteri indicatum obstetricantes per disruptionem maturam tunicarum avertere prudenter student, utpote illa negotium partus lentescit; ad hæmorrhagiam jam præsentem svadentur epithemata frigida abdomini imposita, manus frigida ad uterum intromissa, ut ejusdem contractio provocetur, imo sub enormi periculo injectio aquæ frigidæ in uterum, verum modo in casu maxime ancipiti hoc remedium adhibendum est, utpote inflammationi & suppurationi letali quandoque ansam præbet, (vide diar. 1787, & Maj. 8, & Decembr. 1,) in reliquis summa corporis animique quies, diæta frigida & mixtura acida conveniunt.

2. E solutione placentæ incompleta post foetus partum finitum, in quo casu pars placentæ utero adhærens contractionem ejusdem debitam impedit; placentam debito modo solvens & educens obstetricans hoc malum tollit; huc referri potest menorrhagia post abortum quandoque pertinax & diuturna frustis placentæ utero adhuc annexis adscribenda & per injectionem aquæ te-

pidæ in uterum aliquoties factam, quæ allata causa tollitur, juvanda.

3. E singulari uteri laxitate, quæ, si allatæ causæ haud præsto sint, sub menorrhagia protrac-
ta & debilitante supponi debet, atque roboranti-
bus, ut decocto corticis peruviani cum spiritu vitri-
oli, quiete corporis, saltem cautione ab ambula-
tione multa stantisque situ sensim juvari.

Species VI^a.

MORBUS MACULOSO-HÆMORRHAGICUS.

Est morbus per se non febrilis, cuius essen-
tiales notæ sunt maculæ lividæ petechiis similes in
omni corporis parte externa possibiles, atque san-
guinis effluxus e pluribus communiter locis pro-
veniens.

Symptomata adeoque sunt.

1. Maculæ allatæ & in facie & in reliquo
corpore apparentes, raro latioris, uti ecchymoses,
initio lividæ, sub decrefcente morbo fusci colo-
ris redditæ, totum morbi decursum comitantes.

1. Sangvisfluxus varius & multiplex per os,
nares, expectorationem, vomitum, alvum, imo
cutem sese exferere valens, tenuis indolis, & nul-
lius, quantum ipse observavi, saporis aut odoris.

3. Reliqua sanitas integra, pulsus sc. alvus
& appetitus, quinimo vires vix quidem ad rationem
evacuationis decrefcentes.

Causa proxima ex effectibus hujus morbi haud alia deduci aut statui potest, quam notabilis sanguinis dissolutio, vi cujus vasa minora sanguinem naturalem haud admittentia permeat, itaque vel effluit, vel sub cute effunditur, maculasque allatas producit; causa vero antecedens, quæ tali modo sanguinem solvit, nondum detecta est.

Diagnosıs ex dictis notis facile eruitur, & a morbus similibus distingvitur, sc. a febre petechiali per maculas etiam in facie apparentes, & absentiam febris, atque a scorbuto ob eandem macularum extensionem, & absentiam reliquorum ad scorbutum pertinentium symptomatum, imprimis illæsas gingivas.

Prognosis. Duratio hujus morbi raro ultra quatuordecim dies extenditur, ut plurimum citius finitur, in unico exemplo illum ad plures menses protractum observavi. Eventus illius spontaneus mihi haud cognitus est; per artem vero, quoties mihi occurrit, semper optatus fuit.

Sanatio absolvitur, 1. diæta frigida quoad aerem, alimenta, potum, motum, & tegumenta corporis, 2. decocti corticis peruviani unciiis sex cum spiritus vitrioli acidi drachma ad unciam omni hora sumendam, donec sanguifluxus cessaverit, & posthac rarius per aliquot dies, medicamentum hoc certo & specifica quasi vi illum morbum devincit, semel ferum lactis aluminosum simul adhibendum desiderabatur. (Exempla morbi maculo-

fo-hæmorrhagici simplicis (vide diar. 1783, Januarii 4 & Martii 6, complicati febrilis, vide diar. 1785, Septembr. 1 & 1787, Septembr. 1.)

G E N U S . II ^{dum}

MENSTRUATIO IMPEDITA s. MENOSTASIA.

Est retentio sangvisfluxus feminarum menstrui completa vel incompleta.

Symptomata & effectus per hoc sanitatis vitium possibilia sunt variæ multæque morbosæ affectiones sc.

1. In capite: cephalalgia, vertigo, læsio visus & auditus imo apoplexia.

2. In pectore: dyspnoea, anxietas, palpitationis cordis.

3. In abdomine: cardialgia, gastrodynia, nausea, vomitus, colica, lumbago.

4. In toto corpore: morbi nervosi sc. convulsivi, hysterici, paralytici, hæmorrhagiæ variæ per nares, vomitum, tusim, gravitas corporis, langvor, pallor, tumor hydropicus, vel illi similis leucophlegmaticus, ut plurimum junctus cum symptomatibus pectoris affecti, chlorosis dictus. (vide diar. 1785, Januar. 6, & August. 7, & 1786, Octobr. 7, & 1785, Junii 5.)

Causæ antecedentes possibiles separatim vel concurfu vario agentes.

1. Vitia fluidorum f. sangvinis.

a) Ejusdem abundantia f. plethora, qua forsan majora uteri vasa nimium expansa comprimunt minora & transfluxum sangvinis per illa impediunt.

b) Illius defectus causis variis debilitantibus productus, ob quem vasa uterina haud debito modo per sufficientem copiam & vim sangvinis implentur & aperiuntur.

c) Indoles læsa humorum sc. viscositas lentiorque, nec motus debiti capax, nec ad vasa permeanda idonea.

2. Vitia solidorum sc.

a) Rigiditas vasorum influenti sangvini nimium resistens, qualis constitutio forsan e temperamento stricto, certius e laborioso vitæ genere & ætate incrementum trahere potest.

b) Laxitas vasorum, ob quam sufficienti haud gaudent vi ad sangvinem propellendum; vita sedentaria, otiosa, potus aquosus tepidus largus animus tristis hanc dispositionem morbosam creant.

c) Sensibilitas enormis in hysterice personis locum habens, spasmodicam constrictionem in vasis uterinis & mediante hac transfluxum sangvinis impeditum producere valens.

Causa proxima menostasiæ ex allatis antecedentibus derivanda est, vel vasorum uteri inepti-

tudo ad sangvinem transmittendum, vel sangvinis ipsius vitium, vel utrumque simul junctum.

Diagnosıs

1. Ipsius morbi s. præternaturalis menstruorum retentionis per se patet, quando sc. hæc evacuatio deficit in personis, quæ juxta naturæ ordinem, ætatem nempe infra quinquaginta annos, & extra graviditatis tempus illa gaudere debent, variisque symptomatibus ex hoc defectu supra derivatis laborant. Menostasia a celata graviditate hujus primis mensibus haud satis certo dignosci potest, in feminis ideo suspectis, quarumve antea vitam ignoramus, & imprimis dum symptomata menostasiæ competentia non præsto sunt, judicium de illa differendum est ad illud graviditatis tempus, quo istius manifesta signa haberi possunt.

2. Causarum antecedentium & efficientium, num in solidis aut in fluidis hærent? quales sunt? quæque concurrunt? exacto prægressi & præsentis ægrotantium status examine detegendum est.

Prognosis. Menostasia in genere curatu perquam difficilis est, quandoque omnem medicatio- nis vim eludit, aliæ ob hunc defectum per totam vitam valetudinariæ redduntur, in aliis quodammodo tolerabilis sanitas permanet, interdum effectus reipso funesti exinde procreantur, inprimis timendi sub incremente ætate, quia hic fluxus terminari solet.

Curatio duplex est sc. caufarum, quibus morbus adscribi potest, atque specifica per remedia sic dicta emmenagoga, quibus fluxus menstruus a qualicunque causa impeditus revocari posse creditur.

Curatio caufarum menostasiae earundem differentiae accommodanda est, & primum perficienda

1. Plethora suis signis dignoscenda venae-sectionem primum in brachio, dein in pede instituendam, victum modicum, potum multum tenuem, imprimis serum lactis desiderat.

2. Inopia sanguinis methodo, quae allatae contraria est, reparanda & juvanda est.

3. Lentor & visciditas humorum communiter juncta cum laxitate solidorum per pallidum & leucophlegmaticum corporis habitum dignosci potest; tumor hydropicus quandoque in hoc casu adjunctus initio per diuretica, ut cremorem tartari solubilem, infusum juniperinum debellari, & abigi debet, alias motus corporis frequens & validus; (novi matronam per duos annos multis remediis & exercitio corporis multiplici, forti, ad revocandos menses frustra usam, cui diligens nentis labor fluxum illum restituit.) Frictio corporis totius quotidiana per pannum laneum, roborantia medicamina, imprimis martialia, ut vinum roborans ad cochleare majus bis terve per diem, quam maxime autem pilulae aperientes cum marte ad grana decem aut plura ter indies conveniunt, quae

non raro effectus morbosos tollunt remanente tamen menostasia.

4. Rigiditas solidorum, ut causa e laborioso vitæ genere, ætate provectiore, temperamento cholérico aut melancholico concludenda, potus largos diluentes uti serum lactis, semicupia crebra ex aqua tepida ad fibras relaxandas poscit.

5. Sensibilitas nimia, indeque spasmodica vasorum constrictio, per hysterica affectionem concomitantem cognoscenda, juvatur antihystericis remediis imprimis cum roborantibus junctis, quales sunt pilulæ aperientes cum marte, quæ ad grana decem vel plura bis terve per diem porrigi possunt; convenit quoque semicupium tepidum.

Curatio emmenagoga, cujus immediatus scopus est sanguinis versus uterum derivatio & incitatus motus, aptum habet locum, postquam vitia, menostasiæ causæ, supra allata methodo debellata & quodammodo correctæ sint; hoc respectu quadrare videntur & adhiberi solent.

1. Resolventia, ut borax vel inde paratus cremor tartari solubilis, scilicet ejus uncia in octo aquæ unciis soluta et ad cochlearia duo majora bihorio porrecta, in plethoricis & rigida fibra donatis potissimum conveniens, succus expressus herbarum recentium, imprimis plantæ radicisque taraxaci, tempore verno etiam prodest.

2. Stimulantia & præfertim motum vasorum abdominalium incitantia, uti extractum aloes, myrrhæ, hellebori nigri, crocus, indeque parata composita sc. pilulæ balsamicæ ad grana viginti omni vespera sumenda, nec non elixirum aperitivum Clauderi ad guttas sexaginta ter indies, qvalia utraqve simultaneo tempore adhiberi possunt, non modo ad fluxum provocandum, sed etiam ad eundem, si non rito modo procedat, conservandum, hæc remedia sub laxitate solidorum, & lentore humorum potissimum quadrant. Quatenus incitans proficuum etiam judicari potest emeticum post debitam contra causas menostasiæ peractam præparationem merito tentandum, attamen caute, semel enim inde ortum vidi vomitum cruentum.

3. Derivantia sangvinem versus inferiores corporis partes & uterum, qvalia sunt pediluvia & femicupia tepida crebra, balneum vaporis ex aqua calida simplici, vel cum herba arthemisiæ cocta e sella versus uterum directi; clysmata frequentia emollientia, oleosa, aut cum assa foetida imprimis in hysteriis parata. (Exempla sanata vide diar. 1785, Januar. 6, August 6, & 1786, Octobr. 7.) Hirudines circa pudenda sex circiter triplici vice post elapsum mensem repetiti nonnullis profuere.

Symptomata menostasiæ ætate, qua menstrua naturaliter cessant, non raro occurrunt, quando-

que per motus febriles crebros vel per congestionem fat periculofam ad caput aut pectus se conferentia, quos affectus medicum oportet tempeſtively explorare, avertere et fugare præſertim temperantibus et venæſectione.

G E N U S III^{tium}.

HAEMORRHOIDES s. MORBUS HAEMORRHOIDALIS.

Eſt fluxus ſanguinis ex inteſtino recto proveniens, nec non concursus ſymptomatum cum illo nexum habentium.

Differentia morbi hæmorrhoidalis triplex eſt

1. Hæmorrhoides fluentes ſ. fluxus ipſe ſanguinis e vasis inteſtini recti vario modo, gradu & tempore procedens; quandoque tantum ſub & cum dejectione alvi, quandoque etiam extra illam vel majore, vel minore quantitate, vel absque ordine reverſionis, vel ad ſatis certa tempora, ſive omnis menſis, ſive rarius.

2. Hæmorrhoides coecæ, ſ. tumores minus magiſve molles dolentes, vel non dolentes, aut circa orificium ani locati, aut in cavo inteſtini recti, illi hæmorrhoides externæ, hi internæ vocantur.

3. Molimina hæmorrhoidalia, sub quibus intelligo varias affectiones molestas ita cum fluxu hæmorrhoidali nexas, ut hoc impedito exfurgant, eodemque procedente evanescant. Hæc variam indolem & sedem habere possunt.

a) In capite: dolor, gravitas, stupor, vertigo, aurium susurrus, hæmorrhagia narium, imò apoplexia.

b) In pectore: dyspnoea, oppressio, tussis, dolor vagus, palpitatio cordis, hæmoptysis.

c) In abdomine, cardiæ oppressio, expansio, anxietas, dolor colicus, lumbago, pruritus intestini recti, tenesmus molestus, stranguria, mic-tus cruentus, mucosus.

Causæ antecedentes morbi hæmorrhoidalis

1. Plethora, indeque citati naturæ conatus ad superfluum ejiciendum juxta differentem ætatem ad diversa loca directi, in junioribus ad caput, in adolescentibus ad pectus, & ætate post trigésimum annum incremente ad vasa hæmorrhoidalia.

2. Obstructio s. sanguinis circulatio difficilis & impedita in vasis & visceribus abdominalibus imprimis hepate, per quod maxima pars sanguinis abdominalis reduci & transfluere debet, sanguis enim tali modo e vasis obstructis exclusus ad alia ut & hæmorrhoidalia copiosior affluit illaque expandit, tumefacit, dilatat, imò dirumpit.

3. Alvi segnis, difficilis, dura excretio, ni-

mia hinc collecta fecybala comprimunt vasa intestinalia & sanguinis circulum allato modo, hæsum & inæqualem producunt. Nisi fortes depressorii difficilem illam dejectionem promovere molientes similem compressionem vasorum noxiam efficiunt.

4. Graviditas præsertim ultimum illius tempus, sub qua etiam uteri volumen vasa abdominalia comprimit & circulum lædit.

5. Motus corporis validi potissimum, qui sanguinis affluxum versus intestinum rectum dirigunt, uti equitatio, vectio protracta, imprimis in viis asperis, concubitus nimius.

6. Nonne etiam materia arthritica vel podagrica ad intestinum rectum conversa irritationem, spasmus, circulationem depravatam, itaque affectus hæmorrhoidales inducere potest? saltem hosce sub aggressa podagra mox evanuisse observavi.

Causa proxima.

1. Fluxus & tumorum hæmorrhoidalium est immoderata sanguinis & humorum congestio in vasis hæmorrhoidalibus per allatas producta causas, conspirante singulari illorum vasorum fabrica non valvulosa, ob quam sanguis contentus ad remoram pronior est.

2. Moliminum hæmorrhoidalium est congestio sanguinis per hæmorrhoides solito evacuati, jam vero retenti, ad alias corporis partes, inde-

que eamdem distensio dolorifica, & functionum variè læsio.

Diagnos

1. Fluxus hæmorrhoidalis f. hæmorrhoides fluentes cognoscuntur eo sanguine per anum effluente, excrementis tamen non commixto & absque torm^{en}tibus abdominalibus, quales notæ ad dysenteriam pertinent, illamque a nostro morbo distingunt.

2. Tumores hæmorrhoidales f. mariscæ, externæ oculis manifestæ sunt, internæ e dolore & sentito obstaculo in recto concludi possunt.

3. Molimina hæmorrhoidalia æstimanda sunt symptomata sub hoc nomine allata in subjectis, quibus fluxus hæmorrhoidalis solitus suppressus vel retentus est.

Prognosis

1. Utilis & salutaris judicari potest fluxus hæmorrhoidalis post 30mum ætatis annum proveniens modicus & cum euphoria procedens, non solum ad morbos varios præcavendos sed etiam tollendos, uti sanguifluxus varios, affectiones capitis et pectoris, ipsumque asthma proficuus.

2. Indifferens censendus est fluxus hic accidentalis e vehementi corporis motu, graviditate, nisu depressorio validiori excitatus.

3. Inutilis & noxius est ille fluxus, juniore ætate superveniens, enormis, debilitans, & cum signis obstructi hepatis junctus.

4. Tumores hæmorrhoidales non dolentes pluribus annis adesse possunt absque notabili incommodo, dolentes autem & inflammati in abscessus & fistulas anı verti possunt.

5. Molimina hæmorrhoidalia post subito suppressum fluxum periculosa judicentur, apoplexiam vel pectoris destruentem morbum inducere valentia, vix prorsus cessant absque reverso fluxu; alias per plures annos durare possunt absque periculo vitæ sub convenienti medela præcavendo.

Curatio.

1. Salutaris hæmorrhoidum fluxus ipsi naturæ relinqvendus & non turbandus est; abstinentia ab animi & corporis violentis motibus victu immodico, & refrigerio imprimis immediate intestinum rectum afficiente imperanda est.

2. Suppressus hæmorrhoidum fluxus cum insequente incommodo notabili capitis, pectoris vel abdominis revocari tentabitur.

a) Missione sangvinis vel e vena pedis, vel præsertim per hirudines tumoribus hæmorrhoidālibus, si hi præsto sint, applicandas.

b) Vapore aquæ calidæ cum herbis emollientibus coctæ ad intestinum rectum semel aut bis per diem admissio.

c) Laxantibus alvum; uti lacte sulphuris cum nitro vel cremore tartari ad partes æquales, unde cochleare minus bis terve indies sumitur, sero lactis e manna calabrinæ uncıis duabus, &

crēmoris tartari uncia dimidia parato, aloetica in temperamentis succulentis phlegmaticis non incongrua sunt; motusque corporis diligens quoque fradendus est; de victione in locis lapidosis hunc fluxum revocatum vidi.

3. Hæmorrhoidum fluxus vel tumores, qui juncta habent signa obstructi hepatis, medelam huic convenientem memoratam de hepatalgia requirunt.

4. Fluxus hæmorrhoidalis manifesto nimius atque debilitans venæsectionem, dein serum lactis mox laudatum vel aluminosum desiderat. His non juvantibus, mixtura acida bihorio, vel pulvis corticis peruviani ad scrupulum cum corticis cascarillæ granis sex ter per diem exhiberi possunt.

5. Tumores hæmorrhoidales in universum talia adminicula opus habent, quibus alvi apertura facilis redditur & non impeditur. Victus obstruens vitandus est, & eccoprotica non irritantia uti pulvis e lacte sulphuris supra laudatus pro necessitate adhibendus. Extus ad tumores modice dolentes conveniunt balneatio frequens per aquam frigidam, & unguentum camphoratum album vel mucilago feminis cydoniorum cum adjuncta octava parte laudani liquidi inungendum, major dolor ad inflammationem tendens venæsectionem, hirudines circa anum, cataplasma saturninum desiderat nec non camphorato-nitrosa intus sumenda, hisce auxiliis cito non cedens aut dimi-

nuta inflammatio minatur abscessum, cataplasmate emolliente maturandum, & quam primum potis est, incidendum, ut fistula præcaveatur.

6. Molimina hæmorrhoidalia communiter talem desiderant opem, quæ eorundem indoli acutæ vel chronicæ convenit, si inflammatoriæ videantur hæc molestiæ, venæsectio & temperantia, uti supra memoratus pulvis nitrosus cum lacte sulphuris; si autem nervosa sint ex hoc fonte derivata symptomata, ut vertigo & dyspepsia, aquæ pyramontanæ in usum trahendæ sunt, sub signis obstructi hepatis huic conveniens medicina porrigenda est; ad alvum segnem movendam optime quadrat solutio salis anglicani jejunò ventriculo propinata; medicationem drasticam irritantem ad hunc fluxum provocandum adhibere est frustraneum opus & symptomata deteriora reddit.

7. Diæta hæmorrhoidariis quibuscunque congrua exigit a) victus debitam rationem & electionem sc. abstinentiam ab omnibus, quæ alvum obstitant, farinaceis, lacteis, pisces, pomis terreis, pane recenti, vel triticeo, nec non a calefacientibus nimis, spirituosus, aromaticis; b) motum corporis debitum, crebrum, modicum, haud vero nimis violentum, aut talis indolis, e quo hunc morbum supra deduxi.

Datur fluxus ex intestino recto mucosus quandoque acris & dolorem excitans, e mariscis interdum manifesto exsudans, qui hæmorrhoides

mucosæ appellatur; levis hæc affectio sæpius nulla ope indiget, vel gravior per lavationem ex aqua frigida mitigatur, vel pertinacior medicamen laxans pro evacuanda acrimonia desiderat.

ORDO II^{dis.}

ALVI FLUXUS s. FLUXUS INTESTINALES VITIATI.

Sunt evacuationes primarum viarum f. tubi intestinalis quoad modum, copiam, indolem a naturali ordine discedentes.

Genera in hoc ordine contenta ratione loci & materiæ evacuatæ differentia quintuplum constituunt numerum sc. Vomitum, Choleram, Diarrhoeam, Dysenteriam, Alvi obstipationem.

GENUS I^{nm.}

VOMITUS.

Est ejectio contentorum in ventriculo & vicinis intestinis per os. In plures species juxta variam originem differentes hoc genus dispescitur.

VOMITUS IMPURITATUM.

Est vomitus e materiis acerbis & irritantibus in ventriculo contentis ortum trahens.

1. E cibis aut nimis aut indolis corruptæ, nauseosæ, quæ causa exploratione prægressi victus detegitur, vomituque ipso vel spontaneo, vel promoto per ingestam aquam tepidam largam tollitur, interdum emeticum modicum requiritur. Etiam fordes excrementitiæ non satis evacuatae tali vomitui ansam præbere possunt clysmata imo repetita desiderantes.

2. E biliosa acrimonia, quæ per saporem amarum oris & ejectæ materiæ, linguam fordidam, vertiginem quandoque adjunctam indicatur, atque per emeticum & dein laxantia removetur.

3. Ex acida acrimonia etiam per saporem talem ejectæ materiæ denotata, atque per antacida, uti magnesiæ albam, aquam calcis vivæ, animum rhabbari, potum crebrum et largum aquæ frigidaë debellanda.

4. E vermibus ventriculum irritantibus, per vomitum aut alvum ejectis; si e passione & opprèssione ventriculi vermes ibidem hospitari suspèctum reddatur, emesis artificialis convenit, dein vermifuga solita atque laxantia (vide diar. 1785, Jul. 5.)

5. E venenis ingestis, in qvali casu oleum vel solutio saponis larga copia sumtum & vomitum salutiferum promovet, & involvendo prodest.

6. Ex acrimoniis morbosis ad ventriculum depositis, uti arthritica, rheumatica, cui causa opponenda est medela supra contra arthritidem anomalam commendata, vel exanthematica a peripheria corporis retropulsa, scabiosa, herpetica, in quo casu vesicatoria artubus, balnea tepida, intusque mucilaginosae conveniunt.

Species II^{da}.

VOMITUS NERVOSUS.

Est vomitus e sensibilitate nimia ventriculi ortum trahens absque irritamento per se ad hunc effectum sufficienti.

1. Ex hysteria per suas notas designata, qvalis vomitus quandoque levior sponte transit; pertinacior requirit julapium salinum, pulverem antemeticum, epithemata aromatica cardiæ applicita, laudanum liquidum Sydenhami, & alia antihysterica supra contra talem morbum laudata.

2. E particulari debilitate ventriculi (vide diar. 1787, Maj. 6, ubi tandem assa foetida opem præstitit & Noyembr. 4, ubi alvi segnities tanquam causa occasionalis remota fuit, itaque morbus sa-

natus nec non 1784 Septembr. 5 & 6, ubi abstinencia congrua ad vim ventriculi restituendam juvit.) Profuit interdum fectum lactis aluminosum, semel essentia cinamomi.

3. E graviditate præsertim illius mensibus primis, quandoque omnibus ad partum usque absolutum; tentari solent varia, liquor anodynus mineralis, aqua menthæ, laudanum liquidum cum vel sine effectu.

4. E navigatione inconsueta, qualis vomitus vix ullo compefcitur modo; vinum, panis durus, abstinencia a pingvibus ad illum præcavendum præsertim forsan quadrant.

5. E sympathya s. affectione aliarum corporis partium, quæ per consensum nervorum influxum habet in ventriculum, uti morbus hepatis, præsertim calculi vesicæ felleæ (vide diar. 1785, Octobr. 4,); calculi renales; capitis vehementes dolores & violenta læsio, (vide diar. 1786, April 15.)

6. Ex agitatione febrili ventriculum ipsum commovente in variis febribus sæpe occurrente, uti variolosa, morbillosa, scarlatina, intermittenti; quamvis nullæ eruditates adsint, vel sufficientibus evacuantibus remotæ sint; in quo casu iulafalinum pium vel pulvis antemeticus potissimum convenit.

7. Ex inflammatione ventriculi vel vicini tubi intestinalis, qualis vomitus symptoma est ga-

stiritidis, per ejusdem notas cognoscendus, & illius medelam desiderans.

Species III^{tia}.

VOMITUS ILEUS.

Est vomitus, per quem materia manifesto excrementitia sc. colorem, saporem, odoremque stercoreis habens ejicitur.

Symptomata

1. Vomitus ipse initio ingestorum potus, aut alimenti dein increfcens cum ejectione revera stercorea.

2. Abdominis molestiæ variæ, anxietas, expansio, eructatio maleolenta, dolor fixus imprimis umbilicalis, singultus, pertinax alvi obstipatio.

3. In reliquo corpore pulsus, saltem sub increfcente morbo acceleratus, debilis, urina parca rubra, prostratio virium, sudor pingvis, cessatio vomitus, citaque mors.

Causæ antecedentes sunt quæcunque obstacula in crassis intestinis vel sine tenuium hærentia & transitum contentorum impediencia sc.

1. Tumores & excrescentiæ in tubo intestinali generata, atque canalem plenarie obstruencia.

2. Angustatio notabilis intestinorum vel per inflammationem (vide diar. 1783, Novembr. 10, vel per spasmus, vide diar. 1783, Januar. 5,) vel

per callosam indurationem, cujus exemplum unicuique me vidisse recordor.

3. Hernia incarcerata, per quam pars intestini comprimitur & transitus interrumpitur; volvulus s. susceptio unius intestini partis in altera parte eundem effectum producere valet, (cujus notabile exemplum tradit diar. 1785, Septbr. 10.)

Causa proxima est naturæ nîsus evacuatorius propter obstaculum in parte intestinali inferiori sursum versus directus; probabilius est, generationem materiæ excrementitiæ in tenuibus intestinis vi remoræ effectam statuere, quam ejusdem propulsionem & ascensum ex intestino colo, cujus valvula magna motum talem impedit.

Diagnosîs

1. Ipsius morbi facilis e definitionis notis habetur.

2. Causarum petenda est reliquum ægroti statum investigando, si inflammatio in culpa sit, hujus signa sese produnt, si hernia, exploratione abdominali semper in hoc morbo instituenda illa detegitur, spasmodicam constrictionem subitaneus morbi accessus, ejusdem intermissio, absentia inflammationis & herniæ denotant, tumores chronicos intestinorum & callosas constrictiones e lento morbi incremento et induratione quandoque palpabili concludere licet. Vvolvulus vix alia habet signa quam inflammatio intestinalis nisi forsan tenesmum cum excretionem modicam mucosam.

Prognosis & curatio morbi Ilei juxta causas ejusdem varias instituendæ sunt.

1. Ex inflammatione ortus talis vomitus antiphlogisticam methodum desiderat, vero tamen per os ejecto stercore, sera sæpius paratur medicina.

2. Hernia incarcerata opem chirurgi citissimam requirit. (Volvuli, arte semper insanabilis, per naturam sanati exemplum vidi in Nosocomi Fridericiano; æger nempe post colicam septem hebdomadam cum vomitu crebro pertres primas septimanas, alias alvo crebre et liquide aperta deorsum evacuabat partem intestini coli ad ulnæ circiter longitudinem; sub blanda diæta æger sensim convaluit et excrementa naturalis consistentiæ sensim abiere.)

3. Spasmus intestinalis hunc morbum efficiens enematis emollientibus oleosis, vel antispasmodicis, uti cum assafoetida, cataplasmate simili in abdomine, aqua frigida, opiatis uti laudani liquidi guttis decem bihorio, donec spasmus compescatur, & dein blandissimo laxante, uti oleo ricini americani, juvabitur.

4. Tumores chronici & callositates intestinorum nullam medelam admittunt, sed mortem necessariam vel citius per inflammationem & gangrænam, vel forsan lentiori & hæctico modo inducunt.

Species IV^{ta}.

VOMITUS HECTICUS s: EMETATROPHIA.

Est vomitus ingestorum diu durans, tabem corporis sensim incrementem demum funestam inducens.

Symptomata & signa

1. Vomitus ipse ingestorum, initio præsertim solidorum, dein etiam fluidorum, haud statim post assumptionem, ut in gastritide, sed post horas plures vel pauciores ab ingestione elapsas.

2. Sensus molestus gravativus ventriculi post ingesta, evacuato per vomitum ventriculo evanescens, eructatio frequens malefapida, communiter acida.

3. Alvi segnities & obstipatio, necessarius effectus rejectionis ingestorum per vomitum, quamdiu fluida retinentur, minoris gradus, incremente morbo pertinacior.

4. Contabescencia corporis magis magisque adaucta, demum febrem secum ducens, atque funesta.

Causa hujus mali est obstaculum non auferendum in orificiis ventriculi, imprimis inferiori, hærens, transitum ingestorum & contentorum e ventriculo ad intestina impediens, vel callosæ con-

strictiones, vel tumores varii hoc obstaculum constituunt (vide diar. 1782, Januar. 6, 1785, Maj. 6, & 1787, August. 9, & Septembr. 6,) vel figura et situs ventriculi perversa (vide diar. 1786. April 11.)

Prognosis semper lethalis, adeoque nulla curatio locum habet, tempus morbi indefinitum est, tenuia, blanda, lactea alimenta potissimum conveniunt.

GENUS II^{dum}.

CHOLERA.

Est vehemens, crebra, dolorifica evacuatio per vomitum & alvum simultaneo tempore procedens.

Symptomata.

1. Evacuatio ipsa descriptæ indolis, per quam larga materies biliosa ejicitur.
2. Molestæ sensationes variæ abdominis nausea, anxietas, cardialgia.
3. In reliquo corpore, pulsus debilis, virium depressio, crampi dolorifici artuum imprimis crurum, tendinum subsultus, lipothymia.

Causa hujus morbi merito statuitur materia acris putredinosa partim per corruptam ingestorum indolem, partim per æstivum calorem generata, intestina irritans & ad motum evacuatorium

enormem excitans, menses æstivi calidi Julius & Augustus huic morbo ideo proprium tempus observantur.

Diagnosıs hujus morbi facillime e notis in definitione exhibitis depromitur.

Prognosis; cholera morbus licet per se atrocissimus & vix non periculosus arti tamen tempestivæ & convenienti semper et quidam intra paucos dies cedit.

Curatio peragenda est.

1. Diluendo acrimoniam irritantem per largum & frequentem potum præprimis aquæ puræ frigidæ.

2. Compescendo enormes motus evacuatorios, cui scopo optime & quasi specifico modo satisfacit liquor nervinus morbo statim opponendus, ad guttas viginti omni hora potissimum in aqua frigida porrigendus & continuandus, donec vomitus fileat, posthac rarius ter sc. per diem præbitus utplurimum ad integram restitutionem sufficit.

3. Evacuationem materiæ morbosæ, si forsan post domitos naturæ validos motus superesse videatur, promovendo & complendo, in quem finem pulvis eccoproticus e rheo & magnesia mane & vespera ad unum alterumve diem exhiberi potest.

4. Victum convenientem eligendo, initio blandum farinaceum & e granis cerealibus paratum, posthac alia tamen digestu facilia alimenta.

GENUS III^{ium}

DIARRHOEA.

Est alvi fluxus naturali frequentior, liquidior, copiosior, tamen absque commixto sanguine.

Causa proxima diarrhoeæ haud alia esse potest quam motus intestinorum evacuatorius enormis, s. resistentiis a parte foecum, sphincteris, valvularum solito major.

Causæ antecedentes in universum duæ

1. Contentorum intestinalium acris & irritans qualitas motum nimium provocans, nec non liquidior indoles debitam resistentiam non efficiens.

2. Intestinorum ipsorum

a) Sensibilitas nimia præsertim post mucum naturalem ablatum inducta, vel etiam per hysteriam.

b) Laxitas notabilis, ob quam valvulae haud debitam resistentiam progressui contentorum opponunt.

c) Obstructio quoad vasa resorbentia notabilis, ita ut debito liquidior fiat & maneat contentorum indoles.

Medicationis in diarrhoea universalis regula requirit investigationem illius, quæ inter allatas possibiles causas præsens est, atque electionem adminiculi tali causæ detectæ congrui s. oppositi,

quo scopo diarrhoeæ genus in varias species distingvere quadrat.

Species Ima.

DIARRHOEA IMPURITATUM.

Est diarrhoea e contentis ipsis intestinalibus nimis irritanti & acri indole præditis fuscitata.

Symptomata.

1. Dolorifica, interdum fat levis sensatio intestinalis dejectiones prægrediens & annuncians, illisque peractis cessans.

2. Lingva alba, sapor sæpe alienatus biliosus, amarus, acidus cum adjuncta eructatione similis indolis, appetitus quandoque prostratus quandoque illæsus.

Causæ antecedentes

1. Cibi vel potus ingesti, multi diversi indolemque aut jam acrem aut acrimoniæ cujusdam rancidæ, putrescentis, acidæ facile capacem habentes.

2. Contracta in intestinis corrupta & irritans qualitas ingestorum & contentorum, vel ob debilitatem intestinorum, adeo ut digestio haud rite absolvi possit, vel ob nimiam remoram s. alvi obstipationem completam vel incompletam, qua excrementorum acrimonia & copia augmentur, vel forsan ob calorem nimium atmosphæræ & fe-

brilem, quo putredo & acrimonia ingestorum promoventur, ob quam rationem diarrhoea æstivo tempore frequentius observatur.

3. Vermes intestinales, qui interdum diarrhoeam provocant.

Diagnosis hujus diarrhoeæ partim e dictis symptomatibus, partim ex causis prægressis examinatis & detectis, partimque ex absentia signorum, quæ alias diarrhoeæ species indicant, depromenda est.

Prognosis; diarrhoea hæc, beneficium naturæ dicenda, semet ipsam sæpe curat & facta, quæ requiritur, evacuatione sponte cessat, sub rita igitur medela morbus curatu facilis habendus est.

Curatio, quando ab ægroto ipso desideratur, aut ob notabiliorem morbi gradum vel durationem requiri videtur, consistit in expulsiōe & correctione materiæ nocivæ morbificæ, cui scopo conveniunt.

1. Rhabarbarina, initio pulvis rhei ad drachmam dimidiam vel integram exhibetur aut solus, aut cum æquali parte magnesiæ albæ, si e sapore, ructibus vel causa prægressa acidum peccans derivari possit, insequenti tempore anima rhei ad unciam mediam cum liqvoris anodyni mineralis drachma ad guttas sexaginta propinetur, & sufficit ut plurimum. Si prægressa obstipatio diuturnior fuerit, oleum ricini præsertim convenit.

2. Emesis per ipecacuannhæ scrupulum vel drachmam dimidiam, quando sc. adjuncta sunt signa biliosæ cruditatis, vel pertinacior fuerit morbus, sequens, si opus sit, medicatio per rhabarbarina ut dictum est, compleri potest.

3. Diluentia & involventia, blandaque potus & alimenta, ut decocta e granis cerealibus confecta, abstinencia a carne, cerevisia, oleribus.

4. Sistentia mitiora, supra dictis non sufficientibus apponenda, uti decoctum album ad patellam minorem bihorio; si e purgantibus fortioribus producta sit diarrhoea, qualis hypercatharsis nominari solet, mucilaginosæ, uti infusum radicis saleb ad cochlearia duo bihorio, vel mucilago gummi arabici sola, aut cum syrupo diacodii ad cochleare majus bihorio quadrant. Interdum mucilaginosæ apponenda est tinctura rhei vinosa cum octava parte liqvoris anodynæ; convenit quoque cortex cascarillæ, cujus pulveris grana quatuor cum duobus granis moschi orientalis bihorio sumpta in duobus gravissimis casibus optimum effectum præstiterunt.

Species II^{da}.

DIARRHOEA METASTATICA.

Est diarrhoea e noxia acri materia, quæ ab aliis corporis partibus transfertur & in tubo intestinali deponitur, producta. Huc referri debent.

1. Diarrhoea ex refrigerio f. e materia perspirabili suppressa & ad intestina conjecta, per aliam manifestam causam cognoscitur; initio pulvis rhei porrigi potest, dein calor lecti, potus calidus, liquor nervinus solus vel alternatim cum tinctura rhei vinosa aliquoties per diem sumtus ad perspirationem restituendam conveniunt.

2. Diarrhoea ex arthritide anomala f. materia arthritica ad intestina deposita, ex immediata successione post evanidos artuum dolores dignosci debet, & methodo supra de arthritide anomala commendata tractari.

3. Diarrhoea purulenta, per quam pus ejicitur e parte quadam vicina, hepate, liene, mesenterio suppuratis proveniens; raro hæc ejectio salutaris, sæpius signum destructionis visceris irreparabilis, & funesta putanda est; lactea, farinacea blanda, gummi arabicum, infusum corticis peruviani vel radicis gei urbani conveniunt.

4. Diarrhoeæ symptomatice variæ, scorbutica, scabiosa, hydropica, phthifica, febrilis multiplex, e materia morbifica ad hosce morbos pertinente, ad intestina deposita ortum trahentes, quarum curatio in tractatu de ipsis morbis primitivis memoratur.

Species III^{ta}.

DIARRHOEA HABITUALIS.

Est diarrhoea diu sc. ad plures menses imo annos protracta, utplurimum absque ullo abdominis dolore.

Causæ antecedentes testante experientia esse possunt.

1. Intestinorum ipforum laxitas, præsertim sine dubio in valvulis, resistantiam ideo non debitam contra progressum contentorum præstantibus, vel eorundem sensibilitas nimia per mucis naturalis privationem inducta, qualis effectus ex ipsa diarrhoea protracta intelligitur. (Vide diar. 1785, Febr. 8, & Jul. 7 & Novembr. 5 &c.)

2. Mesenterii vitium diversum, quo debita resorptio chyli impeditur, ut glandularum notabilis obstructio, (vide diar. 1783, Januar. 7, & 1784 Mart. 13, & 1786 Mart. 9 & Jul. 13,) ejusdem pingvedo enormis (vide diar. 1787 Novembr. 9,) & demum illius hydrops (vide diar. 1786 April 10. Mihi notum est exemplum talis diarrhoeæ ex glandularum mesenterii obstructione ortæ et per plures annos recurrentis cum dolore et excretionem quandoque sangvineam atque corporis contabescencia in puella novem circiter annorum per mercurium dulcem ad grana duo cum dimidio opii ter per diem porrecta sanatæ.)

3. Viscerum aliorum abdominalium, hepatis præfertim infarctus notabilis, (vide diar. 1784 Decembr. 6, & 1785 April 8.)

Diagnos. ipsius diarrhoeæ habitualis e notis in definitione contentis facile deducitur, causæ autem difficilius & incertius cognoscuntur; obstructions & mesenterii & aliorum viscerum suis propriis signis præfertim tumore & induratione palpabili detegendæ sunt, hac non præsentē intestinorum ipsorum supra memoratam labem adesse concludere licet.

Prognosis

1. Per se talis diarrhoea vix non semper incurabilis est, e quacunque causa proveniat, tamenque sensim incrementem demum funestam inducit cum vel absque prægresso hydrope.

2. Per artem juvamen possibile haberi potest in casibus, ubi signa viscerum infarctas notabilis haud præsto sunt, sub hisce autem nulla spei ratio est.

Curatio in genere per mucilaginosam & leniter adstringentiam peragenda est, ut

1. Radicem gei urbani, cujus pulveris vel simplicis, vel cum æquali copia gummi arabici compositi, cochleare minus bihorio porrigitur, (exempla ita sanata, vide in diar. 1782 Novembr. 2, & 1783 August. 3, & 1784 Octobr. 5, & 1785 April 4, & 1786 Mart. 7, & Decembr. 3, & 1787 Jun. 6.)

2. Pulverem compositum e radicis gei urbani partibus duabus, corticis cascarillæ & finiarubæ ana parte una, cujus drachma dimidia exhibenda est bihorio (vide diar. 1785, Februar. 8, & Jul. 7, & Novembr. 5, & 1786, April. 5.) Pro-
fuit quoque extractum cascarillæ drachma in li-
quoris nervini uncia soluta et ad guttas quinqva-
ginta aliquoties de die porrecta.

3. Radicem ipecacuannhæ, cujus parca do-
sis, ut granum dimidium bihorio sumtum, sanabat
ægrotum (vide diar. 1784, Januar. 6.)

4. Victum convenientem, blandum, mucila-
ginosum, e gelatinis animalium, pane albo, farina-
ceis, lacteqve paratum.

S p e c i e s IV^{ta}.

DIARRHOEA INFANTILIS.

Est diarrhoea infantes intra biennium circi-
ter primum molestant, duplex præsertim:

1. Diarrhoea e dentitione s. tempore, quo
dentes prorumpunt, sese exferens; hæc in genere
salutaris, ut non injusto creditur, convulsionem
prævertens, adeoque modica, ut remediis vix
indigeat; si quid postularetur, anima rhei cum
qvinta parte liquoris anodini mineralis ad guttas
circiter viginti ter indies exhiberi potest.

2. Diarrhoea cruditatum, partim ex inge-
stis cibis tenellæ ætati non convenientibus, non

raro sub forma cruda exoneratis, in quo casu abstinencia a tali victu & anima rheī supra laudata sufficiunt, praesertim ex acido praedominante per viridem colorem excretorum cognoscendo, & optime per pulverem infantum bis per diem ad scrupulum sumtum debellando; si gravius sit malum, decoctum album ad unciam mediam omni hora vel bihorio utiliter exhibetur; raro fortiora sistencia ut tinctura rheī vinosa, essentia cascarillae aut gei urbani desiderantur.

Fluxus coeliacus dicitur diarrhoea, per quam materia lacti similis ejicitur, ab auctoribus nonnullis memoratus, mihi nunquam obviis, & *Li-enteria* s. diarrhoea, per quam ingesta sub forma cruda s. nondum digesta per alvum prodeunt, qualis excretio ut gradus diarrhoeae, haud ut singularis species cenferi debet.

GENUS IV^{tum}.

DYSENTERIA.

Est fluxus alvi frequens, parvus, mucosus vel mucofo-sanguineus, tormina abdominis & tenesmus molestus secum ducens.

Symptomata & effectus dysenteriae.

1. Frequentia dejectionum ad diversum tamen numerum; sunt, qui centies circiter

per nycthemeron, alii rarius ad alvum deponendam cogantur.

2. Tormina & dolor abdominis lancinantis ut plurimum indolis, inconstantia, excretionem præcedentia & post eandem silentia, vel minuta, sedem communissimam quidem circa umbilicum, interdum in aliis regionibus sc. hypogastrica vel lumbari habentia, raro dolor talis fixus observatur. Magis accidentales per hunc morbum possibiles abdominis molestiæ sunt nausea, vomitus singultus, sapor malus.

3. Tenesmus s. molesta sensatio intestini recti conatum desidendi secum ducens, non raro hic inanis est s. nullam excretionem provocans, quandoque post fluxum ipsum devictum remanet interdum cum adjuncta stranguria molesta.

4. Indoles excretionis rarissime excrementitia, sed mucosa, sæpissime mucoso-sanguinea, raro mere sanguinea, foetida minus magisque, sub progressu morbi in pejus viridescens, in melius stercorea, flatus communiter retinentur & abdomen expandunt, quandoque initium morbi simplicem diarrhoeam refert; dum materia excreta mere mucosa absque sanguine observatur, morbus a nonnullis dysenteria alba vocatur, veræ nilominus dysentericiæ ideam habens.

5. Motus febriles accidentaliter morbo adjuncti, quandoque frigus febrile initium morbi efficit; sæpe nullum febris symptoma adest, com-

plicata etiam esse potest dysenteria cum febre biliosa, putrida, inflammatione abdominis, atque intermittente febre.

6. Maximi gradus symptomata sunt insomnia continua, singultus, aphtæ, extremitatum frigus & pingvis sudor, deglutitio impedita, ardor internus, inquietudo insignis.

7. Reliquiæ possibiles, diarrhoea diuturna tabem inferre valens, nec non hydropicus tumor minus magisque notabilis & periculofus.

8. Reperta in defunctis sunt expansio notabilis intestini coli & recti, inflammatio, exulceratio, gangræna, deraasio tunicæ villosæ, lividus color, (vide sectionem talem in diar. 1786, Jul. 14.)

Causæ antecedentes dysenterici duplicis indolis sunt sc. externæ vel occasionales & internæ, vel disponentes, quarum concursus ad morbum hunc producendum necessarius videtur.

Externæ causæ testante experientia sunt sequentes seorsim vel conjunctim agentes.

1. Aeris certa constitutio sc. calor notabilis diurnus & frigus nocturnum, qualis locum habet mensibus Julio, Augusto, Septembri, qui tempus huic morbo proprium constituunt.

2. Perfrigerium manifestum, notabile vel per denudati & incalescentis corporis expositionem in aere frigidiori, vel per haustum frigidum largiter tempore incalescentiæ sumtum.

3. Aquæ prævæ & putrescentis indolis, dum observatum est, dysenteriam in locis hoc aquæ vitium habentibus præsertim sæviisse, intereaquæ alia vicina loca salubriore aqua donata ab illo morbo libera mansisse.

4. Ingesta prava, acria, incongrue mixta ut fructus horæi immaturi, cerevisia, & lac congelatum; ex his immediate & successive sumtis manifesto exortam observavi dysenteriam.

5. Contagium s. exhalationes ex ægrotis dysenteria laborantibus in fanos transeuntes & agentes, præsertim excrementa ipsa tale miasma effundere habentur.

Causæ internæ duæ

1. Essentialis s. specificè dysenterica corruptio, humorum imprimis contentorum intestinalium, muci & bilis acrimonia & spissitudo per diuturnum æstivum calorem sensim contracta, cui opinioni favet dysenteriae grassatio præsertim observata post æstates calidiores.

2. Accidentaliter humorum pravitas, ut in phthificis, scorbuticis, hydropicis, quos ad hunc morbum suscipiendum maxime dispositos, eodemque maxime afflictos observavi.

Causa proxima dysenteriae, qualis e dictis antecedentibus generari, & deduci potest, qualisque ad explicandos hujus morbi effectus convenit, haud alia cegitari potest, quam acrimonia sæpis-

sime saltem bilioso – putrida contentis abdominalibus maxime bili & muco intestinali inhærens.

Nexus symptomatum dysenteriae cum allata causa.

1. Ex acrimonia allata producitur insolita irritatio aut inconstans & recurrens, quatenus acrimonia illa affluit & evolvitur, aut constantior, si acrimonia fixior & evoluta sit.

2. Ex irritatione dolor, illius gradui & repetitæ actioni conformis, in medio abdomine termina, in ventriculo sitim, nauseam, vomitum; in intestino recto tenesmus efficiens.

3. E dolore tali intelliguntur.

a) Affluxus humorum præsertim mucosi principii, qualis ex. gr. in catarrho & gonorrhoea ex irritatione observatur, hinc enormis excretio mucosa per dysenteriam possibilis, sanguinis excretio partim ex eodem affluxu, partim ex acri & corroderenti materia explicabitur.

b) Motus & contractio intestinorum adaucta duplici modo sc. & eorundem peristalticus motus crebras inducens dejectiones, & constrictio atque angustatio canalıs, ita ut vix alia quam tenuiora contenta excernantur.

c) Inflammatio intestinorum, si fixior & acrior sit materia morbifica, & illa mediante suppuratio atque gangræna.

d) Exiuvatio humorum, consumptio virium increfcens ad funestum usque gradum partim ex

enormi excretionē, partim e defectu cibi & somni inducta.

Diagnosīs

1. Dysenteria simplex & quātalis facile e notis in definitione exhibitis sc. fluxu crebro torminoso, tenesmo, excretionē mucofo-sanguinea dignoscitur.

2. Inflammatoriam dysenteriam suspectam reddunt & indicant præsertim et simul juncta dolor abdominis fixus circumscriptus, sitis insignis, lingua sicca, expansio abdominis, vomitus ingestorum, excretio fere nulla sub tenesmis licet gravissimis.

3. Dysenteriam complicatam cum febre biliosa, hujus annexa signa, ut vertigo, sapor putridus, biliosus, lingua fordida denotant; cum putrida, stupor manifestus & citavirium prostratio indicant; cum intermittente, periodicus regularis recursus vel saltem exasperatio prodit.

Prognosis dysentericæ

1. Duratio hujus morbi diversa & indefinita est, quandoque intra paucos dies transit, imprimis si faustior sit eventus, quandoque ultra mensem protrahitur.

2. Bona signa, e quibus restitutionem ægri sperare licet, sunt: 1) ægrotantis ante hunc morbum constitutio sana; 2) initium morbi, optatum medicinæ effectus præsertim admittens; 3) gradus morbi modicus, scilicet tormina haud adeo

gravia et dejectio non nimis frequens); 4. decrementum illius observatum, dolor sc. minor, dejectio rarior, solidior cum excrementis naturalibus, reversio somni naturalis; sudorem, qui a nonnullis pro bono declaratur signo, per se indifferentem observavi.

3. Mala signa, e quibus minus faustus & funestus morbi eventus timeri potest.

a) Prava corporis constitutio ante dysenteriae accessum, sc. phthifica, scorbutica, hydropica vel alia cacochymica, ætas senilis, debilitatio e prægressis morbis.

b) Gradus morbi insignis sese mox initio exferens per numerosissimas sedes absque excretionem notabili, aut levamine, insignem debilitatem, vomitum frequentem, insomniam continuam.

c) Diu durans morbus, increfcens potius quam decrefcens observatus, aut non rita & tempestiva, aut pravis adstringentibus vel calefacientibus remediis tractatus.

d) Indicia gangrænæ intestinalis, ut facies collapsa, pallido-flavescent, oculi hebetes, extremitatum frigus cum vel absque sudore primum sese in dorso manuum monstrans, pulsus celer parvus, alvus involuntario fluens, cita cessatio omnis doloris, inquietudo insignis, ardor internus.

e) Alia signa, destructionis internæ effectus uti aphtosa lingua vix in unico non mortem annuncians, excrementa purulenta, viridia foeti-

diffima non minus periculum præfagientia, atqve demum fingultus progressui & aliis allatis morbi malis signis accedens, interdum incipienti morbo junctus est fingultus, minus damnosus habendus.

Curatio dysenteriae triplicem partem continet:

1) curationem dysenteriae simplicis qvatalis, 2) curationem dysenteriae complicatae, 3) curationem prophylacticam.

Curatio dysenteriae simplicis, qvatalis, & rationi conveniens f. causae illius proximae opposita & per experientiam probata requirit: 1. evacuationem materiae morbificae, 2. correctionem f. alterationem ejusdem, 3. sedationem fluxus forsan enormis, 4. dietam his scopis congruam.

Evacuatio tubi intestinalis, præcipuam dysenteriae medelam constituens, efficienda est:

1. Per emesin & emetica, circa qvæ notanda sunt:

a) Opportunum huic medicinæ tempus, qvod semper sit curæ initium, five morbus incipiens sit, five ad tempus aliquod protractus, dummodo signa inflammationis, gangrænæ & destructionis intestinalis supra memorata haud observantur, maxime indicatur sub biliosæ saburræ com-præsentibus signis; ob hæc præsertim resurgentia etiam emetici repetitio locum habere & prodesse potest, (vide diar. 1786, Septembr. 3,) in aliis pluri-

bus emetici repetitionem mox initio morbi faciendam utilem inveni.

b) Remedium ipsum adhibendum a plurimis commendatum, mihiqve ipsi solitum est radix ipecacuannhæ ad scrupulum vel drachmam dimidiam; sunt, qvi minutas repetitas hujus medicaminis doses commendarint, qvæ methodus juxta meam experientiam ægris molestas anxietates, haud vero utilem ullam excretionem produxit; tartarus emeticus sufficienti dosi loco ipecacuannhæ adhiberi potest.

2. Per catharsin & purgantia remedia.

a) Opportunum hisce tempus constituunt absolutæ emesi proxime succedens dies, illumqve sequentes continui vel alterni pauciores, vel plures, qvamdium sub tali purgatione morbi decrementum observatur, & donec, dolor abdominis cessaverit, & excretio in naturalem qvodammodo conversa sit; si vero talis purgatio per duos, tresve dies continuata nullum morbi levamen, sed potius incrementum producat, ad alteram medicinam confugiendum est.

b) Medicamenta ipsa eligenda esse possunt:

a) Rhabarbarina sc. pulvis rhei ad drachmam mediam vel scrupulos duos exhibendus postridie post absolutam emesin, & dein alternis diebus, tempore a purgatione libero anima rhei ad guttas

sexaginta trihorio propinetur, hæc methodus leviori morbo convenit & sufficit.

β) Oleum ricini americani, ad unciam dimidiam ter per diem ad terminum supra memoratum ingerendum, præcipuum est in hoc morbo remedium ad intestina purganda; quod si non recens haberi possit, solutio mannata-oleosa ad unciam bihorio adhibenda est.

γ) Clysmata oleosa f. e decocto avenæ cum largo oleo parata semel aut bis per diem porrigenda in casibus, ubi intus sumta evacuantia nullum fecerunt effectum, & tenesmus molestus observatur.

Corrigenda & alteranda est materia morifica.

1. Diluentibus potu sc. largo blando mucilaginoso, uti decocto avenæ, oryzæ, infuso radicis althææ, quibus mucilago gummi arabici admisceri potest.

2. Antisepticiis quorum præstantissimum est spiritus vitrioli sc. mixtura acida mineralis cum mucilagine gummi arabici, cujus uncia omni hora vel bihorio ingeritur, quam sufficientem inveni in nonnullis, ubi effusio sanguinis largior sunt vel morbus cum symptomatibus biliosis aut putridis conjuncta; (vide diar. 1786, Octobr. 4 & Novembr. 6, & 1787, Octobr. 4.)

Sedantia f. sistentia, quæ in dysenteria locum habere possunt.

1. Leniora partim decoctum album, aut solum, ad patellam circiter minorem bihorio, aut cum lacte mixtum, partim anima rhabarbari cum quinta parte liqvoris anodyni mineralis ad guttas sexaginta ter quaterve indies; facta, quæ requiritur, evacuatione, itaque morbo eatenus debellato, ut modica non dolorifica alvi laxitas supersit, illa remedia mihi ad finiendam curam in usu sunt & communiter sufficiunt.

2. Opiata; quando, expurgatione intestinali per oleum ricini parata, dolor parum minutus quinimo non minutus est, laudani liqvidi guttæ quinque cum uncia infusi radicis salab vel mixturæ camphoratæ mucilaginosæ bihorio porrigendæ sunt, donec fluxus fere sedatus fuerit, cujus reliquæ non dolorificæ per roborantia, uti tincturam rhei vinosam cum liqvore debellantur anodino minerali.

Diætetikum in dysenteria regimen desiderat.

1. Aerem purum modice calidum, non multi igitur ægri in eodem cubiculo decumbere debent, integumenta corporis & stragula lecti sufficienter calida sint, & a frigore, cui ægroti pro alvo deponenda crebro exsurgentes admodum expositi sunt, omni modo possibili cavendum est.

2. Alimenta blanda, digestu facilia, quam diu morbus ipse durat, decocta farinacea, lactea, gelatina ex oryza et rasura cornu cervi parata, ova forbilia, jusculum ex intestinis pedibusque agninis

aut vitulinis tantum permittuntur; morbo fere devicto solidior cibus initio e pane albo & piscibus concedi potest, et spiritus vini gallicus aqua mixtus vel modica dosis vini præsertim rubri ad debilia intestina confortanda.

3. Animi tranquillitatem, illius pathemata enim ingrata graviora & morbi curam impedire, & eundem jam sanatum reproducere valent.

Dysenteriae complicatae curatio utrique conjuncto morbo accomodanda est.

1. Dysenteria inflammatoria s. cum inflammatione intestinali combinata desiderat.

a) Venæsectionem etiam repetitam, donec dolor fixus sublatus sit, si vero inflammatio sub progressu morbi & signis mali ominis supra memoratis superveniat, nullum e venæsectione juvamen sperari potest.

b) Emulsionem camphorata vel mixturam camphorata non acidam mucilaginosam bihorio loco alterius medicinæ, potumque solitum largum; extus linimentum volatile abdomini crebro inungatur.

c) Evacuante, quamdiu inflammatorius status continuat, per clysmata oleosa bis indies injicienda; illo autem evanido ad plenioram evacuationem promovendam, oleum ricini vel mixtura camphorata laxativa præ aliis convenit, reliqua dein curatio ut in dysenteria simplici absolvenda est.

d) Abſtinentiam ab irritantibus, uti emeticis, rhabarbaro, adſtringentibus & opiatīs. (Dyſenteriam talem antiphlogiſticis ſanatam, vide diar. 1786, Auguſt. 9, & Septembr. 4.)

2. Dyſenteria cum putrida vel intermittente febre juncta requirit emeſin per ipecacuannham & dein electuarium in hoc caſu antidyſenterici nomine dignum compoſitum e corticis peruviani, roob ſambuci ana uncia, pulveris rhei drachma & fyrupi diacodii ſuff. qvant, cujus cochleare minus initio omni hora, decreſcente morbo bihorio & dein rarius ad plenam reſtitutionem uſque adhibetur; verum in alia dyſenteriae ſpecie ab hoc remedio cavendum eſt.

Prophylactica curatio dyſenteriae, per quam ſani ab hoc morbo præſervabuntur, conſiſtit in evitatione cauſarum ejusdem ſc.

1. Infrigidationis præſertim tempore graſſantis dyſenteriae; bene tectum ideo habeatur corpus imprimis abdomen, & incaleſcentes præcipué a frigore ſibi caveant.

2. Contagii in hoc morbo valde efficaciſ variisqve avertendi modis ſc.

a) Per abſtinentiam plenariam ab his ægrotis, ſi hæc poſſibilis ſit.

b) Per atmophæræ renovationem circa ægrotos; aer liber ſæpius admittatur, acetum frigidum vel vapor acidi mineralis in febre putrida laudatus effundatur, non multi in eodem cubiculo

ægroti cohabitent, excrementa confestim efferantur, & in cavo quodam diffito deponantur, & super imposita terra tegantur.

c) Per salivationem continuam, dum cum hisce ægrotis commercium habetur; ad salivam movendam quadrat masticatio cujusdam aromatici uti radicis enulæ, angelicæ, calami, caryophyllorum &c. mihi ipsi, dum ægros tales in nosocomio congregatos curabam, in usu erat fumatio herbæ nicotianæ.

d) Per emesin validam, quamprimum signa quædam, ut vomiturius, frigus insolitum, malus habitus ventriculi contagii susceptionem reddunt suspectam.

3. Impuritatibus primarum viarum, victus sit modicus, salubris, e multifariis cibis minus compatilibus haud paratus, spirituosæ imprimis, vinum bonum rubrum intestina roborando prophylacticam vim habent, a validioribus purgantibus, dum dysenteria grassatur, etiam abstinendum est, horum enim irritatione productam noxam propria experientia me docuit.

Duplex datur affectio morbose dysentericæ ad primum aspectum similis, facile tamen ab eadem distinguenda sc. *Hepatirrhoea* s. fluxus sanguineo-ferosus vel sanguineo-purulentus per anum e vitio notabili hepatis vel mesenterii, infarctu, aut supuratione ortum trahens, hæc excretio adeoque

symptomata est & sæpius effectus hepatitidis vel hepatalgiæ, quæ in suis locis jam descriptæ sunt, & a dysenteria per absentiam torminum & dejectionum raritatem non difficulter discernenda. Altera affectio etiam symptomata, dicitur *Melæna* sc. excretio sanguinis per anum absque hujus passione, ut in morbo hæmorrhoidali, absque vitio hepatis, ut in hepatirrhoea, & absque crebra & torminosa ejectione, ut in dysenteria, quandoque ex ulcere intestinali provenit, quandoque per notabilem obstructionem viscerum imprimis mesenterii, quæ sanguinis circulationem intestinalempedit, & ut ad certa vasa copia nimia ad rupturam usque congeratur, efficit; rarus hujus morbi est casus & curam morbo primitivo competentem desiderat. Unicum mihi occurrit exemplum, in quo sanguis niger condensatus copiosus sub forma scybalorum sine febre aut alio morbo prægresso vel præfente sed cum debilitate sat notabili evacuatus fuit; intra paucos dies per decoctum chinæ acidum omni hora alternatim cum sero lactis aluminoso sanatum.

GENUS V^{tum.}

ALVI OBSTIPATIO.

Est rarior & difficilior alvi excretio, quam quæ juxta communem naturæ modum fieri debet, absque alio notabili symptomate morbofo.

Egestio quotidiana haud fecus ac ingestio ad sanitatem rite tuendam requiri & inservire videtur; saltem hæc convenientia adeo communis est, ut recti norma æstimari possit, cujus transgressio præternaturalis status s. morbi nomen meretur, licet enim hæc non paucis tolerabilis videatur abnormitas, consveta tamen diuque protracta varia veraque mala creare valet.

Effectus & noxæ e tali imprimis habituali excretionis vitio possibilia & timenda sunt.

1. Expansio nimia intestinorum ob remoram & collectionem contentorum, quandoque molesta, saltem debilitans & vim elasticam frangens.

2. Irritatio intestinorum tormina imprimis infantibus molesta, damnosaque ad epilepsiam usque efficiens, diarrhoeam spontaneam quandoque excitans.

3. Compressio vasorum intestinalium per molem contentorum producta, adeo ut sanguis in iisdem debita copia admitti & moveri nequeat, atque igitur abundantius congeratur ad alias trunci partes, quæ exinde debilitari & ad varios morbos disponi possunt, affectus hæmorrhoidales, variaque chronica mala pectoris & capitis lente hinc generari haud injusto statuitur.

Causæ antecedentes seorsim vel conjunctim obstipationem efficientes esse possunt:

1. Defectus potus & abundantia cibi solidi,

glutinosi farinacei, oleosa parte nimium destituti, vel nullo sale conditi.

2. Defectus motus corporis, quo diaphragmatis & musculorum abdominalium actio adjuvans & intestina commovens detrahitur s. diminuitur.

3. Consuetudo prava sese retinendi, ut & defectus consuetudinis hanc naturæ excretionem ad certa tempora determinantis.

4. Rigiditas & minuta sensibilitas intestinorum apud ætatem senilem; ultimum effectum, indeque segnitiam alvi etiam voracitas procreare valet.

5. Defectus bilis, cujus stimulus naturali modo ad alvum movendam requiritur; ceteris causis per factam explorationem haud detectis, allatum defectum suspicari licet, sive alia signa læsi hepatis sive nulla præsto sint.

Curatio desiderat.

1. Usus talis victus, qui experientia testatur fluxum alvi liberum reddit; potus sufficiens quinimo aquæ frigidæ largus, cerevisia, juscula carnea, olera, fructus horæi imprimis poma sydeantur, pulmentum e granis hordei contusis cum cerevisia & saccharo sumtum loco coenæ apprime convenit.

2. Abstinentioniam ab alimentis obstipantibus uti pane triticeo, pulmentis cum lacte paratis, pomis terreis, pis, pastibus farinaceis.

3. Medelam causis ipsis oppositam, quo pertinent motus corporis sufficiens imprimis ante prandium, certum desidendi tempus, præsertim si illud moneat ipsa natura; rigiditati senili convenit olei boni largus usus, minus sensibilia intestina irritamento medicamentofo, quoties opus est, moventur, vario imprimis salino absque vel cum rheo; si bilis deficiat, pilulæ e sapone cum dimidia parte rhei paratæ, pro necessitate repetendæ & quoad dosin augendæ quadrant; si vim exonerandi nimis debilem suspicari fas est, convenit infusum rasuræ ligni quassiae et dimidiæ partis foliorum fennæ frigidum mane sumendum aut pulvis eccoprotico-tonicus, aut aloe sub forma essentiae cum vel sine aliis amaris.

4. Medelam ipsius mali s. obstipationis jam præsentis & molestantis, clyisma e decocto avenæ vel lacte cum sale, oleo & forsan sacharro citissimam opem affert; si hoc recuset æger, & in mora nullum sit periculum, ore sumi possunt laxantia vel mixtura camphorato-laxativa, electuarium aperiens, oleum ricini, pilulæ contra obstructionem Ph. Dan. vet. ad grana quinque vel plura vespere, pulvis anticolicus, vel similia aut una sufficienti dosi, aut minutis dosibus ad productum effectum.

O R D O III^{tius.}

SERIFLUXUS VITIATI.

G E N U S I^{mum.}

DIABETES.

Est fluxus urinæ naturali mensura notabiliter copiosior, diu durans, emacians.

Symptomata præter allata esse possunt urinæ varia indoles sc. color citrinus vel limpidior, lacteus, sapor quandoque dulcis, sitis insignis, & quod etiam observavi, fames enormis, alvi segnities, sudoris defectus.

Prognosis & curatio hujus morbi incertæ sunt, tabes exinde letalis timeri potest, ni remediis compescatur. (Pauci hujus rari morbi casus mihi occurrere. Alter scorbuticis symptomatibus simul stipatus, per usum spiritus vitrioli levabatur, fucoco autem recenti herbarum sanatus erat. Alter in rustico idiopathicus s. primitivus erat morbus cum siti, fame enormi, contabescencia corporis, efflorescentia crustosa pasim in corpore erumpente, iterumque evanescente junctus; contra hunc morbum pluribus mensibus protractum varia tentabantur remedia roborantia, ut cortex peruvianus, antacida, diaphoretica, ut sulphurea, camphora, balneatio tepida, tandem aluminis crudi

drachmam dimidiam cum gummi arabici granis decem exhibui ter per diem saltem ad tres hebdomades sine minuta diabete, verum surrexit mox post illam medicinam sepositam febris erysipelato-fa gravis, cui nexum exanthema & faciem & fauces & artus occupabat; sanata febre, diabetes cum allatis ceteris molestiis simul cedebat. Diabeti similem urinæ fluxum e calculo vesicæ productum exhibent diar. 1787, Maj. 4. Tandem juvenem sub fluxu tali ad novem mensuras omni nycthemero & ad plures menses protracto emaciatum cum fame & siti enormi sanabant anima-rhei cum dimidia parte olei tart. p. d. ad guttas 50 omni hora alternatim cum cochleari minori pulveris ex antimonii crudii & oculorum cancrorum æqua parte confecti. Senem asthma te laborantem cum adjuncta diabete et fame enormi sanabant flores zinci ad grana duo cum magnesia bihorio sumti. Commendantur quoque nec immerito victus solus animalis et opii grana aliquot dosin semper augendo propinata mane et vespere.)

G E N U S II^{dum.}

ENURESIS s. INCONTINENTIA URINÆ

Est fluxus urinæ spontaneus s. homine inscio vel invito procedens.

Origo hujus vitii & incommodi varia, juxta quam adminicula determinanda sunt.

1. Mala consuetudo apud infantes quartum jam ætatis annum habentes, ob quam inter dormiendum lectum urina conspurcant; minæ, virgæ, parvus potus pomeridianus, evacuatio vesicæ mox ante decubitum prævum hunc morem curant.

2. Debilitas notabilis imprimis paralytica sphincteris, potissimum ortum trahens ex affectu apoplectico & tunc incurabilis, in quo casu urinatorium portatile vel vesica bovina aut suina cum contenta spongia genitalibus adligata ad urinam excipiendam viris inservire potest; a partu inductam similem sphincteris laxitatem semel observavi & pulvere corticis peruviani intus sumto juvi, infusus super decocta aromatica, uti herbæ chamomillæ, rorismarini, salviæ etiam laudantur.

3. Graviditatis certum tempus, quo foetus vesicam comprimit & urinam involuntario exprimit vel ad mingendum crebro nimis cogit, hoc incommodum solummodo post absolutum partum cessat.

4. Ruptura colli vesicæ per pravam obstetricationem vel suppurationem inducta nullo modo sananda; sublevatur hoc incommodum ope utris e corio fabrefacti penduli cum apposita spongia.

G E N U S III^{tiurn.}

P Y U R I A

Est puris fluxus cum urina ejecta mixtus, cognoscendus e sedimento albo, puriformi, foetido, in urina deposito.

Origo hujus symptomatis ut plurimum saltem est suppuratione cujusdam visceris interni, vel renum per inflammationem eorundem antecedentem indicata, vel vesicæ urinariæ vel alterius partis, unde generatum pus metastatico modo ad vias uriniferas transponitur, uti pulmonis, (vid. diar. 1785. Octobr. 4.)

Eventum lethalem vix non semper prænunciat hoc symptoma, suppurationem puto, quæ alio quam hectico modo finire nequit.

Remedia solaminis & levaminis ergo, exhibenda sunt decoctum corticis peruviani, aqua felterana cum lacte mixta, essentia corticis peruviani, cujus uncia apponitur elixirii acidi Halleri drachma, ad guttas sexaginta ter indies.. Mihi occurrit exemplum pyuriæ spuria dicendæ, e causa rheumatica, quod allata essentia sanabat, (vid. diar. 1784. Novembr. 3.) Alia arthrica, cum phlogosi vesicæ per venæsectionem ter repetitam sanata fuit, fluxus ipse sub acceden-

te podagra cessabat. In tali casu nullus urinæ foetor adest.

G E N U S IV^{tum.}

STRANGURIA s. DYSURIA

Est micturitio & mictio crebra, molesta sæpius cum parvæ urinæ effluxu.

Species hujus diversam ob originem plures numerari solent.

S p e c i e s I^{ma.}

STRANGURIA ACCIDENTALIS

Est illa, quæ ex vitio quodam diætæ immediate induci potest, uti ex cerevisia acida, exercitiis corporis violentis, infrigidatione, quibus urinæ acris reddita molestam vesicæ sensationem inducere valet; huc referri potest diureticorum acrium imprimis cantharidum usus internus vel externus.

Sanabile imo ablatis causis sponte transiens judicari potest illud incommodum e dicta origine proveniens.

Curatio differentiarum causarum accommodanda est; acidam urinæ indolem magnesia alba & potus frigida aquæ largus debellant; ex infrigidatione

ortam stranguriam lecto calido, potu largo calido, pulvere e magnesiæ albæ scrupulo, nitri granis decem, camphoræ granis duobus composito & trihorio sumto, itaqve promoti sudore sanavi; e cantharidibus inductum malum potu largo mucilaginoso, emulsioneqve camphorata compefcitur.

Species II^{da}.

STRANGURIA SENILIS

Hæc senes quandoqve molestat, ex acrimonia & paucitate urinæ dependet, haud prorsus sanabilis est, largo, blando, mucilaginoso potu levabitur, ex gr. thea demulcente.

Species III^{tia}.

STRANGURIA VENEREA

Est stranguria ex irritamento s. miasmate venereo citata, post illud sub coitu admissum vel gonorrhoeam topicis adstringentibus suppressam exorta, nullo ex urethra fluxu stipata, inflammatoriæ indolis censenda, atqve venæsectione etiam repetita, emulsione nitroso-camphorata, balneatione in lacte tepido vel cataplasmate emolliente debellanda.

Species IV^{ta}.

STRANGURIA URETHRALIS

Est stranguria ex angustatione urethræ producta, occurrit præsertim in personis gonorrhœam crebro passis ob cicatrices post inflammationem urethræ superstites; diuturnum constans & modicum est malum, per candelulas cereas sensim quoad volumen augendas juvandum, eo sc. scopo ut urethra ad diametrum quodammodo ritum effluxui urinæ non obfistentem dilatari possit.

Species V^{ta}.

STRANGURIA HÆMORRHOIDALIS

Est stranguria e congestione sangvineâ vel mucosâ ad urethram vel vesicam, simili illi, quæ ad vasa hæmorrhoidalia s. intestini recti locum habere potest; e combinato præsertim prægresso affectu hæmorrhoidali, absentibus aliis stranguriæ causis, sangvine vel muco urinæ intermixto dignoscitur; quandoque levior est sponteque & cito transiens, quandoque gravior; initio tunc medellam antiphlogisticam sc. phlebotomiam, hirudines circa anum, emulsiones nitroso-camphoratas desiderans, quandoque chronica & ad plures menses imo annos protracta roborantibus certæ indolis, uti aqua pyrmontana vel simplici frigida debellan-

da, (vid. notabile exemplum in diar. 83. Jul. 5.)
 Mixtura acida mihi etiam proficua visa fuit. Abdomen in hoc casu bene tectum & calidum tenendum est, imo oleosis inungendum, hisce enim circulatio in vasis abdominalibus libera conservatur, & congestio a vasis vesicæ quodammodo avertitur.

Species VI^a.

STRANGURIA SYMPTOMATICA

Est stranguria ab aliis compræsentibus morbis inducta & dependens, uti calculosa f. e calculosa materia vias uriniferas irritante, per mixturam ex acido citri et oleo olivarum debellanda; arthritica e materia hujus nominis producta (vid. arthritid. anomalam); inflammatoria ex phlogosi vesicæ; hysterica e spasmo in viis uriniferis apud hystericas possibili, remedia primitivo morbo congrua imprimis opiata ut laudanum liquidum cum spiritu salis dulci, nec non incessum in aqua calida desiderans. Huc referri potest stranguria vel in gravidis e certo uteri situ vel ex alio abdominis tumore vesicam comprimente; nec non stranguria in feminis neonuptis e coitu validiore quandoque occurrens, aliquali abstinencia, fomentis emollientibus si opus sit, levanda, etiam sponte cessans.

ISCHURIA

Est urinæ fluxus notabiliter vel prorsus impeditus.

Ratione sedis causæ, quæ hunc fluxum impedit, commodissime in tres species dispescitur ischuriæ genus.

Species Im^a.

ISCHURIA RENALIS

Est urinæ impeditus fluxus ob deficientem ejusdem secretionem in renibus.

Symptomata & effectus præter impeditam diuresin possibilia sunt lumbago quandoque molesta, febris; excernendi feri conversio ad viscera interna sæpius ad cerebrum, indeque mentis aberratio, somnolentia lethargica, letalis timenda, ni excretio tempestive restituatur.

Diagnosin sedes ischuriæ renalis sat certa haberi potest e defectu urinæ in vesica urinaria, qui cognoscitur, si nulla adsit stranguria s. conatus & desiderium mingendi, si regio hypogastrica non tumeat & demum quando per catheterem in vesicam introductum nulla educitur urina.

Causæ ischuriæ renalis possibiles sunt.

1. Inflammatio renum f. nephritis, cujus mentio supra facta est.

2. Calculi renum tubos uriniferos obturantes, de quibus circa Lithiasin actum est.

3. Spasmodica renum contractio apud feminas hystericas possibilis, in quibus ideo suspecta habenda, quando signa aliarum causarum haud praesto sunt; pluries hic affectus mihi occurrit; quandam laudani liqvidi guttis decem cum falis succini volatilis granis quinque ter die sumtis sanavi; duæ per pulverem e nitri depurati scrupulo, millepedum ppt., falis succini volatilis ana granis quinque paratum & bihorio vel trihorio sumtum juvabantur.

Species II^{da}.

ISCHURIA VESICALIS

Est retentio urinæ ob vitium in ipsa vesica urinaria.

Dignoscitur sequentibus vix non semper conjunctis signis. 1. Dolore tensivo, pressorio regionis hypogastricæ & perinæi. 2. Intumescencia hypogastrica ob distentam vesicam. 3. Strangurioso sensu vesicæ & desiderio mingendi. 4. Effluxu urinæ per catheterem in vesicam introductum.

Origines f. causæ hujus ischuriæ plures & variae sunt, unde ejusdem differentes denominationes exsurgunt sc.

1. Ischuria inflammatoria sc. symptoma cystidis suo loco descriptæ.

2. Ischuria calculosa producta per calculum vesicæ collum obturantem, cujus mentio de lithiasi facta est.

3. Ischuria paralytica a) ex paraplegia quæ nervi ad vesicam pertinentes resolvuntur, (vid. diaria 1784. April. 6, & notabile exemplum ischuriæ cum adjuncta enuresi, diar. 1785. Septembr. 11,) ischuria paraplegiæ, ut enuresis apoplexiæ effectus est, levatoriam opem catheteris usus præstat, nil autem radicitus curat, b) ex retentione nimia urinæ voluntaria vel coacta, ut parturientibus interdum evenit, quo modo nimis repleta & distenta vesicæ vim sese contrahendi perdit; etiam in hoc casu catheteris usus requiritur, alias irritantia & diuretica vesicæ actionem provocantia ut; emplastrum vel essentia cantharidum regioni hypogastricæ applicita, clysmata acrida, mixturam ex aqua petroselini unciis sex, cremoris tartari solubilis uncia dimidia, spiritus salis dulcis drachmis duabus paratam & ad cochleare majus bihorio exhibitam scopo nostro convenire reperi a debilitate particulari vesicæ in senibus præsertim occurrens usum catheteris portatilis ex resina elastica parati desiderat, quæ ratione vesicæ vim suam quandoque recipere potest. Huc forsan annumeranda est ischuria febrilis quandoque in febribus summe putrido-nervosis obvia, e stupore ægroti, nervorum-

que insensibilitate declaranda, catheteris usu potissimum juvanda, vel per infessum super aquam calidam, atque epithematibus vinoso-aromaticis in regione hypogastrica applicitis, devicta febre talis ejusdem effectus quoque sponte cessat.

4. Ischuria spasmodica, in hystericeis possibilis, desiderat medicationem emollientem, enemata talia, cataplasmata, infessum super per aquam calidam; intus opiata, qualia supra in renali ischuria e spasma commendata sunt, quadrant, & si hæc non sufficiant, etiam catheteris usus faciendus est.

5. Ischuria a refrigerio externis remediis, ut spasmodica tractanda intus emulsionem camphorata desiderat, et, ni cito transeat, ut inflammatoria sananda est.

6. Ischuria polyposa e tumoribus & excrecentiis orificio vesicæ appositis ortum trahens, contra quam vix aliud cogitari potest auxilium quam punctura vesicæ a chirurgo secundum suæ artis regulas instituenda.

7. Ischuria sympathica e compressione colli vesicæ per partes adjacentes inducta; varii uteri status, uti graviditas, prolapsus, hydrops, schirrus, inflammatio in hac culpa esse possunt; similia intestini recti vitia eandem compressionem efficere valent; medicatio istis causis variis accomodanda est. Sat frequens occurrit ischuria hæmorrhoidalis sanguinis missione inprimis per hirudines

prope affectas partes et temperantia camphorata
juvanda.

Species III^{ta}.

ISCHURIA URETHRALIS.

Est retentio urinæ ob impedimentum in
urethra hærens.

Signa sedis hujus ischuriæ eadem sunt ac in
ischuria vesicali nec non obstaculum in urethra
introductionem & transitum catheteris haud ad-
mittens.

Causæ hujus ischuriæ, quibus medicatio con-
formanda est, esse possunt.

1. Materia quædam peregrina in urethra
hærens, illamque obturans, uti calculus, sanguis
aut pus condensatum & similia; balneatio in lacte
tepido, incessus super aquam calidam, injectio olei
in urethram, imo hujus per chirurgum incisio, si
obstaculum haud alio modo auferri queat.

2. Inflammatio urethræ producta per go-
norrhoeam acri injectione tractatam, aut per pra-
vam catheteris encheiresin, quæ causæ simul cum
dolore & ardore urethræ inflammationem desig-
nant; methodus antiphlogistica & balneatio emol-
liens juvabunt.

3. Præputii inflammatio & tumor urethram
comprimentes ejusdemque aperturam occluden-

tes; in hoc casu etiam antiphlogistica methodus, balneatio per aquam saturninam & his non juvantibus incisio præputii desiderantur.

4. Coalitio orificii urethræ, apud neonatos possibilis, aperturam arte faciendam requirens.

GENUS VI^{tum}.

GONORRHOEA VIRULENTA s. MALIGNA.

Est fluxus materiæ mucoso-puriformis quodammodo dolorificus ex urethra proveniens & post coitum paucioribus vel pluribus elapsis diebus sese exferens.

Symptomata & signa.

1. Materia effluens initio pauca, alba, dein copiosior flavescens; viridescens, sub decremento fluxus iterum albescent, dum ficcatur, linteum rigidum reddens.

2. Molestiæ concomitantes, pruritus & rubor glandis, ardor urethræ imprimis sub transfluxu urinæ, coacta & dolorifica penis rigiditas, quandoque cum curvatura ejusdem, quo tempore gonorrhœa chordata dicitur; causa antecedens unica est coitus cum foemina impura s. venereo morbo affecta; causa proxima est materia acris sub allato coitu in urethram penetrans, quæ irritando copiosum mucum attrahit, dolorem exci-

tat, nec non leviozem inflammationis gradum, indeqve exfudationem materiæ puriformis.

Eventus communiter proſper exſpectari poſteſt, & per ipſam naturam poſſibilis, & per congruam artem promovendus in majorem fine dubio ſecuritatem ægroti. Duratio illius fluxus ad menſis ſpatium ſolito ſe extendit, qvandoqve tamen fluxus mucoſus diuturnus remanet. Nonnulli credunt fluxum hujus gonorrhœæ adſtringentibus tractatum et ſuppreſſum reliqvo corpori venereum morbum communicare, ejusdemqve varia ſymptomata producere poſſe, qvod tamen ſufficiente experientia haud ſatis probatum eſt.

Curatio peragenda eſt.

1. Methodo antiphlogiſtica, qvæ initio & ſub graviore dolore urethræ locum habere poſteſt, alias non; conſiſtit autem illa in venæſectione, emulſionibus nitroſo-camphoratis, balneatio per lac tepidum.

2. Diluentibus copioſis & diureticis, qvibus largior & blandior redditur urina, & ob hanc utramqve qvalitatem aptior ad materiam morbiſicam ex urethra ſolvendam & expellendam; potus ſvadeatur ideo largus mucilaginofus, ut decoctum avenæ ſimplex, vel cum ſucco citrino, thea demulcens, & devicto graviore dolore inflammatorio conveniunt qvoqve diuretica alia, uti amygdalarum dulcium olei ad uncias duas cum drachma balfamico-

paivæ quotidie ad cochleare majus fumendas, vel balsamum copaivæ cum partibus æqualibus fyrupi diacodii et mucilaginis gummi arabici ad cochleare minus bihorio, vel denique idem balsamum cum æquali parte electuarii aperientis et partibus duabus roob juniperi ter per diem sumtum. Laudatur quoque mixtura ex partibus æqualibus tincturæ rhei vinosæ et balsami copaivæ ad guttas 80 ter de die; aliquoties cum successu præscripti elixirii aromatico-acidi guttas 40 ter quaterve indies.

3. Abstinencia a calefacientibus diæta & medicamentis, uti spirituosis, salitis &c., nec non motu corporis validiore; hisce enim incitata nimis circulatio sanguinis inflammationem & resorptionem materiæ morbificæ damnofo modo promoveri valet.

4. An etiam roborantia contra fluxum mucosum indolentem superflitem post virulentam excretionem & quandoque diu durantem adhibenda sunt? Commendata in hoc casu, corticem peruvianum, martialia &c. nullius efficaciam fuisse observavi; sensim verò & sponte talis fluxus cessat.

5. Mercurium cum opio, quem nonnulli sub decrescente gonorrhea omni vespere ægris suis præbent, nunquam opus habui.

GONORRHOEA BENIGNA

Est fluxus feminis vel feminiformis involuntarius cum vel sine sensu libidinoso & absque dolorifica affectione urethrae.

Symptomata & signa.

1. Materia effluens per urethram est blanda alba spissa, vel verum semen, vel eidem similis.
2. Effluxus ipse est minus vel magis frequens, quandoque & interdiu & noctu rediens, vel tantummodo noctu cum vel sine adjunctis insomniis libidinosis, qualis nocturna feminis ejaculatio pollutio dicitur.

Causa hujus morbi:

1. Pravum masturbationis vitium, unde contracta consuetudo ad immodicum fluxum naturam provocat.
2. Libidinosae ideæ & meditationes.
3. Acrimonia certa humorum & forsan nervorum nimia agilitas; casum probumque novi virum, qui enormi gradu hunc fluxum patiebatur, cito tamen et sponte cessantem.

Eventus fluxus talis involuntarii.

1. Diu protractus & frequenter revertens nervos admodum debilitat, omnesque ex illis dependentes functiones frangit, animæ facultates omnes recordandi, attendendi, gaudendi depri-

muntur, sensus imprimis visus ad amaurosin usque debilitari possunt, stomachus maxime afficitur cum anorexia, flatulentia & anxietate; etiam dolor varius & vagus corporis, convulsiones, epilepsia, fatuitas, contabescencia, pallor imprimis apud illos, qui foedo onanismo nimiam feminis jacturam faciunt, observantur.

2. Sanationis spes veria est secundum differentem morbi durationem ejusdemque effectus morbosos ad varium gradum productos, non paucos modice affectos sanavi, alios per totam vitam valetudinarios, debitum sanitatis robur haud recuperaturos observavi; & demum alii prorsus insanabili convulsione, epilepsia, fatuitate ex hac causa afflicti mihi occurrerunt. Pollutio verò nocturna rarius accidens, fortioribus imprimis sat communis, vix non tanquam innoxia superflui excretio aestimari potest.

Curatio absolvenda est:

1. Roborantibus remediis, e quibus efficacissimum inveni ipsum pulverem corticis peruviani ad drachmam dimidiam ter indies sumendam, nec minus laudandum essentiam chinæ cum dimidia parte elixirii aromatico-acidi ad guttas sexaginta ter indies, balneatio per aquam frigidam saltem partium pudendarum quinimo totius corporis etiam convenit.

2. Nutrimento blando uti lacteo farinaceo, & simili; stimulo quodam prædita, uti juscula

carnea fortiora, aromatica, salita, potus caffè et vini larga potio vitanda sunt, vini rubri modica dosis et cerevisia fortis innocua est.

3. Evitando omnes occasiones & ideas, quæ ad libidinem stimulant.

4. Corporis motu, situque convenienti; calefaciens agitatio corporis imprimis per motum, qui sanguinem versus renes allicit, uti vectio protracta & equitatio nocent, ut & decubitus in dorso & in stragulis mollioribus calidis.

Huc referenda est *gonorrhoea glandis*, quæ consistit in collectione humoris acris inter glandem & præputium, unde molesta harum partium rubedo, ardor, & pruritus inducuntur; hæc affectio sine causa venerea oritur, initio per balneationem crebram in aqua frigida compescitur; diutius protracta cum constrictione præputii & effluxu humoris, diligentem injectionem decocti avenæ desiderat.

G E N U S VIII^{vum.}

LEUCORRHOEA s. FLUOR ALBUS

Est humoris serosi s. non sanguinei effluxus per vaginam muliebrem.

Variæ hujus affectionis secundum causas diversas exsurgunt species.

Species I^{ma}.

LEUCORRHOEA SIMPLEX

Est fluxus humoris albi mucosi blandi s. nullam irritationem doloremve citantis, & absque alia sanitatis labe sese exferens; sat frequens hæc affectio, raro tanti gradus, ut medici desideretur auxilium.

Adscribitur haud immerito laxitati solidorum & tenuitati fluidorum, quæ iterum ex abusu potus tepidi aqvosi, vitæque sedentaria derivari possunt.

Sanabitur diæta causis opposita, roborantibus, uti cortice peruviano, essentia corticum aurantiorum cum dimidia parte tincturæ martis vel octava liqvoris styptici Loffii ad guttas sexaginta vel elixirio aromatico-acido ad guttas quadraginta ter indies, et injectionibus cum decocto chinæ vel quercus, aqua calcis aliisque adstringentibus.

Species II^{da}.

LEUCORRHOEA CANCROSA

Est fluxus uterinus foetidus ichorosus e cancro uteri ortum trahens, ejusdemque symptomatibus stipatus & dignoscendus; illius dijudicatio

quoad eventum & medicationem loco hysteralgiam continente jam tradita est.

Species III^{ta}.

LEUCORRHOEA PURULENTA

Est fluxus purulentus inflammationem uteri vel vaginæ subsequens, partim indole effluentis materiae, partim prægressis inflammationis signis cognoscendus; ad noxiam materiem evacuandam & curam absolvendam non raro sola natura sufficit; si vero diuturnior fiat morbus, viresque prosteruantur, injectio decocti avenæ simplicis vel melle rosato mixti ad depurationem promovendam & intus decoctum corticis peruviani conveniunt.

Species VI^{ta}.

LEUCORRHOEA FUNGOSA

Est fluxus uterinus continuus, serofus vel sanguineus, vel cum crustis adipem concretum referentibus, nullus verò pravus excreti odor, quo signo ad causam mali suspicandum, curatiusque inquirendum, & a cancroso malo discernendum adducimur.

Causa ipsa est fungus s. excrecentia, cujus pedunculus ipsi utero adhæret, & capitellum in

vagina protuberat, quandoque ægrotæ ipsi sub mictione vel alvi depositione apparens, aut per explorationem vaginalem detegenda.

Curationem perficiat chirurgus per repetitam ligaturam excrescentiæ, unde pars fungi excidit & residuum dein putrefactum ab utero rejicitur; si verò inveteratum malum sit cum dolore uteri & foetore muci excreti, hæmorrhagia frequens vires sensim exhaurit, nec spes sanationis adest; victus lacteus blandus convenit.

Species V^{ta}.

LEUCORRHOEA VENEREA

Est fluxus e vagina muliebri albo-flavescens non foetidus, sed cum sensu excoriationis partium & dysuria junctus.

Causa est miasma venereum per coitum in vaginam introductum.

Signa diagnostica sunt: 1. Coitus immediate hunc fluxum prægressus. 2. Indoles fluxus sc. excorians cum dysuria. 3. Simul explorata & inventa alia syphilidis symptomata, uti ulcuscula, condylomata, pustulæ pruriginosæ in partibus pudendis, ut & reliqua infra describenda ad syphilidem pertinentia phænomena.

Curatio hujus leucorrhœæ uti in gonorrhœa virulenta tentari debet. Hac non juvante usus

mercurii, qualis in morbis venereis infra memorandus venit, faciendus est.

Alia excretionum vitia, uti expectoratio, salivatio, fudor, mere symptomaticæ sunt affectiones ex aliis concomitantibus morbis dependentes, ad eorum tractatum pertinentes; ideoque haud ut species morborum singulares æstimandæ & exponendæ. (Mihi unicum occurrit exemplum fudoris colliqvativi protopathici absque alio prægresso aut concomitante morbo existentis, quo per dimidium annum protracto octogenarius insignem jacturam virium & voluminis corporis fecerat. Multa remedia imprimis cortex & spiritus vitrioli frustra adhibita erant; perfectam tandem restitutionem effecit victus nutriens refrigerantis indolis sequenti ordine: omni mane potus chocolade, interdiu lac ebutyratum ad duas mensuras consumtum, & pro coena tria ova forbilia.)

CLASSIS V^{ta}.

CACHEXIA.

Est morbus chronicus, cujus præcipuum symptoma est vitiata s. præternaturalis peripheriæ constitutio.

Status peripheriæ f. qualitas cutis sensibilis præsertim quoad volumen, naturali majus vel minus, & quoad colorem immutari & vitiari potest, quæ triplex differentia fundamentum præbet dividendi classem cachexiæ in tres ordines sc. 1. Tumores f., Hydropes, quibus volumen peripheriæ augetur 2. Tabes, quibus volumen corporis minuitur 3. Decolorationes, quibus color cutis a naturali modo discedit.

O R D O I^{mus}.

HYDROPS.

Est tumor corporis a collectione serosi humoris productus.

Causa proxima hydropis f. collectionis nimiae serosæ alia esse nequit, quam sublatum æquilibrium justum inter affluxum & refluxum serosi humoris in partibus corporis tali modo, ut major humoris copia affluat, quam ressuat.

Causæ antecedentes proin esse possunt quæcunque affluxum humoris serosi ad partem corporis enormiter adaugent, quæ refluxum impediunt, vel quæ utrumque illum effectum producant. Tali hydropem producendi vi præditæ & per experientiam comprobatae causæ sunt sequentes :

1. Humorū nimia tenuitas & aqvosa constitutio, ita ut debito facilius & largius per vasa minora transmitti, & in cavitatibus secerni atqve exhalare qveant, ac dein sub remora & abundantia ob coagulabilem naturam adeo inspissari, ut ad resorptionem & refluxum inepti fiant; jactura sangvinis notabilis hydropem, ut notum est, efficere valet, sine dubio mediante attenuatione, qvæ profluvii talis effectus est. Hydropes in scorbuto, febre qvandoqve putrida (vide diar. 1786 Jun. 6 & 1787 Septembr. 1.) orientes talem resolutionem pro causa habere videntur.

2. Humorū in cavitatibus secretorum & exhalantium acrimonia vel spissitudo vel utraqve simul juncta, ita ut vasa resorbentia vel irritatione conficta, vel ratione excipiendi fluidi nimis angusta ritam functionem perficere neqveunt. Hoc modo hydropem inducunt:

a) Perspiratio cutanea suppressa vel retenta, indeqve producta materiæ excernendæ acris commixtio cum aliis corpora humoribus; hydropis ex hac causa satis notum exemplum præbet scarlatina febris, (alia vid. diaria 1784 Jul. 7 & August. 9.)

b) Urinæ impedita secretio s. ischuria renalis; senem novi calculosum, cui diuresis ex hac causa sensim minuta & demum prorsus inhibita fuit, qvique defectus hydropem cito adauctum,

interiores cavitates etiam occupantem & letalem produxit.

c) Efflorescentiæ cutaneæ & ad illas perti-
nens materia acris retrogressa, ad alios corporis
humores conversæ, illisque commistæ, uti herpe-
tes, imprimis scabies retropulsa (vid. diar. 1786
April. 6 & 1787 Mart. 4 April. 6, Maj. 3 & infe-
quentes hujus anni menses.) Huc referri possunt
ulcera inveterata consolidata, itaque materia acris
retenta (vid. diaria 1786 April 7 & Jul. 7.)

d) Arthritica materies retenta vel retro-
gressa atque humoribus ferosis commixta (vid.
diar. 1787 Novembr. 6.)

e) Metastatica materies per febres vel pu-
tridas vel intermittentes generata atque in textu
celluloso aut aliis cavitatibus deposita, ibidemque
secretos humores contaminans (vid. diaria 1783
Febr. Novbr. & Decbr.; 1783 Novbr. 8; 1782
Jun. 3 & 1786 Jul. 2.) vel depositio lactea (vid.
diar. 1786 Aug. 11.)

f) Nonne biliosæ materiæ præternaturali
modo ad sanguinis massam traductæ, indeque fe-
rosi humoribus commixtæ culpa hydropis tribui
potest? Hac ratione ex ictero, obstructione for-
san hepatis & febre cholERICA (vide diaria 1787
mensibus Aug. & sequentibus) exoriens hydrops
explicari potest.

3. Solidorum debilitas & laxitas, eorumque
ideo ad motum humorum debitum promovendum

insufficiens actio. Hydropici tumores morbos diuturnos debilitantes, uti febres, dysenteriam, diarrhoeam protractam, phthisin subsequentes vel concomitantes, quique sub vita otiosa, sedentaria, praesertim in illis, quibus laxum est temperamentum, oriuntur, vix melius quam ex inertis solidorum actione declarari possunt, (notabilius & letale exemplum exhibet diar. 1783 Jul. 9.)

4. Impedimentum circulationis humorum, quod triplice modo ad hydropem producendum agere potest sc. pervertendo motum sanguinis arteriosi, qui per vasa resistencia & obstructa permeare nequit, ideoque debita majori copia ad alia vasa ducitur, itaque secretionem largiorem ibidem producit; comprimendo venas & itaque refluxui humorum per illas obstitendo; & demum comprimendo vasa lymphatica, adeo ut resorptionis opus illis praecipue competens perfici nequeat. Tali modo oritur & declarari potest hydrops ex obstructione & induratione viscerum, uti lienis & praesertim hepatis (vid. diar. 1785 Decbr. 4. & 1786 Aug. 13), vel omenti (vid. diar. 1783 Jun. 6 & 1786 Aug. 12), vel mesenterii (vid. diar. 1782 Octbr. 8 & 1783 Jul. 10), vel ovariorum (vid. diar. 1782 Jan. 4, & 1784 Jul. 12.), nec non hydrops per inflammationes possibilis (vid. diar. 1783 Mart. 7 & 8, & 1784 Maj. 5.)

Diagnostica hydropis signa universalis non dantur, quaelibet enim illius species juxta locum

f. fedem differentem definienda fibi proprios habet characteres, e quibus signum omnibus differentiis commune abstrahi nequit.

Prognosis hydropis in universum exhibet.

1. Effectus & eventum per hydropem possibiles, qui sunt:

a) Compressio partium & viscerum ferum coagulatum continentium, qui effectus juxta compressi visceris differentiam, & nobilitatem varia symptomata & varium periculum, quinimo, si pulmones vel cerebrum hac causa afficiantur, ipsam mortem inducere valet.

b) Corruptio & putrescentia stagnantis, indeque irritatio, inflammatio, gangræna & sphacelus adjacentium partium, ut & ipsa mors (vid. diar. 1785 Maj. 9 & 1787 Jun. 8.)

c) Ruptura spontanea partium sero collecto distentarum (vid. diar. 1786 April 7.)

d) Resorptio spontanea feri, indeque vel ejusdem depositio quandoque periculosa in aliis partibus, vel commixtio cum sanguinis massa, unde febris varii momenti surgere potest (vid. diar. 1784 Aug. 11 & 1785 Jul. 2. & 86 Jul. 1.)

2. Spem sanationis, quæ:

a) Per propriam naturæ vim rarissime haberi potest sc. in unico hydropici tumoris casu, effectum meræ debilitatis, qui cessante causa s. restituto robore evanescere valet. Aliàs hydrops nulla naturæ molimina ad sanationem tendentia se-

cum ducit, (mirum & unicam exceptionem tradit diarium 1784. Jan. 3.)

b) Per artem major est, haud tamen generaliter sed secundum durationem, causam & imprimis sedem morbi definienda, cujus igitur determinatio ad specialem hydropis tractatum infra exponendum pertinet.

Curatio omnis hydropis duplicem habet scorum sc. 1. serum collectum superfluum e corpore educere, 2. causas morbosas f. vitia corporis, quæ hydropem creant, tollere & remove. Hisce proin scopis conformia remedia & diæta hydropicis sunt præscribenda.

Evacuatio hydropici seri testante experientia aptissime promovetur per diuresin & remedia sic dicta diuretica, quæ urinæ se & excretionem promovendi habent vim, talia esse possunt.

1. Cremor tartari cujus drachma ter die sumpta convenit & quandoque sufficit hydropi incipienti modico absque diarrhoea aut signis obstructi visceris abdominalis aut pectoralis adjunctis, præsertim augendo diuresin & simul quandoque alvum modice subducendo agit; si forsan menstruus fluxus deficiat et in aliis hydropis speciebus præsertim illis, quæ feбри intermittenti succedunt, cremor tartari solubilis, uti mixtura composita e cremoris tartari solubilis uncia spiritus salis dulcis drachmis duabus, vel tincturæ rhei aqvosæ uncia, aqvæ petroselini octo uncis parata

& ad unciam ter quaterve indies præbita laudabilem quoque effectum produxit (vid. diar. 1782. Aug. 4, & 1783. Febr. 3.) Intra octo saltem dies hæc medicina effectum exserere incipit, quod si observetur, ad integram restitutionem continuari debet, si vero minus, in aliis auxilium petendum est.

2. Scillitica sub varia forma & vario modo imprimis cum resolventibus aliis juncta, uti a) Pilulæ scilliticæ ad grana decem mane & vespera vel modo semel indies sumendæ, in leviori tumore hydropico post febres superflite convenientes & sufficientes. b) Pilulæ ad hydropicos majori vi resolvente donatæ, ut scilliticæ exhibendæ, maxime proficuae, ubi hepatis obstructio simul suspecta est, tum tinctura aperiens ter quaterve ad guttas sexaginta interdiu & laudatæ pilulæ mane & vespera votis sæpe respondent. c) Mixtura diuretica nostra ter die ad guttas sexaginta sumenda imprimis convenit hydropi, quem comitatur pectoris affectio sc. tussis & dyspnœa, etiam dilutior cum aqua destillata quadam & syrupo althææ hæc medicina exhiberi potest, (cujus laudabilem effectum exhibet diar. 1784. Februar. 6.) d) Essentia scillæ cum æquali parte tincturæ rhei vinosæ ad guttas quadraginta ter indies.

3. Ammoniacalis emulsio, quæ inter potentissima antihydrica numerari debet, ad unciam omni hora vel bihorio exhiberi potest & in omni-

bus hydropis gravioribus casibus, maxime ubi pectus simul affectum est, convenit (vid. diar. 1783. Jul. 6 & 1786 Jun. 7 Aprl. 6. & Jul. 7. & 1784 Novbr. 4.)

4. Tinctura rhei aqvosa ad guttas sexaginta ter quaterve indies porrecta, aptissima hydro-picis medicina, quando diarrhoea simul adest; diureticam illius vim auget oleum tartari per deliquium, cujus drachmæ duæ cum uncia animæ rhei combinantur (vid. diar. 1784. Jul. 7. & August 10.)

5. Baccæ juniperi contusæ vel solæ vel cum herbis trifolii fibrini et, si alvus segnior est, cum foliis fennæ ad infusum theiforme bis per diem sumendum simul cum alia inter memoratas medicina. Præsertim sub constitutione scorbutica decoctum ex trifolii fibrini uncia in libris duabus cerevisiæ quotidie ingerendum quadrat.

6. Poma colocynthidum, quorum drachmæ duæ cum unciis duodecim cerevisiæ tenuis coquantur, vel radicis armoraciæ rasæ uncia tres, vini albi libris duabus per biduum infusæ ad unciam ter die porrectæ aliquoties profuere. Vidi etiam bonum effectum e succo recenti herbæ et radicis taraxaci et graminis, ubi cetera remedia frustra tentata erant.

7. Folia digitalis purpureæ pulverata ad granum vel grana duo ter aut sæpius de die ali-

quoties adhibui, sed vix nisi cum emolumento levatorio et transitorio sub adaucta feri evacuatione per alvum vel diuresin.

Causæ hydropis morbosæ f. vitia corporis, unde hydrops originem traxit, propria medicatione aut cum antihydrica cura laudata combinanda, aut eidem subjungenda quandoque opus habent sc.

1. Obstructio viscerum præsertim hepatis remedia resolventia cum diureticis maritata maxime pilulas ad hydropicos & tincturam aperientem desiderat, vel alia contra hepatalgiam infarctum supra memorata; si gravior sit hydropis gradus, per fortiora diuretica partem abundantis feri auferre convenit, & dein resolventem applicare methodum.

2. Hydrops, debilitatis effectus, præter remedia diuretica requirit virium reparationem per bonum nutritum, motum corporis convenientem & frictiones, nec non corticem peruvianum efficiendam.

3. Hydropes ex acrimoniis medicationem singulis harum appropriatam cum generali diuretica methodo, quantum potis est, jungendam exigit.

a) Scabiosis hydropicis convenit cremor tartari cum dimidia parte florum sulphuris vel pulveris pectoralis resolventis ad drachmam ter indies; quandoque, si notabilior sit hydrops, in

anteceffum eundem per fortiora diuretica diminuerè confultum duxi.

b) Hydrops fcorbuto annexus vel rectius hujus effectus, remediis antifcorbuticis infra memorandis fimul cum diureticis imprimis aceto fcillitico cum elixirio antarthritico ad partes æquales juncto & ad guttas fexaginta ter indies fumto et thea amara, fi alvus fegnior, debellabitur.

c. Metaftatico modo poft febres continuas vel intermittentes exfurgens hydrops tamdiu tollerandus eft, donec roborante methodo vires fufficienter reftitutæ fint, tunc nihilominus perfiftens tumor modicis diureticis vel pilulis fcilliticis vel mixtura diuretica debellari poteft; citius adhibita methodus evacuans periculofam reforptionem indeque vel recidivantem morbum vel alia mala inferre valet.

Diæta hydropicis falutaris tribus conflât præceptis fc.

1. Calor corporis bene promovendus & confervandus eft, partim cubiculo calido, maxime autem per decubitum in lecto, non rara & indubitata experientia me docuit, diurefin alias parcam hoc adminiculo notabiliter adauctum morbum fuftuliffe; (vid. diar. 1783. Jul. 6, & 1785 Decbr. 3, & 1787 April 5, & Jun. 7.)

2. Motus corporis frequens ad incalefcen-
tiam corporis continuatus, vel ejus loco frictio per

pannum laneum hydropi e debilitate & scorbuto ortum trahenti potissimum convenit.

3. Alimenta hydropicis aptissima sunt, quæ stimulante & aromatica vi pollent; piper, sinapis, raphanus rusticanus utile aliorum ciborum condimentum præbent; potus multus non dammandus est, quinimo ad serum spissum, acre dilutius & ad permeandas vias excretorias aptius reddendum convenit, minimeque, quantum fitis ægroti desiderat, denegandus; in rariore hydropis casu, qui debilitatem & laxitatem solidorum pro causa habet, scopo juvandi non bibendum est.

Divisio hydropis solito, aptoque modo fit ratione ejusdem differentis sedis in sequentia genera.

G E N U S I mm.

HYDROPS INTERCUS

Est tumor cutaneus albus, mollis, digitum impressum excipiens, ejusdemque vestigium retinens per breve tempus.

Causa illius proxima est serum effusum & collectum in tela cellulosa subcutanea; ratione extensionis diversæ hoc genus duplicem continet speciem.

Species Ima.

OEDEMA

Est hydrops intercus particularis f. certam corporis partem imprimis extremitates inferiores occupans.

Stricto sensu oedema tumorem crurum significat, similis in aliis partibus exurgens tumor oedematofus audit.

Causæ oedematis diversæ sunt, & secundum illas differt morbi dijudicatio & curatio, sc.

1. Debilitas virium post morbos febriles vel evacuationes enormes; methodus roborans præcipuum tunc præstat auxilium, nec non frictio frequens per pannum laneum aut simplex aut fumo aromatico e succino, mastiche, baccis juniperini imbutum, etiam pilulæ squilliticæ aut alia antihydrica in usum trahi possunt, tandemque si tumor non cedat, pro eodem coërcendo fasciæ expulsiivæ ad crura applicentur.

2. Metastatica f. per alios prægressos morbos generata ad crura deposita materies, uti post febres putridas (vid. diar. 1783. Febr. 1, Novbr. 1, Decembr. 1 &c.) Metastatica talis tumoris indoles imprimis e cito illius accessu & febris mox observato decremento dignoscenda est & cum cautione supra de hydropse in genere memorata debellanda; oedema metastaticum post intermittentes febres difficilior dignoscendum f. ab oede-

mate debilitatis distingvendum juxta eandem regulam tractari debet. Oedema in puerperis metastasi lactis adscribendum ut plurimum diu durat, eccoproticis & diureticis sensim vincendum (vid. diar. 1785. Maj. 3, & 1786. April. 4, & Aug. 11.) Huc referri potest oedema ex suppressis menstruis, quod tantum per hunc fluxum revocatum & remedia tali scopo congrua juvari potest; oedema gravidarum tantummodo partu absoluto cessans: atque tandem oedema podagricum, vel sc. podagræ pedissequus, aut ejus locum subiens, ipsi naturæ committendum est, si tamen diuturnus permaneat, motus, frictio et involutio in linteo cerato in auxilium vocari possunt.

3. Alii concomitantes morbi, quorum effectus tumor crurum esse potest, uti ascitis, hydrothorax, infarctus s. affectio asthmatica pulmonum, infarctus hepatis, phthisis &c. Oedema ex his causis mere symptomaticum morbis primitivis s. e quibus ortum trahit, quoad eventum & curam convenit.

Species II^{da}.

ANASARCA

Est hydrops intercus universalis s. totam corporis peripheriam occupans.

Causæ esse possunt quæcunque illarum, e quibus hydropem in genere procreari supra dictum est.

Eventus per ritam & tempestivam medelam sæpius in sanitatem determinari potest, ideoque ni signa insanabilis viscerum læsionis, imprimis hepatis vel pulmonum adsint, bonus sperari & prælagiri.

Curatio promovenda est methodo & remediis contra hydropem in genere commendatis, quibus nil efficientibus adjungi potest scarificatio crurum circa malleolos, dum e cute sic incisa non raro effluxus feri salutaris producitur; si loca scarificata dolorem & ruborem cum metu gangrænæ concipiant, facculus aromaticus initio applicandus, sed in graviore casu epithema, e speciebus resolventibus cum herba absinthii in vino, aceto & aqua ad æquales partes coctis diligenter admovendum, malum prævertit, etiam vesicatoria loco scarificationis laudantur, (effectum exinde utilem præbet diar. 1783. Octobr. 7.) In hyprope inveterato, subjectis senioribus & cachymicis neutrum ex his topicis consvadeo, utpote majus malum sc. acceleratio mortis per gangrænam, quam emolumentum exinde expectari potest.

G E N U S II^{dum}.

HYDROPS ABDOMINALIS

Est tumor abdominis e collectione serosa in cavitate abdominis contenta productus.

Sedes est varia pars abdominis, in qua talis feri collectio locum habere potest; ratione hujus differentiae plures habentur species.

Species I^{ma}.

ASCITES

Est tumor hydropicus abdominis e sero in cavitate peritonei collectio.

Symptomata:

1. Tumor ipse abdominis, qui aequabiliter abdomen occupat & implet, initio quodammodo ita mutabilis, ut latus, in quo decubitus fit, praesertim distendat.

2. Tumor in extremitatibus inferioribus nec non partium genitalium, saltem in plurimis sub increfcente morbo accedens.

3. Urina parca rubra, fitis adaucta, dyspnoea contabescentia partium, quae non tument.

Causae antecedentes eadem sunt, e quibus hydropes in genere supra deduximus, maxime tamen laesio & obstructio hepatis aut alterius visceris abdominalis (vid. indic. diar.)

Diagnosis s. indicium, quo ascites ab alio tumore abdominali distingvitur, est fluctuatio, ejusdemque perceptio habenda, dum plana manus lateri abdominis applicatur, & oppositum latus al-

tera manu percutitur, tunc motum contentæ aquæ
f. fluctuationem sentit manus apposita.

Eventus ascitis:

1. Per se f. morbi hujus sibi ipsi relictæ sensim majus timendum est augmentum, & interdum feri collecti acrimonia; prius compressionem viscerum adjacentium, circulationem impeditam, unde demum pectus etiam affici & vel phthisis vel hydrothorax letalis induci potest, posterior verò causa irritationem & inflammationem peritonei vel intestinorum etiam funestam procreare valet, (vid. diar. 1784. Novbr. 11, & 1785. Maj. 9.)

2. Per artem.

a) Sæpius radicalis curatio locum non habet, frequentissima ascitis causa est invincibilis viscerum degeneratio & induratio, non raro per explorationem abdominalem percipienda, (vid. indic. diar.)

b) Pauca tamen habentur exempla curationis radicalis sperandæ, si indicia læsionis viscerum non adsint, (vid. diar. 1783. Jan. 3, & Jul. 6, & 1784. Octobr. 4, 1785. Jun. 4.)

c) Palliativa ascitis sanatio, f. levatoria collecti feri eductio per paracenthesin possibilis est, & mediante illa sæpius, quotiesque ob renovatum tumorem opus est, repetita per plures etiam annos vita valetudinaria conservari potest.

Curationis duplex est via:

1. Methodus antihydrica generalis supra laudata, f. remedia diuretica quandoque cum resolventibus juncta, si compræsentis viscerum obstructionis signa adsint.

2. Paracenthesis f. punctura in cavitatem abdominis penetrans a chirurgo instituenda, per quam serum collectum effluere potest; hæc medicatio modo locum habet, postquam interna remedia absque juvamine applicita sint; semper levamen affert, ideoque iteranda est, quando collectio hydropica ad molestum volumen aucta observatur; etiam exempla habentur curationis per & post illam operationem radicaliter peractæ. (vid. diar. 1783. Januar. 3, & Jul. 6, & 1785. Jun. 4.) Diuresin antea parcam post paracenthesin augeri observasse mihi videor.

Ascitem sæpius, et anasarcam comitatur hydropicus tumor partium genitalium interdum insignis tam scroti quam præputii ut effluxum urinæ impedire queat, sacculus aromaticus cum camphora sæpe juvat, alias scarificatio in hoc casu requiritur, & quam primum loca sic incisa ad inflammationem tendere videntur, epithema supra ad scarificata crura commendatum adhiberi debet.

Species II^{da}.

HYDROPS OVARIII

Est tumor abdominis e collectione serosa in uno alterove ovario productus.

Symptomata & signa sunt:

1. Sedes tumoris saltem incipientis in alterutro latere sc. regione iliaca; sensim increfcens tumor abdomen magis implet, quinimo adjunctus ascites lapsu temporis integrum abdomen expandere potest.

2. Dolor obtusus gravativus lateris affecti sub incipiente morbo.

3. Tumor oedematofus sensim oriens in extremitate inferiore ad latus affectum pertinente.

4. Absentia fluctuationis abdominis, per quam noster hydrops ab ascite distingvitur.

Origo hujus morbi haud inique ponitur in ovulo quodam ovarii, utpote enim hoc naturaliter liqvorem quendam lymphaticum, cujus certus requiritur affluxus & refluxus, continet; probabile est, hoc per causam quandam obstruentem, inflammationem vel aliam impedito, illum sensim ad gradum notabilem hydropicum augeri posse.

Infanabilis hic hydrops judicandus est, per plures tamen annos durabilis & tolerabilis; paracentesis incerta est medicatio & inflammationi letali facile occasionem præbens.

Species III^{ta}.

HYDROPS SACCATUS

Est tumor hydropicus e collecto fero in sacco membranoso, qui nullam partem naturalem corporis constituit.

Diagnosin præbent: 1. Tumoris limitatio ut in prægressa specie. 2. Sedes talis, ut ovario adscribi nequeat. 3. Resistentia elastica, in ex-crescentiis haud locum habens. 4. Persistentia & lentum, quandoque lentissimum incrementum, per plures annos.

Insanabilis itidem hic hydrops est etiam diu durans, verum si ad gradum intolerabilem incre-scat, paracentesin, imo sæpius repetitam admit-tens cum spe levaminis.

Etiam ab auctoribus memoratur hydrops peritonei s. effusum serum inter musculos ab-dominales & peritoneum, vix nisi post mor-tem detegendum; qualis etiam fuit hydrops me-focoli, (vid. diar. 1786. Maj. 8.).

Species IV^{ta}.

HYDROMETRA

Est tumor abdominalis e fero in cavitate ute-ri morbose collecto oriens.

Diagnostica signa sunt: 1. Sedes tumoris successive incrementis in regione uteri s. hypoga-frica. 2. Absentia graviditatis vel ob ætatem illi non convenientem vel ob durationem tempus gra-viditatis excedentem. 3. Absentia ischuriæ ve-ficalis. 4. Minor tumoris durities quam in tu-

moribus a solidis; fluctuatio quoque ad signum referri solet, quæ tamen vix semper, aut satis distincto modo sese exferit. 5. Quandoque effluxus sat largus serofus per vaginam.

Causa partim est obstructio orificii uteri per tumores, mucum inspissatum & forsan spasmodicam constrictionem, partim læsum æquilibrium inter affluxum & refluxum serosi liquidi.

Curatio difficilis & incerta instituenda est per auxilia os uteri referrare valentia; quæ essent corporis validiores commotiones, saltus, vomitus, nec non balnea & injectiones emollientes, quibus non juvantibus commendatur stylus apice obtuso præditus in uterum introducendus. In casu, ubi natura ipsa effluxum promovet hæc remedia non requiruntur.

Ob similitudinem cum prægressis morbis huc referri potest:

Tympanitis ceu tumor abdominis quodammodo permanens elasticus, a pulsatione sonans, vel totum abdomen æqvabiliter distendens vel partem supra aut infra umbilicalem; in acutis morbis hæc expansio metheorismus dicitur.

Diagnosin præbent notæ definitionis nec non absentia fluctuationis & levitas tumoris.

Causa proxima est aër in cavitate abdominis præternaturali modo retentus collectus & expansus.

Causæ antecedentes possibiles sunt:

1. Intestinorum canalem obturantes, uti vermes, constrictio spasmodica in hysteriis, contractio inflammatoria, tumores lenti & excreſcentiæ in parietibus intestinorum; (in dissecta femina tympanitica observabam certum intestini locum callosum adeoque angustatum, ut aëris ritus transfluxus impeditus fuerit.) His omnibus fit, ut aër intestinalis haud in toto tubo distribui aut educi queat, sed per remoram incaleſcat & nimis expandatur.

2. Relaxatio intestinorum, adeo ut ad aëris vim elasticam coërcendam haud sufficiant. Aqua asciticorum forſan hoc modo & non raro tympanitidem ſecum ducit; (exemplum huc trahendum, exhibet diar. 1785. Octobr. 7.)

3. Aër ipſe ob gravem putreſcentiam expansus, qualem causam habere videtur metheorismus ſ. tympanitica expansio toties in febribus gravibus putridis occurrens; an ſimilis eſt origo affectionis tympaniticæ in febre puerperali frequentiffimæ?

4. Aër in cavitate abdominis extra intestina per horum solutionem sphacelofam vel aliam extravasatus & expansus, qui casus, ſi exiſtat, rariffimus eſt.

Prognosis & curatio tympanitidis juxta causas ſ. morbos primitivos, unde hæc affectio mere ſymptomatica ortum trahit, determinandæ ſunt; metheorismus in febribus putridis per clysmata

ex aqua frigida et aceto vel oleo vitrioli; vermifera per anthelmintica; spasmodica per antihysterica præsertim affam foetidam sanabilis judicari potest; ascites adjuncta ut ipsa origo sanatu difficilis est & stimulantia calida simul desiderat, ut spiritum salis dulcem cum essentia affæfoetidæ, nec non infusa vinosa amara; et tumoribus vel callositate intestinorum oriens lento progressu quodammodo cognoscenda & insanabilis habenda est. (Tympniticos affectus sanatos exhibet diar. 1784 Novbr. 6. & 1785 August 5. & Septembr. 5.); idiopathica sola fortasse paracentesi sanatur.

Physeonia f. tumor abdominalis durus e contentis induratis & excrescentibus, uti ab utero (vid. diar. 1785 Maj.) & mesenterio (vid. diar. 1785 Maj. 8.) & pancreate (vid. diar. 1787 Decbr. 6.) compressio viscerum adjacentium indeque hydrops vel alius terminus letalis hinc surgunt.

Physometra f. uteri tumor e contento aere distinguenda a priore per levitatem, sonitum a pulsatione, notabile incrementum a calore, quandoque exitum flatuum per vaginam; curanda ut hydrometra.

G E N U S III^{tium}.

HYDROTHORAX

Est collectio hydropica f. feri morbose extravasati in cavitate pectoris.

Differentia illius totuplex statui potest, quot sunt cavitates diversæ pectoris, in quibus serum colligi posse observatum est sc. hydrothorax stricte talis f. collectio hydropica utrumque vel alterutrum cavum inter pulmones & pleuram occupans; hydrops pericardii f. in hujus cavitate locum habens; & hydrops mediastini, quæ in hujus duplicatura residet. Varietas autem hæc post mortem detecta vix propriis signis in viventibus distingvi potest, nec illis opus est, utpote idem de quacunque differentia valet medici judicium.

Symptomata hydrothoracis magis vel minus constantia.

1. Dyspnœa f. respirandi difficultas continua; diu durans, increescens, suffocationem minitans vel revera inducens.

2. Tussis vel sicca vel humida cum sputo vario mucofo, puriformi, & sangvineo in magno morbi gradu.

3. Situs corporis semper uno, alterove modo intolerabilis; si in una cavitate pectoris morbus hæreat, in opposito latere decubitus tolerari nequit, si utraqve cavitas serum contineat, in neutro

latere decubitus commodus fit; tunc incremente morbo situm erectum continuo eligit æger.

4. Tumor partium extremarum, faciei vel artuum tam inferiorum quam interdum superioris imprimis in latere affecto; intumescencia talis incrementis morbi solitus comes est.

5. Minus constantia sunt anxietas, palpitatio cordis, vox debilis & difficilis, vigiliæ, sensus ponderis supra diaphragma, incrementum dyspnoeæ post cibos largius ingestos, pulsus depressus imò intermittens nec raro expansus.

Causæ antecedentes hydrothoracis esse possunt.

1. Causæ hydropis communes supra allatæ haud secus in pectus quam in alias corporis partes agentes (vid. diar. 1783 a no. 8 a 13), huc etiam memorari potest sanguifluxus nimius in subjectis ad hydropem dispositis (vid. diar. 1784 Maj. 8,) præsertim attentione dignum habeo illud monitum, quod pueris caute contra pectoris oppressiōnem præscribenda sit phlebotomia, ne hydrothorace necarentur.

2. Asthma convulsivum, quo circulatio humorum in pectore impeditur, itaque extravasationi serosæ ansa præbetur (vid. diar. 1782 Septembr. 3 & 1787 Novembr. 6.)

3. Hepatis enorme volumen pectus compri-mens & circulationem impediens (vid. diar. 1782 Octobr. 10 & Decembr. 7.)

4. Pulmonis ipsius vitia simili modo circu-

lationem perturbantia, vel ejusdem inflammatio (vid. diar. 1783 Mart. 7. & 8 & 1784 Maj. 5.) vel chronica affectio & obstructio (vid. diar. 1782 Februar. 7 & Decembr. 8.)

5. Metastatica materies in pectore deposita post febres putridas vel intermittentes (vid. diar. 1782 Februar. 8 & Junii 3; 1785 April 7, & 1783 Novembr. 8.)

Diagnosıs hydrothoracıs habenda est e tribus praefercim signis sc. dyspnoea continua & crescente, certo corporis situ intolerabili & tumore hydropico partium extremarum, quod ultimum tamen haud semper praesto est; praegressum asthma convulsivum diagnosin firmat; fallax autem sine dubio est signum a nonnullis relatum sc. fluctuatio aquarum, dum aegri humeris prehenso pectus commovetur. Ab empyemate & vomica hydrothorax distingvitur per signa inflammationis in illis praegressa. Ab obstructione f. infarctu pulmonum (vid. diar. 1782 Jul. 11) nec non vitio cordis dyspnoeam faciente (vid. diar. 1785 Jul. 5.) discernitur hydrothorax per situm corporis in allatis casibus ubiqve tolerabilem. Ab omni tamen incertitudine haud libera est haec diagnosıs, praesertim chronicus infarctus unius pulmonis formam ab hydrothorace vix destingvendam sibi induere potest; novi virum diu omnibus hydrothoracıs symptomatibus afflicto, quae terminabantur in tussin purulentam; alius tam manifesto hydrother-

acicus videbatur, ut ad paracenthesin pectoris destinatus esset, sed pridie ante operationem faciendam moriebatur, & in demortuo invenimus enormem massam steatomatosam, quæ unius pectoris cavitatem implevit.

Prognosis: 1) eventus spontaneus hydrothoracis semper tamen lente funestus est; collectio enim feri sensim ad tantum gradum ascendit, ut pulmones comprimantur & ad functionem vitæ necessariam inepti reddantur, 2) per artem dubius censendus est, plurimi hoc morbo necantur; non paucos tamen servari posse probabili experientia constat (vid. 1783 Maj. 3 & Jul. 6 & 1784 Novbr. 5. & 1786 Jun. 7. & Aug. 15.)

Curatio per medicationem antihydronicam generalem instituenda est; squillitica potissimum convenire videntur, maxime autem emulsio ammoniacalis; commendanda quoque sunt vesicatoria in pectore ampla et repetita; sunt, qui tincturam cartharidum ad guttas decem ter indies commendant; tentamen, quod ipse institui, votis haud respondit. Paracenthesis pectoris quoque inter auxilia contra hydrothoracem a medicis numerari solet, mihi ipsi haud occurrit casus hydrothoracis adeo certus & quoad sedem extravasati adeo definitus, ut e paracenthesi juvamen sperari potuerit.

G E N U S IV^{tum}.

HYDROCEPHALUS

Est collectio feri præternaturalis in interna cranii fede circa cerebrum.

Symptomata & signa sunt:

1. Læfio varia functionis cerebri fenfim absque febre increfcens, uti vertigo paulatim adaucta demum cum lipothymia & vel apoplexiæ infultibus (vid. diar. 1786 April 15 & indicem apoplexiæ ex fero circa cerebrum,) ftupor notabilis, tremor artuum, memoriæ debilitatio, langvor, fomnolentia, dilatatio pupillæ enormis, quandoque vifus duplex, insignis interdum capitis dolor, verus lethargus (vid. diar. 1784. April. 7. & Jun. 6.)

2. Vomitus frequens; in duplo faltem exemplo recordor hoc fymptoma, quod licet non conftans, nec per fe indicativum, fupra allatis tamen annexum diagnofin corroborat.

3. Volumèn capitis apud infantes magis magisque & notabiliter increfcens cum dimotione offium cranii in futuris; etiam ferum in theca vertebrarum extravafatum (circa finem vertebrarum dorfi protrudi, ibidemque ad utrumque latus formare valet facculum, qui fpina bifida nominari folet.

Origo:

1. Prava conformatio in utero materno,

dum sit notum est, foetus jam hydrocephalo laborantes nasci posse.

2. Retropulsa & deposita materia morbosa ad cerebrum, hydropica, arthritica, metastatica post morbos febriles, nec non exanthematica, (novi fœminam, cui post herpetem cruris sponte exsiccatum supervenerunt symptomata hydrocephali sensim ad lethalem gradum prosecta, ulceribus artificialibus largissime licet suppurantibus haud avertenda.)

3. Abusus potus spirituosi imprimis vini adusti.

4. Ignotæ aliæ causæ, dum non rarò in demortuis invenimus serosam juxta cerebrum collectionem, cujus causas detegere & ex antecedentibus derivare nequimus.

Causa proxima est serum ipsum morbose in varia sede cerebri effusum & collectum, sc. sub pia matre, in gyris cerebri; sæpissime in ventriculis lateralibus, apud infantem septem mensium hoc morbo necatum duas mensuras feri limpidi in illius ventriculis inveni; quandoque basis cranii præcipuus extravasati locus est.

Eventus hujus morbi fere semper lethalis est mediante aut apoplexia aut lethargo, qui uterque finis e copia collecti cerebrum comprimente, ejusdemque functionem demum prorsus impediante intelligi potest.

Curatio proin vix speranda est nisi forsan sub leviori & incipientis morbi gradu, contra quem vix validius auxilium, quam fetaceum in nuchâ diu gestum & suppurans cogitari potest.

O R D O II^{us}.

T A B E S

Est chronica corporis & virium consumptio absque febre essentialiter annexa.

Ad hunc ordinem tria genera referri possunt sc. Phthisis, Rachitis, Atrophia.

G E N U S I^{m u m}.

P H T H I S I S

Est morbus chronicus s. diu durans, consumens cum tussi essentialiter & constanter adjuncta.

Symptomata phthiseos.

1. Tussis aut sicca quandoque sub incipiente morbo, aut humida, fere semper talis sub progrediente morbo, vel modica & tolerabilis initio morbi matutino tempore imprimis se exferens, interdum silens, vel dein crebrior & molestior.

2. Expectoratio s. sputum, quando procedit, materiem purulentam continens, qualis sc. in abscessibus observatur, quæque saporem quando-

que dulcem aut falsum habet, odorem sub progressu morbi interdum foetidum, coloremque vel albescentem, vel cinereum vel flavum, imo viridescentem, & quæ demum aut simplex est aut mixta cum muco vel sanguine.

3. Pectoris molesta sensatio & affectio varia sc. dyspnoea sensum increfciens imprimis sub motu corporis sese exferens; dolor quandoque varius, ut punctorius vagus, sensatio excorians; oppressio anxia animum deprimens & ad iracundiam disponens.

4. Febriles motus sub progressu morbi accedentes, primo post prandium sese exferentes per æstum insolitum in volis manuum & facie, quæ simul aut in alterutra aut in utraque gena intense sæpe rubet, dein increfcentes vespertino tempore notabiles & sudorem nocturnum secum ducentes, frigus febrile non raro adest, ut plurimum irregulare, quandoque typum quotidianum habentes. Appetitus initio morbi naturalis & quandoque ad finem talis, sæpius tamen sub progressu deperditus.

5. Faucium & oris affectiones, ut rauco pertanax, dolor cum molesta deglutitione quandoque incipienti morbo annexa, semper autem versus finem funestum aphthæ lingvam, os, fauces obducunt.

6. Excretiones copiosæ colliqvativæ vel alvi vel sudoris et quandoque urina oleosum liquidum in superficie habens etiam propectum morbum

comitantes, ejusdemque exitum lethalem promoventes.

7. Virium tandem & massæ corporis diminutio indies major, quæque tumorem oedematolum crurum secum ducit & efficit.

Causæ phthiseos remotæ per experientiam comprobatae.

1. Dispositio congenita, & certa structura corporis, ut collum longum, pectus planum, artus graciles, capilli & supercilia nigra, parentes phthifici.

2. Ingrata diu durantia animi pathemata, ut moeror & indignatio.

3. Hæmophthisis notabilis prægressa.

4. Inflammatio pulmonum in suppurationem conversa.

5. Retentio sanguifluxus soliti & naturalis, ut menstruationis vel hæmorrhagiæ narium.

6. Catarrhalis tussis neglecta & male curata.

7. Materia irritans morbosa s. per alios morbos generata & ad pulmones deposita, uti scabiosa, herpetosa, ulcerosa, arthritica, scrophulosa, venerea, scorbutica, variolosa, morbillosa, metastatica post febres putridas vel intermittentes.

8. A nonnullis phthisis contagiosa habetur, cujus sententiæ argumentum sufficiens propria experientia mihi haud præbuit.

Causa proxima est puris generatio & collectio in pulmonibus, quæ suppuratio testante experientia & sectione cadaverum duplici modo differt, scilicet:

- 1) Suppuratio pulmonum cum tuberculis, id est tumoribus parvis duris in substantia pulmonum generatis, aut crudis e materia mucosa inspissata compositis, aut inflammatis, aut revera suppurantibus; phthisis ex hac causa tuberculosa dici solet.
- 2) Suppuratio simplex absque tuberculis propter abscessus vel ulcera pulmonum generata; quandoque ulcera talia fistulosa esse possunt scilicet membrana crassa callosa circumscripta.

Nexus phthiseos cum causis prægressis scilicet modus, quo hæ phthificam pulmonum suppurationem promovent & efficiunt.

1. Dispositio phthifica sine dubio consistit vel in teneritudine vasorum præsertim connata particulari pulmonum, vel in aptitudine ad inflammatorios morbos concipiendos certis subjectis propria, vel utraque conjuncta, unde comprehendi potest, causas inflammantes talium pulmones facilius afficere & lædere posse.

2. Protracta animi pathemata humoribus lentorem & spissitudinem inducendo, unde stagnatio & tuberculorum formatio in pulmonibus derivari possunt, phthifico morbo originem præbere videntur.

3. Hæmophthisis notabilis vulnerationem pulmonum pro causa habet, quæ in hac parte præ-

aliis inflammationi ejusdemque seqvelis obnoxia est, & propter motum continuum pulmonum consolidationi obstantem & propter irritationem aëris continuo influentis.

4. Pneumoniæ suppuratæ transitus in phthisin, utpote hæc in suppuratione pulmonum consistit, per se intelligitur.

5. Acrimoniae variæ ad pulmones depositæ, uti catarrhales, morbillosa, variolosa, scabiosa &c. irritando & inflammando suppurationem & lentiore vel citiore modo phthisin procreant.

Nexus phthiseos cum effectibus & symptomatibus.

1. Tussis e materia peregrina pulmones irritante excitatur, five illa veré purulenta, five tuberculosa fit.

2. Dyspnœa a compressione vasorum pulmonalium per materiam morbificam, itaque impedita circulatione intelligitur.

3. Puris expectoratio ex ejusdem generatione in pulmonibus atque naturæ vi ad illud expellendum nitente & sufficiente producitur.

4. Fluxus colliqvativi, diarrhœa & fudor e materia purulenta ad sangvinis massam absorpta, illamque ita resolvente, ut per vias excretorias largiter nimis educatur.

5. Febriles motus partim inflammationi suppurationem generanti aut e purè renovatæ,

partim materiæ purulentæ in sangvinis massam resorptæ et irritanti adscribere fas est.

6. Faucium affectio inflammatoria vix aliter, quam per consensum f. continuationem tunicæ schneiderianæ in pectore inflammatae declarari potest, aphtæ autem e pure resorpto, humores inquinante & in cavitate oris secreto derivari possunt.

7. Consumtio demum corporis & virium partim ex febre, partim e copiosis excretionibus; partimque e functione læsa pulmonum ortum trahit.

Diagnostica signa phthiseos:

1. Generalia sunt, tussis diuturna increscens, contabescencia corporis, sputum purulentum f. materiæ, quæ vel pus manifestum continet, vel minus manifestum, in aqua tamen subsidens, illaque qualitate a muco distingvendum. Mihi etiam occurrit tussis catarrhalis diuturna cum tabe & sputo puriformi, quæ a vera phthifica tussi per diversum progrediendi modum præsertim, distingvitur, illa enim ab initio gravis & sat violenta est, phthifica autem initio mitis sensim ingravescens observatur.

2. Tuberculosa phthisis sine sputo purulento & ante illius expectorationem; e tussi diuturna sicca cum dyspnœa & tabe concludi potest, quandoque glandulæ induratae inveniuntur & diagnostice corroborant.

3. Phthisis deuteropathica f. ex aliis morbis eorumque materia ad pulmones deposita uti scorbutica, scabiosa, metastatica e prægressis vel concomitantibus talibus morbis primitivis dignoscenda est.

4. Phthisis a vomica clausa pulmonum e dolore continuo in certa pectoris parte, decubitu intolerabili in latere opposito, tusi sicca, dyspnoea, prægressis signis inflammationis minus magisque manifestis cognosci potest.

Prognosis:

1. Communissimus sæpius timendus phthiseos eventus est lenta & demum funesta virium consumptio, certior quodammodo & citior in subiectis junioribus, capillis nigris præditis quam in senioribus & albo colore capillorum gaudentibus.

2. Spes sanationis haberi potest:

a) In phthisi a pneumonia & vomica rupta in quo casu sub expectoratione bene procedente plurimi servantur.

b) Sub origine illius metastatica e febribus putridis, variolis, morbillis, tusi convulsiva, ut plurimum quoque curabili.

c) Sub adjuncto vel superveniente scorbutico (vid. diar. 1786. April. 3.), etiam alios similes vidi casus, nullaque mihi occurrit exceptio a regula: sanabilem declarare phthisin, cui scorbutus sese affociat.

d) Per scabiem retrogressam exortus status phthificus quandoque sanabilis est, imprimis si vera suppuratio pulmonum nondum inducta sit, (vid. diar. 1786. Septbr. 5. & 1787. Novbr. 5.; phthifin superveniente scabie sanatam, vid. in diar. 1785. Jul. 10.)

e) In senioribus, phlegmaticis subjectis phthifis quandoque ad multos annos tolerabilis manet, ulcera pulmonum in hoc casu callosa & fistulosa fiunt fonticulorum adinstar.

3. Nulla sanationis spes haberi potest:

a) In phthifi post hæmopthyfin, saltem adeo rarum est exemplum sanationis, ut bona prognos illo superstrui nequeat.

b) In phthifi tuberculosa.

c) In phthifi cum raucedine.

d) In phthifi cum pulsu febrili celeri et in junioribus subjectis, tardior pulsus minus violentum morbum & forsan sanabilem indicat.

e) In phthifi cum adjunctis summi gradus symptomatibus, sc. excretionibus colliqvativis, aphthis, tumore oedematoso crurum, sputoque foetido, excepta phthifi a vomica.

Curatio phthiferos ad duplicem partem referri potest sc. generalem & specialem.

Curatio phthiferos generalis phthifi e quacunque causa ortæ cum annexo sputo purulento convenit, atque ad tres scopos dirigenda est sc.:

1) expectorationem materiæ purulentæ e pulmo-

nibus promovere. 2) sangvinem & humores per absorptam materiam corruptos corrigere. 3) molesta morbi symptomata mitigare. Auxilia congrua sunt:

1. Oleum asphalti, quod primum forsan locum inter remedia vere antiphthifica meretur, quibusdam sufficientem opem præstitit, alios levavit; foetidam expectorationem corrigit, sputum promovendo agere videtur; phthificis verò cum voce non clara vel rauca, cum febre, cum hæmopthysi vel dispositione ad eandem, vel summo morbi gradu jam afflictis nec prodest nec sufficit; ad sex vel octo guttas mane & vespere in aqua frigida porrigi potest; intra paucos dies effectum exferere solet, quod si observetur, diuturno dein tempore continuari potest, si verò brevi tempore non proficuum animadvertatur, de protracto illius usu nil sperandum est. (Exempla hoc remedio juvata exhibet diar. 1782. Febr. 5. & 1783. Jun. 4. & Decbr. 4. & 1785. Jul. 11.)

2. Muscus islandicus; vel pulvis illis ad drachmas quatuor sexve coquitur cum aquæ unciiis octo ad pultem, quæ omni mane cum lacte & saccharo ingeritur, vel si hæc forma ægrotis non placeat, integri musci eadem dosis coqui potest cum lactis & aquæ ana unciiis octo, unde decoctum gelatinosum percolatur ad usum; vel uncia illius sex coqvuntur cum aquæ mensuris tribus ad remanentiam duarum, quæ per filtrum colantur et

mixtæ cum sacchari uncia dimidia iterum brevi coqvuntur et dein colantur; gelatina sic parata omni mane ad modicam patellam cum lacte ingeritur. Emolumentum ex hoc medicamine aliquoties observavi.

3. Jusculum fecalinum f. e farina fecalina subtiliori ad unciam dimidiam cocta cum aquæ libra paratum omniqve mane fumendum loco musci substitui potest, simili modo agere videtur, nec minorem laudem meretur; quandoqve vesperi hoc & muscum mane præscribo.

4. Infusum salab sub tusi phthisin minante et acrimoniis ad pulmones conversis adscribenda mirum quandoqve juvamen et semper levamen affert.

5. Aqua felterana cum tertia parte lactis calidi aut pro lubitu imprimis tempore pomeridiano fumi potest, dum muscus vel jusculum fecalinum mane adhibetur; aut juxta certam regulam, dum sc. aqua hæc sensim adaucta dosi ad integrum tandem lagenæ contentum quotidie ante meridiem bibitur, & dein qvoad dosin minuitur, donec viginti qvatuor circiter vasa exhausta sint. Hæc ultima methodus vix nisi incipienti morbo, viribus adhuc bonis & præsertim subjectis sangvineis convenit.

6. Succus recens pressus e cucumeribus magnis maturis ad patellas duas per diem sumtus

ad æstum phthificorum moderandum proficit; verum nec hic nec aqua felterana sub alvo ad laxitatem prona convenit, utpote hæc magis istis remediis provocatur.

7. Decoctum corticis peruviani sc. corticis peruviani drachmæ sex, radicis fenegæ drachmæ duæ coctæ cum aquæ simplicis unciis duodecim ad uncias octo, quibus percolatis additur syrapi altheæ, mucilaginis gummi arabici ana sesquiuncia, cujus decocti uncia bihorio vel trihorio ingeritur, quodque potissimum phthifico statui post peripneumoniam, aliosque acutos morbos utile est; lentæ autem phthisi cum suspectis pulmonum tuberculis corticem minus congruum imo noxium observare mihi visus sum.

8. Varia præterea auxilia antiphthifica commendata sunt, iterumque laudibus suis destituta; ipecacuanha quotidie ad emesin promovendam porrigenda, cujus tentamen in nonnullis absque operato effectu institui; solutio extracti myrrhæ juxta methodum Griffethianam in alio ex ægrotis meis hæmopthyfin excitavit, & in alio nil profuit; inspiratio vaporis calidi ex herbis emollientibus & pectoralibus per machinam huic scopo quadrantem etiam in non paucis frustra adhibita est. Parum meliori cum successu adhibetur fulphuretum calcis ad grana tria unacum magnesia ter die sumta; nec sine effectu proprinata sunt pulveris digitalis purpureæ granum vel grana duo trihorio;

denique haud spernendum videtur fetaceum prope pectus a nonnullis comendatum, quod, vel melius fonticuli, inprimis sub origine morbi ab acrimoniis ad pulmones a reliquo corpore delatis conveniunt.

9. Diæta phthificis congrua exigit: a) Victum blandum e lacte, farinaceis, piscibus, carnibus tenerioris indolis paratum, cerevisiam fortem præfertim in senioribus. b) Abstinentiam a stimulantibus & calefacientibus, uti spirituosis aromaticis, acidis salitis, potuque caffè. c) Aerem calidiorum purum ruralem quodammodo humidum, hinc clima meridionale, itinera maritima svadentur.

10. Symptomatum in phthisi molestiorum mitigatio secundum varietatem eorundem differt.

a) Expectorationem difficilem kermis mineralis granum cum saccharo bihorio vel rarius sumtum promovet.

b) Diarrhoeam quodammodo diminuit gummi arabicum ad cochleare minus sæpius per diem ingestum.

c) Vigiliis noctesque infomnes in ægris tamen desperatis extracto opii ad granum dimidium vel integrum aut granis tribus florum zinci vespera porrigendis debellare licet.

d) Sudorem colliqvativum integumentis non nimis calidis et interdum infuso frigido herbæ salviæ vespere sumto moderari valemus.

e) Aphtosæ fauces & lingua linctu boracino abstergi itaqve levare possunt.

Curatio specialis phthiſeos ad causas ejusdem respectum habet, illisque adaptanda est.

1. Tuberculosa phthiſis nondum sputum purulentum vel paucum nec febrem secum ducens remediis resolventibus tentanda est, e quibus mihi præsertim proficue apparuerunt pilulæ pectorales adgrana quindecim, imo plura ter die sumendæ.

2. E scabie retrogressa exorta phthiſis sulphurea desiderat vel pillulas mox laudatas vel florem sulphuris cum oculis cancrorum & camphora, nec non balneum universale ex aqua tepida frequens.

3. Phthiſis a morbo venereo cum hujus signis juncta nec ante eandem præfens remedia antisyphilitica desiderat.

4. Phthiſis cum scorbuto juncta antiscorbuticis remediis tollitur, quibuscum jungi potest jusculum fecalinum, (vid. diar. 1786 April 3.).

GENUS II^{dum}.

RACHITIS

Est tabes puerilis juncta cum intumescencia abdominis, capite magno leuco-phlegmatico, nec non præternaturali magnitudine epiphyseum osseum.

Symptomata rachitidis & effectus:

1. Capitis magnitudo præternaturalis cum facie pallida inflata, sub incremento morbi ossa frontis protuberant; ingenium præmaturum observatur, dentes flavescent, nigrescent, corroduuntur & excidunt.

2. Pectoris latera conprimuntur, sternum protuberat, spina dorsi uno aliove modo sæpe curvatur.

3. Ossa debito molliora & flexilia fiunt itaque ad incurvationem & rupturam disposita, cujus vitii effectus præsertim in cruribus propter incumbens corporis pondus sese exferit, epiphyfes ossium imprimis circa juncturas manuum & in costis debito majores observantur; ambulatio propter talem ossium læsionem fit difficilis imo impossibilis & perversa.

4. Totum corpus contabescit cum langvore, pigritia, flacciditate musculorum & febris hectica in nonnullis funesta exfurgit.

5. Abdominis præternaturalis intumescencia s. expansio constans non fluctuans.

6. In demortuis hepar, lien, glandulæ mesenterii debito majora, serum quandoque extravasatum juxta cerebrum vel in cavitate pectoris, ossa fragilia, aspera, porosa reperiuntur.

Causæ antecedentes rachitidis:

1. Ætas infantilis & puerilis, utpote huic ille morbus proprius observatur, vel jam quinto

menſe, vel ſerius poſt inchoatam ambulationem ſeſe exferens.

2. Parentes debiles vel nutrix valetudinaria imprimis, qui morbo venereo afflicti fuerunt.

3. Cauſæ variæ vires infantum debilitantes humoresque corrumpentes, uti cibus multus farinaceus, aer frigidus humidus, dentitio difficilis, efflorefcentia cutanea retrogreſſa, & imprimis defectus motus corporei.

Cauſa proxima ſtatuitur acrimonia acida, ad quam prima ætas potiffimum inclinât, quæque debilitata concoctione facile generari poteſt; ab hac intelligi poteſt mollities offium, utpotequæ in acidis molleſcunt.

Diagnofis a deſcriptis ſymptomatibus depro-mitur; ratione gradus diſtingvitur hic morbus in rachitidem incompletam, in qua nondum ulla osſium læſio obſervatur, & completam, ubi illa præſto eſt.

Prognofis:

1. Duratio rachitidis ad annum ætatis tertium vel ſextum quvimo duodecimum protrahi poteſt.

2. Spes ſanationis haberi poteſt imprimis ſub morbo minoris gradus & per ritam medelam, ſcabies tanquam ſalutare molimen naturæ contra hunc morbum obſervata eſt.

3. Minor ſpes haberi poteſt, quando notabilis morbi gradus ſigna adſunt, dentes decide-

dunt, halitus foetidus ex ore spirat, insignis dyspnoea, macies, febris hectica adfunt.

Curatio rachitidis perficienda est.

1. Antacidis remediis, quæ mere talia incipienti morbo sufficiunt, aut sc. anima rhci uncia cum drachmis duabus olei tartari per deliquium vel simul dimidia extracti gentianæ, ut in mixtura antirachitica ad guttas triginta vel plus juxta ætatem ter per diem porrigitur, aut pulvis infantum sub alvo stricla ad cochleare minus bis per diem.

2. Roborantibus cum antacidis mixtis, inter quæ præstat decoctum chinæ simplex, cujus unciis octo drachma salis tartari apposita est, ad cochleare majus trihorio aut bihorio fumendum; hocce remedium præsertim ingravescenti & meris antacidis non cedenti morbo convenit.

3. Balneatione per aquam frigidam; aut spongia madefacta bis per diem corpus, imprimis spina dorsi, lumbique & abdomen laventur, aut integrum corpus in aqua frigida immitatur; hoc auxilium maximi contra rachitidem habeo.

4. Diæta convenienti & roborantis indolis, quo pertinent:

a) Victus imprimis e cibis salitis ficcis depromendus, aromata & salita profunt, potus fit parcus etiam roborans, uti cerevisia fortis, vinum rubrum quandoque fumendum, aqua frigida.

b) Aër calidus & ficcus maxime proficit; ut

infantes tales debiles radiis solis exponantur, svadere soleo.

c) Integumenta corpori proxima lanea sint; stragula lecti duriora.

d) Motus corporis insignis utilitatis censendus est, qvalicunqve possibili modo faciendus per ambulationem, unctionem in curru, frictionem per pannum laneum simplicem vel fumo mastichis imbutum in abdomine, præsertim dorso & artubus applicandam.

G E N U S III^{tium}

ATROPHIA

Est tabes corporis chronica absqve signis phthiseos aut rachitidis.

Causæ atrophiae diversæ sunt & juxta illas dijudicatio & curatio hujus morbi differunt:

1. Atrophia ex evacuationibus nimis, uti sangvinis, alvi, urinæ, feminis, sudoris præter curam causas debellantem desiderat nutrientem victum & medicamen roborans in cortice peruviano petendum.

2. Atrophia ulcerosa s. ab ulceribus largiter suppurantibus ortum trahens præter curam ulceris desiderat auxilia sangvinem corrigentia sc.

corticem peruvianum & aquam felteranam cum lacte.

3. Atrophia scrophulosa f. ex obstructis glandulis producta; varia contra hunc morbum landantur remedia, uti spongia usta, glandes qverni, solutio terræ ponderosæ salitæ, mercurialia, aqua marina, inprimis extus applicita ceteraque, quibus omnibus juxta meam experientiam efficacior est tinctura nostra antirachitica ad guttas sexaginta ter die adultis porrecta. Profuit quoque semel essentia chinæ composita cum tertia parte elixirii aromatico-acidi ad guttas sexaginta ter de die. Diæta sit ut in rachitide.

4. Atrophia senilis f. marasmus, naturalis, ut ita dicam, morbus consistens in partium rigiditate nutritionem non amplius admittente, quæque ad omnes functiones ineptæ redduntur; eventus hujus est certa mors; vinum, cerevisia fortis jusecula carnea, calor, dulcia profunt.

5. Atrophia mere symptomatica ut e vermicibus, scorbuto, hydrope, infarctu hepatis; dyspepsia, vomitu habituali haud aliam curam, quam quæ morbis primitivis convenit, desiderat.

O R D O III^{titus.}

DECOLORATIONES

Sunt morbi, quorum præcipuum signum est depravatio visibilis & coloris præternaturalis mutatio in cute.

Quatuor genera sub hoc ordine comprehenduntur sc. Icterus, Scorbutus, Lues venerea, Scabies.

G E N U S I^{mum.}

ICTERUS

Est morbus, in quo cutis, oculi, urina colorem habent flavum varii quidem gradus, unde denominationes illius plures habentur sc. icterus pallidus, ubi color pallido-flavescentem observatur, icterus flavus s. aurigo, ubi color croceus est, icterus niger s. melasicterus, ubi color in nigrescentem vergit.

Causa proxima haud alia esse potest quam biliosi humoris in hepate præparati transitus in massam sanguineam immediatus, unde hujus serosa pars bile tingitur flavumque colorem in partibus efficit. Viam talem possibilem monstrat injectio anatomicorum e vasis biliferis in venosa penetrare valens; obstructis ideo ductibus hepaticis,

bilis ab illis exclusa in venosis vasis suscipitur & ad massam sangviuis vertitur; si verò ductus choledochus haud pervius sit, bilis cystica eodem modo per ductum hepaticum in vasa hepatis demum venosa traduci potest, indeque in sangvinem; e priori causa icterns pallidior, e posteriori autem intensior flavedo produci & intelligi potest.

Causæ antecedentes icteri variæ sunt, & harum differentia specialis icteri consideratio nititur.

Species I^{ma}.

ICTERUS VULGARIS

Est icterus frequentissime occurrens continuus chronicus s. nulla febre stipatus.

Symptomata præter definitionis notas possibilia & crebrius annexa sunt, alvi segnities, excrementa alba, sapor amarus, anorexia, nausea, quandoque molestus corporis pruritus, quæ omnia e bilis defectu in intestinis & præsentia in aliis partibus intelliguntur, quandoque dolor pressorius imo tumor palpabilis in regione hepatis, infarctui ejusdem adscribendus.

Causæ antecedentes & efficientes esse possunt:

1. Animi ingrata pathemata, ira, terror, indignatio, qualis causa constrictionem spasmodicam ductibus hepaticis inferre, itaque refluxum bilis producere videtur; mihi etiam colica hysterica

icterum efficiens occurrit sine dubio eadem ratione ac animi pathema agens.

2. Impuritates primarum viarum mucosæ in duodeno præsertim hærentes & ductum chole-
dochum quodammodo obturantes, forsan ipsius bi-
lis spissitudo, ut talis obstruens causa statui potest.

3. Febres intermittentes rarò per se, sæ-
pius per remedia adstringentia intempestive sup-
pressæ, affectionis hepaticæ cum ictero causam fi-
stunt, (vid. diar. 1785. April. 2, & 1786. Jun. 2.)

4. Infarctus s. obstructio hepatis e qualicun-
que origine proveniens sive simplex, sive schirrosa
steatomatosa, rheumatica, arthritica, (vid. diar.
1785. Decembr. 4, & 1786. Decembr. 4.)

Diagnos. icteri vulgaris s. ab allatis causis
producti imprimis per explorationem anteceden-
tium eruitur; infarctum hepatis ut causam ex statu
valetudinario & affectione hepatis præcedente,
icterique diuturnitate atque pertinacia contra de-
bita remedia concludere licet; impuritates verò
primarum viarum per citiorem morbi ortum &
medicaminum cito observatam efficaciam probabi-
les redduntur.

Prognosis: icterus vulgaris ut plurimum cura-
bilis nec adeo diuturnus est morbus; excipiendus
tamen ille est, qui ex infarctu hepatis oritur, ut
primitivus morbus dijudicandus, interdum igitur
insanabilis & in hydropem lethalem transiens.

Curatio icteri vulgaris absolvenda est remediis resolventibus salinis rhabarbarinis saponaceis ita porrectis, ut modica alvi subductio promoveatur.

1. Pulvis e cremore tartari, nitro & rheo vel præsertim e sapone hispanico, tartaro tartarifato et radice rhei ad partes æquales compositus & ad cochleare minus ter qvaterve nyctemero exhibitus plurimos mihi obvios ictericos sanavit; si forma pulveris ægrotis displiceat, mixtura e salis mirabilis Glauberi unciiis duabus, aquæ menthæ unciiis octo, animæ rhabarbari uncia una alterave ad cochlearia duo majora bi vel trihorio loco pulveris præberi potest.

2. Tinctura aperiens ad guttas sexaginta trihorio decrefcenti ictero imprimis sub alvo ad laxitatem prona convenit & sæpe sufficit.

3. Pilulæ resolventes cum rheo, vel si alvus valde fegnis observetur, cum aloe, requiruntur ad icterum magis inveteratum, supra allatis remediis non cedentem, & ad grana qvindicim vel ter nyctemero, vel modo mane & vespera, dum mixtura aperiens interdium adhibetur, porriguntur; in pertinaci tali malo decoctum resolvens e radicibus graminis & taraxaci paratum etiam adhiberi potest; nec contemnendi sunt vitelli ovorum recentes mane ingerendi.

4. Diæta s. victus ictericis maxime quadrans est tenuis e jusculis potissimum tam carneis quam alio modo paratis depromendus; cibi ficciores viscidae indolis & spirituosæ scopo resolventi minus congrua judicari debent.

Species II^{da}.

ICTERUS INFANTILIS

Est icterus in neonatis quandoque occurrens e meconio intestina implente derivandus atque laxantibus ut syrupo e cichoreo cum rheo vel pulvere infantum ad sufficientem effectum præbitis tollendus.

Species III^{ta}.

ICTERUS PERIODICUS

Est icterus per intervalla licet irregularia recurrens, alioque tempore absens.

Symptomata & signa illius sunt:

1. Recursus per paroxysmos fortiores, qui consistunt in gravi anxietate cardiæ & pectoris, vomitu molesto, diarrhœa quandoque adjuncta, excretionem per has vias quandoque biliosa, & calculorum per anum; finito intra aliquot horas tali paroxysmo flavedo cutis observatur magis magisque increfcens, dein sensim imo sponte evanescens.

2. Intervalla dein libera observantur variæ durationis, ad plures hebdomades imo menses protracta, in quibus ægroti quodammodo tolerabilem degunt vitam.

Causa proxima icteri periodici est calculus in vesica fellea inclusus, vel aliud vitium bilem cysticam notabiliter inspissans & ad exitum per ductum choledochum prorsus ineptam reddens; hac ratione per affluentem bilem & effluxum impeditum cystis magis magisque impletur ad tantum denuo gradum, ut dolorifica ejusdem distentio producat, indeque per consensum motus naturæ violenti ad causam mali per vomitum removendam nitentes, quali molimine contentum cystidis exprimitur, quandoque ipse calculus, si nimia illius moles exitum haud impediat, saltem vero pars inclusæ bilis partim in intestina protrusa, partim autem motu retrogrado per ductum hepaticum, atque dein per vasa bilifera & venosa hepatis in massam sanguinis communicata cum insequenti ictero, qui dein eliminata materia biliosa per vias solitas excretorias sponte evanescit; intervalla dein succedunt libera, donec nova & sufficiens bilis in cystide accumulatio producta sit.

Eventus icteri periodici dubius, quandoque faustus, adeo ut naturæ conatibus ejiciatur calculus vel materia cystidem obstruens, itaque causa morbi plenario tollatur, interdum vero infastus & crebriore morbi recurso, utpotequi causam non

removendam indicat, timendus; miseram tunc per plures annos vitam degere possunt tales ægroti, tandemque ni alio morbo succumbant consumptionem letalem e violentia dolorum sibi contrahunt.

Curationis modus sub hoc morbo duplex:

1. Sub ipsis paroxysmis, qui ad salutarem finem tendentes haud supprimendi sunt; eorum nimia violentia imprimis in plethoricis venæsectionem desiderat, alias linimentum volatile extus, clyisma emolliens, potus largus aquosus, syrupus diacodii cum oleo crebro sumtus, finito paroxysmo rhabarbarina cum sale mixta, ut pulvis rhei et temperans camphoratus ana ad grana quindecim bis terve per diem ad bilem in intestinis effusam evacuandam conveniunt.

2. Extra paroxysmos haud alia indicatio locum habere potest quam attenuatio bilis, ejusdemque per appropriata & interposita purgantia evacuatio, quæ ratione bilis accumulatio in cystide, indeque surgentes paroxysmi quodammodo averti possunt. Hisce scopis quadrant diæta tenuis abstinentia ab oleosis & spirituosis, salis largus usus; decoctum radicum resolventium imprimis graminis & taraxaci frequenter adhibitum, et pulvis supra laudatus semel saltem quavis septimana sumtus; motus corporis medicus in curru aut eqvo ad promovendum bilis effluxum quoque convenit, violentior autem irritationi per calculum, indeque renovato paroxysmo ansam dare.

valet. Quod ut specificum contra calculos biliosos comendatur remedium, olei nempe terebinthinæ destillati et naphthæ vitrioli partes æquales ad guttas sedecim ter indies non sine effectu aliquali etiam in casu pertinacissimo adhibitum observavi.

Species IV^{ta}.

ICTERUS SYMPTOMATICUS

Est icterus ab alio simul præfente morbo prorsus dependens, illoque sublato evanescens, talis est icterus inflammatorius hepatitidis quandoque effectus (vid. diar. 1783. Febr. 2.) Nec non icterus biliosus stricte talis dicendus febre-biliosos, cholicas concomitans, (vid. diar. 1787. August. & insequentibus mensibus); uterque ut merum symptoma juxta regulas principali morbo congruas judicari debet.

G E N U S II^{dum}.

SCORBUTUS

Est morbus chronicus cum maculis lividis ad extremitates inferiores maxime crura limitatis, gingivis dentium tumidis livido-rubefcentibus imprimis quoad margines cruentis s. sanguinem facile fundentibus, languore universali, rigiditate genuum.

Symptomata scorbuti:

1. Essentialia constantiora:

a) Color faciei pallido-flavescentem vel in viridescentem vergens; oculi simili modo comparati, pigri, hebetes.

b) Gingivæ dentium vel prorsus vel tantummodo in marginibus tumidæ livido-rubescentes, a minima pressione sanguinem fundentes, dentes quandoque vacillantes, & halitus foetidus ex ore spirans; rarissime gingivæ illæsæ, (vid. diar. 1786. Jul. 3.)

c) Langvor minoris vel majoris gradus primo sese exferens in genibus cum rigiditate, dein universalis, imo tanta possibilis, ut ægrotos nequidem in lecto unicum membrum movere valentes observaverim; hinc averfatio motus vera tamen impotentia major.

d) Dyspnœa semper nonnulla, quandoque tanta, ut particularis pectoris affectionis imò hydrothoracis suspicio citari queat.

e) Maculæ extremitatum inferiorum vel minoris generis morfus pulicum æquantes livido-nigrescentes crura potissimum notantes vel quandoque majores flavo-viridescentes præsertim circa genua & malleolos observatæ, (rarissimum anomalie exemplum, ubi maculæ tales in brachiis aderant, vel ubi plane absunt, vid. diar. 1786. Jun. 3.)

2. Minus constantia symptomata & effectus scorbuti.

a) Crurum vel tumor mollior aut durus, vel induratio, epidermidis exsiccatio, ita ut digito abradi possit.

b) Dolor artuum quandoque pectoris etiam fixus pertinax, verum absque inflammationis periculo.

c) Tuffis vel ficca vel humida cum sputo mucoso.

d) Tabes corporis quandoque tanta, ut ad primum aspectum phthifica videretur.

e) Maximi gradus phænomena, plenaria immobilitas, tanta debilitas, ut minimus motus fitusque erectus lipothymiam imo mortem ipsam inducant, hæmorrhagiæ, hydrops internus vel externus, (vid. 1786. April. 3, & Jun. 3, & Aug. 14.)

Causæ antecedentes scorbuti, f. diætæ conditiones, quæ imprimis sub certo concursu ad scorbutum procreandum agunt, testante experientia sunt.

1. Defectus nutrimenti vegetabilis imprimis e recentibus vegetabilibus deprompti; atque usus alimenti oppositæ indolis [sc. carnis salitæ semiputridæ, praviqve panis; navigantium scorbutus merito huic causæ præcipue adscribitur; victus vegetabilis ad sanandum scorbutum maxime efficax etiam probat vim oppositæ diætæ ad eundem procreandum.

2. Defectus motus corporei atque moeror & depressio animi, quibus circulatio humorum

lentescit, testante enim experientia pigri præsertim scorbuto afficiuntur, & motus ad illum tollendum optime prodest.

3. Frigus intensum diuturnum, ideo scorbuticus morbus imprimis ad regiones boreales pertinet, rarissime in meridionalibus observatur; in Norvegia valde frequens, in Dania rarior, post hyemes graviores tamen epidemicus, (vid. diar. 1786. April. & insequentibus mensibus); navigantibus præsertim supervenit sub tempestate frigida procellosa.

4. Habitacula parva, aëre incluso exhalationibusque putridis multorum hominum inquinata, quibus utentes pauperes præ aliis scorbuto affici observabam.

5. Vicissitudines notabiles caloris & frigoris; Kongsbergæ in norvegia apud metallicos haud alios incolas scorbutum endemicum vidi, cujus præcipuam causam haud aliam detegere potui, quam certum vitæ genus, quod nimirum interdium sub frigore intenso labores suos exerceant, vespereaque & noctu igne hypocausti nimium recalescant.

6. Vernale tempus; quod scorbuticum morbum hyemali tempore contractum evolvit, ejusdemque symptomata manifesta reddit, (vid. diar. 1786. Jun. 3.)

7. Dispositio corporis ad scorbutum suscipiendum esse potest, sexus virilis, morbus idem

prægressus, debilitas post alios morbos imprimis putridam & intermittentem febrem.

Causa proxima scorbuti f. vitium ipsum corporis, in quo scorbutus consistit, e causis ejusdem antecedentibus, atque effectibus f. symptomatibus deducenda est; quæ enim vitium illæ in corpore producunt, quodque ad symptomata declaranda convenit, talem quoque indolem scorbutici vitii statuere licet. Juxta hoc ratiocinium causa proxima scorbuti consistit in spissitudine & acrimonia humorum ad putrescentiam prona.

Nexus talis proximæ scorbuti causæ cum principiis prægressis facile patet; hæc enim omnia ita sunt comparata, ut allatum vitium, quod scorbuticum statuimus, efficiant; sic victu pravo similis generatur humorum indoles, defectu motus & frigore nimio perspirabilis evacuanda materia retinetur & abundans redditur, hac ultima causa lymphæ inspissata acrimoniam involvit, ideoque inefficacem reddit, donec superveniens vernalis calor resolutionem lymphæ, evolutionem acrimoniam, ejusdemque efficaciam morbificam producat.

Declaratio symptomatum scorbuti ex allata supposita causa non minus probabilis fieri potest. Spissitudo enim saltem ad initium hujus morbi pertinens lentam procreat circulationem indeque retardatas secretiones humorum, quæ ad omnes corporis functiones requiruntur, ita ut ad illas peragendas langvor & impotentia exsurgant; e ple-

niore stagnatione maculæ, vibicis, gingivarum cruenta indoles non minus intelligi possunt, quam ecchymosis s. similis color cutis a sanguine sub illo extravasato, dyspnoea e spisso sanguine minora pulmonum vasa difficulter permeante explicatur; sangvisfluvia sub majori gradu morbi ex evoluta putrescentia indeque facta sanguinis dissolutione derivari possunt; putrescentem demum indolem maxime probat juvantium natura, quæ acida & antiseptica est.

Diagnosıs scorbuti facillime e notis in definitione ejusdem porrectis eruitur, sub gingivarum illæsa conditione rarissime occurrente reliqua tamen signa sufficiunt rita exploratione detegenda, ne hic morbus primo aspectu phthisin simulans pro vera tali habentur.

Prognosis:

1. Per se & sine convenienti medela scorbutus semper pejor redditur & demum letalis vel per debilitatem vel hæmorrhagias vel hydropem; excepto tamen scorbuto phthisi supervenienti et salutari, quem sine remediis æque ac sub remediis cessare observavi.

2. Per artem vero hic morbus quamvis maximi gradus tamen sanabilis est, & quidem in plurimis intra tres hebdomades.

Medicatio scorbuti triplicem partem continet, sc. curatoriam, symptomaticam, prophylacticam.

Curatio scorbuti ad humorum putrescentem indolem per acida corrigendam & eorum evacuationem quodammodo promovendam tendere debet, quali scopo juxta indubitata[m] experientiam sequentia respondent.

1. Poma citrina & aurantia, quorum [duo vel tria, saltem unum æger quotidie consumere potest; loco fructuum forte deficientium eorundem succus ad cochleare majus bis vel ter die ingeri potest, hoc auxilium in scorbuto vix minus specificum quam cortex peruvianus in febre intermittente censeretur debet; alia tamen adminicula etiam in usum trahenda sunt, ut cura citius compleatur, & quæ scire oportet in casibus, ubi fructus illi peregrini vel prorsus non vel insufficienti copia habentur; mirum videtur, quod tamen verum est, acetum vices laudati acidi non supplere.

2. Herbæ recentes imprimis certæ antiscorbuticæ dictæ, cochlearia, nasturtium aquaticum, acetosa, taraxacum, beccabunga, vel quatales ingerendæ; vel earundem plurium vel pauciorum succus expressus ad uncias tres imo sex quotidie bibendus; hæ ipsæ ut & alia olera etiam cum jusculo carneo cocta optime profunt; huc referri possunt omnes fructus horæi, poma acidula, ribesia, cerasa, rubus chamaemorus & similia.

3. Herba trifolii fibrini, non modo ejusdem recentis succus ad modicam quantitatem aliis laudatis commixtus, sed etiam herba sicca vel in aqua

calida infusa & ut potus theiformis adhibita, vel cocta cum cerevisia sc. herbæ manipuli duo cum cerevisiæ libris quatuor; ejusdem præparata etiam quadrant, mihi in usu est elixirium antarthriticum cum æqua vel dimidia parte aceti scillitici ad guttas sexaginta ter per diem.

4. Lactea, alimenta ex his parata, serum lactis, lac condensatum, ebutyratum, etiam scorbuticis valde proficua.

5. Motus corporis maxime necessarius est, quantum vires valent, optimus in aëre libero & donec modicus provocetur sudor, ægrotis licet invitis instituendus.

Scorbuticis communiter plura ex allatis auxiliis præscribo simul adhibenda sc. laudatum elixirium, infusum trifolii fibrini, serum lactis, & quando haberi possunt, poma citri atque succum herbarum, sub quali medicaminum connubio citior cura peragitur.

Curatio symptomatrica certo scorbuti gradui, ejusdemque minus constantibus symptomatibus adaptanda est.

1. Debilitas enormis ægrotos ad lectum cogens optime & certo debellatur decocto chinæ acido ad unciam bihorio fumendo & quidem loco laudati elixirii, non omisſis reliquis; scorbuto ipso hinc diminuto, viribusque adeo restauratis, ut

æger ambulare qveat, china haud amplius opus est.

2. Diarrhœa imo dysenteria scorbuto annexa pulvere gummi arabici ad cochleare minus alternatim cum laudato decocto corticis certò compefcitur.

3. Hæmorrhagiæ sub hoc morbo incidentes eidem decocto cedunt.

4. Tumor crurum notabilior imprimis cum alvo fegni juvatur thea amara ad patellam femel vel bis per diem fimul cum aliis antiscorbuticis fumto.

5. Tussis nimis moleſta præter remedia primitivo morbo congrua oxymelle ſcillitico vel linctu noſtro pectorali levabitur; ſi dolor pectoris pertinacior adjungatur, ex infuſo ſ. decocto radicis ſenegæ maximam opem obſervavi.

6. Rigiditas genuum poſt morbum devictum quandoqve ſuperſtes optime balneo vaporis vel inunctione ſucci citrini tollitur, (vide Deſcriptionem & curam ſcorbuti in diar. 1786. April. & Jun. 3.)

Scorbuticis noxia deprehenſa ſunt.

1. Venæſectio præſertim ſub protracto morbo; verum initio ejusdem, ſi inflammatio forſan accedat haud timenda eſt. 2. Purgantia fortiora, unde fluxus dysentericus excitari poteſt. 3. Subitaneus & violentior motus in magno morbi gradu periculofus lipothymiam imo mortem inducere

valens. 4. Mercurialia, quæ in scorbuticis salivationem citam, enormem, damnosam & difficulter sedandam provocant.

Curatio scorbuti prophylactica causas ejusdem s. vitia diætæ supra memorata, unde hic morbus progignitur, avertendo & evitando, illisque oppositum vitæ genus eligendo absolvitur; diligens corporis motus, victus quantum potis est, vegetabilis, transpiratio cutanea æqvabili calore juxta normam naturæ conservata, habitacula majora saltem depurata per aërem liberum, vel fumigationes aromaticas talis cautionis scopo conveniunt; cerevisia fortis, & brasica alba sale condita & conservata meritò ad frequentem usum commendantur navigantibus imprimis, si iter protracto tempore super mare fiat.

G E N U S III^{tium}.

LUES VENEREA s. SYPHILIS

Est morbus chronicus, cujus frequentissimæ notæ sunt ulcera diuturna, vel partium pudendarum vel faucium, vel crustosa faciei, nec non dolor membrorum nocturno tempore præsens, exacerbatus somnumque impediens.

Rita & completa definitio luis venereæ per notas constantes fieri nequit, utpote symptomata

designantia semper in hoc morbo præsentia haud dantur; multa quidem indicia illi propria sunt, nulla autem inseparabilia.

Symptomata, effectus & signa luis venereæ:

1. In partibus pudendis, ulcera (chancres dicta) in glande virili, vagina & labiis ejusdem; excrefcentiæ verucosæ s. condylomata in his partibus, apud infantes præsertim circa anum se exferentes; fluor ex pudendis femineis flavescens, viridescens, excorians, dysuriam inducens; non modò conjuncta hæc signa sed singula eorundem certam morbi diagnofin præbent.

2. In superficie cutanea, ulcera crustoia variolis ficcatis similia, illis parum majora in facie circa os vel mentum, in fronte, circa aures apparentia, chronica, quæ etiam certum morbi signum constituunt: ulcera quandoque majora aperta, lardacea facie prædita in aliis partibus occurrunt, imprimis in mammis nutricum, quibus morbus ab infantibus communicatus est; hæc per se minus diagnostica aliis certioribus signis confirmanda sunt. Huc pertinent efflorescentiæ aliæ cutaneæ, scabies, herpes & similia, quæ etiam originem veneream habere possunt, non tamen proprii ejusdem effectus sunt, sed ansam dant examen de ceteris signis instituendi.

3. In cavitate oris & faucium, ulcera chronica alba cum circumferentia rubra in palato, velo palatino, potissimum tonsillis; hoc non modò pro-

prium sed frequentissimum luis venereæ signum est; quandoque dolor & deglutitio difficilis juncta sunt, sæpius absunt, lardacea ulcuscula in labiis vel oris angulis fere æque certum indicium præbent, imprimis sub suspecta syphilide.

4. In extremitatibus & capite dolor gravis interdum mitescens vel filens, nocturno tempore sese exferens vel graviter exacerbatus somnumque impediens; capitis dolor ad certum locum, vel alterutrum latus limitatus esse solet. Hicce dolor etiam diagnosticum morbi signum sistit, imo per se satis certum, imprimis si remediis doloribus alterius indolis congruis pertinaciter resistat, vel si alia symptomata syphilitica adfuerint aut adsint.

5. In ossibus protuberantiæ s. excrescentiæ aut minus duræ, topi nominatæ, aut duritiæ ossæ præditæ, exostoses dictæ, quandoque graviter, quandoque haud dolentes; quæ etiam ut signa pathognomonica censerî possunt; rarissimam enim exceptionem faciunt familia ex causa scorbutica ortum trahentia; caries quoque ossium imprimis tenuiorum, nasalium vel palati effectus proprii luis venereæ esse possunt.

6. In glandulis, quæ non raro intumescunt, præsertim ingvinales, inflammationem dein & suppurationem contrahentes, hæc bubones dictæ etiam signum sat certum morbi sistunt.

7. Minus crebra nec propria symptomata & effectus luis venereæ sunt affectio oculorum,

chronica inflammatio, lippitudo, hemicrania *per-*
tinax, aurifluxus purulentus, dolor nasi formica-
 torius valde frequens in syphillide norvagica, quæ
 omnia licet morbum non indicantia tamen ad cu-
 ratius de illo examen instituendum nos ducunt et
 venereæ indolis habeantur, si vel juncta sunt cum
 quibusdam ex allatis certioribus signis, vel hisce
 successerint, vel in subjectis contagio expositis oc-
 currant; etiam vertigo, epilepsia, phthisis, ob-
 structio hepatis, abortus frequens; debiles, mor-
 tui, exulcerati & semiputridi foetus hujus morbi
 producta esse queunt. Vidi quoque sudorem noc-
 turnum enormem diu durantem sine alio sympto-
 mate syphilitico, sed post hunc morbum solitis re-
 mediis fugatum; mercurius et dein cura famis
 profuit; in alio fudor similis junctam habuit ar-
 thritidem.

Causa efficiens & origo unica luis venereæ
 est contagium, s. ejusdem communicatio a perso-
 nis illo afflictis ad alias sanas; circa tale conta-
 gium scire utile est.

1. Modum & vias, quibus propagatio hujus
 morbi possibilis inventa est: a) per coitum carna-
 lem; b) per osculationem, imprimis si labia exul-
 cerata sint; c) mediante officio nutricis, quo & ab
 infantibus ad nutrices & ab his ad illas morbus
 communicatur; d) mediante generatione a paren-
 tibus infectis ad infantes; e) mediante alio com-

mercio familiari, uti decubitu in lecto cum talibus ægrotis vel vestibus et integumentis eorum utendo.

2. Efficaciam contagii fere universalem, adeo ut raro ullus allatis modis illi expositus morbo non inficiatur; exempla exceptionis mihi aliquoties obvia fuerunt, vidi mulieres infectas earumque viros illæfos & vice versa. Maxime contagiosus est morbus efflorescentias cutaneas secum ducens, minus sub aliis formis, & minime si miasma tantummodò in ossibus hæreat vel supersit.

3. Evolutionem miasmatis ad diversum tempus post susceptum contagium; in aliis citius, in aliis tardius imò post annos plures sese per manifesta symptomata exferit morbus; quandoque post morbos febriles celatum virus ad actum excitatur.

Causa proxima luis venereæ adhuc ignota est.

Diagnosys syphilidis e signis ejusdem supra-memoratis, propriis dictis sive pluribus sive paucioribus depromitur, illamque confirmat contagium descriptis viis admissum.

Prognosis:

1. Per se & sola naturæ vi hic morbus incurabilis est, admodum diu durans, semper in pejus tendens, corruptionem & dissolutionem ulcerosam in fluidis & solidis tam mollibus quam duris, tam internis quam externis, itaque miserriam vitam & tandem tabem funestam efficere valens.

2. Per artem in univcrsum curabilis declarari potest ad gradum tamen minus vel magis perfectum sc.

a) Facilius & prorsus curabilis est, si modò partes molles & fluidæ symptomata continent; si morbus non nimis inveteratus sit, & viscera interna illæsa.

b) Difficilius sanationem admittit morbus mercurialibus jam incomplete tractatus, excrementas osseas secum ducens, in senibus, in infantibus, in gravidis, in complicatione cum aliis morbis, scorbuto, diarrhœa, epilepsia aliisque convulsivis ægri tudinibus.

c) Vix juvandus & funestus habeatur morbus, si vel cerebrum sine dubio ob cariem cranii affectum sit, indeqve vertigo, epilepsia, coecitas, fluxus aurium purulentus cum enormi dolore interno capitis surgant; vel pulmones lædantur cum insequenti phthisi, cujus curatæ exempla rariora sunt non curatis; vel hepar afficiatur, cujus incipiens obstructio sanabilis quidem est, inveterata schirrositas, aut jam contractus abscessus funesta; vel demum uteri scirrhus & cancer oboriantur, qui licet veneream causam habentes remediis illi appropriatis non cedunt.

d) Medicus etiam in culpa esse potest sanationis incompletæ fomitisqve morbose residui, citius feriusqve secundi, si vel ob ignorantiam vel fordidi lucri causa remedia ad celanda symptoma-

ta haud vero ad morbum ipsum exstirpandum sufficientia porrigat, ex. gr. mera topica ad ulcera glandis ficcanda et bubonem fugandum aut mercurium sublimatum aut alia mercurialia per se efficacia, sed non diu satis continuata aut denique remedia haud mercurialia, uti acida mineralia praesertim nitri, quorum efficacia nondum probata est.

Curatio syphilidis continet 1) dijudicationem subjectorum, quæ curam huic morbo quadrantem sufferre vel non sufferre queunt; 2) medicationem præparatoriam; 3) medicationem curatoriam s. curationem per mercurium absolvendam.

Dijudicandi regulæ quoad subjecta syphilide afflicta & mercurii usum ideo adhibendum sequentes sint.

1. Prorsus inutilis, noxius mortemque accelerans sub gradu notabili & incurabili hydropis & phthiscos, five ex venerea five ex alia origine hi morbi derivari possunt, nec non si schirrus uteri vel aliarum partium adfit.

2. Conditionaliter incongruum & damnosum remedium est mercurius, quamdiu cum syphilide juncta sunt scorbutus, morbi nervosi, diarrhoea, febres quæcunque, ultimumque graviditatis tempus, quæ omnia convenienti medela tolli debent, autequam curatio morbi venerei per mercurium instituat.

3. Usum mercurii non prohibent alia incommoda chronica, ut dyspepsia, asthma, lithiasis; in feminis mox post finitam menstruationem cura incipienda est.

Præparatio mercurii applicationem tutiorem & efficaciorum reddens illique igitur præmittenda consistit.

1. In balneis tepidis aquosis universalibus alternis diebus adhibendis & ad decem vel quindecim vices repetendis; quali balneatione sanguis diluitur, & vasa omnia emolliuntur & aperiuntur, ita ut mercurius eo melius & certius ubique penetrare & vim suam exferere valeat, in gravidis hæc præparatio locum habere nequit.

2. In certo vivendi genere, tempore balneationis observato sc. potu largo blando ut ferulæ lactis, decoctive tenuis e radicibus graminis & taraxaci parati, abstinencia a calefacientibus, spirituosus, salinis, acidis; victu modico non nimis nutriente; quinimo ut obesitas, si adsit, diminuatur, fami nequidem satis faciendum; decoctum lignorum a quibusdam tempore & loco præparationis commendatum vix requiritur.

3. In alvi purgatione bis tempore præparationis instituenda, initio sc. & circa finem, ne mercurii actio occasione crudorum intestinalium diarrhoeam provocet, in plethoricis quoque venæsectio ut cautela utilis adhiberi potest.

Incompletus mercurii effectus in extirpanda syphilide haud immeritò neglectæ huic præparationi inprimis per balnea adscribendus est; vix igitur sine illa, quando possibilis est, ipsa curatio facienda est.

Curatio ipsa luis venereæ per mercurium ejusdemque præparata varia absolvi potest, quæ pertinent.

1. Unguentum mercuriale f. neapolitanum, circa cujus usum notanda sunt.

a) Quantitas unguenti quavis viceapplicandi ad drachmas duas.

b) Partes corporis inungendæ, quæ sunt sequentis ordinis, primò inferior dimidia pars unius cruris, dein similis pars alterius lateris, tunc superior dimidia pars cruris primi lateris & dein similis pars alterius, postea femora eodem modo & lumbi tandemque, si opus sit, ipsa brachia.

c) Modus inunctionis, primò fricetur inungenda pars, donec caleseat, tunc applicetur definita dosis unguenti & inungatur per aliquot minuta, & pars ita inuncta linteo involvatur.

d) Repetitio talis inunctionis vel omni vespere vel in debilioribus alternis vesperis fieri potest & quidem ad tot vires, ut sufficiens mox definienda salivatio producat, topi & exostoses forsan præsentibus quotidie inungi debent.

e) Salivationis per talem mercurii usum productæ determinatio & tractatio: salivatio hæc tunc demum utilis & sufficiens æstimanda est, quando vix desinente fluxu provenit saliva spissa a libris circiter tribus ad sex quovis nyctemero, quando talis salivatio saltem ad quindecim dies nec ultra viginti quinque perdurat & quando omnia symptomata morbi sub eadem evanescent; donec descripta salivatio spissa proveniat, inunctio continuari debet, & dein seponi; si salivatio ante dictum terminum cessare incipiat, nova inunctio requiritur; si verò ultra allatum terminum protrahitur, lintea membra inuncta obtegentia auferantur, os diligenter collutorio ex aqua rosarum cum quarta parte mucilaginis seminis cydoniorum abstergatur, imo vino rubro aqua diluto, & aqua laxativa ad sufficientem dosin porrigatur; incommodum ipsius rite procedentis salivationis tolerari debet, nec alio modo quam per collutionem oris crebram mediante decocto avenæ vel infuso radicis altheæ mitigari potest, vel denique mera aqua frigida, quæ ad salivationem enormem quandoque sanguine mixtam compescendam optime convenit.

f) Diæta ad usum mercurii & salivationem requisita sc. potus largus ad tres circiter mensuras quovis nyctemero consumendus, cujus indoles esse potest vel decoctum avenæ, vel infusum raseræ ligni sassafras & gvajaci, vel aqua simplex lacte mixta, cibus sit tenuis blandus, juscula carnea vel

e granis cerealibus parata, panis albus, pisces recentes; salita, acida, aromatica, dura haud conveniunt; aër liber fugiendus est, sed quodammodo calidus sit ad gradus circiter quindecim; quamdiu salivatio procedit, ut in lecto teneatur aeger, tutissimum est. Ad alvum biduo vel triduo forsitan clausam solvendam clyσμα aut aquæ laxativæ aut oleum ricini uncia una alterave convenit; si autem alvus laxa reddatur, unde salivatio impediri potest, a mercurialibus desistendum & decoctum album pro potu adhibendum est, donec fluxus hic naturalis fiat.

g) Salivatione finita lintea artubus obvoluta auferenda sunt, & vestimenta renovanda, etiam cubicula immutari & aëre libero depurari possunt; laxans remedium supra-laudatum quovis tertio die ad quatuor vel quinque vices porrigatur; & alimenta solidiora initio e carnibus tenerioribus parata fumantur.

2. Mercurius dulcis intus fumendus, vel cum saccharo albo in subjectis ad alvum strictam prunis vel in aliis cum oculis cancerorum sc. scrupulo hoc remedium jungere soleo. Incipiendum est a minori dosi sc. granis duobus mane & vespere porrigendis; si octiduo elapso signa salivationis sc. tumor glandularum salivalium & gingivarum sese haud exferant, quævis dosi ad grana tria imo quatuor & quinque sensim augeri potest, donec

rita salivatio producat; si nihilominus salivatio haud procedat, inunctiones per unguentum neapolitanum supra allato modo præscribo & ad optatam salivationem usque productam continuo, reliqua tractatio eadem est ac in salivatione per inunctiones promota. Si alvus ad laxitatem prona est vel corticis cascarillæ grana quatuor vel granum dimidium opii pulveri mercuriali apponenda sunt, quod ultimum remedium vel moschus optime quoque convenit, ubi convulsivi affectus adsunt.

3. Mercurius sublimatus corrosivus, cujus grana sex solvantur in spiritus frumenti uncis duodecim, cujusque solutionis uncia dimidia bis terve per diem ingeritur, vel pilulæ ex hoc medicamine cum mica panis paratæ ad eandem dosin exhibentur; jamjam obsoleta est hæc medicina, utpote ejus efficacia fallax sc. ad morbum pro tempore celandum, haud verò ad eundem extirpandum sufficiens observata est: in unico casu, ubi exostoses tanquam reliquæ morbi adfuerunt, proficua mihi apparuit per se tamen haud sufficiens ad eradicandum malum. Diæta sub hoc medicamine adhibito ab ordinario discrepans haud requiritur, si usus saliti, acidi, spirituosus, excipiatur.

Cura morbi per mercurium absoluta, si reliquæ quædam morbi si nullæ superesse videantur, tanquam tutissima extirpationis mali via sequens methodus commendanda est: loco omnis cibi

pro prandio carnis non pingvis coctæ aut assæ uncia duæ cum æquali parte panis; pro cœna qualitas & quantitas alimenti eadem; loco omnis potus decoctum nyctemero consumendum, paratūque e radicis sassaparillæ, aut chinæ unciis duabus coctis cum aquæ simplicis libris quinque ad remanentem partem dimidiam; atque demum pilulæ ex extracto cicutæ ad grana sex mane & vespera sumendæ. Spatio sex hebdomadum hæc medela optatum effectum præstare solet, raro longior illius usus desideratur. Probata fatis hæc methodus est contra ulcera et efflorescentias cutis chronicas fere omnis generis et affectus doloresque syphiliticos aliis remediis non tollendos.

GENUS IV^{tum.}

SCABIES

Est efflorescentia cutis chronica pruriens pustulosa, materiem purulentam ut plurimum continens.

Symptomata vix alia ad hunc morbum pertinent quam allata efflorescentia quandoque humida sc. cum pustulis suppurantibus, quandoque sicca absque suppuratione manifesta, totam superficiem cutaneam, potissimum manus, rarissime fa-

ciem occupans; inquietudo & insomnia ob pruritum calore lecti adauctum quandoque accusantur; macies itidem & color cacoehymicus sub protracto malo induci possunt.

Causæ antecedentes scabiei possibiles.

1. Contagium s. infectio hujus morbi a personis illo afflictis ad alios sanos mediante contactu propagata. Hæc frequentissima causa est.

2. Corruptio humorum per se generata ob pravam vitæ rationem, victum talem, aquam putrescentem, defectum motus, immunditiem, transpirationem frigore multo inhibitam, (vid. diar. 1785 Mart. 4.) In regionibus borealibus scabies frequentior est quam alibi, maxime apud pauperes, qui & frigori & aliis diætæ vitiis præsertim obnoxii sunt; etiam ex acrimonia venerea scabiem produci posse supra dictum est.

Causa proxima scabiei sine dubio est acrimonia & spissitudo humoris per vasa cutis exhalantia evacuandi, quique ideo circa fines vasorum quodammodo stagnat, irritationem, indeque pruritus, inflammationem & suppurationem generare valet. Nonnulli infecta sc. acaros cuti adherentes pro origine scabiei statuunt; mihi probabilius videtur, hos per microscopium observatos ut effectum quam ut causam scabiei habere.

Diagnosıs scabiei per notas definitionis sat manifesta est; etiam sine definitione per nomen

solum cuicunque cognitus est hic morbus. Datur tamen efflorescentia saltem sub initio dubia, adeo ut etiam a prægresso contagio morbus concludi debeat.

Prognosis:

1. Per se scabies diudurans incommodum est, raro saltem, non nisi mutata diæta, quæ ejusdem causa est, evanescens.

2. Per artem convenientem impune curabilis est, eò tamen difficilius, quo magis protracta illius duratio est.

3. Per artem imprudentem, ut topica intempestive siccantia, purgantia fortiora, nec non frigus intensum cum periculo tolli potest hæc efflorescentia, dum materia illam constituens reformatur & dein aut massam sanguinis contaminans, aut in certis corporis partibus deposita morbos fere omnis generis progignere valet sc. febriles tam intermittentes quam putridæ & inflammatoriæ indolis, dolores colicos & arthriticos, nervosos morbos, convulsiones, epilepsiam, obauditio- nem; infarctus viscerum tam abdominis quam pectoris cum insequenti phthisi, hydropes & alvi fluxus molestos, (vid. diar. 1785. Mart. 4, & April 5, & Maj 3, & Jul. 8 & 9, & 1784. Octobr. 6; & 1787. Mart. 1, & Maj. 7; & 1786. August. 1, & Mart. 11; & 1783. Octobr. 5; & 1785. Aug.

4; & 1786. Sept. 5; & 1787. Novembr. 5.) Mediante tali retrogressu scabies proinde funestos effectus creare potest.

Curatio ipsius scabiei. Mihi solita & per multiplicem experientiam probata methodus triplici remedio constat sc.

1. Balneo universali tepido alternis diebus adhibendo per totam morbi durationem saltem in illis vix omittendo, qui diu hoc malo afflicti fuerunt. Commendanda est simul frequens lotio cum aqua marina vel decocto avenæ, quo ultimo scabiosam efflorescentiam aliis remediis non vincendam aliquoties sanavi.

2. Floribus sulphuris, quos jungo vel cum æqua parte cremoris tartari, si alvus per se strictior sit, vel cum oculis cancrorum, si alvus minus stricta sit, vel cum pulvere radicis gei urbani, si alvus revera laxa observetur, cujus compositi cochleare minus ter quaterve per diem ingeritur.

3. Unguentis sc. unguento ad scabiem Ph. dan., postquam pulvis nuper allatus per aliquot dies plures vel pauciores juxta variam morbi durationem porrectus sit, omni vespera partibus maxime scabiosis inungendo, strenue continuando et repetendo, licet medicatio sat lenta videatur, vel semel fugatus morbus recrudescat. Linimentum ex axungia porcinae uncia cum drachma mercurii præcipitati albi eodem modo adhibitum

cum fructu interdum applicatur. Commendatur porro, nec immerito in scabie simplici, unguentum ad scabiem piceum toti corpori capite excepto tribus vespèris continuis inungendum, quarto die nec antea, lavetur corpus aqua tepida vel melius saponata; post biduum ut plurimum crustæ scabiosæ exsiccatæ decidunt, quod si non observatur, inunctio allata ratione repeti debet. Cito quoque absolvetur cura ope unguenti sulphuris cum helleboro, cujus uncia et dimidia totum corpus a collo inde ad plantas pedum inungatur, reiteratur inunctio sexta quavis hora per nyctemeron nec abluatur aquæ saponatæ ope unguentum ante sextam post ultimum applicationem præterlapsam horam. Lectum per hoc tempus tenere debet ægrotus, laneis tegumentis præsertim involutus. Desquamatio et pruritus, quæ curam sequuntur graviora, brevi sæpissime unacum scabie evanescunt sine ulla sanitatis noxa; raro similem unguenti applicationem repetere necesse est.

Efflorescentias scabiosas vel potius herpetosas, quæ omnem aliam curam respuunt, acidorum mineralium, sulphurici præsertim, interno usu non semel sanatas observavi.

Curatio morborum e scabie ortum trahentium duplici medicatione constat; altera indoli ipsi talium morborum appropriata; altera ad sca-

biem versus cutem revocandam tendente; in mor-
bis acutis prior solummodò applicari potest, in
chronicis verò utraqve medela ut plurimum con-
jungi; revocatio scabiei per balnea & sulphurea
supra laudata promoveri debet; etiam commer-
cium cum aliis scabiosis, eorumqve vestimenta ad-
hibenda hoc scopo commendantur.

FORMULAE

AD

SYSTEMA PERTINENTES.

Aqua ophthalmica simplex.

R. Aquæ rosarum Unc. duas
Mucil. feminis cydonior. Unciam.
M.

Aqua ophthalmica camphorata.

R. Aquæ ophthalm. simpl. Unc. tres
Spir. vini camphor. Drachm. dimid.
M.

Aqua ophthalmica cum flor. zinci.

R. Aquæ rosar. Unc. duas
Spir. vini gall. Drachm. duas
Flor. zinci gr. quatuor.
M.

Decoctum album.

R. Pulv. testar. ppt. Drachm. sex.
Gummi arabic. Drachm. duas
Aquæ fontan. Libr. tres
coq. ad Libr. duas
add.
Aquæ Cinamomi c. vino Unc. un.
Pulv. sacchar. alb. Drachm. duas.
M.

Decoctum chinæ simplex

R. Cort. chinæ reg. opt. Unc. duas
coq. cum

Aqv. simpl. Libr. un. & dimid. ad Libr. un.
colat. add.

Syrup. commun. Unc. duas.

M.

Decoctum chinæ acidum

R. Decoct. chinæ simpl. Libr. un.

Elixir. vitrioli acidi. Unc. dimid.

M.

Decoctum chinæ cum fenega

R. Cort. chinæ reg. opt. Drachm. sex vel Unc.
dimid.

Radic. feneg. incis. Drachm. duas

M. coq. cum Aqv. simpl. Unc. duodec.

ad remanent. Unc. octo.

Colat. refrigerat. add.

Syrup. alth. Unc. un.

M.

Decoctum mundificans

R. Rad. sassapar. Unc. duas

Raf. sassaf. Unc. dimid.

Coqv. c. aqv. simpl. Libr. quatuor

ad. rem. colat. Libr. duar.

D.

Decoctum Senegæ — f. Infusum Senegæ

R. Radic. seneg. Unc. tres
 Coq. c. aqv. simpl. Libr. tres ad Libr. duas.
 Colat. add.
 Pulv. nitr. depurat. Unc. dimid.
 Syrup. altheæ
 Oxymell. scillitic. aa. uncias duas.

M.

Decoctum resolvens

R. Radic. gramin.
 — taraxac. aa. Unc. tres
 M. coq. c. aqv. simpl. Libr. quatuor
 ad remanent. Libr. duarum.

D.

Electuarium ad Hæmoptoen

R. Pulv. nitri depurat. Unc. un.
 — bol. armen. Drachm. duas.
 Conserv. rosar. Unc. unam.
 Syrup. alth. q. s. ut f. Electuar.

D.

Elixir antarthriticum

R. Extract. trifol. fibr. Unc. dimid.
 Solv. in Essent. trifol. fibr. Unc. tres
 add.
 Elix. acid. Unc. dim.

M.

Emplastrum resolvens

R. Emplastr. melilot.
 — diachyl. c. Gummi \overline{aa} Libr. un.
 Pulv. camphor. Unc. un.
 M.

Emulsio ammoniacalis

R. Gummi ammoniac. drachm. duas
 solv. in
 Aqv. hyssopi Unc. oct.
 Oxymell. scillitic. Unc. un.
 M.

Emulsio communis

R. Sem. cucumer
 — papaver. alb.
 Amygdalar. dulc. \overline{aa} Unc. un.
 M. fiat c. aqv. commun. Libr. duab. emulsio
 add.
 Sacchar. alb. Unc. un.
 M.

Emulsio camphorata

R. Emuls. commun. unciis octo
 Pulv. camphor. grana duodecim.
 M.

Infusum radicis Salab

R. Radic. salab. drachm. tres
 Macer. in aqv. fontan. Unc. trig. per lenem
 calorem ad massam gelatinosam:
 cui add.
 Syrup. diacodii Unc. tres.
 D.

Jalapium calinum

- R. Aqv. menth. Unc. quatuor
 Succ. citri, Unc. un. & dimid.
 Sal. tartar. Drachm. un.
 Sacchar. alb. Unc. dimid.

M.

Linctus boracinus

- R. Mell. rosar. Unc. duas
 Mucil. femin. cydon. Unciam
 Borac. raffin. Drachmam.

M.

Linctus pectoralis

- R. Oxymell. scillit.
 Syrup. Altheæ
 Mucilag. gummi arab. aa.

M.

Linimentum resolvens

- R. Ungv. neapol.
 Linim. volat. camphor. aa.

M.

Liquor antispasmodicus

- R. Liquor. cornu cerv. succinat.
 —, anodyn. miner. ad part. æquales.

M.

Liquor nervinus

- R. Liquor anodyn. m. H. Unc. dimid.
 in qvo solv.
 Camphor. Scrup. duos.

D.

Mixtura acida mineralis

R. Aqv. menth. Unc. sex
 Spirit. vitriol. Drachm. un.
 Syrup. rub. ideï Unc. dimid.
 M.

Mixtura acida vegetabilis

R. Sal. effent. tartari Drachmam
 Aqv. menthæ Unc. octo
 Sacch. albi. Drachm. duas.
 M.

Mixtura camphorato-acida

R. Camphor. Drachm. dimid.
 Sacchar. alb.
 Mucilag. gi. arab. aa. Drachm. un.
 Trit. in mortario vitr.
 add.
 Acet. calid. Unc. dimid.
 Aqv. flor. sambuc. Unc. sex.
 Syrup. papaver. rhoead. Unc. un.
 M.

Mixtura camphorato-nitrosa

R. Mixt. camph. n. acidæ. Unc. octo.
 Pulv. nitri depur. Drachm. duas.
 M.

Mixtura camphorato laxativa

R. Mixt. camph. n. acid.

Aqv. laxat. Vienn. $\overline{\text{aa.}}$

M.

Mixtura diapnoica

R. Spirit. Minder. Unciam.

Aqv. sambuci. Unc. quatuor

Syrup. diacod. Unciam.

M.

Pilulae anthelminticae

R. Gi asæfoetidæ part. tres.

Extr. aloes aqv. part. unam.

M. f. pil. pond. gr. trium.

D.

Pilulae aperientes cum marte

R. Croc. mart. sulphurat. Unc. duas.

Myrrh. rubr.

Gummi ammoniac.

— galban.

— asæfoetidæ.

Aloes succotrin. $\overline{\text{aa.}}$ Unc. un.

Olei succini drachmas duas

Mercur. dulc.

Sulphur. aurat. antimon. $\overline{\text{aa.}}$ Unc. dimid.

M. f. pilul. pond. gr. duor.

D.

Pilulæ ad hydropicos

- R. Sapon. venet. Drachm. tres.
 Olei juniper.
 Pulv. squill. composit. aa. Drachm. unam.
 Mercur. dulc.
 Kerm. mineral. aa. Drachm. dimid.

M. Fiant. pilul. pond. gr. duorum.

D.

Pilulæ pectorales

- R. Extract. con. macul.
 Gummi ammoniac. deparat.
 Flor. sulphur. ad partes æquales.

M. f. Pilul. pond. gr. trium.

D.

Pilulæ pectorales cum Kerm. miner.

- R. Massæ pilul. pector. drachm. sex
 Kerm. mineral. gr. duodecim

M. f. pilul. pond. gr. trium.

D.

Pilulæ resolventes

- R. Gummi ammoniac. in aceto scillit. solut.
 & inspissat.

Sapon venet.

Extract. con. macul. ad part. æqual.

M. f. pilul. pond. gr. trium.

D.

Pilulæ resolventes cum aloë

- R. Massæ pilul. resolv. partes sex

Extract. aloës aqvof. part. unam

M. f. pilul. pond. gr. trium.

D.

Pilulæ resolventes cum rheo

R. Mass. pilul. resolv. partes lex

Pulv. radic. rhei part. unam

M. f. pilul. pond. gr. trium.

D.

Pulvis antemeticus

R. Crem. tartari Unc. dimid.

Magn. albæ

Pulv. sacch. alb. $\frac{aa.}{aa.}$ Drachm. duas.

M.

Pulvis anticolicus

R. Pulv. folior. fenn.

— Nitr. depurat. ad part. æqual.

M.

Pulv. antispasticus

R. Pulv. refriger. Unc. unam

— rad. valer. sylv. Unc. dimid.

Moschi orient gr. quatuor.

M.

Pulvis digestivus cum rheo

R. Cremor. tart. Unc. dimid.

Pulv. nitr. depurat. Drachm. duas

— radic. Rhei. optim. Drachm. unam.

M.

Pulvis digestivus sine rheo

R. Cremor. tart. part. duas

Pulv. nitr. depurat. part. un.

M.

Pulvis digestivus ad quartanas

- R. Cremor. tart. Unc. un.
 Sal. ammoniac. Unc. dimid.
 Pulv. radic. rhei Drachm. duas.

M.

Pulvis eccoproticus

- R. Cremor. tart. part. duas
 Pulv. radic. rhei part. un.

M.

Pulvis eccoprotico-tonicus

- R. Pulv. cortic. chinæ reg. opt. part. duas
 — radic. rhei part. un.

M.

Pulvis emeticus fortis

- R. Tart. emetic. gr. duo
 Pulv. radic. ipecacoanhæ
 Sacchar alb. $\overline{\text{aa.}}$ Scrup. un.

M.

Pulvis expectorans

- R. Pulv. kerm. mineral. gr. un.
 — sacchar. alb. Scrup. un.

M.

Pulvis pectoralis antispasmodicus

- R. Pulv. opii puri
 — rad. ipecacoanhæ $\overline{\text{aa.}}$ gr. tria
 — amyli. Drachm. duas
 — sacch. alb. Unc. dimid.

M.

Pulvis febrifugus ad quartanas

R. Pulv. cortic. chinæ reg. opt. Unc. un.
Sal. ammoniac. Drachm. duas
Pulv. radic. rhei, Drachm. unam.

M.

Pulvis flor. zinci

R. Pulv. flor. zinci gr. duo
— magn. albi gr. quinque
— sacch. albi Scrup. unum.

M.

Pulvis pectoralis resolvens

R. Pulv. radic. ireos florent.
— — ari
flor. sulphur. ad partes æquales.

M.

Pulvis pro suffitu

R. Rassur. succin.
Bacc. juniper.
Folior sabin.
Gummi mastich. aa.

M.

Serum lactis aluminosum

R. Lact. vaccin. Libr. duas
ebull. add.
Alum. crudi Drachmam unam et dimid.
Serum col.

D.

Solutio emetica

R. Tart. emet. gr. tria

f. in

Aqv. font. Unc. duas.

D.

Solutio Gummi Guajaci aquosa

R. Gummi Guajac. Drachm. tres

— Arabici Drachm. un.

Aqv. destillat. Menth. Unc. sex

Terendo fiat solutio.

D.

Solutio mannato-oleosa

R. Mannæ calabrin. Unc. duas

Sal anglican. Unc. dimid.

M. solv. in Aqv. fervid. Unc. qvinq.
add.

Ol. olivar. alb. Unc. un. & dimid.

D.

Solutio salis anglicani

R. Sal. anglicani. Unc. duas

solv. in

Aqv. menth. Unc. octo.

D.

Solutio tartari tartarifati

R. Pulv. tart. tartarif. Unc. un.

Aqv. simpl. Unc. duas.

M.

Species pro balneo vaporis

R. Herb. absynth.

— serpill.

Flor. arnicæ

— sambuc.

— melilot. ad part. æquales.

M.

Species stomachicæ externæ

R. Herb. menth.

— absinth.

Flor. chamomill.

Semin. cumin. ad part. æquales.

M.

Thea amara

R. Herb. trif. fibr.

Bacc. junip.

Fol. fennæ $\overline{\text{aa.}}$

M.

Thea carminativa

R. Herb. menthæ pip. Unc duas

Flor. chamom. rom. Unciam

Sem. foenic. Drachm. tres.

M.

Thea arnicæ

R. Flor. arnicæ Unc. un.

— lavendul.

Semin. foenicul. $\overline{\text{aa.}}$ Drachm. duas.

M.

Thea demulcens

R. Herb. plant. aqv. c. Unc. duas
 Rad. altheæ. Unc. unam
 Sem. foeniculi. Drachm. duas.
 M.

Thea juniperina

R. Bacc. juniper. contus. Unc. un. & dimid.
 Semin. anis. Drachm. un.
 D.

Thea pectoralis

R. Flor. sambuc.
 — verbasci $\overline{\text{aa.}}$ Libr. un.
 Radic. Liqvir. Libr. dimid.
 Semin. foenicul. Unc. duas.
 M.

Thea sambuci

R. Flor. sambuc. Libr. un.
 Semin. anis. Unc. un.
 M.

Tinctura antasthmatica

R. Eff. asæfoet.
 Eff. digit. purp.
 Liqv. nerv $\overline{\text{aa.}}$
 M.

Tinctura aperiens

R. Animæ rhei
 Sol. tart. tartaris $\overline{\text{aa.}}$
 M.

Tinctura aperiens amara

R. Extr. gentianæ Drachmam dimid.
solv. in
Tinct. aperient. Uncia
D.

Tinctura antirachitica

R. Extr. gentian. rubr. drachm. dimidiam
solv. in
Animæ rhei Uncia
adde
Olei tartari p. d. drach. duas
M. D.

Ungventum ad scabiem piceum

R. Picis liquid. Part. duas
Butyri saliti
Ciner. clavell. $\overline{aa.}$ Part. unam
M.

Ungventum ad scabiem cum helleboro

R. Sulph. sublimati Unc. qvat.
Pulv. hellebori alb. Unciam
Sapon. moll. Unc. qvat.
Axung. porc. Unc. octo.
M. f. Ungv.

D.

Ungventum sinapinum

R. Pulv. sem. sinap. angl.
Aceti vini qv. f. ut f. Ungv.
D.

Ungventum terebinthinatum

R. Terebinthinæ venet.
 Ceræ flavæ $\overline{\text{aa.}}$ Drachm. tres
 liqves. adde
 Olei terebinth. Unc. dimid.
 M.

Vinum roborans

R. Limatur. mart. f. rubig.
 Pulv. cortic. chinæ reg. opt.
 — radic. calam. aromat. $\overline{\text{aa.}}$ Unc. unam
 Vini alb. Gallic. Mensur. duas
 Stent in digestion. per duos dies. Colatur.
 D.

Not. Quæ cæteræ passim occurrunt formulæ, in
 Pharmacopœa danica inveniuntur.

E R R A T A.

Pag. 117	Lin. 4	effica fervari . . .	1.	efficax fervari.
- 118	- 8	Prætera	-	Præter
- -	- -	humans	-	humanas.
- -	- 14	tale	-	ætate.
- -	- 17	profererumpunt . . .	-	prorumpunt.
- -	- 23	port	-	post.
- 129	- 6	specunen	-	speciem.
pluribus locis.		Schirrus	-	Scirrhus.
		Aphthæ	-	Aphthæ.
		Ophthalmia	-	Ophthalmia.
Pag. 168	Lin. 15	aures	-	auris.
- 252	- 16	ascitis	-	ascites.

MANCHESTER MEDICAL SOCIETY.
DUPLICATE SOLD.

